

《大般若經和現觀莊嚴論合本》

林崇安編

內觀教育基金會,2009

說明：此處的《大般若經》是由《大般若波羅蜜多經》〈第二分〉的前後部分和整個〈第五分〉所合成，經文中配上《現觀莊嚴論》的頌文並標上一千多個細目，便於經論對讀，並掌握完整的八事七十義的要義。凡省略的經文段落以（…）標示。

第二分般若經（401-408 卷）

大般若波羅蜜多經卷第四百一

緣起品第一

- (01) 如是我聞：一時，薄伽梵住王舍城鷲峰山中，與大苾芻眾五千人俱，皆阿羅漢，諸漏已盡，無復煩惱，得真自在，心善解脫，慧善解脫，如調慧馬，亦如大龍，已作所作，已辦所辦，棄諸重擔，逮得己利，盡諸有結，正知解脫，至心自在，第一究竟，除阿難陀獨居學地，得預流果，具壽善現而為上首。
- (02) 復有五百苾芻尼眾，皆阿羅漢，尊者持譽而為上首。
- (03) 復有無量鄔波索迦，鄔波斯迦，皆已見諦。
- (04) 復有無量無數菩薩摩訶薩眾，1.一切皆得諸陀羅尼及三摩地，2.常居空住，行無相境，無分別願恒現在前，3.於諸法性具平等忍，4.得無礙辯，5.不退神通，6.言行清高，7.翹勤匪懈，8.演暢正法，無所希求，9.應理稱機，10.離諸矯誑，11.於深法忍，到究竟趣，12.斷諸怖畏，13.降伏眾魔，14.滅一切惑，摧諸業障，15.智慧辯才，善巧具足，16.已無數劫大誓莊嚴，17.含笑先言，18.舒顏和視，19.讚頌美妙，20.辯說無窮，21.威德尊嚴，22.處眾無畏，氣調閑雅，進趣合儀，23.巧演如流，多劫無盡，24.善觀諸法皆同幻事、陽焰、夢境、水月、響聲，亦如空花、鏡像、光影，又等變化及尋香城，知皆無實，唯現似有，25.

心不下劣，無畏泰然，一切法門，皆能悟入，有情勝解心行所趣，26.通達無礙而拔濟之，27.成最上忍，28.善知實性，29.攝受大願，無邊佛土，30.普於十方無數諸佛等持正念常能現前，31.為度有情，歷事諸佛，勸請久住，轉正法輪，32.滅諸隨眠、見趣、纏垢，33.遊戲無量百千等持，引發無邊殊勝善法。

- (05) 是諸菩薩摩訶薩眾具如是等無量功德，其名曰賢護菩薩、寶性菩薩、導師菩薩、仁授菩薩、星授菩薩、常授菩薩、德藏菩薩、上慧菩薩、寶藏菩薩、勝慧菩薩、增長慧菩薩、不虛見菩薩、善發趣菩薩、善勇猛菩薩、常精進菩薩、常加行菩薩、不捨軛菩薩、日藏菩薩、無比慧菩薩、觀自在菩薩、得大勢菩薩、妙吉祥菩薩、金剛慧菩薩、寶印手菩薩、常舉手菩薩、慈氏菩薩，如是等無量百千俱胝那庾多菩薩摩訶薩皆法王子，堪紹尊位而為上首。
- (06) 爾時，世尊於師子座上自敷尼師壇結跏趺坐，端身正願，住對面念，入等持王妙三摩地，諸三摩地皆攝入此三摩地中，是所流故。爾時，世尊正知正念，從等持王安庠而起，以淨天眼觀察十方殑伽沙等諸佛世界，舉身怡悅，從兩足下千輻輪相各放六十百千俱胝那庾多光，從足十指、兩趺、兩跟、四踝、兩脛、兩踠、兩膝、兩陞、兩股、腰脅、腹背、臍中、心上、胸臆德字、兩乳、兩腋、兩肩、兩膊、兩肘、兩臂、兩腕、兩手、兩掌、十指、項脰、頤頷、頰額、頭頂、兩眉、兩眼、兩耳、兩鼻、口四牙、四十齒、眉間毫相，一一身分各放六十百千俱胝那庾多光。此一一光各照三千大千世界，從此展轉遍照十方殑伽沙等諸佛世界，其中有情遇斯光者，必得無上正等菩提。
- (07) 爾時，世尊舉身毛孔皆悉熙怡，各出六十百千俱胝那庾多光，是一一光各照三千大千世界，從此展轉遍照十方殑伽沙等諸佛世界，其中有情遇斯光者，必得無上正等菩提。爾時，世尊演身常光照此三千大千世界，從此展轉遍照十方殑伽沙等諸佛世界，其中有情遇斯光者，必得無上正等菩提。
- (08) 爾時，世尊從其面門出廣長舌相，遍覆三千大千世界，熙怡微笑。復從舌相流出無量百千俱胝那庾多光，其光雜色，從此雜色一一光中現寶蓮花，其花千葉，皆真金色眾寶莊嚴。如是光、花遍三千界，從此展轉周流十方殑伽沙等諸佛世界。諸花臺中

皆有化佛結跏趺坐，演妙法音，一一法音皆說六種波羅蜜多相應之法，有情聞者，必得無上正等菩提。

- (09) 爾時，世尊不起于座，復入師子遊戲等持，現神通力，令此三千大千世界六種變動，謂：動、極動、等極動，踊、極踊、等極踊，震、極震、等極震，擊、極擊、等極擊，吼、極吼、等極吼，爆、極爆、等極爆。又令此界東踊西沒、西踊東沒、南踊北沒、北踊南沒、中踊邊沒、邊踊中沒。其地清淨，光澤細軟，生諸有情利益安樂。

時此三千大千世界所有地獄、傍生、鬼界及餘無暇險惡趣坑一切有情，皆離苦難，從此捨命，得生人中及六欲天，皆憶宿住，歡喜踊躍，同詣佛所，以殷淨心頂禮佛足。

從此展轉周遍十方殑伽沙等諸佛世界，以佛神力六種變動。

時彼世界諸惡趣等一切有情皆離苦難，從彼捨命，得生人中及六欲天，皆憶宿住，歡喜踊躍，各於本界同詣佛所，頂禮佛足。

時此三千大千世界及餘十方殑伽沙等世界有情，盲者能視，聾者能聽，啞者能言，狂者得念，亂者得定，貧者得富，露者得衣，飢者得食，渴者得飲，病者得除愈，醜者得端嚴，形殘者得具足，根缺者得圓滿，迷悶者得醒悟，疲頓者得安適。

時諸有情等心相向，如父如母，如兄如弟，如姊如妹，如友如親，離邪語業命，修正語業命，離十惡業道，修十善業道，離惡尋思，修善尋思，離非梵行，修正梵行，好淨棄穢，樂靜捨誼，身意泰然，忽生妙樂，如修行者入第三定。復有勝慧歎爾現前，咸作是思：布施、調伏、安忍、勇進、寂靜、諦觀，遠離放逸，修行梵行，於諸有情慈悲喜捨，不相擾惱，豈不善哉！

- (10) 爾時，世尊在師子座，光明殊特，威德巍巍，映蔽三千大千世界并餘十方殑伽沙等諸佛國土，蘇迷盧山、輪圍山等，及餘一切龍神天宮乃至淨居，皆悉不現。如秋滿月，暉映眾星，如夏日輪，光奪諸色，如四大寶妙高山王，掩蔽諸山，喪其光彩。佛以神力現本色身，令此三千大千世界一切有情皆悉睹見。時此三千大千世界無量無數淨居諸天，下至欲界四大王眾天及餘一切人非人等，皆見如來處師子座，威光顯曜如大金山，歡喜踊躍，歎未曾有，各持種種上妙花鬘、塗散等香、衣服、瓔珞、寶幢、幡蓋、伎樂、諸珍及無量種天青蓮花、天赤蓮花、天白蓮花、天香蓮花、天黃蓮花、天紅蓮花、天金錢樹花及香葉花，

并餘無量水陸生花，持詣佛所，奉散佛上。以佛神力，諸花鬘等旋轉上踊，合成花臺，量等三千大千世界，垂天花蓋、寶鐸、珠幡，綺飾紛綸，甚可愛樂。時此佛土微妙莊嚴，猶如西方極樂世界，佛光暉映三千大千物類，虛空皆同金色，十方各等殑伽河沙諸佛世界亦復如是。時此三千大千佛土，以佛神力，一切天人各各見佛正坐其前，咸謂如來獨為說法。

- (11) 爾時，世尊不起于座，熙怡微笑，從其面門放大光明，遍照三千大千佛土并餘十方殑伽沙等諸佛世界。時此三千大千佛土一切有情，尋佛光明，普見十方殑伽沙等諸佛世界一切如來應正等覺，聲聞、菩薩眾會圍繞，及餘一切有情無情品類差別。時彼十方殑伽沙等諸佛世界一切有情，尋佛光明，亦見此土釋迦牟尼如來應正等覺，聲聞、菩薩眾會圍繞，及餘一切有情無情品類差別。
- (12) 爾時，東方盡殑伽沙等世界，最後世界名曰多寶，佛號寶性，現為菩薩說大般若波羅蜜多，彼有菩薩名曰普光，…爾時，南方盡殑伽沙等世界，最後世界名離一切憂，佛號無憂德，現為菩薩說大般若波羅蜜多，彼有菩薩名曰離憂，…爾時，西方盡殑伽沙等世界，最後世界名近寂靜，佛號寶焰，現為菩薩說大般若波羅蜜多，彼有菩薩名曰行慧，…爾時，北方盡殑伽沙等世界，最後世界名曰最勝，佛號勝帝，現為菩薩說大般若波羅蜜多，彼有菩薩名曰勝授，…爾時，東北方盡殑伽沙等世界，最後世界名定莊嚴，佛號定象勝德，現為菩薩說大般若波羅蜜多，彼有菩薩名離塵勇猛，…爾時，東南方盡殑伽沙等世界，最後世界名妙覺莊嚴甚可愛樂，佛號蓮花勝德，現為菩薩說大般若波羅蜜多，彼有菩薩名蓮花手，…爾時，西南方盡殑伽沙等世界，最後世界名離塵聚，佛號日輪遍照勝德，現為菩薩說大般若波羅蜜多，彼有菩薩名曰光明，…爾時，西北方盡殑伽沙等世界，最後世界名真自在，佛號一寶蓋勝，現為菩薩說大般若波羅蜜多，彼有菩薩名曰寶勝，…爾時，下方盡殑伽沙等世界，最後世界名曰蓮花，佛號蓮花德，現為菩薩說大般若波羅蜜多，彼有菩薩名蓮花勝，…爾時，上方盡殑伽沙等世界，最後世界名曰歡喜，佛號喜德，現為菩薩說大般若波羅蜜多，彼有菩薩名曰喜授，見此大光、大地變動及佛身相，心懷猶豫，前詣佛所，白言：「世尊！何因何緣而有此瑞？」

- (13) 時喜德佛告喜授言：「從此下方盡殞伽沙等世界，最後世界名曰堪忍，佛號釋迦牟尼，將為菩薩說大般若波羅蜜多，彼佛神力，故現斯瑞。」
- (14) 喜授聞已，歡喜踊躍，白言：「世尊！我今請往堪忍世界觀禮供養釋迦牟尼佛及菩薩眾，唯願聽許！」
- (15) 時喜德佛告喜授言：「善哉！善哉！隨汝意往。」即以千莖金色蓮花，其花千葉，眾寶莊嚴，授與喜授而誨之曰：「汝持此花至釋迦牟尼佛所，如我詞曰：『喜德如來致問無量：少病少惱、起居輕利、氣力調和、安樂住不？世事可忍不？眾生易度不？持此蓮花以寄世尊而為佛事。』汝至彼界，應住正知，勿以慢心觀彼佛土及諸大眾而自毀傷。所以者何？彼諸菩薩威德難及，悲願熏心，以大因緣而生彼土。」
- (16) 喜授菩薩受花奉敕，與無量百千俱胝那庾多菩薩及無數百千童男童女，頂禮佛足，右繞奉辭，各持無量上妙供具發引而來，所經上方諸佛世界，一一佛所，供養恭敬，尊重讚歎，無空過者。到此佛所，頂禮雙足，繞百千匝，卻住一面。喜授菩薩前白佛言：「世尊！從此上方盡殞伽沙等世界，最後世界名曰歡喜，佛號喜德，致問世尊無量：少病少惱、起居輕利、氣力調和、安樂住不？世事可忍不？眾生易度不？持此千莖金色蓮花，以寄世尊而為佛事。」
- (17) 時釋迦牟尼佛受此蓮華，還散上方諸佛世界，佛神力故，令此蓮花遍諸佛土，諸花臺中皆有化佛結跏趺坐，為諸菩薩說大般若波羅蜜多，有情聞者，必得無上正等菩提。
- (18) 是時，喜授及諸眷屬見此事已，歡喜踊躍，歎未曾有，各隨善根、供具多少，供養恭敬，尊重讚歎佛菩薩已，退坐一面。餘上方界皆亦如是。
- (19) 爾時，於此三千大千堪忍世界，眾寶充滿，諸妙香花遍布其地，寶幢、幡蓋處處行列，花樹、果樹、香樹、鬘樹、衣樹、寶樹、諸雜飾樹，周遍莊嚴，甚可愛樂，如眾蓮花世界普花如來淨土，曼殊室利童子、善住慧菩薩及餘無量大威德菩薩摩訶薩本所居土。

大般若波羅蜜多經卷第四百二

歡喜品第二

【第一事】一切相智

【第 1 義】發心 (I-1)

發心為利他，求正等菩提，彼彼如《經》中，略廣門宣說。
如 A1 地 A2 金 A3 月 A4 火，A5 藏 A6 寶源 A7 大海，
A8 金剛 A9 山 A10 藥 A11 友，A12 如意寶 A13 日 A14 歌。
A15 王 A16 庫及 A17 大路，A18 車乘與 A19 泉水，
A20 雅聲 A21 河流 A22 雲，分二十二種。

◎發心所緣之菩提彼，及所為之利他彼，廣、中、略三部《般若》皆就略、廣二門宣說，如《二萬頌般若經》所說，餘二《經》亦說故。如是發心，依譬喻、助伴相同門中，分為二十二種，謂：

A1 與助伴欲相應之發心，是一切白法之所依處，猶如大地。

A2 意樂相應者，乃至菩提而不改變，猶如純金。

A3 增上意樂相應者，能增長四念住等一切善法，猶如初月。

A4 與修三智隨順加行相應者，能燒障礙三智之柴，猶如猛火。

A5 布施相應者，能滿足眾生願，猶如寶藏。

A6 持戒相應者，是一切功德之生源，猶如寶源（寶礦）。

A7 安忍相應者，雖遇逆緣不能擾亂，猶如大海。

A8 精進相應者，他不能破壞，猶如金剛。

A9 靜慮相應者，散亂所不能動，猶如山王。

A10 般若相應者，能除二障重病，猶如良藥。

A11 方便相應者，不捨利他，猶如善友（善知識）。

A12 大願相應者，如願成辦，猶如如意寶珠。

A13 力相應者，能成熟所化，猶如日輪。

A14 妙智相應者，以愛語調伏所化，猶如歌音。

A15 神通相應者，勢力無礙，猶如國王。

A16 二資糧相應者，具足無量福慧資糧，猶如倉庫。

A17 三十七菩提分相應者，三世諸佛皆行此道，猶如大路。

A18 悲及毗鉢舍那相應者，不墮生死涅槃，猶如車乘。

A19 總持辯才相應者，能持已聞未聞諸法，猶如泉水（或池沼）。

A20 四法嚩陀南相應者，發揚眾生解脫生死之妙音，猶如雅音。

A21 唯一共道相應者，饒益眾生等無有異，猶如河流。

A22 法身相應之發心，能示現住睹史多天及從彼沒等，猶如大雲。

◎如是二十二種發心之界限：

01-03 初三發心，如其次第，是大乘資糧道下、中、上品所攝。

04 加行相應者一種，是大乘加行道所攝。

05-14 其後十種發心，即極喜等十地所攝。

15-19 再次，神通相應等五種發心，三清淨地所攝。

20-22 最後三種發心，佛地所攝。

◎《大乘經莊嚴論》云：

發心於諸地，勝解意樂淨，許餘為異熟，後永斷諸障。

01-04 此說資糧、加行位者，名勝解發心。

05-11 七未清淨地者，名增上意樂清淨發心。

12-19 三清淨地者，名異熟發心。

20-22 佛地者，名障斷發心。

○又說：如地之發心為下品資糧道所攝者，是說最下界限，非說以上便無彼發心。如金、如月等發心界限，准此應知。

(01) A1 爾時，世尊知諸世界諸有緣眾一切來集，諸天魔梵、若諸沙門、若婆羅門、若健達縛、若阿素洛、若諸龍神、人非人等、若諸菩薩摩訶薩眾，住最後身，紹尊位者，皆來集會，便告具壽舍利子言：「若菩薩摩訶薩 1 欲於一切法，等覺一切相，當學般若波羅蜜多。」(地)

(02) 時舍利子歡喜踊躍，即從座起，頂禮雙足，偏覆左肩，右膝著地，合掌恭敬而白佛言：「世尊！云何菩薩摩訶薩欲於一切法，等覺一切相，當學般若波羅蜜多？」

(03) 佛告具壽舍利子言：「諸菩薩摩訶薩應以無住而為方便，安住般若波羅蜜多，所住能住不可得故；

○應以無捨而為方便，圓滿布施波羅蜜多，施者、受者及所施物不可得故；

○應以無護而為方便，圓滿淨戒波羅蜜多，犯無犯相不可得故；

○應以無取而為方便，圓滿安忍波羅蜜多，動不動相不可得故；

○應以無勤而為方便，圓滿精進波羅蜜多，身心勤怠不可得故；

○應以無思而為方便，圓滿靜慮波羅蜜多，有味無味不可得故；

- ◎A2 應以無著而為方便，圓滿般若波羅蜜多，諸法性相不可得故。（金）
- ◎A3 復次，舍利子！諸菩薩摩訶薩安住般若波羅蜜多，以無所得而為方便，應修習四念住、四正斷、四神足、五根、五力、七等覺支、八聖道支，是三十七菩提分法不可得故；（月）
- 以無所得而為方便，應修習空三摩地、無相三摩地、無願三摩地，是三等持不可得故；
- 以無所得而為方便，應修習四靜慮、四無量、四無色定，靜慮、無量及無色定不可得故；
- 以無所得而為方便，應修習八解脫、八勝處、九次第定、十遍處，解脫、勝處、等至、遍處不可得故；
- 以無所得而為方便，應修習九想，謂膨脹想、膿爛想、異赤想、青瘀想、啄噉想、離散想、骸骨想、焚燒想、滅壞想，如是諸想不可得故；
- 以無所得而為方便，應修習十隨念，謂佛隨念、法隨念、僧隨念、戒隨念、捨隨念、天隨念、入出息隨念、厭隨念、死隨念、身隨念，是諸隨念不可得故；
- 以無所得而為方便，應修習十想，謂無常想、苦想、無我想、不淨想、死想、一切世間不可樂想、厭食想、斷想、離想、滅想，如是諸想不可得故；
- 以無所得而為方便，應修習十一智，謂苦智、集智、滅智、道智、盡智、無生智、法智、類智、世俗智、他心智、如說智，如是諸智不可得故；
- 以無所得而為方便，應修習有尋有伺三摩地、無尋唯伺三摩地、無尋無伺三摩地，三三摩地不可得故；
- 以無所得而為方便，應修習未知當知根、已知根、具知根，三無漏根不可得故；
- 以無所得而為方便，應修習不淨處觀、遍滿處觀、一切智智、奢摩他、毗鉢舍那、四攝事、四勝住、三明、五眼、六神通、六波羅蜜多、七聖財、八大士覺、九有情居智、陀羅尼門、三摩地門、十地、十行、十忍、二十增上意樂、如來十力、四無所畏、四無礙解、十八佛不共法、三十二大士相、八十隨好、無忘失法、恆住捨性、一切智、道相智、一切相智、一切相微

妙智、大慈大悲大喜大捨，及餘無量無邊佛法，如是諸法不可得故。

- 復次，舍利子！若菩薩摩訶薩 2 欲疾證得一切智智，當學般若波羅蜜多；
- 3 欲疾圓滿一切智、道相智、一切相智，當學般若波羅蜜多；
- 4 欲疾圓滿一切有情心行相智、一切相微妙智，當學般若波羅蜜多；
- ◎A4，5 欲拔一切煩惱習氣，當學般若波羅蜜多；（火）
- 6 欲入菩薩正性離生，當學般若波羅蜜多；
- 7 欲超聲聞及獨覺地，當學般若波羅蜜多；
- 8 欲住菩薩不退轉地，當學般若波羅蜜多；
- 9 欲得六種殊勝神通，當學般若波羅蜜多；
- 10 欲知一切有情心行所趣差別，當學般若波羅蜜多；
- 11 欲勝一切聲聞、獨覺智慧作用，當學般若波羅蜜多；
- 12 欲得一切陀羅尼門、三摩地門，當學般若波羅蜜多；
- ◎A5，13 欲以一念隨喜之心，超過一切聲聞、獨覺所有布施，當學般若波羅蜜多；（藏）
- ◎A6，14 欲以一念隨喜之心，超過一切聲聞、獨覺所有淨戒，當學般若波羅蜜多；（寶源）（缺 A7 安忍：大海。A8 精進：金剛）
- ◎A9,A10，15 欲以一念隨喜之心，超過一切聲聞、獨覺定、慧、解脫、解脫智見，當學般若波羅蜜多；（山、藥）
- 16 欲以一念隨喜之心，超過一切聲聞、獨覺靜慮、解脫、等持、等至及餘善法，當學般若波羅蜜多；
- 17 欲以一念所修善法，超過一切異生、聲聞、獨覺善法，當學般若波羅蜜多；
- ◎A11，18 欲行少分布施、淨戒、安忍、精進、靜慮、般若，為諸有情方便善巧，迴向無上正等菩提，便得無量無邊功德，當學般若波羅蜜多。（友）
- 復次，舍利子！若菩薩摩訶薩 19 欲令所行布施、淨戒、安忍、精進、靜慮、般若波羅蜜多，離諸障礙，速得圓滿，當學般若波羅蜜多；
- 20 欲得生生常見諸佛，恒聞正法，得佛覺悟，蒙佛憶念，教誡教授，當學般若波羅蜜多；

- 21 欲得佛身，具三十二大丈夫相，八十隨好圓滿莊嚴，當學般若波羅蜜多；
- 22 欲得生生常憶宿住，終不忘失大菩提心，遠離惡友，親近善友，恒修菩薩摩訶薩行，當學般若波羅蜜多；
- 23 欲得生生具大威力，摧眾魔怨，伏諸外道，當學般若波羅蜜多；
- 24 欲得生生遠離一切煩惱業障，通達諸法，心無罣礙，當學般若波羅蜜多。
- 25 欲得生生善心、善願、善行相續，常無懈廢，當學般若波羅蜜多；
- 26 欲生佛家，入童真地，常不遠離諸佛菩薩，當學般若波羅蜜多；
- ◎A12，27 欲得生生具諸相好，端嚴如佛，一切有情見者歡喜，發起無上正等覺心，速能成辦佛地功德，當學般若波羅蜜多；
(如意寶)
- 28 欲以種種勝善根力，隨意能引上妙供具，供養恭敬，尊重讚歎一切如來應正等覺，令諸善根速得圓滿，當學般若波羅蜜多；
- ◎A13，29 欲滿一切有情所求飲食、衣服、床榻、臥具、病緣醫藥、種種花、香、燈明、車乘、園林、舍宅、財穀、珍寶嚴具、伎樂及餘種種上妙樂具，當學般若波羅蜜多。(日)
- 復次，舍利子！若菩薩摩訶薩 30 欲善安立盡虛空界、法界、世界一切有情，皆令安住布施、淨戒、安忍、精進、靜慮、般若波羅蜜多，當學般若波羅蜜多；
- 31 欲得發起一念善心所獲功德，乃至無上正等菩提亦不窮盡，當學般若波羅蜜多；
- 32 欲得十方諸佛世界一切如來應正等覺及諸菩薩共所稱讚，當學般若波羅蜜多；
- 33 欲一發心即能遍至十方各如殞伽沙界供養諸佛，利樂有情，當學般若波羅蜜多；
- 34 欲一發聲即能遍滿十方各如殞伽沙界讚歎諸佛，教誨有情，當學般若波羅蜜多；

- 35 欲一念頃安立十方殑伽沙等諸佛世界一切有情，皆令習學十善業道，受三歸依，護持禁戒，修四靜慮及四無量、四無色定，獲五神通，當學般若波羅蜜多；
- 36 欲一念頃安立十方殑伽沙等諸佛世界一切有情，令住大乘，修菩薩行，不毀餘乘，當學般若波羅蜜多；
- 37 欲紹佛種，令不斷絕，護菩薩家，令不退轉，嚴淨佛土，令速成辦，當學般若波羅蜜多。
- ◎A14 復次，舍利子！若菩薩摩訶薩 38 欲安住內空、外空、內外空、空空、大空、勝義空、有為空、無為空、畢竟空、無際空、散空、無變異空、本性空、自相空、共相空、一切法空、不可得空、無性空、自性空、無性自性空，當學般若波羅蜜多。
- （歌）
- 若菩薩摩訶薩 39 欲安住一切法真如、法界、法性、不虛妄性、不變異性、平等性、離生性、法定、法住、實際、虛空界、不思議界，當學般若波羅蜜多。
- 若菩薩摩訶薩 40 欲覺知一切法盡所有性、如所有性無顛倒，無分別，當學般若波羅蜜多。
- 若菩薩摩訶薩 41 欲覺知一切法因緣、等無間緣、所緣緣、增上緣性無所有不可得，當學般若波羅蜜多。
- 若菩薩摩訶薩 42 欲覺知一切法如幻、如夢、如響、如像、如光影、如陽燄、如空花、如尋香城、如變化事，唯心所現，性相皆空，當學般若波羅蜜多。
- 若菩薩摩訶薩 43 欲知十方殑伽沙等三千大千世界大地虛空、諸山大海、江河池沼、澗谷陂湖、地水火風、諸極微量，當學般若波羅蜜多。
- ◎A15 若菩薩摩訶薩 44 欲析一毛以為百分，取一分毛盡舉三千大千世界大海江河、池沼澗谷、陂湖中水，棄置他方無邊世界，而不損害其中有情，當學般若波羅蜜多。（王）
- 若菩薩摩訶薩見火劫起，遍燒三千大千世界天地洞然，45 欲以一氣吹令頓滅，當學般若波羅蜜多。
- 若菩薩摩訶薩見風劫起，三千世界所依風輪飄擊上涌，將吹三千大千世界蘇迷盧山、輪圍山等諸所有物，碎如芻桂，46 欲以一指障彼風力，令息不起，當學般若波羅蜜多。

- 若菩薩摩訶薩 47 欲於三千大千世界一結跏坐充滿虛空，當學般若波羅蜜多。
- 若菩薩摩訶薩 48 欲以一毛翎取三千大千世界妙高山王、輪圍山等諸所有物，擲過他方無量無數無邊世界，而不損害其中有情，當學般若波羅蜜多。
- 若菩薩摩訶薩 49 欲以一食一花、一香一幢蓋等，供養恭敬，尊重讚歎十方各如殞伽沙界一切如來應正等覺及弟子眾，無不充足，當學般若波羅蜜多。
- ◎A16 若菩薩摩訶薩 50 欲等安立十方各如殞伽沙界諸有情類，令住戒蘊、定蘊、慧蘊、解脫蘊、解脫智見蘊，或住預流、一來、不還、阿羅漢果、獨覺菩提，乃至或令人無餘依般涅槃界，當學般若波羅蜜多。（庫）
- ◎復次，舍利子！若菩薩摩訶薩修行般若波羅蜜多，能如實知如是布施得大果報，謂如實知如是布施得生剎帝利大族、或生婆羅門大族、或生長者大族、或生居士大族；如是布施得生四大王眾天、或生三十三天、或生夜摩天、或生睹史多天、或生樂變化天、或生他化自在天；依此布施得初靜慮、或第二靜慮、或第三靜慮、或第四靜慮，依此布施得空無邊處定、或識無邊處定、或無所有處定、或非想非非想處定，依此布施起四念住乃至八聖道支，得預流果、或一來果、或不還果、或阿羅漢果、或獨覺菩提，或得無上正等菩提；能如實知如是淨戒、安忍、精進、靜慮、般若得大果報，亦復如是。
- 若菩薩摩訶薩修行般若波羅蜜多，能如實知如是布施方便善巧能滿布施波羅蜜多，如是布施方便善巧能滿淨戒波羅蜜多，如是布施方便善巧能滿安忍波羅蜜多，如是布施方便善巧能滿精進波羅蜜多，如是布施方便善巧能滿靜慮波羅蜜多，如是布施方便善巧能滿般若波羅蜜多；如是淨戒、安忍、精進、靜慮、般若方便善巧皆能圓滿六波羅蜜多。」
- (04) 時舍利子白佛言：「世尊！云何菩薩摩訶薩修行般若波羅蜜多能如實知如是布施方便善巧，能滿布施乃至般若波羅蜜多；如是淨戒乃至般若方便善巧，能滿淨戒乃至靜慮波羅蜜多？」
- (05) 佛言：「舍利子！以無所得為方便故，謂菩薩摩訶薩行布施時，了達一切施者、受者、所施物相不可得故，能滿布施波羅蜜多；○犯無犯相不可得故，能滿淨戒波羅蜜多；

- 動不動相不可得故，能滿安忍波羅蜜多；
- 身心勤怠不可得故，能滿精進波羅蜜多；
- 有亂無亂不可得故，能滿靜慮波羅蜜多；
- 諸法性相不可得故，能滿般若波羅蜜多，是為菩薩摩訶薩行布施時，方便善巧能滿六種波羅蜜多；如是菩薩摩訶薩行淨戒時，方便善巧能滿六種波羅蜜多，乃至行般若時，方便善巧能滿六種波羅蜜多。
- ◎A17 復次，舍利子！若菩薩摩訶薩 51 欲得過去、未來、現在諸佛功德，當學般若波羅蜜多。（大路）
- 若菩薩摩訶薩 52 欲到一切有為無為法之彼岸，當學般若波羅蜜多。
- 若菩薩摩訶薩 53 欲達過去、未來、現在諸法真如、法界、法性、無生、實際，當學般若波羅蜜多。
- 若菩薩摩訶薩 54 欲窮過去、未來、現在生不生際，當學般若波羅蜜多。
- ◎A18 若菩薩摩訶薩 55 欲與一切聲聞獨覺而為導首，當學般若波羅蜜多。（車乘）
- 若菩薩摩訶薩 56 欲與一切如來為親侍者，當學般若波羅蜜多。
- 若菩薩摩訶薩 57 欲與一切如來為內眷屬，當學般若波羅蜜多。
- 若菩薩摩訶薩 58 欲得大眷屬，當學般若波羅蜜多。
- 若菩薩摩訶薩 59 欲得菩薩常為眷屬，當學般若波羅蜜多。
- 若菩薩摩訶薩 60 欲消一切施主供養，當學般若波羅蜜多。
- 若菩薩摩訶薩 61 欲摧伏慳貪心，不起犯戒心，除去恚怒心，棄捨懈怠心，靜息散亂心，遠離惡慧心，當學般若波羅蜜多。
- 若菩薩摩訶薩 62 欲安立一切有情於施性福業事、戒性福業事、修性福業事、供侍福業事、有依福業事，當學般若波羅蜜多。
- 若菩薩摩訶薩 63 欲得五眼，所謂肉眼、天眼、慧眼、法眼、佛眼，當學般若波羅蜜多。
- 若菩薩摩訶薩 64 欲以天眼盡見十方殑伽沙等世界諸佛，當學般若波羅蜜多。
- 若菩薩摩訶薩 65 欲以天耳盡聞十方殑伽沙等世界諸佛所說法要，當學般若波羅蜜多。

- 若菩薩摩訶薩 66 欲如實知十方各如殑伽沙界一切諸佛心、心所法，當學般若波羅蜜多。
- 若菩薩摩訶薩 67 欲得普聞十方世界諸佛說法，乃至無上正等菩提而不斷絕，當學般若波羅蜜多。
- 若菩薩摩訶薩 68 欲見過去、未來、現在十方一切諸佛國土，當學般若波羅蜜多。
- ◎A19 若菩薩摩訶薩 69 欲於過去、未來、現在十方諸佛所說契經、應頌、授記、諷頌、自說、因緣、本事、本生、方廣、希法、譬喻、論議，諸聲聞等所未曾聞，皆能受持，究竟通利，當學般若波羅蜜多。（泉水）
- 若菩薩摩訶薩 70 欲於過去、未來、現在十方諸佛所說法門，既自受持，究竟通利，復能為他如實廣說，當學般若波羅蜜多。
- 若菩薩摩訶薩 71 欲於過去、未來、現在十方諸佛所說法門，自如實行，復能勸他如實修行，當學般若波羅蜜多。
- 若菩薩摩訶薩 72 欲於十方殑伽沙等幽闇世界，或世界中間日月所不照處，為作光明，當學般若波羅蜜多。
- ◎A20 若菩薩摩訶薩 73 欲於十方殑伽沙等無量世界，其中有情成就邪見，不聞佛名、法名、僧名，而能開化，令起正見，聞三寶名，當學般若波羅蜜多。（雅聲）
- ◎A21 若菩薩摩訶薩 74 欲令十方殑伽沙等世界有情，以己威力，盲者能視，聾者能聽，啞者能言，狂者得念，亂者得定，貧者得富，露者得衣，飢者得食，渴者得飲，病者得除愈，醜者得端嚴，形殘者得具足，根缺者得圓滿，迷悶者得醒悟，疲頓者得安泰，一切有情等心相向，如父如母，如兄如弟，如姊如妹，如友如親，當學般若波羅蜜多。（河流）
- 若菩薩摩訶薩 75 欲令十方殑伽沙等世界有情，以己威力，在惡趣者皆生善趣，當學般若波羅蜜多。
- 若菩薩摩訶薩 76 欲令十方殑伽沙等世界有情，以己威力，習惡業者皆修善業，當學般若波羅蜜多。
- 若菩薩摩訶薩 77 欲令十方殑伽沙等世界有情，以己威力，諸犯戒者皆住戒蘊，未得定者皆住定蘊，有惡慧者皆住慧蘊，無解脫者皆住解脫蘊，無解脫智見者皆住解脫智見蘊，未見諦者得預流果、若一來果、若不還果、若阿羅漢果、若獨覺菩提，若得無上正等菩提，當學般若波羅蜜多。

- 若菩薩摩訶薩 78 欲學諸佛殊勝威儀，令諸有情觀之無厭，息一切惡，生一切善，當學般若波羅蜜多。
- ◎復次，舍利子！菩薩摩訶薩修行般若波羅蜜多時，作是思惟：『我何時得如象王視，容止肅然，為眾說法？』79 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我何時得身語意業隨智慧行，皆悉清淨？』80 欲成斯事，當學般若波羅蜜多。
- ◎A22 菩薩摩訶薩修行般若波羅蜜多時，作是思惟：『我何時得足不履地，如四指量，自在而行？』81 欲成斯事，當學般若波羅蜜多。（雲）
- 菩薩摩訶薩修行般若波羅蜜多時，作是思惟：『我何時得無量百千俱胝那庾多四大王眾天乃至色究竟天，供養恭敬，尊重讚歎，導從圍繞，詣菩提樹？』82 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我何時得無量百千俱胝那庾多四大王眾天乃至色究竟天，於菩提樹下，以天衣為座？』83 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我何時得菩提樹下結跏趺坐，以眾妙相所莊嚴手而撫大地，使于地神并諸眷屬俱時踊現？』84 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我何時得坐菩提樹降伏眾魔，證得無上正等菩提？』85 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我何時得成正覺已，行住坐臥，隨地方所，悉為金剛？』86 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我何時得捨國出家，是日即成無上正覺，還於是日轉妙法輪，即令無量無數有情遠塵離垢，生淨法眼，復令無量無數有情永盡諸漏，心慧解脫，亦令無量無數有情於無上菩提得不退轉？』87 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我何時得無上菩提，無量無數聲聞、菩薩為弟子眾，一說法時，令無量無數

- 有情不起于座，得阿羅漢果，復令無量無數有情亦不起于座，於無上菩提得不退轉？』88 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我何時得壽量無盡，無邊光明，相好莊嚴，觀者無厭，雖復行時，千葉蓮花每承其足，而令地上現千輻輪，舉步經行，大地震動，而不擾惱地居有情，欲迴顧時，舉身皆轉，足之所履，盡金剛際，如車輪量，地亦隨轉？』89 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我何時得舉身支節皆放光明，遍照十方無邊世界，隨所照處，為諸有情作大饒益？』90 欲成斯事，當學般若波羅蜜多。
- 菩薩摩訶薩修行般若波羅蜜多時，作是思惟：『我得無上正等覺時，願所居土無有一切貪欲、瞋恚、愚癡等名，其中有情成就妙慧，由斯慧力，亟作是思：布施、調伏、安忍、勇進、寂靜、諦觀，離諸放逸，修行梵行，慈悲喜捨，不惱有情，如餘佛土，豈不善哉？』91 欲滿斯願，當學般若波羅蜜多。
- 菩薩摩訶薩修行般若波羅蜜多時，作是思惟：『我得無上正等覺時，化事既周，般涅槃後，正法無有滅盡之期，常為有情作大利樂。』92 欲滿斯願，當學般若波羅蜜多。
- 菩薩摩訶薩修行般若波羅蜜多時，作是思惟：『我得無上正等覺時，願令十方殑伽沙等世界有情聞我名者，必得無上正等菩提。』93 欲滿斯願，當學般若波羅蜜多。
- ◎舍利子！諸菩薩摩訶薩若欲成就此等無量無邊功德，當學般若波羅蜜多。
- ◎復次，舍利子！若菩薩摩訶薩修行般若波羅蜜多，既能成辦如是功德，爾時，三千大千世界四大天王皆大歡喜，咸作是念：『我等今者，當以四鉢奉此菩薩，如昔天王奉先佛鉢。』
- 是時，三千大千世界三十三天、夜摩天、睹史多天、樂變化天、他化自在天，皆大歡喜，咸作是念：『我等皆當給侍供養如是菩薩，令阿素洛凶黨損減，使諸天眾眷屬增益。』
- 是時，三千大千世界梵眾天、梵輔天、梵會天、大梵天、光天、少光天、無量光天、極光淨天、淨天、少淨天、無量淨天、遍淨天、廣天、少廣天、無量廣天、廣果天、無繁天、無熱天、善現天、善見天、色究竟天歡喜欣慶，咸作是念：『我等當請如是菩薩速證無上正等菩提，轉妙法輪，利樂一切。』

◎舍利子！若菩薩摩訶薩修行般若波羅蜜多，增益六種波羅蜜多時，彼世界諸善男子善女人等，皆大歡喜，咸作是念：『我等當為如是菩薩作父母、兄弟、妻子、眷屬、知識、朋友。』

○時彼世界四大王眾天乃至色究竟天，歡喜慶幸，咸作是念：『我等當設種種方便，令是菩薩離非梵行，從初發心乃至成佛常修梵行。所以者何？若染色欲生於梵天尚能為障，況得無上正等菩提。』是故菩薩斷欲出家修梵行者，能得無上正等菩提，非不斷者。」

(06)時舍利子白佛言：「世尊！諸菩薩摩訶薩為決定有父母、妻子、諸親友耶？」

(07)佛言：「舍利子！或有菩薩具有父母、妻子、眷屬而修菩薩摩訶薩行；或有菩薩摩訶薩無有妻子，從初發心乃至成佛常修梵行，不壞童真；或有菩薩摩訶薩方便善巧示受五欲，厭捨出家，方得無上正等菩提。

舍利子！譬如幻師，若彼弟子善於幻術，幻作五欲，於中自恣，共相娛樂，於意云何？是幻所作，為有實不？」

(08)舍利子言：「不也，世尊！」

(09)佛言：「舍利子！菩薩摩訶薩亦復如是方便善巧，為欲成熟諸有情故，化受五欲。然此菩薩摩訶薩於五欲中深生厭患，不為五欲之所染汙，以無量門訶毀諸欲，欲為熾然，燒身心故，欲為穢惡，染自他故，欲為魁膾，於去、來、今常為害故，欲為怨敵，長夜伺求，作衰損故，欲如草炬，欲如苦果，欲如劍刃，欲如火聚，欲如毒器，欲如幻惑，欲如暗井。菩薩摩訶薩以如是等無量過門訶毀諸欲，既善了知諸欲過失，寧有真實受諸欲事？但為饒益所化有情，方便善巧示受諸欲。」

觀照品第三

【第2義】：大乘教授（I-2）

B1 修行及 B2 諸諦，B3 佛陀等三寶，B4 不耽著 B5 不疲，
B6 周遍攝持道。B7 五眼 B8 六通德，B9 見道並 B10 修道，
應知此即是，十教授體性。

○此（大乘教授）有十種：

◎B1 修行自體：開示世俗、勝義二諦雙運之教授

- (01) B1 爾時，舍利子白佛言：「世尊！諸菩薩摩訶薩應云何修行般若波羅蜜多？」
- (02) 佛言：「舍利子！菩薩摩訶薩修行般若波羅蜜多時，應如是觀：實有菩薩，不見有菩薩，不見菩薩名，不見般若波羅蜜多，不見般若波羅蜜多名，不見行，不見不行。何以故？舍利子！菩薩自性空，菩薩名空。所以者何？色自性空，不由空故。色空非色，色不離空，空不離色，色即是空，空即是色。受想行識自性空，不由空故。受想行識空非受想行識，受想行識不離空，空不離受想行識，受想行識即是空，空即是受想行識。何以故？舍利子！此但有名謂為菩提，此但有名謂為薩埵，此但有名謂為菩薩，此但有名謂之為空，此但有名謂之為色受想行識。如是自性無生無滅，無染無淨，菩薩摩訶薩如是修行般若波羅蜜多，不見生，不見滅，不見染，不見淨。何以故？但假立客名，分別於法而起分別；假立客名，隨起言說，如如言說，如是如是生起執著。菩薩摩訶薩修行般若波羅蜜多時，於如是等，一切不見，由不見故，不生執著。
- 復次，舍利子！菩薩摩訶薩修行般若波羅蜜多時，應如是觀：菩薩但有名，佛但有名，般若波羅蜜多但有名；色但有名，受想行識但有名；餘一切法但有名。
- 舍利子！如我但有名，謂之為我，實不可得。如是有情、命者、生者、養者、士夫、補特伽羅、意生、儒童、作者、使作者、起者、使起者、受者、使受者、知者、見者亦但有名。謂為有情乃至見者，實不可得。以不可得空故，但隨世俗假立客名，諸法亦爾，不應執著。是故菩薩摩訶薩修行般若波羅蜜多時，不見有我乃至見者，亦不見有一切法性。
- 舍利子！菩薩摩訶薩如是修行般若波羅蜜多，除諸佛慧，一切聲聞、獨覺等慧所不能及，以不可得空故。所以者何？是菩薩摩訶薩於名所名俱無所得，以不觀見，無執著故。
- 舍利子！菩薩摩訶薩若能如是行般若波羅蜜多，名為善行般若波羅蜜多。
- 舍利子！假使汝及大目犍連，滿瞻部洲如稻、麻、竹、斫、甘蔗林等所有般若，比行般若波羅蜜多菩薩摩訶薩般若，百分不及一，千分不及一，百千分不及一，俱胝分不及一，百俱胝分不及一，千俱胝分不及一，百千俱胝分不及一，數分、筭分、

計分、喻分乃至鄔波尼殺曇分亦不及一。何以故？是菩薩摩訶薩般若，能使一切有情趣般涅槃，一切聲聞、獨覺般若不如是故。

又舍利子！修行般若波羅蜜多菩薩摩訶薩，於一日中所修般若，一切聲聞、獨覺般若所不及故。

舍利子！置瞻部洲。假使汝及大目犍連，滿四大洲如稻、麻、竹、斫、甘蔗林等所有般若，比行般若波羅蜜多菩薩摩訶薩般若，百分不及一，千分不及一，百千分不及一，乃至鄔波尼殺曇分亦不及一。何以故？是菩薩摩訶薩般若能使一切有情趣般涅槃，一切聲聞、獨覺般若不如是故。

又舍利子！修行般若波羅蜜多菩薩摩訶薩，於一日中所修般若，一切聲聞、獨覺般若所不及故。

舍利子！置四大洲。假使汝及大目犍連，滿一三千大千世界如稻、麻、竹、斫、甘蔗林等所有般若，比行般若波羅蜜多菩薩摩訶薩般若，百分不及一，千分不及一，百千分不及一，乃至鄔波尼殺曇分亦不及一。何以故？是菩薩摩訶薩般若能使一切有情趣般涅槃，一切聲聞、獨覺般若不如是故。

又舍利子！修行般若波羅蜜多菩薩摩訶薩，於一日中所修般若，一切聲聞、獨覺般若所不及故。

舍利子！置一三千大千世界。假使汝及大目犍連，充滿十方殑伽沙等諸佛世界如稻、麻、竹、斫、甘蔗林等所有般若，比行般若波羅蜜多菩薩摩訶薩般若，百分不及一，千分不及一，百千分不及一，乃至鄔波尼殺曇分亦不及一。何以故？是菩薩摩訶薩般若能使一切有情趣般涅槃，一切聲聞、獨覺般若不如是故。

又舍利子！修行般若波羅蜜多菩薩摩訶薩，於一日中所修般若，一切聲聞、獨覺般若所不及故。」

大般若波羅蜜多經卷第四百三

(03) 爾時，舍利子白佛言：「世尊！若預流、一來、不還、阿羅漢聲聞般若，若獨覺般若，若菩薩摩訶薩般若，若如來應正等覺般若，是諸般若皆無差別，不相違背，無生無滅，自性皆空。若法無差別，不相違，無生滅，自性空，是法差別既不可得，云何世尊說行般若波羅蜜多菩薩摩訶薩，於一日中所修般若，一切聲聞、獨覺般若所不能及？」

- (04) 佛告舍利子：「於汝意云何？修行般若波羅蜜多菩薩摩訶薩，一日所修般若勝事，一切聲聞、獨覺般若有是事不？」
- (05) 舍利子言：「不也，世尊！」
- (06) 「復次，舍利子！於汝意云何？修行般若波羅蜜多菩薩摩訶薩，於一日中所修般若，作是念言：『我當修行一切相微妙智、一切智、道相智、一切相智，利益安樂一切有情。』彼於一切法，覺一切相已，方便安立一切有情於無餘依般涅槃界，一切聲聞、獨覺般若有是事不？」
- (07) 舍利子言：「不也，世尊！」
- (08) 「復次，舍利子！於汝意云何？一切聲聞、獨覺頗能作是念『我當證阿耨多羅三藐三菩提，方便安立一切有情於無餘依涅槃界』不？」
- (09) 舍利子言：「不也，世尊！」
- (10) 「復次，舍利子！於汝意云何？一切聲聞、獨覺頗能作是念『我當修行六波羅蜜多，成熟有情，嚴淨佛土，滿佛十力、四無所畏、四無礙解、大慈大悲大喜大捨、十八不共法，當證無上正等菩提，方便安立無量無數無邊有情於無餘依涅槃界』不？」
- (11) 舍利子言：「不也，世尊！」
- (12) 佛言：「舍利子！諸菩薩摩訶薩皆作是念：『我當修行六波羅蜜多，成熟有情，嚴淨佛土，滿佛十力、四無所畏、四無礙解、大慈大悲大喜大捨、十八不共法，當證無上正等菩提，方便安立無量無數無邊有情於無餘依般涅槃界。』
- 舍利子！譬如螢火無如是念：『我光能照遍瞻部洲，普令大明。』如是一切聲聞、獨覺無如是念：『我當修行六波羅蜜多，成熟有情，嚴淨佛土，滿佛十力、四無所畏、四無礙解、大慈大悲大喜大捨、十八不共法，當證無上正等菩提，方便安立無量無數無邊有情於無餘依般涅槃界。』
- 舍利子！譬如日輪，光明熾盛，照瞻部洲無不周遍，如是菩薩摩訶薩皆作是念：『我當修行六波羅蜜多，成熟有情，嚴淨佛土，滿佛十力、四無所畏、四無礙解、大慈大悲大喜大捨、十八不共法，證得無上正等菩提，方便安立無量無數無邊有情於無餘依般涅槃界。』

舍利子！以是當知一切聲聞、獨覺般若，比行般若波羅蜜多菩薩摩訶薩，於一日中所修般若，百分不及一，千分不及一，百千分不及一，乃至鄔波尼煞曇分亦不及一。」

- (13) 爾時，舍利子白佛言：「世尊！諸菩薩摩訶薩云何能超一切聲聞、獨覺等地，能得菩薩不退轉地，能淨佛道？」
- (14) 佛言：「舍利子！諸菩薩摩訶薩從初發心修行六種波羅蜜多，住空、無相、無願之法，即能超過一切聲聞、獨覺等地，能得菩薩不退轉地，能淨佛道。」
- (15) 時舍利子復白佛言：「世尊！諸菩薩摩訶薩住何等地，能與一切聲聞、獨覺作真福田？」
- (16) 佛言：「舍利子！諸菩薩摩訶薩從初發心修行六種波羅蜜多，住空、無相、無願之法，乃至坐于妙菩提座，常與一切聲聞、獨覺作真福田。何以故？以依菩薩摩訶薩故，一切善法出現世間，所謂一切十善業道、五近事戒、八近住戒、四靜慮、四無量、四無色定、四聖諦智、四念住、四正斷、四神足、五根、五力、七等覺支、八聖道支、六波羅蜜多、十八空等，及佛十力、四無所畏、四無礙解、大慈大悲大喜大捨、十八佛不共法、一切智、道相智、一切相智，諸如是等無量無數無邊善法出現世間。由此菩薩諸善法故，世間便有剎帝利大族、婆羅門大族、長者大族、居士大族、四大王眾天、三十三天、夜摩天、睹史多天、樂變化天、他化自在天、梵眾天、梵輔天、梵會天、大梵天、光天、少光天、無量光天、極光淨天、淨天、少淨天、無量淨天、遍淨天、廣天、少廣天、無量廣天、廣果天、無想有情天、無繁天、無熱天、善現天、善見天、色究竟天、空無邊處天、識無邊處天、無所有處天、非想非非想處天。復由菩薩諸善法故，便有預流、一來、不還、阿羅漢、獨覺、菩薩摩訶薩及諸如來應正等覺出現世間。」
- (17) 時舍利子復白佛言：「世尊！菩薩摩訶薩為復須報施主恩不？」
- (18) 佛言：「舍利子！菩薩摩訶薩不復須報諸施主恩。所以者何？已甚報故。何以故？舍利子！菩薩摩訶薩為大施主，施諸有情多善法故，謂施有情十善業道、五近事戒、八近住戒、四靜慮、四無量、四無色定、四聖諦智、四念住、四正斷、四神足、五根、五力、七等覺支、八聖道支、六波羅蜜多、十八空等，及佛十力、四無所畏、四無礙解、大慈大悲大喜大捨、十八佛不

共法、一切智、道相智、一切相智，施諸有情如是等類無量無數無邊善法，故說菩薩為大施主，由斯已報諸施主恩，真淨福田，生無量福。」

◎B2 修行所緣：開示四諦之教授

(19) B2 爾時，舍利子白佛言：「世尊！修行般若波羅蜜多菩薩摩訶薩與何法相應故，應言與般若波羅蜜多相應？」

(20) a 佛言：「舍利子！修行般若波羅蜜多菩薩摩訶薩與色空相應故，應言與般若波羅蜜多相應；與受想行識空相應故，應言與般若波羅蜜多相應。（教授苦諦）

舍利子！修行般若波羅蜜多菩薩摩訶薩與眼處空相應故，應言與般若波羅蜜多相應；與耳鼻舌身意處空相應故，應言與般若波羅蜜多相應；與色處空相應故，應言與般若波羅蜜多相應；與聲香味觸法處空相應故，應言與般若波羅蜜多相應。

舍利子！修行般若波羅蜜多菩薩摩訶薩與眼界、色界、眼識界空相應故，應言與般若波羅蜜多相應；與耳界、聲界、耳識界空相應故，應言與般若波羅蜜多相應；與鼻界、香界、鼻識界空相應故，應言與般若波羅蜜多相應；與舌界、味界、舌識界空相應故，應言與般若波羅蜜多相應；與身界、觸界、身識界空相應故，應言與般若波羅蜜多相應；與眼界、法界、意識界空相應故，應言與般若波羅蜜多相應。

舍利子！修行般若波羅蜜多菩薩摩訶薩與苦聖諦空相應故，應言與般若波羅蜜多相應；與集滅道聖諦空相應故，應言與般若波羅蜜多相應。

舍利子！修行般若波羅蜜多菩薩摩訶薩與無明空相應故，應言與般若波羅蜜多相應；與行、識、名色、六處、觸、受、愛、取、有、生、老死愁歎苦憂惱空相應故，應言與般若波羅蜜多相應。

舍利子！修行般若波羅蜜多菩薩摩訶薩，與一切法空相應故，應言與般若波羅蜜多相應；與有為無為法空相應故，應言與般若波羅蜜多相應。

舍利子！修行般若波羅蜜多菩薩摩訶薩與本性空相應故，應言與般若波羅蜜多相應。

舍利子！修行般若波羅蜜多菩薩摩訶薩與如是七空相應故，應言與般若波羅蜜多相應。

舍利子！修行般若波羅蜜多菩薩摩訶薩，與如是七空相應時，不見色若相應若不相應，不見受想行識若相應若不相應。

◎b 不見色若生法若滅法，不見受想行識若生法若滅法；不見色若染法若淨法，不見受想行識若染法若淨法。不見色與受合，不見受與想合，不見想與行合，不見行與識合。何以故？無有少法與法合者，以本性空故。（教授集諦）

舍利子！諸色空，彼非色；諸受想行識空，彼非受想行識。何以故？舍利子！諸色空，彼非變礙相；諸受空，彼非領納相；諸想空，彼非取像相；諸行空，彼非造作相；諸識空，彼非了別相。何以故？舍利子！色不異空，空不異色，色即是空，空即是色；受想行識不異空，空不異受想行識，受想行識即是空，空即是受想行識。

◎c 舍利子！是諸法空相，不生不滅，不染不淨，不增不減，非過去非未來非現在。如是空中無色，無受想行識；無眼處，無耳鼻舌身意處；無色處，無聲香味觸法處；無眼界、色界、眼識界，無耳界、聲界、耳識界，無鼻界、香界、鼻識界，無舌界、味界、舌識界，無身界、觸界、身識界，無意界、法界、意識界；無無明，亦無無明滅，乃至無老死愁歎苦憂惱，亦無老死愁歎苦憂惱滅；無苦聖諦，無集滅道聖諦；無得，無現觀；無預流，無預流果；無一來，無一來果；無不還，無不還果；無阿羅漢，無阿羅漢果；無獨覺，無獨覺菩提；無菩薩，無菩薩行；無正等覺，無正等覺菩提。（教授滅諦）

舍利子！修行般若波羅蜜多菩薩摩訶薩與如是法相應故，應言與般若波羅蜜多相應。

◎d 復次，舍利子！修行般若波羅蜜多菩薩摩訶薩，不見布施波羅蜜多若相應若不相應，不見淨戒、安忍、精進、靜慮、般若波羅蜜多若相應若不相應；不見色若相應若不相應，不見受想行識若相應若不相應；不見眼處若相應若不相應，不見耳鼻舌身意處若相應若不相應；不見色處若相應若不相應，不見聲香味觸法處若相應若不相應；不見眼界、色界、眼識界若相應若不相應，不見耳界、聲界、耳識界若相應若不相應；不見鼻界、香界、鼻識界若相應若不相應，不見舌界、味界、舌識界若相

應若不相應，不見身界、觸界、身識界若相應若不相應，不見
眼界、法界、意識界若相應若不相應；不見四念住若相應若不相應，不見四正斷、四神足、五根、五力、七等覺支、八聖道
支若相應若不相應；不見佛十力若相應若不相應，不見四無所
畏、四無礙解、大慈大悲大喜大捨、十八佛不共法、一切智、
道相智、一切相智若相應若不相應。（教授道諦）

舍利子！修行般若波羅蜜多菩薩摩訶薩，與如是法相應故，應
言與般若波羅蜜多相應。

復次，舍利子！修行般若波羅蜜多菩薩摩訶薩，不觀空與空相
應，不觀無相與無相相應，不觀無願與無願相應。何以故？空、
無相、無願皆無相應不相應故。

舍利子！修行般若波羅蜜多菩薩摩訶薩，與如是法相應故，應
言與般若波羅蜜多相應。

◎B3 修行所依：開示佛、法、僧三寶之教授

○1 教授佛寶

復次，舍利子！修行般若波羅蜜多菩薩摩訶薩，入一切法自相
空已，不觀色若合若散，不觀受想行識若合若散。不觀色與前
際若合若散。何以故？不見前際故。不觀受想行識與前際若合
若散。何以故？不見前際故。不觀色與後際若合若散。何以故？
不見後際故。不觀受想行識與後際若合若散。何以故？不見後
際故。不觀色與現在若合若散。何以故？不見現在故。不觀受
想行識與現在若合若散。何以故？不見現在故。不觀前際與後
際若合若散，不觀前際與現在若合若散，不觀後際與前際若合
若散，不觀後際與現在若合若散，不觀現在與前際若合若散，
不觀現在與後際若合若散，不觀前際與後際、現在若合若散，
不觀後際與前際、現在若合若散，不觀現在與前際、後際若合
若散，不觀前際、後際、現在若合若散。何以故？三世空故。
舍利子！修行般若波羅蜜多菩薩摩訶薩，與如是法相應故，應
言與般若波羅蜜多相應。

○復次，舍利子！修行般若波羅蜜多菩薩摩訶薩，不觀一切智與
過去若合若散。何以故？尚不見過去，況觀一切智與過去若合
若散。不觀一切智與未來若合若散。何以故？尚不見未來，況
觀一切智與未來若合若散。不觀一切智與現在若合若散。何以

故？尚不見現在，況觀一切智與現在若合若散。不觀一切智與色若合若散。何以故？尚不見色，況觀一切智與色若合若散。不觀一切智與受想行識若合若散。何以故？尚不見受想行識，況觀一切智與受想行識若合若散。不觀一切智與眼處若合若散。何以故？尚不見眼處，況觀一切智與眼處若合若散。不觀一切智與耳鼻舌身意處若合若散。何以故？尚不見耳鼻舌身意處，況觀一切智與耳鼻舌身意處若合若散。不觀一切智與色處若合若散。何以故？尚不見色處，況觀一切智與色處若合若散。不觀一切智與聲香味觸法處若合若散。何以故？尚不見聲香味觸法處，況觀一切智與聲香味觸法處若合若散。不觀一切智與眼界、色界、眼識界若合若散。何以故？尚不見眼界、色界、眼識界，況觀一切智與眼界、色界、眼識界若合若散。不觀一切智與耳界、聲界、耳識界若合若散。何以故？尚不見耳界、聲界、耳識界，況觀一切智與耳界、聲界、耳識界若合若散。不觀一切智與鼻界、香界、鼻識界若合若散。何以故？尚不見鼻界、香界、鼻識界，況觀一切智與鼻界、香界、鼻識界若合若散。不觀一切智與舌界、味界、舌識界若合若散。何以故？尚不見舌界、味界、舌識界，況觀一切智與舌界、味界、舌識界若合若散。不觀一切智與身界、觸界、身識界若合若散。何以故？尚不見身界、觸界、身識界，況觀一切智與身界、觸界、身識界若合若散。不觀一切智與眼界、法界、意識界若合若散。何以故？尚不見眼界、法界、意識界，況觀一切智與眼界、法界、意識界若合若散。（教授佛寶）

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，不觀一切智與布施波羅蜜多若合若散。何以故？尚不見布施波羅蜜多，況觀一切智與布施波羅蜜多若合若散。不觀一切智與淨戒波羅蜜多若合若散。何以故？尚不見淨戒波羅蜜多，況觀一切智與淨戒波羅蜜多若合若散。不觀一切智與安忍波羅蜜多若合若散。何以故？尚不見安忍波羅蜜多，況觀一切智與安忍波羅蜜多若合若散。不觀一切智與精進波羅蜜多若合若散。何以故？尚不見精進波羅蜜多，況觀一切智與精進波羅蜜多若合若散。不觀一切智與靜慮波羅蜜多若合若散。何以故？尚不見靜慮波羅蜜多，況觀

一切智與靜慮波羅蜜多若合若散。不觀一切智與般若波羅蜜多若合若散。何以故？尚不見般若波羅蜜多，況觀一切智與般若波羅蜜多若合若散。不觀一切智與四念住若合若散。何以故？尚不見四念住，況觀一切智與四念住若合若散。不觀一切智與四正斷、四神足、五根、五力、七等覺支、八聖道支若合若散。何以故？尚不見四正斷乃至八聖道支，況觀一切智與四正斷乃至八聖道支若合若散。不觀一切智與佛十力若合若散。何以故？尚不見佛十力，況觀一切智與佛十力若合若散。不觀一切智與四無所畏、四無礙解、大慈大悲大喜大捨、十八不共法、一切智、道相智、一切相智若合若散。何以故？尚不見四無所畏乃至一切相智，況觀一切智與四無所畏乃至一切相智若合若散。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，不觀一切智與佛若合若散，亦不觀佛與一切智若合若散。何以故？一切智即佛，佛即一切智故。不觀一切智與菩提若合若散，亦不觀菩提與一切智若合若散。何以故？一切智即菩提，菩提即一切智故。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

○2 教授法寶

○復次，舍利子！修行般若波羅蜜多菩薩摩訶薩，不著色有性，不著色無性，不著受想行識有性，不著受想行識無性；不著色常，不著色無常，不著受想行識常，不著受想行識無常；不著色樂，不著色苦，不著受想行識樂，不著受想行識苦；不著色我，不著色無我，不著受想行識我，不著受想行識無我；不著色寂靜，不著色不寂靜，不著受想行識寂靜，不著受想行識不寂靜；不著色空，不著色不空，不著受想行識空，不著受想行識不空；不著色無相，不著色有相，不著受想行識無相，不著受想行識有相；不著色無願，不著色有願，不著受想行識無願，不著受想行識有願。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，不作是念：『我行般若波羅蜜多。』不作是念：『我不行般若波羅蜜多。』不作是念：『我亦行亦不行般若波羅蜜多。』不作是念：『我非行非不行般若波羅蜜多。』

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

復次，舍利子！修行般若波羅蜜多菩薩摩訶薩，不為布施波羅蜜多故，修行般若波羅蜜多，不為淨戒、安忍、精進、靜慮、般若波羅蜜多故，修行般若波羅蜜多；不為人正性離生故，修行般若波羅蜜多，不為得不退轉地故，修行般若波羅蜜多；不為成熟有情故，修行般若波羅蜜多，不為嚴淨佛土故，修行般若波羅蜜多；不為四念住故，修行般若波羅蜜多，不為四正斷、四神足、五根、五力、七等覺支、八聖道支故，修行般若波羅蜜多；不為佛十力故，修行般若波羅蜜多，不為四無所畏、四無礙解、大慈大悲大喜大捨、十八不共法、一切智、道相智、一切相智故，修行般若波羅蜜多；不為內空故，修行般若波羅蜜多，不為外空、內外空、空空、大空、勝義空、有為空、無為空、畢竟空、無際空、散空、無變異空、本性空、自相空、共相空、一切法空、不可得空、無性空、自性空、無性自性空故，修行般若波羅蜜多；不為真如故，修行般若波羅蜜多，不為法界故，修行般若波羅蜜多，不為法性故，修行般若波羅蜜多，不為實際故，修行般若波羅蜜多，不為平等性故，修行般若波羅蜜多。何以故？修行般若波羅蜜多菩薩摩訶薩，不見諸法性差別故。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

復次，舍利子！修行般若波羅蜜多菩薩摩訶薩，不為神境智證通故，修行般若波羅蜜多，不為天耳、他心、宿住隨念、天眼、漏盡智證通故，修行般若波羅蜜多。何以故？修行般若波羅蜜多菩薩摩訶薩，尚不見般若波羅蜜多，況見菩薩及諸如來六神通事。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，不作是念：『我以神境智證通，遍到十方殑伽沙等諸佛世界，供養恭敬，尊重讚歎爾所世界諸佛如來。』不作是念：『我以天耳智證通，遍聞十方殑伽沙等諸佛世界諸佛菩薩所說法音。』不作是念：『我以他心智證通，遍知十方殑伽沙等諸佛世界一切有情心心所法。』不作是念：『我以宿住隨念智證通，遍憶十方殑伽沙等諸佛世界一切有情諸宿住事。』不作是念：『我以天眼智證通，遍見十方殑伽沙等諸佛世界一切有情死此生彼。』不作是念：『我以漏盡智證通，遍觀十方殑伽沙等諸佛世界一切有情漏盡不盡。』

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，如是與般若波羅蜜多相應時，則能安立無量無數無邊有情於無餘依般涅槃界，一切惡魔不得其便，世間眾事所欲隨意，十方各如殑伽沙界一切諸佛及諸菩薩摩訶薩眾，皆共護念如是菩薩，不令退墮一切聲聞、獨覺等地。十方各如殑伽沙界四大王眾天乃至色究竟天，皆共擁衛如是菩薩，諸有所為，令無障礙，身心痛惱，咸得痊除，設有罪業，於當來世應招苦報，轉現輕受。何以故？以是菩薩於一切有情慈悲普遍故。

舍利子當知！如是菩薩摩訶薩少用加行，便能引發一切陀羅尼門、一切三摩地門皆現在前，隨所生處，常得奉事諸佛世尊，乃至證得無上菩提，於其中間常不離佛。舍利子當知！修行般若波羅蜜多菩薩摩訶薩，與如是般若波羅蜜多相應時，得如是等無量無數不可思議殊勝功德。

復次，舍利子！修行般若波羅蜜多菩薩摩訶薩，不作是念：『有法與法若相應若不相應，若等若不等。』何以故？是菩薩摩訶薩不見有法與法若相應若不相應，若等若不等。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，不作是念：『我於法界若速現等覺，若不速現等覺。』何以故？無有少法能於法界現等覺故。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，不見少法離法界者。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，不作是念：『法界能為諸法因緣。』

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，不作是念：『此法能證法界，若不能證。』何以故？是菩薩摩訶薩尚不見少法，何況有法能證法界及以不證。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

復次，舍利子！修行般若波羅蜜多菩薩摩訶薩，不見法界與空相應，亦不見空與法界相應。

舍利子！修行般若波羅蜜多菩薩摩訶薩，與如是法相應故，應言與般若波羅蜜多相應。

舍利子！修行般若波羅蜜多菩薩摩訶薩，不見色與空相應，亦不見空與色相應，不見受想行識與空相應，亦不見空與受想行識相應；不見眼處與空相應，亦不見空與眼處相應，不見耳鼻舌身意處與空相應，亦不見空與耳鼻舌身意處相應；不見色處與空相應，亦不見空與色處相應，不見聲香味觸法處與空相應，亦不見空與聲香味觸法處相應；不見眼界、色界、眼識界與空相應，亦不見空與眼界、色界、眼識界相應；不見耳界、聲界、耳識界與空相應，亦不見空與耳界、聲界、耳識界相應；不見鼻界、香界、鼻識界與空相應，亦不見空與鼻界、香界、鼻識界相應；不見舌界、味界、舌識界與空相應，亦不見空與舌界、味界、舌識界相應；不見身界、觸界、身識界與空相應，亦不見空與身界、觸界、身識界相應；不見眼界、法界、意識界與空相應，亦不見空與眼界、法界、意識界相應；不見苦聖諦與空相應，亦不見空與苦聖諦相應，不見集滅道聖諦與空相應，亦不見空與集滅道聖諦相應；不見無明與空相應，亦不見空與無明相應，不見行、識、名色、六處、觸、受、愛、取、

有、生、老死愁歎苦憂惱與空相應，亦不見空與行乃至老死愁歎苦憂惱相應；不見四念住與空相應，亦不見空與四念住相應，不見四正斷、四神足、五根、五力、七等覺支、八聖道支與空相應，亦不見空與四正斷乃至八聖道支相應；不見佛十力與空相應，亦不見空與佛十力相應，不見四無所畏、四無礙解、大慈大悲大喜大捨、十八不共法、一切智、道相智、一切相智與空相應，亦不見空與四無所畏乃至一切相智相應。

舍利子！修行般若波羅蜜多菩薩摩訶薩若能如是相應，是為第一與空相應。諸菩薩摩訶薩由與如是空相應故，不墮聲聞、獨覺等地，嚴淨佛土，成熟有情，速證無上正等菩提。

舍利子！修行般若波羅蜜多菩薩摩訶薩諸相應中，與般若波羅蜜多相應為最第一，最尊最勝，最上最妙，最高最極，無上無上，無等無等等。何以故？舍利子！此般若波羅蜜多相應，即是空相應、無相相應、無願相應故。

舍利子！修行般若波羅蜜多菩薩摩訶薩與如是般若波羅蜜多相應時，當知即為受記作佛，若近受記。

舍利子！是菩薩摩訶薩能為無量無數無邊有情作大饒益。

舍利子！是菩薩摩訶薩不作是念：『我與般若波羅蜜多相應。』不作是念：『我得受記，定當作佛，若近受記。』不作是念：『我能嚴淨佛土，成熟有情。』亦不作是念：『我當得阿耨多羅三藐三菩提，轉妙法輪，饒益一切。』何以故？是菩薩摩訶薩不見有法離於法界，不見有法修行般若波羅蜜多，不見有法得佛授記，不見有法當得無上正等菩提，不見有法嚴淨佛土，不見有法成熟有情。何以故？修行般若波羅蜜多菩薩摩訶薩，不起我想、有情、命者、生者、養者、士夫、補特伽羅、意生、孺童、作者、使作者、起者、使起者、受者、使受者、知者、見者想故。所以者何？我、有情等畢竟不生，亦復不滅，彼既畢竟不生不滅，云何當能修行般若波羅蜜多？

舍利子！是菩薩摩訶薩不見有情生故，修行般若波羅蜜多，不見有情滅故，修行般若波羅蜜多，達有情空故，修行般若波羅蜜多，達有情非我故，修行般若波羅蜜多，達有情不可得故，修行般若波羅蜜多，達有情遠離故，修行般若波羅蜜多，達有情本性非有情性故，修行般若波羅蜜多。

舍利子！修行般若波羅蜜多菩薩摩訶薩諸相應中，與空相應最為第一，與般若波羅蜜多相應最尊最勝。

舍利子！諸菩薩摩訶薩如是相應，普能引發如來十力、四無所畏、四無礙解、大慈大悲大喜大捨、十八不共法、一切智、道相智、一切相智。

舍利子！修行般若波羅蜜多菩薩摩訶薩，與如是般若波羅蜜多相應故，畢竟不起慳貪心，不起犯戒心，不起忿恚心，不起懈怠心，不起散亂心，不起惡慧心。」

大般若波羅蜜多經卷第四百四

○3 教授僧寶

諸鈍根利根（C1 鈍根隨信預流向，C2 利根隨法預流向，隱含 C3 但住預流果）；信見至（C6 鈍根信解一來向、利根見至一來向，隱含 C7 但住一來果，C9 鈍根信解不還向、利根見至不還向）家家（C4 天家家，C5 人家家）；C8 一間 C10 中般 C11 生般 C12 行般 C13 無行般，究竟三超（C14 全超，C15 半超，C16 遍歿），往有頂壞色貪；C17 現法寂滅及 C18 身證（隱含 C19 阿羅漢向）；C20 麟喻共二十。

○此處別說三寶教授中之僧寶，謂：

C1, C2 如道相智品所說大乘見道十六剎那中，安住八忍之聖位菩薩，名預流向，有鈍根隨信行、利根隨法行之二。

C3 安住見道八智之聖位菩薩，由永盡見斷三結，名但住預流果，此是論中隱說者。

C4, C5 斷欲惑三品之聖位菩薩，名曰家家，分天家家、人家家之二。

C6 為斷欲地第六品修所斷惑，得解脫道故，精進修行之修道菩薩，鈍根者名信解，利根者名見至，此二合一，名一來向。

C7 已斷欲地第六品修所斷惑之聖位菩薩，名一來果，此亦是論中隱說者。

C8 已斷欲地修惑第八品之聖位菩薩，名曰一間。

C9 為斷欲地九品修惑，得解脫道故，精進修行之修道位菩薩，信解、見至准前合一，名不還向。

C10 其次中般，謂聖位菩薩於色界中有身而得斷隨一煩惱障之解脫道者。

- C11 生般、C12 有行般、C13 無行般，謂生色界乃得彼解脫道者、及勤修功行而得、與不用功行而得者。
- C14, C15, C16 於色究竟身而證斷隨一煩惱障之聖位菩薩，名往色究竟者，此分三超，即全超、半超、遍歿。
- 若先往梵眾天生，捨諸餘處，次生色究竟而證彼解脫道者，名曰全超。
 - 若從梵眾天歿，在下三淨居天隨受一生，次生色究竟天而證彼道者，名曰半超。
 - 若從梵眾天乃至色究竟天漸次受生，後證彼道者，名曰遍歿。
- C17, C18 菩薩不求無色界生，故名為「往有頂者」，是說離色界貪之菩薩。此分二種：
- 盡斷惑業結生相續者，名現法涅槃；
 - 證得八解脫者，名曰身證。
- C19 為欲盡斷煩惱障故，精進修行之七地菩薩，名阿羅漢向，此是論中隱說者。
- C20 十地菩薩，名曰麟喻獨覺。
- 此上共為二十種僧，此依獅子賢論師意述。
- (01) 爾時，舍利子白佛言：「世尊！與般若波羅蜜多相應菩薩摩訶薩，從何處沒，來生此間？從此間沒，當生何處？」
- (02) C1, C2 佛告舍利子：「與般若波羅蜜多相應菩薩摩訶薩，有從餘佛土沒，來生此間；有從睹史多天沒，來生此間；有從人中沒，還生此間。【預流向】
- C2 舍利子！若從餘佛土沒，來生此者，1 是菩薩摩訶薩疾與般若波羅蜜多相應。由與般若波羅蜜多相應故，轉生便得深妙法門速現在前，從此已後，恒與般若波羅蜜多疾得相應，在所生處，常值諸佛，供養恭敬，尊重讚歎，能令般若波羅蜜多漸得增長。
- 若從睹史多天沒，來生此者，2 是菩薩摩訶薩即為一生所繫，於六波羅蜜多常不忘失，一切陀羅尼門、三摩地門皆得自在。
- 【隨法行】
- C1 若從人中沒，還生此者，3 是菩薩摩訶薩除不退轉，其根味鈍，不能疾與般若波羅蜜多相應，一切陀羅尼門、三摩地門皆未自在。舍利子！汝所問『與般若波羅蜜多相應菩薩摩訶薩，從此間沒，當生何處』者，4 是菩薩摩訶薩從此沒已，生餘佛

土，從一佛國至一佛國，在在生處，常得值遇諸佛世尊，供養恭敬，尊重讚歎，乃至無上正等菩提。【隨信行】

舍利子！復有菩薩摩訶薩無方便善巧故，入初靜慮，入第二、第三、第四靜慮，亦行六種波羅蜜多，5 是菩薩摩訶薩得靜慮故，生長壽夭，隨彼壽盡，來生人中，值遇諸佛，供養恭敬，尊重讚歎。雖行六種波羅蜜多，而根味鈍，不甚明利。

C6 舍利子！復有菩薩摩訶薩入初靜慮乃至第四靜慮，亦行六種波羅蜜多，6 是菩薩摩訶薩無方便善巧故，捨諸靜慮而生欲界。當知是菩薩摩訶薩亦根味鈍，不甚明利。【信解一來向】

C6 舍利子！復有菩薩摩訶薩入初靜慮，入第二、第三、第四靜慮；入慈無量，入悲喜捨無量；入空無邊處定，入識無邊處、無所有處、非想非非想處定；修四念住、四正斷、四神足、五根、五力、七等覺支、八聖道支；修佛十力、四無所畏、四無礙解、大慈大悲大喜大捨、十八不共法，7 是菩薩摩訶薩有方便善巧故，不隨靜慮、無量、無色勢力而生，但生有佛世界，值遇諸佛，供養恭敬，尊重讚歎，常與般若波羅蜜多相應。當知是菩薩摩訶薩此賢劫中定得無上正等菩提。【見至一來向】

C5 舍利子！復有菩薩摩訶薩入初靜慮乃至第四靜慮，入慈無量乃至捨無量，入空無邊處定乃至非想非非想處定，8 是菩薩摩訶薩有方便善巧故，不隨靜慮、無量、無色勢力而生，還生欲界，若刹帝利大族、若婆羅門大族、若長者大族、若居士大族，為欲成熟諸有情故，不為貪染後有故生。【人家家】

C4 舍利子！復有菩薩摩訶薩入初靜慮乃至第四靜慮，入慈無量乃至捨無量，入空無邊處定乃至非想非非想處定，9 是菩薩摩訶薩有方便善巧故，不隨靜慮、無量、無色勢力而生，或生四大王眾天，或生三十三天，或生夜摩天，或生睹史多天，或生樂變化天，或生他化自在天，為欲成熟諸有情故，及為嚴淨諸佛土故，常值諸佛，供養恭敬，尊重讚歎，無空過者。舍利子！復有菩薩摩訶薩修行般若波羅蜜多，有方便善巧故，入初靜慮，於此處沒，生梵世中，作大梵王，威德熾盛，勝餘梵眾多百千倍，10（是菩薩摩訶薩）從自天處遊諸佛土，從一佛國至一佛國，其中有菩薩摩訶薩未證無上正等菩提者，勸證無上正等菩提，已證無上正等菩提未轉法輪者，請轉法輪，為欲利樂諸有情故。【天家家】

C7 舍利子！復有菩薩摩訶薩，修行般若波羅蜜多有方便善巧故，入初靜慮乃至第四靜慮，入慈無量乃至捨無量，入空無邊處定乃至非想非非想處定，修四念住乃至八聖道支，於空解脫門、無相解脫門、無願解脫門自在現前，不隨靜慮、無量、無色勢力而生，11 是菩薩摩訶薩一生所繫，現前承事親近供養現在如來應正等覺，於是佛所勤修梵行，從此間沒，**生睹史多天**，盡彼壽量，諸根無缺，具念正知，無量無數百千俱胝那庾多天眾圍繞導從，遊戲神通，來生人中，證得無上正等菩提，轉妙法輪，度無量眾。【一來果】

C9 舍利子！復有菩薩摩訶薩具六神通，**不生欲界，不生色界，不生無色界**，遊諸佛土，12（**是菩薩摩訶薩**）從一佛國至一佛國，供養恭敬，尊重讚歎諸佛世尊，修菩薩行，至得無上正等菩提。【不還向】

舍利子！復有菩薩摩訶薩具六神通，遊戲自在，從一佛國至一佛國，所經佛土無有聲聞、獨覺之名，唯有一乘真淨行者，13 是菩薩摩訶薩於諸佛土供養恭敬，尊重讚歎諸佛世尊，修行般若波羅蜜多，漸次增長嚴淨佛土，成熟有情。

舍利子！復有菩薩摩訶薩具六神通，遊戲自在，從一佛國至一佛國，所經佛土有情壽量不可數知，14 是菩薩摩訶薩於諸佛土供養恭敬，尊重讚歎諸佛世尊，修行般若波羅蜜多，漸次增長嚴淨佛土，成熟有情。

舍利子！復有菩薩摩訶薩具六神通，遊諸世界。有諸世界無三寶名，15 是菩薩摩訶薩往彼讚歎佛法僧寶，令諸有情深生淨信，由斯長夜利益安樂；是菩薩摩訶薩於此命終，生有佛界，修菩薩行，至得無上正等菩提。

C9 舍利子！復有菩薩摩訶薩從初發心，勇猛精進，得初靜慮乃至第四靜慮，得慈無量乃至捨無量，得空無邊處定乃至非想非非想處定，修四念住乃至八聖道支，修佛十力乃至一切相智，16 是菩薩摩訶薩**不生欲界，不生色界，不生無色界**，常生能益有情之處，利益安樂一切有情。【不還向】

C13 舍利子！復有菩薩摩訶薩先已修習六波羅蜜多，17（**是菩薩摩訶薩**）初發心已，便入菩薩**正性離生**，乃至證得不退轉地。【無行般】

C11 舍利子！復有菩薩摩訶薩先已修習六波羅蜜多，18（是菩薩摩訶薩）初發心已，便能展轉證得無上正等菩提，轉妙法輪，度無量眾，於無餘依大涅槃界而般涅槃。般涅槃後，所說正法若住一劫、若一劫餘，利樂無邊諸有情類。【生般】

C13 舍利子！復有菩薩摩訶薩先已修習六波羅蜜多，19（是菩薩摩訶薩）初發心已，便能與般若波羅蜜多相應，與無量無數百千俱胝那庾多菩薩摩訶薩前後圍繞，遊諸佛土，從一佛國至一佛國，供養恭敬，尊重讚歎諸佛世尊，成熟有情，嚴淨佛土。【無行般】

C18 舍利子！復有菩薩摩訶薩修行般若波羅蜜多，得四靜慮、四無量、四無色定，於中遊戲，先入初靜慮，從初靜慮起，入滅盡定；從滅盡定起，入第二靜慮；從第二靜慮起，入滅盡定；從滅盡定起，入第三靜慮；從第三靜慮起，入滅盡定；從滅盡定起，入第四靜慮；從第四靜慮起，入滅盡定；從滅盡定起，入空無邊處；從空無邊處起，入滅盡定；從滅盡定起，入識無邊處；從識無邊處起，入滅盡定；從滅盡定起，入無所有處；從無所有處起，入滅盡定；從滅盡定起，入非想非非想處；從非想非非想處起，入滅盡定；從滅盡定起，入初靜慮。舍利子！20 是菩薩摩訶薩修行般若波羅蜜多方便善巧，於諸勝定，順逆往還，次第超越，遊戲自在。【身證】

舍利子！復有菩薩摩訶薩雖已得四念住、四正斷、四神足、五根、五力、七等覺支、八聖道支，已修佛十力、四無所畏、四無礙解、大慈大悲大喜大捨、十八不共法、一切智、道相智、一切相智，而不取預流果、若一來果、若不還果、若阿羅漢果、若獨覺菩提、若無上正等菩提，21 是菩薩摩訶薩修行般若波羅蜜多方便善巧故，令諸有情起四念住乃至八聖道支，使得預流果乃至阿羅漢果、獨覺菩提，或令有情修佛十力乃至一切相智，使得無上正等菩提。

舍利子！此諸聲聞、獨覺果智即是菩薩摩訶薩忍。

舍利子！當知是菩薩摩訶薩住不退轉地，與般若波羅蜜多相應，能為斯事。

舍利子！復有菩薩摩訶薩住六波羅蜜多，淨睹史多天宮，當知22 是菩薩摩訶薩此賢劫中定當作佛。

C8 舍利子！復有菩薩摩訶薩修行般若波羅蜜多，雖已得四靜慮、四無量、四無色定，已得四念住、四正斷、四神足、五根、五力、七等覺支、八聖道支，已修佛十力、四無所畏、四無礙解、大慈大悲大喜大捨、十八不共法、一切智、道相智、一切相智，心趣菩提，常無懈廢，而於聖諦現未通達。舍利子當知 23 是菩薩摩訶薩一生所繫。【一間】

C12 舍利子！復有菩薩摩訶薩修行六種波羅蜜多，遊諸世界，從一佛國至一佛國，嚴淨佛土，安立有情於無上覺。舍利子！24 是菩薩摩訶薩要經無量無數大劫，乃證無上正等菩提。【有行般】

舍利子！復有菩薩摩訶薩安住六種波羅蜜多，常勤精進，饒益有情，25（是菩薩摩訶薩）口常不說引無義語，身意不起引無義業。

C17,C18 舍利子！復有菩薩摩訶薩修行六種波羅蜜多，常勤精進，饒益有情，26（是菩薩摩訶薩）從一佛國至一佛國，斷諸有情三惡趣道。【行有頂】

舍利子！復有菩薩摩訶薩雖具住六波羅蜜多，常以布施波羅蜜多而為上首，勇猛修習諸菩薩行，27（是菩薩摩訶薩）惠諸有情一切樂具，常無懈怠，須食與食，須飲與飲，須乘與乘，須衣與衣，華香、瓔珞、房舍、臥具、床榻、燈明、財穀、珍寶，隨其所須資生之物，皆悉給施。

舍利子！復有菩薩摩訶薩雖具住六波羅蜜多，常以淨戒波羅蜜多而為上首，勇猛修習諸菩薩行，28（是菩薩摩訶薩）具身語意殊勝律儀，勸諸有情亦令修習如是律儀，令速圓滿。

舍利子！復有菩薩摩訶薩雖具住六波羅蜜多，常以安忍波羅蜜多而為上首，勇猛修習諸菩薩行，29（是菩薩摩訶薩）遠離一切忿恚等心，勸諸有情亦令修習如是安忍，令速圓滿。

舍利子！復有菩薩摩訶薩雖具住六波羅蜜多，常以精進波羅蜜多而為上首，勇猛修習諸菩薩行，30（是菩薩摩訶薩）具足修行一切善法，勸諸有情亦令修習如是精進，令速圓滿。

舍利子！復有菩薩摩訶薩雖具住六波羅蜜多，常以靜慮波羅蜜多而為上首，勇猛修習諸菩薩行，31（是菩薩摩訶薩）具修一切勝奢摩他，勸諸有情亦令修習如是勝定，令速圓滿。

舍利子！復有菩薩摩訶薩雖具住六波羅蜜多，常以般若波羅蜜多而為上首，勇猛修習諸菩薩行，32（是菩薩摩訶薩）具修一切毗鉢舍那，勸諸有情亦令修習如是勝慧，令速圓滿。

舍利子！復有菩薩摩訶薩修行般若波羅蜜多，化身如佛，33（是菩薩摩訶薩）遍入地獄、傍生、鬼界、若人、若天，隨其類音，為說正法。

C16 舍利子！復有菩薩摩訶薩安住六種波羅蜜多，化身如佛，34（是菩薩摩訶薩）遍到十方殑伽沙等諸佛世界，為諸有情宣說正法，嚴淨佛土，於諸佛所聽聞正法，供養恭敬，尊重讚歎，周覽十方最勝佛土微妙淨相，而便自起最極莊嚴清淨佛土，於中安處一生所繫諸大菩薩，教令速證無上菩提。【遍歿】

舍利子！復有 35 菩薩摩訶薩修行六種波羅蜜多，成就大士三十二相，諸根猛利，清淨端嚴，眾生見者，無不愛敬，因斯勸導，應其根欲，令漸證得三乘涅槃。如是，舍利子！菩薩摩訶薩修行般若波羅蜜多，應學清淨身語意業。

舍利子！復有 36 菩薩摩訶薩修行六種波羅蜜多，雖得諸根明利，而不自重輕他。

舍利子！復有 37 菩薩摩訶薩從初發心，恒住施戒波羅蜜多，乃至未得不退轉地，於一切時不墮惡趣。

舍利子！復有 38 菩薩摩訶薩從初發心乃至未得不退轉地，常不捨離十善業道。

舍利子！復有 39 菩薩摩訶薩安住施戒波羅蜜多，作轉輪王，成就七寶，以法教化，不以非法，安立有情於十善道，亦以財寶濟諸貧乏。

C17 舍利子！復有 40 菩薩摩訶薩安住施戒波羅蜜多，無量百千世作轉輪聖王，值遇無量百千諸佛，供養恭敬，尊重讚歎，捨施內外，不以為難。【現法寂滅】

C19 舍利子！復有 41 菩薩摩訶薩安住六種波羅蜜多，常為邪見盲冥有情作法照明，亦持此明常以自照，乃至無上正等菩提，此法照明，曾不捨離，是菩薩摩訶薩由是因緣，於諸佛法常得現起。【阿羅漢向】

◎B4 修行堅穩之因，對治貪著惡事懈怠：開示不耽著精進之教授

是故，舍利子！諸菩薩摩訶薩修行般若波羅蜜多，於身語意三有罪業，無容暫起。」

- (03) 時舍利子白佛言：「世尊！云何名為菩薩摩訶薩有罪身語意業？」
- (04) 佛言：「舍利子！若菩薩摩訶薩作是念：『此是身，我由此故，而起身業；此是語，我由此故，而起語業；此是意，我由此故，而起意業。』舍利子！是名菩薩摩訶薩有罪身語意業。
舍利子！諸菩薩摩訶薩修行般若波羅蜜多，不得身及身業，不得語及語業，不得意及意業。
舍利子！若菩薩摩訶薩修行般若波羅蜜多，得身語意及身語意業者，便起慳貪心、犯戒心、忿恚心、懈怠心、散亂心、惡慧心，若起此心，不名菩薩摩訶薩。是故修行般若波羅蜜多菩薩摩訶薩，生此念者，無有是處。
舍利子！諸菩薩摩訶薩修行六種波羅蜜多，能淨身語意三種羸重。」
- (05) B4 時舍利子白佛言：「世尊！云何菩薩摩訶薩能淨身語意三種羸重？」
- (06) 佛言：「舍利子！諸菩薩摩訶薩修行般若波羅蜜多，不得身及身羸重，不得語及語羸重，不得意及意羸重。
舍利子！如是菩薩摩訶薩修行般若波羅蜜多，能淨身語意三種羸重。
又舍利子！若菩薩摩訶薩從初發心，恒具受持十善業道，不起聲聞及獨覺心，常於有情起大悲心。
舍利子！我亦說是菩薩摩訶薩能淨身語意三種羸重。
舍利子！復有菩薩摩訶薩修行六種波羅蜜多，淨菩提道。」
- (07) 時舍利子白佛言：「世尊！云何名為菩薩摩訶薩菩提道？」
- (08) 佛言：「舍利子！諸菩薩摩訶薩修行般若波羅蜜多時，不得一切身語意業及三羸重，不得布施波羅蜜多，不得淨戒波羅蜜多，不得安忍波羅蜜多，不得精進波羅蜜多，不得靜慮波羅蜜多，不得般若波羅蜜多，不得聲聞乘，不得獨覺乘，不得菩薩正等覺乘。
舍利子！是名菩薩摩訶薩菩提道。何以故？以菩提道於一切法皆不得故。」

舍利子！復有菩薩摩訶薩修行六種波羅蜜多，趣菩提道無能制者。」

◎B5 修行增進之因，對治退屈懈怠：開示不疲勞精進之教授

- (09) B5 時舍利子白佛言：「世尊！何緣菩薩摩訶薩修行六種波羅蜜多，趣菩提道無能制者？」
- (10) 佛言：「舍利子！諸菩薩摩訶薩修行六種波羅蜜多時，不著色蘊，不著受想行識蘊；不著眼處，不著耳鼻舌身意處；不著色處，不著聲香味觸法處；不著眼界、色界、眼識界，不著耳界、聲界、耳識界，不著鼻界、香界、鼻識界，不著舌界、味界、舌識界，不著身界、觸界、身識界，不著意界、法界、意識界；不著苦聖諦，不著集滅道聖諦；不著無明，不著行、識、名色、六處、觸、受、愛、取、有、生、老死愁歎苦憂惱；不著四念住，不著四正斷、四神足、五根、五力、七等覺支、八聖道支；不著布施波羅蜜多，不著淨戒、安忍、精進、靜慮、般若波羅蜜多；不著佛十力，不著四無所畏、四無礙解、大慈大悲大喜大捨、十八不共法、一切智、道相智、一切相智；不著預流果，不著一來、不還、阿羅漢果，不著獨覺菩提，不著一切菩薩摩訶薩行，不著諸佛無上正等菩提。
- 舍利子！由是因緣，菩薩摩訶薩修行六種波羅蜜多增長熾盛，趣菩提道無能制者。

◎B6 修行不退之因，對治自輕懈怠：開示攝持大乘道精進之教授

舍利子！復有菩薩摩訶薩安住般若波羅蜜多，速能圓滿一切智智。成勝智故，常不墜墮諸險惡趣，不受下賤人天身，永不貧窮，所受身形，諸根具足，容顏端正，為諸天人、阿素洛等之所敬愛。」

- (11) B6 時舍利子白佛言：「世尊！何等名為菩薩摩訶薩所成勝智？」
- (12) 佛言：「舍利子！諸菩薩摩訶薩由成此智，盡見十方殑伽沙等諸佛世界一切如來應正等覺，盡聞彼佛所說正法，盡見彼會一切聲聞、菩薩僧等，亦見彼土莊嚴之相。諸菩薩摩訶薩由成此智，不起世界想，不起佛想，不起法想，不起聲聞僧想，不起菩薩僧想，不起獨覺想，不起我想，不起非我想，不起佛土莊嚴之想。諸菩薩摩訶薩由成此智，雖行布施波羅蜜多，而不得

布施波羅蜜多；雖行淨戒波羅蜜多，而不得淨戒波羅蜜多；雖行安忍波羅蜜多，而不得安忍波羅蜜多；雖行精進波羅蜜多，而不得精進波羅蜜多；雖行靜慮波羅蜜多，而不得靜慮波羅蜜多；雖行般若波羅蜜多，而不得般若波羅蜜多；雖行四念住，而不得四念住；乃至雖行八聖道支，而不得八聖道支；雖行佛十力，而不得佛十力；乃至雖行一切相智，而不得一切相智。舍利子！是名菩薩摩訶薩所成勝智。諸菩薩摩訶薩由成此智，速能圓滿一切佛法，雖知一切法，而不得一切法，以自性空故。

◎B7 於所修行能自在轉，不依仗他之因：開示五眼之教授

- a 能見百踰繕那乃至三千大千以內粗細眾色之肉眼；
- b 從昔有漏善業所感異熟而生，能如實見眾生生死之天眼；
- c 現證諸法無實之慧眼；
- d 能知一切聖者根性利鈍之法眼；
- e 能現觀一切諸法之佛眼。

B7 舍利子！復有菩薩摩訶薩修行般若波羅蜜多能淨五眼，所謂肉眼、天眼、慧眼、法眼、佛眼。」

- (13) a 時舍利子白佛言：「世尊！云何菩薩摩訶薩清淨肉眼？」
- (14) 佛言：「舍利子！有菩薩摩訶薩肉眼見百踰繕那，有菩薩摩訶薩肉眼見二百踰繕那，有菩薩摩訶薩肉眼見三百踰繕那，有菩薩摩訶薩肉眼見四百、五百、六百乃至千踰繕那，有菩薩摩訶薩肉眼見一瞻部洲，有菩薩摩訶薩肉眼見二大洲，有菩薩摩訶薩肉眼見三大洲，有菩薩摩訶薩肉眼見四大洲，有菩薩摩訶薩肉眼見小千世界，有菩薩摩訶薩肉眼見中千世界，有菩薩摩訶薩肉眼見三千大千世界。舍利子！是名菩薩摩訶薩清淨肉眼。」
- (15) b 時舍利子復白佛言：「世尊！云何菩薩摩訶薩清淨天眼？」
- (16) 佛言：「舍利子！菩薩摩訶薩天眼，見一切四大王眾天天眼所見，見一切三十三天、夜摩天、睹史多天、樂變化天、他化自在天天眼所見，見一切梵眾天天眼所見，乃至見一切色究竟天天眼所見。舍利子！有菩薩摩訶薩天眼所見，一切四大王眾天乃至色究竟天天眼所不能見。舍利子！諸菩薩摩訶薩天眼，能見十方殑伽沙等世界有情死此生彼。舍利子！是名菩薩摩訶薩清淨天眼。」
- (17) c 時舍利子復白佛言：「世尊！云何菩薩摩訶薩清淨慧眼？」

- (18) 佛言：「舍利子！菩薩摩訶薩慧眼，不見有法若有為若無為，若有漏若無漏，若世間若出世間，若有罪若無罪，若雜染若清淨，若有色若無色，若有對若無對，若過去若未來若現在，若欲界繫若色界繫若無色界繫，若善若不善若無記，若見所斷若修所斷若非所斷，若學若無學若非學非無學，乃至一切法若自性若差別。舍利子！是菩薩摩訶薩慧眼，不見有法是可見，是可聞，是可覺，是可識。舍利子！是名菩薩摩訶薩清淨慧眼。」
- (19) d 時舍利子復白佛言：「世尊！云何菩薩摩訶薩清淨法眼？」
- (20) 佛言：「舍利子！菩薩摩訶薩法眼，能如實知補特伽羅種種差別：此隨信行，此隨法行，此無相行；此住空，此住無相，此住無願；此由空解脫門起五根，由五根起無間定，由無間定起解脫智見，由解脫智見永斷三結，所謂薩迦耶見、戒禁取、疑，永斷此三結故，得預流果；此由修道，薄欲貪瞋恚，得一來果；此復由上品修道，永斷欲貪瞋恚，得不還果；此復由增上品修道，永斷五順上分結，所謂色貪、無色貪、無明、慢、掉舉，永斷此五順上分結故得阿羅漢果；此由無相解脫門起五根，由五根起無間定，乃至永斷五順上分結得阿羅漢果；此由無願解脫門起五根，由五根起無間定，乃至永斷五順上分結，得阿羅漢果；由二、由三，亦復如是。舍利子！是名菩薩摩訶薩清淨法眼。

復次，舍利子！菩薩摩訶薩法眼，能如實知所有集法皆是滅法，由知此故，便得五根。舍利子！是名菩薩摩訶薩清淨法眼。

復次，舍利子！菩薩摩訶薩法眼，能如實知此菩薩摩訶薩最初發心，修行布施波羅蜜多，乃至修行般若波羅蜜多，成就信根、精進根，方便善巧故，意受身增長善法。是菩薩摩訶薩或生刹帝利大族，或生婆羅門大族，或生長者大族，或生居士大族，或生四大王眾天，乃至或生他化自在天，住於彼處成就有情，隨諸有情心所愛樂，給施種種上妙樂具，嚴淨佛土，供養恭敬，尊重讚歎諸佛世尊，不墮聲聞、獨覺等地，乃至無上正等菩提終不退轉。舍利子！是名菩薩摩訶薩清淨法眼。

復次，舍利子！菩薩摩訶薩法眼，能如實知此菩薩摩訶薩於無上正等菩提已得受記，此菩薩摩訶薩於無上正等菩提未得受記；此菩薩摩訶薩於無上正等菩提已得不退，此菩薩摩訶薩於無上正等菩提未得不退；此菩薩摩訶薩已到不退轉地，此菩薩

摩訶薩未到不退轉地；此菩薩摩訶薩已圓滿神通，此菩薩摩訶薩未圓滿神通；此菩薩摩訶薩神通已圓滿故，能往十方殑伽沙等諸佛世界，供養恭敬，尊重讚歎諸佛世尊，此菩薩摩訶薩神通未圓滿故，不能往十方殑伽沙等諸佛世界，供養恭敬，尊重讚歎諸佛世尊；此菩薩摩訶薩已得神通，此菩薩摩訶薩未得神通；此菩薩摩訶薩已得無生法忍，此菩薩摩訶薩未得無生法忍；此菩薩摩訶薩已得勝根，此菩薩摩訶薩未得勝根；此菩薩摩訶薩已嚴淨佛土，此菩薩摩訶薩未嚴淨佛土；此菩薩摩訶薩已成熟有情，此菩薩摩訶薩未成熟有情；此菩薩摩訶薩已得大願，此菩薩摩訶薩未得大願；此菩薩摩訶薩已為諸佛稱譽，此菩薩摩訶薩未為諸佛稱譽；此菩薩摩訶薩已親近諸佛，此菩薩摩訶薩未親近諸佛；此菩薩摩訶薩壽命無量，此菩薩摩訶薩壽命有量；此菩薩摩訶薩得菩提時，苾芻僧無量，此菩薩摩訶薩得菩提時，苾芻僧有量；此菩薩摩訶薩得菩提時，有菩薩僧，此菩薩摩訶薩得菩提時，無菩薩僧；此菩薩摩訶薩專修利他行，此菩薩摩訶薩兼修自利行；此菩薩摩訶薩有難行苦行，此菩薩摩訶薩無難行苦行；此菩薩摩訶薩為一生所繫，此菩薩摩訶薩為多生所繫；此菩薩摩訶薩已住最後有，此菩薩摩訶薩未住最後有；此菩薩摩訶薩已坐妙菩提座，此菩薩摩訶薩未坐妙菩提座；此菩薩摩訶薩有魔來試，此菩薩摩訶薩無魔來試。舍利子！是名菩薩摩訶薩清淨法眼。」

- (21) e 時舍利子復白佛言：「世尊！云何菩薩摩訶薩清淨佛眼？」
- (22) 佛言：「舍利子！菩薩摩訶薩菩提心無間，入金剛喻定，得一切相智，成就佛十力、四無所畏、四無礙解、大慈大悲大喜大捨、十八不共法、無障無礙解脫佛眼。菩薩摩訶薩由此佛眼，超過一切聲聞、獨覺智慧境界，無所不見，無所不聞，無所不覺，無所不識，於一切法，見一切相。舍利子！是名菩薩摩訶薩清淨佛眼。」

舍利子！菩薩摩訶薩證阿耨多羅三藐三菩提時，乃得如是清淨佛眼。

舍利子！若菩薩摩訶薩欲得如是清淨五眼，當勤修習六到彼岸。所以者何？此六到彼岸摠攝一切善法，謂一切聲聞善法、獨覺善法、菩薩善法、如來善法。

舍利子！有問如來應正等覺：『以實而言，何法能攝一切善法？』佛正答言：『所謂般若波羅蜜多。』何以故？此般若波羅蜜多是一切善法之母，能生五波羅蜜多及五眼等諸功德故。舍利子！若菩薩摩訶薩欲得清淨五眼，當學般若波羅蜜多；若菩薩摩訶薩欲得阿耨多羅三藐三菩提，當學如是清淨五眼。舍利子！若菩薩摩訶薩能學如是清淨五眼，定得阿耨多羅三藐三菩提。

◎B8 於修行果能速圓滿廣大資糧之因：開示六通之教授

- 1 能轉變種種事之神變通；
- 2 能現知世界粗、細諸聲之天耳通；
- 3 能知他善、惡等心之他心通；
- 4 能知往昔受生之宿住隨念通；
- 5 能知世界粗、細諸色之天眼通；
- 6 永斷煩惱障之漏盡通。

B8 舍利子！復有菩薩摩訶薩修行般若波羅蜜多時，能引發六神通波羅蜜多，所謂神境智證通、天耳智證通、他心智證通、宿住隨念智證通、天眼智證通、漏盡智證通波羅蜜多。」

(23) 1 時舍利子白佛言：「世尊！云何菩薩摩訶薩修行般若波羅蜜多時，所引發神境智證通？」

(24) 佛言：「舍利子！有菩薩摩訶薩神境智證通，能起種種大神變事，所謂震動十方各如殞伽沙界大地等物，變一為多，變多為一，或隱或顯，迅速無礙，山崖墻壁直過如空，陵虛往來猶如飛鳥，地中出沒如出沒水，水上經行如經行地，身出煙焰如燎高原，體注眾流如銷雪嶺，日月神德威勢難當，以手按摩，光明隱蔽，乃至淨居轉身自在，如斯神變，其數無邊。

舍利子！此菩薩摩訶薩雖有如是神境智用，而於其中不自高舉，不著神境智證通性，不著神境智證通事，不著能得如是神境智證通者，於著不著俱無所著。何以故？自性空故，自性離故，自性本來不可得故。

舍利子！是菩薩摩訶薩不作是念：『我今引發神境智通，為自娛樂，唯除為得一切智智。』舍利子！是名菩薩摩訶薩修行般若波羅蜜多時，所引發神境智證通。」

(25) 2時舍利子復白佛言：「世尊！云何菩薩摩訶薩修行般若波羅蜜多時，所引發天耳智證通？」

(26) 佛言：「舍利子！有菩薩摩訶薩天耳智證通，最勝清淨，過人天耳，能如實聞十方各如殑伽沙界情非情類種種音聲，所謂遍聞一切地獄聲、傍生聲、鬼界聲、人聲、天聲、聲聞聲、獨覺聲、菩薩聲、諸佛聲、訶毀生死聲、讚歎涅槃聲、棄背有為聲、趣向菩提聲、厭惡有漏聲、欣樂無漏聲、稱揚三寶聲、制伏邪道聲、論議決擇聲、諷誦經典聲、勸斷惡法聲、令修善法聲、拔濟苦難聲、慶慰歡樂聲，如是等聲，若大若小，悉能遍聞，無障無礙。

舍利子！是菩薩摩訶薩雖有如是天耳作用，而於其中不自高舉，不著天耳智證通性，不著天耳智證通事，不著能得如是天耳智證通者，於著不著俱無所著。何以故？自性空故，自性離故，自性本來不可得故。

舍利子！是菩薩摩訶薩不作是念：『我今引發天耳智通，為自娛樂，唯除為得一切智智。』舍利子！是名菩薩摩訶薩修行般若波羅蜜多時，所引發天耳智證通。」

(27) 3時舍利子復白佛言：「世尊！云何菩薩摩訶薩修行般若波羅蜜多時，所引發他心智證通？」

(28) 佛言：「舍利子！有菩薩摩訶薩他心智證通，能如實知十方各如殑伽沙界他有情類心、心所法，所謂遍知他有情類，若有貪心，如實知有貪心，若離貪心，如實知離貪心；若有瞋心，如實知有瞋心，若離瞋心，如實知離瞋心；若有癡心，如實知有癡心，若離癡心，如實知離癡心；若有愛心，如實知有愛心，若離愛心，如實知離愛心；若有取心，如實知有取心，若離取心，如實知離取心；若聚心，如實知聚心，若散心，如實知散心；若小心，如實知小心，若大心，如實知大心；若舉心，如實知舉心，若下心，如實知下心；若寂靜心，如實知寂靜心，若不寂靜心，如實知不寂靜心；若掉心，如實知掉心，若不掉心，如實知不掉心；若定心，如實知定心，若不定心，如實知不定心；若解脫心，如實知解脫心，若不解脫心，如實知不解脫心；若有漏心，如實知有漏心，若無漏心，如實知無漏心；若有豐心，如實知有豐心，若無豐心，如實知無豐心；若有上心，如實知有上心，若無上心，如實知無上心。」

舍利子！是菩薩摩訶薩雖有如是他心智用，而於其中不自高舉，不著他心智證通性，不著他心智證通事，不著能得如是他心智證通者，於著不著俱無所著。何以故？自性空故，自性離故，自性本來不可得故。

舍利子！是菩薩摩訶薩不作是念：『我今引發他心智通，為自娛樂，唯除為得一切智智。』舍利子！是名菩薩摩訶薩修行般若波羅蜜多時，所引發他心智證通。」

大般若波羅蜜多經卷第四百五

(29) 4 時舍利子復白佛言：「世尊！云何菩薩摩訶薩修行般若波羅蜜多時，所引發宿住隨念智證通？」

(30) 佛言：「舍利子！有菩薩摩訶薩宿住隨念智證通，能如實念十方各如殑伽沙界一切有情諸宿住事，所謂隨念若自若他一心、十心、百心、千心、多百千心頃諸宿住事；或復隨念一日、十日、百日、千日、多百千日諸宿住事；或復隨念一月、十月、百月、千月、多百千月諸宿住事；或復隨念一年、十年、百年、千年、多百千年諸宿住事；或復隨念一劫、十劫、百劫、千劫、多百千劫乃至無量無數百千俱胝那庾多劫諸宿住事；或復隨念前際所有諸宿住事，謂如是時、如是處、如是名、如是姓、如是類、如是食、如是久住、如是壽限、如是長壽、如是受樂、如是受苦，從彼處沒，來生此間，從此間沒，往生彼處，如是狀貌，如是言說，若略若廣，若自若他，諸宿住事皆能隨念。舍利子！是菩薩摩訶薩雖有如是宿住智用，而於其中不自高舉，不著宿住隨念智證通性，不著宿住隨念智證通事，不著能得宿住隨念智證通者，於著不著俱無所著。何以故？自性空故，自性離故，自性本來不可得故。

舍利子！是菩薩摩訶薩不作是念：『我今引發宿住智通，為自娛樂，唯除為得一切智智。』舍利子！是名菩薩摩訶薩修行般若波羅蜜多時，所引發宿住隨念智證通。」

(31) 5 時舍利子復白佛言：「世尊！云何菩薩摩訶薩修行般若波羅蜜多時，所引發天眼智證通？」

(32) 佛言：「舍利子！有菩薩摩訶薩天眼智證通最勝清淨，過人天眼，能如實見十方各如殑伽沙界情非情類種種色像，所謂普見諸有情類死時生時、妙色麤色、善趣惡趣、若勝若劣，諸如是等種種色像。因此復知諸有情類隨業力用受生差別，如有情

成就身惡行，成就語惡行，成就意惡行，誹毀賢聖邪見因緣，身壞命終當墮惡趣，或生地獄，或生傍生，或生鬼界，或生邊地下賤悖惡有情類中，受諸苦惱。如有有情成就身妙行，成就語妙行，成就意妙行，讚美賢聖正見因緣，身壞命終當昇善趣，或生天上，或生人中，受諸快樂。如有有情種種業類，受果差別皆如實知。

舍利子！是菩薩摩訶薩雖有如是天眼作用，而於其中不自高舉，不著天眼智證通性，不著天眼智證通事，不著能得如是天眼智證通者，於著不著俱無所著。何以故？自性空故，自性離故，自性本來不可得故。

舍利子！是菩薩摩訶薩不作是念：『我今引發天眼智通，為自娛樂，唯除為得一切智智。』舍利子！是名菩薩摩訶薩修行般若波羅蜜多時，所引發天眼智證通。」

(33) 6時舍利子復白佛言：「世尊！云何菩薩摩訶薩修行般若波羅蜜多時，所引發漏盡智證通？」

(34) 佛言：「舍利子！有菩薩摩訶薩漏盡智證通，能如實知十方各如殑伽沙界一切有情，若自若他，漏盡不盡。此通依止金剛喻定，斷諸障習，方得圓滿，得不退轉菩薩地時，於一切漏亦名為盡，畢竟不起，現在前故。菩薩雖得此漏盡通，不墮聲聞、獨覺之地，唯趣無上正等菩提，不復希求餘義利故。

舍利子！是菩薩摩訶薩雖有如是漏盡智用，而於其中不自高舉，不著漏盡智證通性，不著漏盡智證通事，不著能得如是漏盡智證通者，於著不著俱無所著。何以故？自性空故，自性離故，自性本來不可得故。

舍利子！是菩薩摩訶薩不作是念：『我今引發漏盡智通，為自娛樂，唯除為得一切智智。』舍利子！是名菩薩摩訶薩修行般若波羅蜜多時，所引發漏盡智證通。

舍利子！菩薩摩訶薩修行般若波羅蜜多時，能圓滿清淨六神通波羅蜜多，由此六神通波羅蜜多圓滿清淨故，便證無上正等菩提。……（中略：[無等等品第四](#)；[舌根相品第五](#)）

大般若波羅蜜多經卷第四百六 [善現品第六](#)

◎B9 令了知須斷見惑種子：開示見道之教授

- (35) B9 爾時，佛告尊者善現：「汝以辯才應為菩薩摩訶薩眾宣說般若波羅蜜多相應之法，教誡教授諸菩薩摩訶薩，令於般若波羅蜜多皆得成辦。」
- (36) 時諸菩薩摩訶薩眾及大聲聞、諸天人等，咸作是念：「尊者善現為自辯才，當為菩薩摩訶薩眾宣說般若波羅蜜多相應之法，教誡教授諸菩薩摩訶薩，令於般若波羅蜜多皆得成辦？為當承佛威神力耶？」
- (37) 尊者善現知諸菩薩摩訶薩眾及大聲聞、諸天人等心之所念，便告尊者舍利子言：「諸佛弟子凡有所說，一切皆承佛威神力。何以故？舍利子！如來為他宣說法要，與諸法性常不相違，諸佛弟子依所說法，精勤修學，證法實性，由是為他有所宣說，皆與法性能不相違，故佛所言，如燈傳照。舍利子！我當承佛威神加被，為諸菩薩摩訶薩眾宣說般若波羅蜜多相應之法，教誡教授諸菩薩摩訶薩，令於般若波羅蜜多皆得成辦，非自辯才能為斯事。何以故？舍利子！甚深般若波羅蜜多非諸聲聞、獨覺境故。」
- (38) 爾時，尊者善現白佛言：「世尊！如佛所說諸菩薩摩訶薩，此中何法名為菩薩摩訶薩？世尊！我都不見有一法可名菩薩摩訶薩，亦都不見有一法可名般若波羅蜜多，如是二名我亦不見，云何令我為諸菩薩摩訶薩眾宣說般若波羅蜜多相應之法，教誡教授諸菩薩摩訶薩，令於般若波羅蜜多皆得成辦？」
- (39) 佛告善現：「菩薩摩訶薩唯有名，般若波羅蜜多唯有名，如是二名，亦唯有名。善現！此之三名，不生不滅，唯假施設，不在內不在外不在兩間，不可得故。
善現當知！如世間我，唯有假名，如是名假，不生不滅，唯假施設，謂之為我；如是有情、命者、生者、養者、士夫、補特伽羅、意生、儒童、作者、受者、知者、見者，亦唯有假名，如是名假，不生不滅，唯假施設，謂為有情乃至見者。如是一切，唯有假名，此諸假名，不在內不在外不在兩間，不可得故。
如是，善現！若菩薩摩訶薩、若般若波羅蜜多、若此二名，皆是假法，如是假法，不生不滅，唯假施設，不在內不在外不在兩間，不可得故。

復次，善現！如內諸色，唯是假法，如是法假，不生不滅，唯假施設，謂之為色；如是受想行識，亦唯是假法，如是法假，不生不滅，唯假施設，謂為受想行識。如是一切，唯有假名，此諸假名，不在內不在外不在兩間，不可得故。如是，善現！若菩薩摩訶薩、若般若波羅蜜多、若此二名，皆是假法，如是假法，不生不滅，唯假施設，不在內不在外不在兩間，不可得故。

復次，善現！譬如眼處，唯是假法，如是法假，不生不滅，唯假施設，謂為眼處；如是耳鼻舌身意處，亦唯是假法，如是法假，不生不滅，唯假施設，謂為耳鼻舌身意處。如是一切，唯有假名，此諸假名，不在內不在外不在兩間，不可得故。如是，善現！若菩薩摩訶薩、若般若波羅蜜多、若此二名，皆是假法，如是假法，不生不滅，唯假施設，不在內不在外不在兩間，不可得故。

復次，善現！譬如色處，唯是假法，如是法假，不生不滅，唯假施設，謂為色處；如是聲香味觸法處，亦唯是假法，如是法假，不生不滅，唯假施設，謂為聲香味觸法處。如是一切，唯有假名，此諸假名，不在內不在外不在兩間，不可得故。如是，善現！若菩薩摩訶薩、若般若波羅蜜多、若此二名，皆是假法，如是假法，不生不滅，唯假施設，不在內不在外不在兩間，不可得故。

復次，善現！譬如眼界、色界、眼識界，唯是假法，如是假法，不生不滅，唯假施設，謂為眼界、色界、眼識界；如是耳界、聲界、耳識界，鼻界、香界、鼻識界，舌界、味界、舌識界，身界、觸界、身識界，意界、法界、意識界，亦唯是假法，如是法假，不生不滅，唯假施設，謂為耳界、聲界、耳識界乃至意界、法界、意識界。如是一切，唯有假名，此諸假名，不在內不在外不在兩間，不可得故。如是，善現！若菩薩摩訶薩、若般若波羅蜜多、若此二名，皆是假法，如是假法，不生不滅，唯假施設，不在內不在外不在兩間，不可得故。

復次，善現！譬如內身所有頭頸、肩膊、手臂、腹背、胸脅、腰脊、求膝、板脛、足等皮肉骨髓，唯有假名，如是名假，不生不滅，唯假施設，謂為內身頭頸等物。如是一切，唯有假名，此諸假名，不在內不在外不在兩間，不可得故。如是，善現！

若菩薩摩訶薩、若般若波羅蜜多、若此二名，皆是假法，如是假法，不生不滅，唯假施設，不在內不在外不在兩間，不可得故。

復次，善現！譬如外事所有草木、根莖、枝葉及花果等，唯有假名，如是名假，不生不滅，唯假施設，謂為外事草木根等。如是一切，唯有假名，此諸假名，不在內不在外不在兩間，不可得故。如是，善現！若菩薩摩訶薩、若般若波羅蜜多、若此二名，皆是假法，如是假法，不生不滅，唯假施設，不在內不在外不在兩間，不可得故。

復次，善現！譬如過去未來諸佛，唯有假名，如是名假，不生不滅，唯假施設，謂為過去未來諸佛。如是一切，唯有假名，此諸假名，不在內不在外不在兩間，不可得故。如是，善現！若菩薩摩訶薩、若般若波羅蜜多、若此二名，皆是假法，如是假法，不生不滅，唯假施設，不在內不在外不在兩間，不可得故。

復次，善現！譬如夢境、谷響、光影、幻事、陽燄、水月、變化，唯有假名，如是名假，不生不滅，唯假施設，謂為夢境乃至變化。如是一切，唯有假名，此諸假名，不在內不在外不在兩間，不可得故。如是，善現！若菩薩摩訶薩、若般若波羅蜜多、若此二名，皆是假法，如是假法，不生不滅，唯假施設，不在內不在外不在兩間，不可得故。如是，善現！諸菩薩摩訶薩修行般若波羅蜜多時，於一切法名假、法假及方便假，應正修學。所以者何？善現！修行般若波羅蜜多諸菩薩摩訶薩，不應觀色名若常若無常，不應觀受想行識名若常若無常；不應觀色名若樂若苦，不應觀受想行識名若樂若苦；不應觀色名若我若無我，不應觀受想行識名若我若無我；不應觀色名若淨若不淨，不應觀受想行識名若淨若不淨；不應觀色名若空若不空，不應觀受想行識名若空若不空；不應觀色名若有相若無相，不應觀受想行識名若有相若無相；不應觀色名若有願若無願，不應觀受想行識名若有願若無願；不應觀色名若寂靜若不寂靜，不應觀受想行識名若寂靜若不寂靜；不應觀色名若遠離若不遠離，不應觀受想行識名若遠離若不遠離；不應觀色名若雜染若清淨，不應觀受想行識名若雜染若清淨；不應觀色名若生若滅，不應觀受想行識名若生若滅。…

不應觀眼界名若常若無常，不應觀法界、意識界及意觸、意觸為緣所生諸受名若常若無常；不應觀眼界名若樂若苦，不應觀法界乃至意觸為緣所生諸受名若樂若苦；不應觀眼界名若我若無我，不應觀法界乃至意觸為緣所生諸受名若我若無我；不應觀眼界名若淨若不淨，不應觀法界乃至意觸為緣所生諸受名若淨若不淨；不應觀眼界名若空若不空，不應觀法界乃至意觸為緣所生諸受名若空若不空；不應觀眼界名若有相若無相，不應觀法界乃至意觸為緣所生諸受名若有相若無相；不應觀眼界名若有願若無願，不應觀法界乃至意觸為緣所生諸受名若有願若無願；不應觀眼界名若寂靜若不寂靜，不應觀法界乃至意觸為緣所生諸受名若寂靜若不寂靜；不應觀眼界名若遠離若不遠離，不應觀法界乃至意觸為緣所生諸受名若遠離若不遠離；不應觀眼界名若雜染若清淨，不應觀法界乃至意觸為緣所生諸受名若雜染若清淨；不應觀眼界名若生若滅，不應觀法界乃至意觸為緣所生諸受名若生若滅。所以者何？善現！是菩薩摩訶薩修行般若波羅蜜多時，若菩薩摩訶薩、若菩薩摩訶薩名、若般若波羅蜜多、若般若波羅蜜多名，皆不見在有為界中，亦不見在無為界中。何以故？善現！是菩薩摩訶薩修行般若波羅蜜多時，於一切法不作分別，無異分別。善現！是菩薩摩訶薩修行般若波羅蜜多時，住一切法無分別中，不見菩薩摩訶薩，不見菩薩摩訶薩名，不見般若波羅蜜多，不見般若波羅蜜多名。善現！是菩薩摩訶薩修行般若波羅蜜多時，能修布施波羅蜜多，亦能修淨戒、安忍、精進、靜慮、般若波羅蜜多；能住內空，亦能住外空、內外空、空空、大空、勝義空、有為空、無為空、畢竟空、無際空、散空、無變異空、本性空、自相空、共相空、一切法空、不可得空、無性空、自性空、無性自性空；能住真如，亦能住法界、法性、不虛妄性、不變異性、平等性、離生性、法定、法住、實際、虛空界、不思議界；能修四念住，亦能修四正斷、四神足、五根、五力、七等覺支、八聖道支；能住苦聖諦，亦能住集滅道聖諦；能修四靜慮，亦能修四無量、四無色定；能修八解脫，亦能修八勝處、九次第定、十遍處；能修空解脫門，亦能修無相、無願解脫門；能修一切陀羅尼門，亦能修一切三摩地門；能修五眼，亦能修六神通；能修佛十力，亦能修四無所畏、四無礙解、大慈大悲大喜大捨、十八不共

法。是菩薩摩訶薩於如是時，不見菩薩摩訶薩，不見菩薩摩訶薩名，不見般若波羅蜜多，不見般若波羅蜜多名。何以故？善現！是菩薩摩訶薩修行般若波羅蜜多，於一切法善達實相，善達其中無雜染法、清淨法故。

如是，善現！諸菩薩摩訶薩修行般若波羅蜜多，覺一切法名假施設、法假施設。善現！是菩薩摩訶薩於名、法假如實覺已，不執著色，不執著受想行識；不執著眼處，不執著耳鼻舌身意處；不執著色處，不執著聲香味觸法處；不執著眼界、色界、眼識界及眼觸、眼觸為緣所生諸受，乃至不執著眼界、法界、意識界及意觸、意觸為緣所生諸受；不執著有為界，不執著無為界；不執著布施波羅蜜多，不執著淨戒、安忍、精進、靜慮、般若波羅蜜多；不執著諸相好，不執著菩薩身，不執著肉眼乃至佛眼，不執著智波羅蜜多及神通波羅蜜多，不執著內空乃至無性自性空，不執著成熟有情，不執著嚴淨佛土，不執著方便善巧。何以故？善現！以一切法皆無所有，能著、所著、著處、著時不可得故。

如是，善現！諸菩薩摩訶薩於一切法無所執著，修行般若波羅蜜多時，增益布施波羅蜜多，增益淨戒、安忍、精進、靜慮、般若波羅蜜多，趣入菩薩正性離生，趣入菩薩不退轉地，圓滿菩薩殊勝神通。如是菩薩殊勝神通得圓滿已，從一佛土趣一佛土，為欲成熟諸有情故，為欲嚴淨自佛土故，為見如來應正等覺；及為見已，供養恭敬，尊重讚歎，令諸善根皆得生長；如是善根得生長已，隨所樂聞，諸佛正法皆得聽受；既聽受已，乃至無上正等菩提能不忘失，普於一切陀羅尼門、三摩地門皆得自在。如是，善現！諸菩薩摩訶薩修行般若波羅蜜多，如實覺知名假、法假，無所執著。

- (40) 復次，善現！所言菩薩摩訶薩者，於意云何？即色是菩薩摩訶薩不？」「不也，世尊！」
- (41) 「即受想行識是菩薩摩訶薩不？」「不也，世尊！」
- (42) 「離色有菩薩摩訶薩不？」「不也，世尊！」
- (43) 「離受想行識有菩薩摩訶薩不？」「不也，世尊！」…
- (44) 爾時，佛告尊者善現：「汝觀何義，作如是言：即色等法非菩薩摩訶薩，離色等法無菩薩摩訶薩耶？」

- (45) 時尊者善現白佛言：「世尊！若菩提、若薩埵、若色等法，尚畢竟不可得，性非有故，況有菩薩摩訶薩。此既非有，如何可言即色等法是菩薩摩訶薩，離色等法有菩薩摩訶薩？」
- (46) 佛告善現：「善哉！善哉！如是！如是！如汝所說。善現！若菩提、若薩埵、若色等法不可得故，諸菩薩摩訶薩亦不可得；諸菩薩摩訶薩不可得故，所行般若波羅蜜多亦不可得。善現！諸菩薩摩訶薩修行般若波羅蜜多時，應如是學。」
- (47) 復次，善現！所言菩薩摩訶薩者，於意云何？即色真如是菩薩摩訶薩不？」「不也，世尊！」
- (48) 「即受想行識真如是菩薩摩訶薩不？」「不也，世尊！」
- (49) 「離色真如有菩薩摩訶薩不？」「不也，世尊！」
- (50) 「離受想行識真如有菩薩摩訶薩不？」「不也，世尊！」…
- (51) 爾時，佛告尊者善現：「汝觀何義，作如是言：即色等法真如非菩薩摩訶薩，離色等法真如無菩薩摩訶薩耶？」
- (52) 時尊者善現白佛言：「世尊！色等法尚畢竟不可得，性非有故，況有色等法真如。此真如既非有，如何可言即色等法真如是菩薩摩訶薩，離色等法真如有菩薩摩訶薩？」
- (53) 佛告善現：「善哉！善哉！如是！如是！如汝所說。善現！色等法不可得故，色等法真如亦不可得；色等法及真如不可得故，諸菩薩摩訶薩亦不可得；諸菩薩摩訶薩不可得故，所行般若波羅蜜多亦不可得。善現！諸菩薩摩訶薩修行般若波羅蜜多時，應如是學。」

大般若波羅蜜多經卷第四百七

- (54) 「復次，善現！所言菩薩摩訶薩者，於意云何？色增語是菩薩摩訶薩不？」「不也，世尊！」
- (55) 「受想行識增語是菩薩摩訶薩不？」「不也，世尊！」
- (56) 「色常增語是菩薩摩訶薩不？」「不也，世尊！」
- (57) 「受想行識常增語是菩薩摩訶薩不？」「不也，世尊！」
- (58) 「色無常增語是菩薩摩訶薩不？」「不也，世尊！」
- (59) 「受想行識無常增語是菩薩摩訶薩不？」「不也，世尊！」
- (60) 「色樂增語是菩薩摩訶薩不？」「不也，世尊！」
- (61) 「受想行識樂增語是菩薩摩訶薩不？」「不也，世尊！」
- (62) 「色苦增語是菩薩摩訶薩不？」「不也，世尊！」
- (63) 「受想行識苦增語是菩薩摩訶薩不？」「不也，世尊！」

- (64) 「色我增語是菩薩摩訶薩不？」「不也，世尊！」
- (65) 「受想行識我增語是菩薩摩訶薩不？」「不也，世尊！」
- (66) 「色無我增語是菩薩摩訶薩不？」「不也，世尊！」
- (67) 「受想行識無我增語是菩薩摩訶薩不？」「不也，世尊！」
- (68) 「色淨增語是菩薩摩訶薩不？」「不也，世尊！」
- (69) 「受想行識淨增語是菩薩摩訶薩不？」「不也，世尊！」
- (70) 「色不淨增語是菩薩摩訶薩不？」「不也，世尊！」
- (71) 「受想行識不淨增語是菩薩摩訶薩不？」「不也，世尊！」
- (72) 「色空增語是菩薩摩訶薩不？」「不也，世尊！」
- (73) 「受想行識空增語是菩薩摩訶薩不？」「不也，世尊！」
- (74) 「色不空增語是菩薩摩訶薩不？」「不也，世尊！」
- (75) 「受想行識不空增語是菩薩摩訶薩不？」「不也，世尊！」
- (76) 「色有相增語是菩薩摩訶薩不？」「不也，世尊！」
- (77) 「受想行識有相增語是菩薩摩訶薩不？」「不也，世尊！」
- (78) 「色無相增語是菩薩摩訶薩不？」「不也，世尊！」
- (79) 「受想行識無相增語是菩薩摩訶薩不？」「不也，世尊！」
- (80) 「色有願增語是菩薩摩訶薩不？」「不也，世尊！」
- (81) 「受想行識有願增語是菩薩摩訶薩不？」「不也，世尊！」
- (82) 「色無願增語是菩薩摩訶薩不？」「不也，世尊！」
- (83) 「受想行識無願增語是菩薩摩訶薩不？」「不也，世尊！」
- (84) 「色寂靜增語是菩薩摩訶薩不？」「不也，世尊！」
- (85) 「受想行識寂靜增語是菩薩摩訶薩不？」「不也，世尊！」
- (86) 「色不寂靜增語是菩薩摩訶薩不？」「不也，世尊！」
- (87) 「受想行識不寂靜增語是菩薩摩訶薩不？」「不也，世尊！」
- (88) 「色遠離增語是菩薩摩訶薩不？」「不也，世尊！」
- (89) 「受想行識遠離增語是菩薩摩訶薩不？」「不也，世尊！」
- (90) 「色不遠離增語是菩薩摩訶薩不？」「不也，世尊！」
- (91) 「受想行識不遠離增語是菩薩摩訶薩不？」「不也，世尊！」
- (92) 「色雜染增語是菩薩摩訶薩不？」「不也，世尊！」
- (93) 「受想行識雜染增語是菩薩摩訶薩不？」「不也，世尊！」
- (94) 「色清淨增語是菩薩摩訶薩不？」「不也，世尊！」
- (95) 「受想行識清淨增語是菩薩摩訶薩不？」「不也，世尊！」
- (96) 「色生增語是菩薩摩訶薩不？」「不也，世尊！」
- (97) 「受想行識生增語是菩薩摩訶薩不？」「不也，世尊！」

(98) 「色滅增語是菩薩摩訶薩不？」 「不也，世尊！」

(99) 「受想行識滅增語是菩薩摩訶薩不？」 「不也，世尊！」…

大般若波羅蜜多經卷第四百八

(01) 爾時，佛告具壽善現：「汝觀何義，作如是言：色等法增語非菩薩摩訶薩？復觀何義，作如是言：色等法若常若無常增語、若樂若苦增語、若我若無我增語、若淨若不淨增語、若空若不空增語、若有相若無相增語、若有願若無願增語、若寂靜若不寂靜增語、若遠離若不遠離增語、若雜染若清淨增語、若生若滅增語，亦非菩薩摩訶薩耶？」

(02) 時具壽善現白佛言：「世尊！色等法尚畢竟不可得，性非有故，況有色等法增語。此增語既非有，如何可言色等法增語是菩薩摩訶薩？」

世尊！色等法常尚畢竟不可得，性非有故，況有色等法無常。色等法常無常尚畢竟不可得，況有色等法常無常增語。此增語既非有，如何可言色等法常無常增語是菩薩摩訶薩？」

世尊！色等法樂尚畢竟不可得，性非有故，況有色等法苦。色等法樂苦尚畢竟不可得，況有色等法樂苦增語。此增語既非有，如何可言色等法樂苦增語是菩薩摩訶薩？」

世尊！色等法我尚畢竟不可得，性非有故，況有色等法無我。色等法我無我尚畢竟不可得，況有色等法我無我增語。此增語既非有，如何可言色等法我無我增語是菩薩摩訶薩？」

世尊！色等法淨尚畢竟不可得，性非有故，況有色等法不淨。色等法淨不淨尚畢竟不可得，況有色等法淨不淨增語。此增語既非有，如何可言色等法淨不淨增語是菩薩摩訶薩？」

世尊！色等法不空尚畢竟不可得，性非有故，況有色等法空。色等法空不空尚畢竟不可得，況有色等法空不空增語。此增語既非有，如何可言色等法空不空增語是菩薩摩訶薩？」

世尊！色等法有相尚畢竟不可得，性非有故，況有色等法無相。色等法有相無相尚畢竟不可得，況有色等法有相無相增語。此增語既非有，如何可言色等法有相無相增語是菩薩摩訶薩？」

世尊！色等法有願尚畢竟不可得，性非有故，況有色等法無願。色等法有願無願尚畢竟不可得，況有色等法有願無願增

語。此增語既非有，如何可言色等法有願無願增語是菩薩摩訶薩？

世尊！色等法寂靜尚畢竟不可得，性非有故，況有色等法不寂靜。色等法寂靜不寂靜尚畢竟不可得，況有色等法寂靜不寂靜增語。此增語既非有，如何可言色等法寂靜不寂靜增語是菩薩摩訶薩？

世尊！色等法遠離尚畢竟不可得，性非有故，況有色等法不遠離。色等法遠離不遠離尚畢竟不可得，況有色等法遠離不遠離增語。此增語既非有，如何可言色等法遠離不遠離增語是菩薩摩訶薩？

世尊！色等法雜染尚畢竟不可得，性非有故，況有色等法清淨。色等法雜染清淨尚畢竟不可得，況有色等法雜染清淨增語。此增語既非有，如何可言色等法雜染清淨增語是菩薩摩訶薩？

世尊！色等法生尚畢竟不可得，性非有故，況有色等法滅。色等法生滅尚畢竟不可得，況有色等法生滅增語。此增語既非有，如何可言色等法生滅增語是菩薩摩訶薩？」

(03) 佛言：「善現！善哉！善哉！如是！如是！如汝所說。善現！色等法及常無常等不可得故，色等法增語及常無常等增語亦不可得，法及增語不可得故，諸菩薩摩訶薩亦不可得，諸菩薩摩訶薩不可得故，所行般若波羅蜜多亦不可得。善現！諸菩薩摩訶薩修行般若波羅蜜多時，應如是學。

復次，善現！汝先所言『我都不見有一法可名菩薩摩訶薩』者，如是！如是！如汝所說。善現！諸法不見諸法，諸法不見法界；法界不見諸法，法界不見法界。

善現！法界不見色界，色界不見法界；法界不見受想行識界，受想行識界不見法界。善現！法界不見眼處，眼處不見法界；法界不見耳鼻舌身意處，耳鼻舌身意處不見法界。善現！法界不見色處，色處不見法界；法界不見聲香味觸法處，聲香味觸法處不見法界。

善現！法界不見眼界，眼界不見法界；法界不見耳鼻舌身意界，耳鼻舌身意界不見法界。善現！法界不見色界，色界不見法界；法界不見聲香味觸法界，聲香味觸法界不見法界。善現！

法界不見眼識界，眼識界不見法界；法界不見耳鼻舌身意識界，耳鼻舌身意識界不見法界。

善現！法界不見地界，地界不見法界；法界不見水火風空識界，水火風空識界不見法界。善現！法界不見無明，無明不見法界；法界不見行、識、名色、六處、觸、受、愛、取、有、生、老死，行乃至老死不見法界。

◎B10 令了知須斷修惑種子：開示修道之教授

B10 善現！有為界不見無為界，無為界不見有為界。

善現！非離有為施設無為，非離無為施設有為。

如是，善現！諸菩薩摩訶薩修行般若波羅蜜多時，於一切法都無所見；無所見故，其心不驚不恐不怖，於一切法心不沈沒，亦不憂悔。何以故？善現！是菩薩摩訶薩如是修行甚深般若波羅蜜多時，不見色，不見受想行識；不見眼處，不見耳鼻舌身意處；不見色處，不見聲香味觸法處；不見眼界，不見耳鼻舌身意界；不見色界，不見聲香味觸法界；不見眼識界，不見耳鼻舌身意識界；不見地界，不見水火風空識界；不見無明，不見行、識、名色、六處、觸、受、愛、取、有、生、老死；不見貪欲，不見瞋恚愚癡；不見我，不見有情、命者、生者、養者、士夫、補特伽羅、意生、儒童、作者、受者、知者、見者；不見欲界，不見色無色界；不見聲聞及聲聞法；不見獨覺及獨覺法；不見菩薩及菩薩法；不見諸佛及諸佛法；不見無上正等菩提。如是，善現！諸菩薩摩訶薩於一切法都無所見；無所見故，其心不驚不恐不怖，於一切法心不沈沒，亦不憂悔。」

(04) 爾時，具壽善現白佛言：「世尊！復何因緣，諸菩薩摩訶薩修行般若波羅蜜多時，於一切法心不沈沒，亦不憂悔？」

(05) 佛告善現：「諸菩薩摩訶薩修行般若波羅蜜多時，普於一切心、心所法不得不見，由是因緣，於一切法心不沈沒，亦不憂悔。」

(06) 具壽善現復白佛言：「世尊！諸菩薩摩訶薩修行般若波羅蜜多時，何因緣故，於一切法其心不驚不恐不怖？」

(07) 佛告善現：「諸菩薩摩訶薩修行般若波羅蜜多時，普於一切意及境界不得不見。

如是，善現！諸菩薩摩訶薩修行般若波羅蜜多時，於一切法其心不驚不恐不怖。

復次，善現！諸菩薩摩訶薩於一切法都無所得，應行般若波羅蜜多。

復次，善現！諸菩薩摩訶薩修行般若波羅蜜多時，於一切處及一切時，不得般若波羅蜜多，不得般若波羅蜜多名；不得菩薩摩訶薩，不得菩薩摩訶薩名，亦不得菩薩摩訶薩心。

善現！應如是教誡教授諸菩薩摩訶薩，令於般若波羅蜜多皆得成辦。」

入離生品第七

(01) 爾時，具壽善現白佛言：「世尊！若菩薩摩訶薩 1 欲圓滿布施波羅蜜多，當學般若波羅蜜多；欲圓滿淨戒、安忍、精進、靜慮、般若波羅蜜多，當學般若波羅蜜多。

○若菩薩摩訶薩 2 欲遍知色，當學般若波羅蜜多；欲遍知受想行識，當學般若波羅蜜多。

○若菩薩摩訶薩 3 欲遍知眼處，當學般若波羅蜜多；欲遍知耳鼻舌身意處，當學般若波羅蜜多。

○若菩薩摩訶薩 4 欲遍知色處，當學般若波羅蜜多；欲遍知聲香味觸法處，當學般若波羅蜜多。

○若菩薩摩訶薩 5 欲遍知眼界，當學般若波羅蜜多；欲遍知耳鼻舌身眼界，當學般若波羅蜜多。

○若菩薩摩訶薩 6 欲遍知色界，當學般若波羅蜜多；欲遍知聲香味觸法界，當學般若波羅蜜多。

○若菩薩摩訶薩 7 欲遍知眼識界，當學般若波羅蜜多；欲遍知耳鼻舌身意識界，當學般若波羅蜜多。

○若菩薩摩訶薩 8 欲遍知眼觸，當學般若波羅蜜多；欲遍知耳鼻舌身意觸，當學般若波羅蜜多。

○若菩薩摩訶薩 9 欲遍知眼觸為緣所生諸受，當學般若波羅蜜多；欲遍知耳鼻舌身意觸為緣所生諸受，當學般若波羅蜜多。

○若菩薩摩訶薩 10 欲遍知地界，當學般若波羅蜜多；欲遍知水火風空識界，當學般若波羅蜜多。

○若菩薩摩訶薩 11 欲遍知無明，當學般若波羅蜜多；欲遍知行、識、名色、六處、觸、受、愛、取、有、生、老死，當學般若波羅蜜多。

- 若菩薩摩訶薩 12 欲永斷貪欲、瞋恚、愚癡，當學般若波羅蜜多。
- 若菩薩摩訶薩 13 欲永斷薩迦耶見、戒禁取、疑、欲貪、瞋恚，當學般若波羅蜜多。
- 若菩薩摩訶薩 14 欲永斷色貪、無色貪、無明、慢、掉舉，當學般若波羅蜜多。
- 若菩薩摩訶薩 15 欲永斷一切隨眠、纏、結，當學般若波羅蜜多。
- 若菩薩摩訶薩 16 欲永斷四食，當學般若波羅蜜多。
- 若菩薩摩訶薩 17 欲永斷四暴流、軛、取、身繫、顛倒，當學般若波羅蜜多。
- 若菩薩摩訶薩 18 欲遠離十不善業道，當學般若波羅蜜多。
- 若菩薩摩訶薩 19 欲受行十善業道，當學般若波羅蜜多。
- 若菩薩摩訶薩 20 欲修行四靜慮，當學般若波羅蜜多；欲修行四無量、四無色定，當學般若波羅蜜多。
- 若菩薩摩訶薩 21 欲修行四念住，當學般若波羅蜜多；欲修行四正斷、四神足、五根、五力、七等覺支、八聖道支，當學般若波羅蜜多。
- 若菩薩摩訶薩 22 欲得佛十力，當學般若波羅蜜多；欲得四無所畏、四無礙解、大慈大悲大喜大捨、十八不共法，當學般若波羅蜜多。
- 若菩薩摩訶薩 23 欲自在入覺支三摩地，當學般若波羅蜜多。
- 若菩薩摩訶薩 24 欲自在遊戲六種神通，當學般若波羅蜜多。
- 若菩薩摩訶薩 25 欲於四靜慮、四無色、滅盡定次第超越，順逆自在，當學般若波羅蜜多。
- 若菩薩摩訶薩 26 欲於一切陀羅尼門、三摩地門皆得自在，當學般若波羅蜜多。
- 若菩薩摩訶薩 27 欲於一切師子遊戲三摩地乃至師子奮迅三摩地入出自在，當學般若波羅蜜多。
- 若菩薩摩訶薩 28 欲於入出健行三摩地、寶印三摩地、妙月三摩地、月幢相三摩地、一切法印三摩地、觀印三摩地、法界決定三摩地、決定幢相三摩地、金剛喻三摩地、入一切法門三摩地、三摩地王三摩地、王印三摩地、力清淨三摩地、寶篋三摩地、入一切法言詞決定三摩地、入一切法增語三摩地、觀察十

方三摩地、一切法陀羅尼門印三摩地、一切法無忘失三摩地、一切法等趣行相印三摩地、住虛空處三摩地、三輪清淨三摩地、不退神通三摩地、器涌三摩地、勝定幢相三摩地及餘無量勝三摩地，皆得自在，當學般若波羅蜜多。

○若菩薩摩訶薩 29 欲滿一切有情所願，當學般若波羅蜜多。

【第 3 義】：大乘加行道＝大乘順決擇分（I-3）

所緣及行相，因緣并攝持，菩薩救世者，如煖等體性。

依具四分別，分下中上品，勝出諸聲聞，及以諸麟喻。

◎菩薩救護世者之加行道暖等四位，由所緣、行相、因緣、攝持，如世間道自性依止四種分別，並分下、中、上三品差別，勝出聲聞及獨覺之加行道也。

一、[釋煖等前三勝法]

（煖）D1a 所緣無常等，是四諦等相，行相破著等，是得三乘因。D1b 色等離聚散住 D1c 假立無說。

（頂）D2a 色等不安住，其體無自性。彼等自性一，不住無常等，彼等彼性空，彼等自性一。D2b 不執著諸法，不見彼相故，D2c 智慧所觀察，一切無所得。

（忍）D3a 色等無自性，彼無即為性，D3b 無生無出離清淨及 D3c 無相，由不依彼相，非勝解無想。

（世第一）D4a 正定定作用，D4b 授記盡執著。D4c 三互為一性，正定不分別。

是順決擇分，下中上三品。

◎D1a 初暖位中，下品暖之所緣，謂無常等四諦之十六種相。

其行相謂於四諦十六相上，破除實有執著之暖下品智。

○若菩薩摩訶薩欲滿如是殊勝善根，由此善根得圓滿故，不墮諸惡趣，不生貧賤家，不墮聲聞及獨覺地，於菩薩頂終不退墮，當學般若波羅蜜多。」

（02）爾時，舍利子問善現言：「云何名為菩薩頂墮？」

（03）善現答言：「若諸菩薩無方便善巧而行六波羅蜜多，無方便善巧而住三解脫門，退墮聲聞或獨覺地，不入菩薩正性離生，如是名為菩薩頂墮。」

（04）時舍利子問善現言：「何者名生？」

- (05) 善現對曰：「生謂法愛。」
- (06) D1a 舍利子言：「何謂法愛？」
- (07) 善現對曰：「若菩薩摩訶薩修行般若波羅蜜多，安住色空而起想著，安住受想行識空而起想著；
安住色無相而起想著，安住受想行識無相而起想著；
安住色無願而起想著，安住受想行識無願而起想著；
安住色寂靜而起想著，安住受想行識寂靜而起想著；
安住色遠離而起想著，安住受想行識遠離而起想著；
安住色無常而起想著，安住受想行識無常而起想著；
安住色苦而起想著，安住受想行識苦而起想著；
安住色無我而起想著，安住受想行識無我而起想著；
安住色不淨而起想著，安住受想行識不淨而起想著。
舍利子！是為菩薩摩訶薩隨順法愛，即此法愛，說名為生。
復次，舍利子！若菩薩摩訶薩作如是念：『此色應斷，此受想行識應斷；由此故色應斷，由此故受想行識應斷。此苦應遍知，由此故苦應遍知；此集應永斷，由此故集應永斷；此滅應作證，由此故滅應作證；此道應修習，由此故道應修習。此是雜染，此是清淨；此應親近，此不應親近；此應行，此不應行；此是道，此非道；此是應學，此不應學；此是布施波羅蜜多，此非布施波羅蜜多；此是淨戒、安忍、精進、靜慮、般若波羅蜜多，此非淨戒、安忍、精進、靜慮、般若波羅蜜多；此是方便善巧，此非方便善巧；此是菩薩生，此是菩薩離生。』舍利子！若菩薩摩訶薩修行般若波羅蜜多時，安住此等種種法門而起想著，是為菩薩摩訶薩隨順法愛。即此法愛，說名為生。如宿食生，能為過患。」…

第五分般若經（全 556-565 卷）

大般若波羅蜜多經卷第五百五十六

善現品第一

- (01) 如是我聞：
- (02) 一時，薄伽梵住王舍城鷲峰山頂，與大苾芻眾萬二千人俱，皆阿羅漢，具壽善現、舍利子等而為上首，除阿難陀獨居學地。復有無量無數菩薩摩訶薩得無礙辯，慈氏菩薩、妙吉祥菩薩等而為上首。
- (03) 爾時，世尊告善現曰：「汝以辯才應為菩薩摩訶薩眾宣示般若波羅蜜多，令諸菩薩摩訶薩眾修行般若波羅蜜多，速得成辦。」
- (04) 時舍利子作是念言：「具壽善現為以自力為諸菩薩摩訶薩眾宣示般若波羅蜜多？為是如來威神之力？」
- (05) 爾時，善現知舍利子心之所念，便告之言：「諸佛弟子有所宣示，皆是如來威神之力。
- 何以故？舍利子！佛為弟子宣示法要，彼依佛教精勤修學，乃至證得諸法實性；證已，為他有所宣示，若與法性能不相違，皆是如來威神所致，亦是所證法性等流。是故我當為諸菩薩宣示般若波羅蜜多，皆是如來威神之力。」
- (6a) 爾時，善現便白佛言：「世尊使我為諸菩薩摩訶薩眾宣示般若波羅蜜多，令諸菩薩眾修行般若波羅蜜多速得成辦。
- 世尊！所言諸菩薩者，何法增語謂為菩薩？
- 世尊！我不見有法可名菩薩摩訶薩，亦不見有法可名般若波羅蜜多。
- 世尊！我於菩薩及菩薩法不見不得，亦復不見不得般若波羅蜜多，云何使我為諸菩薩摩訶薩眾宣示般若波羅蜜多？
- 世尊！我教何等菩薩摩訶薩修行何等般若波羅蜜多令速成辦？
- 世尊！菩薩摩訶薩聞說是語，心不沈沒，亦無退屈，不驚不怖，如說而住，修行般若波羅蜜多，是菩薩摩訶薩應有般若波羅蜜多令速成辦，若無所執，即是般若波羅蜜多。
- (6b) 復次，世尊！若菩薩摩訶薩修行般若波羅蜜多，應如是學，謂不執著是菩薩心。何以故？是心非心，本性淨故。」

- (07) 時舍利子問善現言：「為有是心非心性不？」
- (08) 善現反問舍利子言：「心非心性若有若無，為可得不？」
- (09) 舍利子言：「不也，善現！」
- (10) 善現便語舍利子言：「心非心性若有若無既不可得，如何可問為有是心非心性不？」
- (11) 時舍利子問善現言：「何等名為心非心性？」
- (12) 善現答言：「若無變壞，亦無分別，是則名為心非心性。」
- (13) 時舍利子讚善現言：「善哉！善哉！誠如所說。佛說仁者住無諍定最為第一，實如聖言。若菩薩摩訶薩聞說是語，心不沈沒，亦無退屈，不驚不怖，如說而住，修行般若波羅蜜多，是菩薩摩訶薩已於無上正等菩提得不退轉。若菩薩摩訶薩如是觀察心非心性，是菩薩摩訶薩不離般若波羅蜜多。若諸有情欲勤修學或聲聞地、或獨覺地、或菩薩地，皆於般若波羅蜜多應常聽聞、受持、讀誦，令善通利，如說修行。所以者何？於此般若波羅蜜多甚深教中，廣說一切所應學法。諸菩薩摩訶薩於此般若波羅蜜多精勤修學，於一切處皆得善巧。」

◎D1b 中品暖之所緣，謂色等離真實聚散所差別四諦。

其行相謂離名相續安住，及知無勝義安住之智。

- (14a) D1b 爾時，善現復白佛言：「我於菩薩心不知亦不得，我於菩薩摩訶薩眾及於般若波羅蜜多俱不見有實事可得，云何令我為諸菩薩摩訶薩眾宣示般若波羅蜜多？」

世尊！我觀一切，若生若滅、若染若淨，都不可得，而於其中說有菩薩、般若名等，便有疑悔。

◎D1c 上品暖之所緣，謂色等一切諸法，皆是假立所差別之四諦。

行相謂通達皆不可說之智。

D1c 世尊！菩薩等名，俱無決定，亦無住處。所以者何？菩薩名等，都無所有，無所有法，無定無住。若菩薩摩訶薩聞說是事，心不沈沒，亦無退屈，不驚不怖，當知是菩薩摩訶薩決定安住不退轉地，以無所住而為方便，住無所住。

◎D2a 第二頂位中，下品頂之所緣有二：

一、不安立諦，謂色等勝義不安住，及其自體無實有自性。

行相謂知色等與彼法性其自性為一之智。

次、安立諦，謂彼色等由彼實性空故，色等不住勝義無常等所差別之四諦。

行相謂知無常等與彼法性其自性為一之智。

- (14b) D2a 復次，世尊！諸菩薩摩訶薩行深般若波羅蜜多，不應住色，亦不應住受想行識。所以者何？若住於色，便作色行，非行深般若波羅蜜多；若住受想行識，便作受想行識行，非行深般若波羅蜜多。

◎D2b 中品頂之所緣，謂不執著諸法相。

行相謂不見彼諸法有實相故，由是因緣通達無實之智。

D2b 所以者何？非作、行者能攝受般若波羅蜜多。若不能攝受般若波羅蜜多，則不能修習般若波羅蜜多；若不能修習般若波羅蜜多，則不能圓滿般若波羅蜜多；若不能圓滿般若波羅蜜多，則不能成辦一切智智；若不能成辦一切智智，便不能益所益有情。

所以者何？色不應攝受受想行識，亦不應攝受般若波羅蜜多，亦不應攝受色。不可攝受故，即非色；受想行識亦不可攝受故，即非受想行識；般若波羅蜜多亦不可攝受故，便非般若波羅蜜多。

- (14c) 諸菩薩摩訶薩應如是學甚深般若波羅蜜多，若如是學甚深般若波羅蜜多，是名菩薩無所攝受三摩地輪，廣大資具無量無出，不為一切聲聞、獨覺之所引奪，亦不攝受一切智智。所以者何？是一切智智非取相修得。諸取相者，皆是煩惱。若取修得一切智智者，則勝軍梵志於一切智智不應信解，是勝軍梵志雖由信解力歸趣佛法，名隨信行，而能以少分智觀一切法性空，悟入一切智智。既悟入已，不取色相，亦不取受想行識相，不以喜樂觀見此智，不以得聞觀見此智，不以內色觀見此智，不以外色觀見此智，不以內外色觀見此智，亦不離色觀見此智；不以內受想行識觀見此智，不以外受想行識觀見此智，不以內外受想行識觀見此智，亦不離受想行識觀見此智。勝軍梵志以如是等諸離相門，於一切智智深生信解，名隨信行，於一切法皆無取著。如是梵志以離相門，於一切智智得信解已，於一切法皆不取相，亦不思惟無相諸法。如是梵志由勝

解力，於一切法不取不捨，無得無證，時彼梵志於自信解乃至涅槃亦不取著，以真法性為定量故。

- (14d) 世尊！是菩薩摩訶薩甚深般若波羅蜜多，不攝受色，亦不攝受受想行識，雖於諸法無所攝受，若未圓滿如來十力、四無所畏、四無礙解及十八不共法等，終不中道入般涅槃。當知如是諸菩薩摩訶薩甚深般若波羅蜜多雖無取著，而能成辦一切智智，利益安樂一切有情。

◎D2c 上品頂之所緣，謂以觀察勝義之慧，周遍觀察之四諦。

行相謂知三輪一切諸法於勝義中，皆無所得之智。

- (14e) D2c 復次，世尊！諸菩薩摩訶薩行深般若波羅蜜多，應如是觀：何謂般若波羅蜜多？是誰般若波羅蜜多？若法無所有不可得，是般若波羅蜜多耶？無所有中，無彼無此，何所繫屬？世尊！若菩薩摩訶薩於如是事審觀察時，心不沈沒，亦無退屈，不驚不怖，當知是菩薩摩訶薩不離般若波羅蜜多。」

◎D3a 第三忍位中，下品忍之所緣，謂色等法於勝義中，皆無自性。

行相謂知色等於勝義無，即是名言中自性之智。

- (15) D3a 時舍利子問善現言：「何因緣故，色離色性，受想行識離受想行識性，般若波羅蜜多離般若波羅蜜多性，而說菩薩摩訶薩不離般若波羅蜜多？」
- (16) 善現答言：「如是！如是！色離色性，受想行識離受想行識性，般若波羅蜜多離般若波羅蜜多性。如是諸法，相亦離性，性亦離相，相亦離相，性亦離性，能相、所相俱不可得。若菩薩摩訶薩能如實知如是義者，不離般若波羅蜜多。」
- (17) 時舍利子問善現言：「若菩薩摩訶薩於此中學，速能成辦一切智智耶？」

◎D3b 中品忍之所緣，謂色等於勝義中無生死無涅槃。

行相謂知如是修當得身語意三業清淨之智。

- (18a) D3b 善現答言：「如是！如是！若菩薩摩訶薩於此中學，速能成辦一切智智。
- 何以故？舍利子！是菩薩摩訶薩知一切法無生滅故。
- 舍利子！若菩薩摩訶薩能如是行，則為鄰近一切智智。」

◎D3c 上品忍之所緣，謂四諦勝義無相。

行相謂由勝義不依彼自性，故知非勝解相及無想之智。

(18b) D3c 復次，舍利子！諸菩薩摩訶薩若行色為行相，若行色生為行相，若行色壞為行相，若行色滅為行相，若行色空為行相，若謂我能行，是行有所得。

若行受想行識為行相，若行受想行識生為行相，若行受想行識壞為行相，若行受想行識滅為行相，若行受想行識空為行相，若謂我能行，是行有所得。

若菩薩摩訶薩作如是念：『我是菩薩，能行般若波羅蜜多。』是為行相。

若菩薩摩訶薩作如是念：『能如是行者，是修行般若波羅蜜多。』亦為行相，當知是菩薩無方便善巧。」

(19) 時舍利子問善現言：「諸菩薩摩訶薩當云何行，名行般若波羅蜜多？」

◎D4a 第四世第一法位中，下品第一法之所緣，謂法性無生及健行等三摩地。

行相謂知在佛位中彼正定作用任運而轉之智。

(20) D4a 善現答言：「諸菩薩摩訶薩若不行色，不行色相，不行色生，不行色壞，不行色滅，不行色空，是行般若波羅蜜多。諸菩薩摩訶薩若不行受想行識，不行受想行識相，不行受想行識生，不行受想行識壞，不行受想行識滅，不行受想行識空，是行般若波羅蜜多。

若菩薩摩訶薩不取行，不取不行，不取亦行亦不行，不取非行非不行，於不取亦不取，是行般若波羅蜜多。

何以故？舍利子！以一切法皆不可取，不可隨行，不可執受，離性相故，如是名為諸菩薩摩訶薩於一切法無生定輪，廣大資具無量無出，不共一切聲聞、獨覺。若菩薩摩訶薩安住此定，疾證無上正等菩提。」

◎D4b 中品第一法之所緣，謂於不現見事授記之勝因。

行相謂於勝義盡粗分之三輪執著。

(21) D4b 爾時，善現承佛神力，復告大德舍利子言：「若菩薩摩訶

薩雖安住此定，而不見此定，亦不著此定，亦不念言：『我於此定已、正、當入。』彼如是等思惟分別，由此定力，一切不起，當知已為過去如來應正等覺授與無上正等菩提不退轉記。」

◎D4c 上品第一法之所緣，謂能修之三摩地與修者之菩薩並所修之般若波羅密多，三輪之法性互為一性所差別之四諦。行相謂知所修之三摩地後，至全無分別，即是成佛之最勝方便之智。

- (22) D4c 時舍利子問善現言：「若菩薩摩訶薩由住此定，已為過去諸佛世尊現前授記，是菩薩摩訶薩為能顯示如是定不？」
- (23) 善現答言：「不也，舍利子！何以故？是善男子於如是定無知無想。」
- (24) 舍利子言：「具壽說彼諸善男子於如是定無知無想耶？」
- (25) 善現報言：「我定說彼諸善男子於如是定無知無想。所以者何？如是諸定無所有故。彼善男子於如是定無知無想，如是諸定於一切法亦無知無想。所以者何？以一切法無所有故。」

二、[釋分別]

E, F 由所依對治，二所取分別，由愚蘊等別，彼各有九種。

◎分別有二，謂所取分別與能取分別。所取中又二，依雜染事為所依者及依彼對治者。彼二之中又各有九種，由緣愚蒙無明等，及緣蘊等有差別故。

◎九種雜染所取分別謂：

E1 染汙總集，謂緣染汙無明。

E2 總苦，謂緣有漏色等諸蘊。

——此緣苦、集總體為二。

E3 執著名色，謂愛著邪果。

E4 貪著常斷二邊，謂愛邪所知。

E5 於染淨法不知取捨，謂緣不信。

E6 於諸聖道不勇悍住，謂緣懈怠。

——此緣別煩惱為四。

E7 有漏適悅、逼迫、中容三受。

E8 諸受所依，謂有漏自、他等。

E9 知受為苦性，由此厭離引發清淨等。
——緣彼執為實有受用，是緣別苦為三。

◎九種清淨所取分別：

F1 清淨諸蘊。

F2 增上緣諸處所攝生門。

F3 因緣諸界所攝種族。

F4 清淨之生緣起還滅。

——是所知中，盡所有性所攝之四。

F5 緣如所有空性，謂緣清淨所知者一。

F6 緣波羅蜜多義，執著諸行，謂緣行者一。

F7, F8, F9 緣見道、修道、無學道者，謂緣三道者為三。

(26) 時薄伽梵讚善現言：「善哉！善哉！如汝所說。故我說汝住無
諍定最為第一。諸菩薩摩訶薩欲學般若波羅蜜多，應如是學，
若如是學，名學般若波羅蜜多。」

(27) 時舍利子便白佛言：「若菩薩摩訶薩能如是學，名真學般若波
羅蜜多耶？」

(28) 佛告舍利子：「若菩薩摩訶薩能如是學，名真學般若波羅蜜多。」

(29) 時舍利子復白佛言：「諸菩薩摩訶薩如是學時，於何法學？」

(30) E1-E9, F1-F9 佛告舍利子：「諸菩薩摩訶薩如是學時，非於法學。
何以故？舍利子！如諸愚夫異生所執，非一切法如是有故。」

(31) 時舍利子復白佛言：「若爾，諸法如何而有？」

(32a) 佛告舍利子：「如無所有，如是而有，若於如是無所有法不能
了達，說為無明。」

(32b) 愚夫異生於一切法無所有性，無明貪愛增上勢力，分別執著
斷常二邊，由此不知不見諸法無所有性，分別諸法；由分別故，
便生執著。

(32c) 由執著故，分別諸法無所有性，由此於法不見不知；以於諸
法不見不知，分別過去、未來、現在；由分別故，貪著名色；
著名色故，分別執著無所有法；於無所有法分別執著故，於如
實道不知不見，不能出離三界生死，不信諦法，不覺實際，是
故墮在愚夫數中。

(32d) 由斯菩薩摩訶薩眾，於法性相都無執著。」

(33) 時舍利子復白佛言：「諸菩薩摩訶薩如是學時，豈不求學一切
智智？」

(34) 佛告舍利子：「諸菩薩摩訶薩如是學時，亦不求學一切智智。然諸菩薩如是學時，雖無所學，而名真學一切智智，速能成辦一切智智故。」

G, H 由實有假有，能取亦分二，自在我等體，蘊等依亦爾。

◎第二，能取分別亦有兩種，謂實有補特伽羅為依，及假有士夫為依。彼二復各有九種，由緣自在我等體，及緣蘊等所依，有如是等諸分別故。

○九種實執能取分別者，謂：

G1 緣執有自在我之執，此一是就執著相而立；

餘八就執著境而立，謂：

G2 緣執自在我是一。

G3 是造因之我。

G4 是見境之我等。

G5 又緣執雜染為自在之我。

G6 緣世間道離欲我執。

G7, G8, G9 出世間見道、修道、道作用所依之力等執為自在之我。其我執即此分別之所緣。

○九種假執能取分別者，謂：

H1, H2, H3 又於蘊、界、處，執為假有士夫。

H4 及於十二緣起執為假有士夫。

H5, H6, H7, H8, H9 於三十七菩提分法、見道、修道、勝進道、無學道，執為假有士夫。

(35) G1-G9, H1-H9 爾時，具壽善現便白佛言：「世尊！設有人來作如是問：『幻土若學一切智智，彼亦能成辦一切智智不？』我得此問，當云何答？」

(36) 佛言善現：「我還問汝，隨汝意答。於意云何？幻異色受想行識不？」

(37) 善現答言：「幻不異色，色不異幻，幻即是色，色即是幻，受想行識亦復如是。」

(38) 佛告善現：「於意云何？五取蘊中起想、等想，施設言說，假名菩薩摩訶薩不？」

(39) 善現對曰：「如是，世尊！」

(40) 佛告善現：「諸菩薩摩訶薩求趣無上正等菩提，修學般若波羅蜜多，一切皆如幻土修學。何以故？幻土即是五取蘊故。所以者何？我說五蘊、眼等六根，皆如幻化，都非實有。」

三、[釋攝持]

I.1 心不驚怖等，I.2 宣說無性等，I.3 棄捨所治品，應知為攝持。

◎I.1 加行道菩薩，不離一切相智作意，於甚深空性不驚不恐等方便善巧，捨此違品二乘作意，及隨一實執。

——如是菩薩加行道智，即是加行道菩薩之內攝持，以此即是雙破生死涅槃二邊之菩薩現觀故。

(41) I.1 具壽善現復白佛言：「若菩薩摩訶薩新學大乘聞如是說，其心將無驚怖退屈？」

(42) 佛告善現：「若菩薩摩訶薩新學大乘，親近惡友，聞如是說，心便驚怖，則生退屈；若近善友，雖聞此說，而不驚怖，亦無退屈。」

◎I.2 若佛勝應身，為加行道菩薩宣說：一切諸法皆勝義無自性等；

◎I.3 及說：捨此違品惡魔、惡友之道者。

——即是加行道菩薩之外攝持，以是圓滿開示大乘道之善知識故。

(43) I.2,I.3 具壽善現復白佛言：「何等名為菩薩惡友？」

(44) 佛告善現：「諸菩薩惡友者，謂教菩薩厭離般若波羅蜜多，捨菩提心，取諸法相，令學取相世俗書典，令學聲聞相應經法，又令習近眾魔事業，此等名為菩薩惡友。」

(45) 具壽善現復白佛言：「何等名為菩薩善友？」

(46) 佛告善現：「諸菩薩善友者，謂教菩薩勤修般若波羅蜜多，乃至為說魔事、魔過，令其覺知，方便棄捨，此等名為新學菩薩大誓莊嚴真淨善友。」

【第4義】：大乘修行所依：自性住種性（I-4）

J. 通達有六法，對治與斷除，彼等皆永盡，具智慧悲愍。
不共諸弟子，利他漸次行，智無功用轉，所依名種性。
法界無差別，種性不應異。由能依法異，故說彼差別。

◎十三類菩薩身中，十三種修行之法性，即是大乘所依修行之種性：

J1-J6 大乘四順決擇分及見、修二道；

——是就修行自性分為六種智德。

J7 就對治逆品，立能治修行；

J8 就斷除逆品，立能斷修行；

J9 就逆品盡分，立彼永盡解脫道之修行；

——是就修行作用分三。

J10 依八地增上，立雙破生死涅槃二邊之慧悲修行；

J11 依九地增上，立不共聲聞弟子之修行；

J12 依十地後得增上，立次第利他之修行；

J13 依十地後心增上，立智無功用轉修行；

——是就界限增上分四。

(47) J.具壽善現復白佛言：「言菩薩者，是何句義？」

法界無差別。種性不應異。

◎J' 問：三乘種性不可分為各異，或一切三乘種性人，皆應通住三乘種性，以彼等法界無差別，法界即種性故。

由能依法異，故說彼差別。

◎J'' 答：所通達之法界雖無差別，然無不可分三類種性，及種性不可分別之過。以就能依三乘智德功能大小之別，而說所依法性之差別故，譬如所依同一瓦瓶，就能依蜜、糖等不同而分器皿之差別故。

【第5義】：大乘修行所緣 (I-5)

K. 所緣一切法，此復為善等，若世間所知，及諸出世間。

有漏無漏法，諸有為無為，若共弟子法，及佛不共法。

◎此中差別分十一種，謂：

K1-K3 善等，「等」取不善、無記。

K4 此復有世間道所攝或所通達，謂五蘊。

K5 及諸出世道中，無漏四靜慮。

K6 有漏法，謂五取蘊。

K7 無漏法，謂四念住。

K8 有為，謂道諦。

K9 無為，謂滅諦。

K10 共聲聞弟子法，謂四靜慮。

K11 佛不共法，謂十力等。

(48) K.佛告善現：「學一切法無著無礙，覺一切法無著無礙，求證菩提，故名菩薩。」

【第6義】：修行所為 (I-6)

勝諸有情 L1 心，及 L2 斷 L3 智為三，當知此三大，自覺所為事。

◎此中差別，分為三大，當知此三大即菩薩自覺之所為，以緣此果而修行故：

L1 勝出諸有情之大悲心等即是心大。

(49) L1 具壽善現復白佛言：「此復何緣名摩訶薩？」

(50) 佛告善現：「以諸菩薩於大有情眾中，當為上首故，復名摩訶薩。」

L2 斷德究竟是能斷大。

(51) L2 時舍利子便白佛言：「我今樂說摩訶薩義，唯願聽許！」

(52) 佛告舍利子：「隨汝意說。」

(53) 舍利子言：「以諸菩薩方便善巧，為諸有情宣說法要，令斷我見、有情見、命者見、補特伽羅見、有見、無見、斷、常見等，依如是義，名摩訶薩。」

L3 智德究竟是能證大。

(54) L3 爾時，善現亦白佛言：「我今樂說摩訶薩義，唯願聽許！」

(55) 佛告善現：「隨汝意說。」

(56) 善現白言：「以諸菩薩發菩提心、無等等心、聲聞獨覺不能引心，於如是心亦不執著。所以者何？一切智心是真無漏，不墮三界，不應於中而生執著，依如是義，名摩訶薩。」

(57) 時舍利子問善現言：「何因緣故，於如是心亦不執著？」

(58) 善現答言：「如是諸心無心性故，不應執著。」

【第7義】：披甲正行 (I-7)

M1-M6 由彼等別別，皆攝施等六，故披甲修行，六六如《經》說。

◎M1-M6 以彼六種披甲正行，一一皆於施等之中攝六度故。

【第8義】：趣入正行（I-8）

N1-N9 靜慮無色定，施等道慈等，成就無所得，三輪善清淨。
所為及六通，於一切相智，能趣入正行，當知昇大乘。

◎此差別有九：

N1 道之所依，謂靜慮及無色定。

N2 能引究竟智德者，謂施等六度。

N3 能引究竟斷德者，謂見道、修道、無學道、勝進道。

N4 利他之方便，謂慈等四無量心。

N5 清淨利他者，謂成就無所得。

N6 不同小乘者，謂於一切物三輪清淨。

N7 轉諸善根令成三種所為義。

N8 能速圓滿二種資糧者，謂六神通。

N9 於果位，謂能趣入一切相智之正行。

——當知此九趣入正行，能升進大乘也。

(59) 時滿慈子亦白佛言：「我今樂說摩訶薩義，唯願聽許！」

(60) 佛告滿慈子：「隨汝意說。」

(61) M 滿慈子言：「以諸菩薩普為利樂一切有情，被大願鎧故；
N 發趣大乘故，乘大乘故，名摩訶薩。」

【第9義】：資糧正行（I-9）

O1 悲及 O2-O7 施等六，並修 O8 止 O9 觀道，及以 O10 雙運道，
O11 諸善權方便。O12 智 O13 福與 O14 諸道，O15 陀羅尼 O16 十地，
O17 能對治當知，資糧行次第。

◎此中差別有十七種：

O1 欲令有情離苦之大悲。

O2-O7 由大悲故修行布施等六波羅蜜多。

O8 在入定時修習止。

O9 在入定時修習觀。

O10 在入定時修習止觀雙運道。

O11 於利他事善權方便：地資糧。

O12 智慧資糧。

O13 與福德資糧。

- 014 見道等，為道資糧。
- 015 諸法文義乃至多劫受持不忘之陀羅尼，此分：
- a 通達諸字真實之忍陀羅尼；
 - b 為救護眾生能制諸明咒之咒陀羅尼；
 - c 諸經文句乃至多劫受持不忘之法陀羅尼；
 - d 諸經義理乃至多劫受持不忘之義陀羅尼。
- 016 能為功德作所依處之十地資糧。
- 017 能斷相違品之對治資糧。

- (62) O1 爾時，善現便白佛言：「如世尊說：『諸菩薩摩訶薩被大願鎧。』齊何言諸菩薩摩訶薩被大願鎧？」
- (63) 佛告善現：「諸菩薩摩訶薩作如是念：我應度脫無量無數無邊有情入無餘依般涅槃界，雖作是事，而無有法及諸有情得涅槃者。何以故？諸法實性法應爾故。譬如幻師或彼弟子，於四衢道，化作大眾，互相加害，於意云何？此中有實相害事不？」
- (64) 善現對曰：「不也，世尊！」
- (65) 佛告善現：「諸菩薩摩訶薩亦復如是，雖現度脫無量無數無邊有情入無餘依般涅槃界，而無有法及諸有情得涅槃者。若菩薩摩訶薩聞如是事不驚不怖，亦無退屈，當知是菩薩摩訶薩被大願鎧。」(缺 O2-O8)
- (66) O9 爾時，善現便白佛言：「如我解佛所說義者，諸菩薩摩訶薩不被大願鎧，當知是為被大願鎧。」
- (67) 佛告善現：「如是！如是！所以者何？一切智智無造無作，一切有情亦無造無作，諸菩薩摩訶薩為欲饒益彼有情故，被大願鎧。所以者何？色非造非不造，非作非不作；受想行識亦非造非不造，非作非不作。何以故？色乃至識不可得故。」
- (68) O10 具壽善現便白佛言：「如我解佛所說義者，色乃至識無染無淨。所以者何？色無縛無脫，受想行識亦無縛無脫。」
- (69) 時滿慈子問善現言：「尊者說色無縛無脫，說受想行識亦無縛無脫耶？」
- (70) 善現答言：「如是！如是！」
- (71) 滿慈子言：「說何等色無縛無脫，說何等受想行識亦無縛無脫耶？」
- (72) 善現答言：「說如幻土色無縛無脫，說如幻土受想行識亦無縛

無脫。所以者何？色乃至識無所有故，無縛無脫；遠離故，無縛無脫；寂靜故，無縛無脫；無生滅故，無縛無脫，是名菩薩發趣大乘被大願鎧。」

(73) 時滿慈子聞如是說，歡喜信受，默然而住。

(74) O11 爾時，善現便白佛言：「諸菩薩摩訶薩發趣大乘。云何大乘？云何菩薩發趣大乘？如是大乘從何處出？至何處住？誰復乘是大乘而出？」(缺 O12-O17)

(75a) 佛告善現：「言大乘者，即是無量無數增語，無邊功德共所成故。『云何菩薩發趣大乘』者，謂諸菩薩勤修六種波羅蜜多，能從一地進趣一地，是名菩薩發趣大乘。

[別釋 O12 智資糧]

此別釋智資糧，論無頌文，而釋有之，謂所緣境有二十種空性，故能緣智亦分二十種智慧資糧：

P1 由內六處真實空，故名內空。

P2 由外色等真實空，故名外空。

P3 由內外俱分所攝之根依處真實空，故名內外空。

P4 由空性亦真實空，故名空空。

P5 由十方真實空，故名大空。

P6 由道所證之涅槃真實空，故名勝義空。

P7 由緣生有為真實空，故名有為空。

P8 由非緣生無為真實空，故名無為空。

P9 由內外中間真實空，故名畢竟空。

P10 由生死前際後際真實空，故名無際空。

P11 由取捨真實空，故名無散空。

P12 由實性真實空，故名本性空。

P13 由一切法真實空，故名一切法空。

P14 由諸法生等真實空，故名自相空。

P15 由過去未來等真實空，故名不可得空。

P16 由因緣和合真實空，故名無性自性空。

P17 由五蘊自性真實空，故名有性空。

P18 由無為虛空等真實空，故名無性空。

P19 由本性空亦真實空，故名自性空。

P20 由諸法作者自性空，故名他性空。

——如空有二十，亦有爾許之能緣智慧資糧故。

[別釋 O11 地資糧]

一、[初地修治]

Q. 由十種修治，當能得初地，意樂饒益事，有情平等心。
能捨近善友，求正法所緣，常發出家心，愛樂見佛身。
開闡正法教，諦語為第十，彼性不可得，當知名修治。

【補入】第二分修治地品

修治地品第十八

◎「復次，善現！汝問『齊何當知菩薩摩訶薩發趣大乘？』者，若菩薩摩訶薩修行六種波羅蜜多時，從一地趣一地，齊此當知菩薩摩訶薩發趣大乘。云何菩薩摩訶薩修行般若波羅蜜多時，從一地趣一地？善現！若菩薩摩訶薩知一切法無所從來亦無所趣。何以故？善現！以一切法無去無來、無從無趣，由彼諸法無變壞故。善現！是菩薩摩訶薩於所從趣地不恃、不思惟，雖修治地業而不見彼地。是為菩薩摩訶薩修行六種波羅蜜多時，從一地趣一地。

(01) Q 云何菩薩摩訶薩修治地業？善現！諸菩薩摩訶薩住初地時，應善修治十種勝業。云何為十？一者、以無所得而為方便，修治增上意樂業，利益事相不可得故。二者、以無所得而為方便，修治一切有情平等心業，一切有情不可得故。三者、以無所得而為方便，修治布施業，施者、受者及所施物不可得故。四者、以無所得而為方便，修治親近善友業，於諸善友無執著故。五者、以無所得而為方便，修治求法業，諸所求法不可得故。六者、以無所得而為方便，修治常樂出家業，所棄捨家不可得故。七者、以無所得而為方便，修治愛樂佛身業，相隨好因不可得故。八者、以無所得而為方便，修治開闡法教業，所分別法不可得故。九者、以無所得而為方便，修治破憍慢業，諸興盛法不可得故。十者、以無所得而為方便，修治諦語業，一切語言不可得故。善現！諸菩薩摩訶薩住初地時，應善修治此十勝業。

二、[二地修治]

R. 戒報恩安忍，極喜及大悲，承事敬師聞，第八勤施等。

(02) R 復次，善現！諸菩薩摩訶薩住第二地時，應於八法思惟修習令速圓滿。云何為八？一者、清淨尸羅。二者、知恩報恩。三者、住安忍力。四者、受勝歡喜。五者、不捨有情。六者、常起大悲。七者、於諸師長以敬信心，諂承供養如事諸佛。八者、勤求修習波羅蜜多。善現！諸菩薩摩訶薩住第二地時，於此八法應思應學令速圓滿。

三、[三地修治]

S. 多聞無厭足，無染行法施，嚴淨成佛剎，不厭倦眷屬。
及有慚有愧，五種無著性。

(03) S 復次，善現！諸菩薩摩訶薩住第三地時，應住五法。云何為五？一者、勤求多聞常無厭足，於所聞法不著文字。二者、以無染心常行法施，雖廣開化而不自高。三者、為嚴淨土植諸善根，雖用迴向而不自舉。四者、為化有情，雖不厭倦無邊生死而不憍逸。五者、雖住慚愧而無所著。善現！諸菩薩摩訶薩住第三地時，應常安住如是五法。

四、[四地修治]

T. 住林少欲足，杜多正律儀，不捨諸學處，訶厭諸欲樂。
寂滅捨眾物，不沒無顧戀。

(04) T 復次，善現！諸菩薩摩訶薩住第四地時，應於十法受持不捨。云何為十？一者、住阿練若常不捨離。二者、常好少欲。三者、常好喜足。四者、常不捨離杜多功德。五者、於諸學處常不棄捨。六者、於諸欲樂深生厭離。七者、常樂發起寂滅俱心。八者、捨一切物。九者、心不滯沒。十者、於一切物常無顧戀。善現！諸菩薩摩訶薩住第四地時，於如是十法應受持不捨。

五、[五地修治]

U. 親識及慳家，樂猥雜而住，自讚及毀他，十不善業道。
憍慢與顛倒，惡慧忍煩惱，遠離此十事，證得第五地。

(05) U 復次，善現！諸菩薩摩訶薩住第五地時，應遠離十法。云何為十？一者、應遠離居家。二者、應遠離苾芻尼。三者、應遠離家慳。四者、應遠離眾會忿爭。五者、應遠離自讚毀他。六者、應遠離十不善業道。七者、應遠離增上傲慢。八者、應遠離顛倒。

九者、應遠離猶豫。十者、應遠離貪、瞋、癡。善現！諸菩薩摩訶薩住第五地時，應常遠離如是十法。

六、[六地修治]

V. 施戒忍精進，靜慮慧圓滿，於弟子麟喻，捨喜捨怖心。

見求無愁感，盡捨無憂悔，雖貧不厭求，證得第六地。

(06) V 復次，善現！諸菩薩摩訶薩住第六地時，應圓滿六法。云何為六？所謂六種波羅蜜多，即是布施乃至般若。復應遠離六法。云何為六？一者、聲聞心。二者、獨覺心。三者、熱惱心。四者、見乞者來不喜愁感心。五者、捨所有物追戀憂悔心。六者、於來求者方便矯誑心。善現！諸菩薩摩訶薩住第六地時，常應圓滿前說六法，及應遠離後說六法。

七、[七地修治]

W. 執我及有情，命與數取趣，斷常及相因，蘊界并諸處。

住三界貪著，其心遍怯退，於三寶尸羅，起彼見執著。

諍論於空性，遠空性過失，由離此二十，便得第七地。

(7a) W 復次，善現！諸菩薩摩訶薩住第七地時，應遠離二十法。云何二十？一者、應遠離我執乃至見者執。二者、應遠離斷執。三者、應遠離常執。四者、應遠離相執。五者、應遠離見執。六者、應遠離名色執。七者、應遠離蘊執。八者、應遠離處執。九者、應遠離界執。十者、應遠離諦執。十一者、應遠離緣起執。十二者、應遠離住著三界執。十三者、應遠離一切法執。十四者、應遠離於一切法如理不如理執。十五者、應遠離依佛見執。十六者、應遠離依法見執。十七者、應遠離依僧見執。十八者、應遠離依戒見執。十九者、應遠離依空見執。二十者、應遠離厭怖空性。

X. 知三解脫門，三輪皆清淨，大悲無執著，法平等一理。

知無生知忍，說諸法一相，滅除諸分別，離想見煩惱。

奢摩他定思，善毘鉢舍那，內心善調伏，一切無礙智。

非貪地隨欲，等遊諸佛土，一切善現身，共為二十種。

(7b) X 復應圓滿二十法。云何二十？一者、應圓滿通達空。二者、應圓滿證無相。三者、應圓滿知無願。四者、應圓滿三輪清淨。五者、應圓滿悲愍有情及於有情無所執著。六者、應圓滿一切法

平等見及於此中無所執著。七者、應圓滿一切有情平等見及於此中無所執著。八者、應圓滿通達真實理趣及於此中無所執著。九者、應圓滿無生忍智。十者、應圓滿說一切法一相理趣。十一者、應圓滿滅除分別。十二者、應圓滿遠離諸想。十三者、應圓滿遠離諸見。十四者、應圓滿遠離煩惱。十五者、應圓滿止觀地。十六者應圓滿調伏心性。十七者、應圓滿寂靜心性。十八者、應圓滿無礙智性。十九者、應圓滿無所愛染。二十者、應圓滿隨心所欲往諸佛土於佛眾會自現其身。

(7c) 善現！諸菩薩摩訶薩住第七地時，常應遠離如前所說二十種法，及應圓滿如後所說二十種法。

八、[八地修治]

Y. 知諸有情意，遊戲諸神通，修微妙佛剎，觀故親近佛。

知根淨佛土，安住如幻事，故思受三有，說此八種業。

(08) Y 復次，善現！諸菩薩摩訶薩住第八地時，應圓滿四法。云何為四？一者、應圓滿悟入一切有情心行。二者、應圓滿遊戲諸神通。三者、應圓滿見諸佛土如其所見而自嚴淨種種佛土。四者、應圓滿承事供養諸佛世尊於如來身如實觀察。善現！諸菩薩摩訶薩住第八地時，於此四法應勤圓滿。

九、[九地修治]

Z. 無邊諸誓願，了知天等語，辯說如懸河，入胎最第一。

種姓族圓滿，眷屬及生身，出家菩提樹，圓滿諸功德。

(09) Z 復次，善現！諸菩薩摩訶薩住第九地時，應圓滿四法。云何為四？一者、應圓滿根勝劣智。二者、應圓滿嚴淨佛土。三者、應圓滿如幻等持數入諸定。四者、應圓滿隨諸有情善根應熟故入諸有自現化生。善現！諸菩薩摩訶薩住第九地時，於此四法應勤圓滿。

[果位第十地相]

〈A〉超過九地已，若智住佛地，應知此即是，菩薩第十地。

◎此中九地者，謂指：

〈A1〉聲聞種姓地；

〈A2〉預流向是居四雙八單之最初智德，名八人地。

- 〈A3〉預流是斷三結所顯之智德，故名見地。
- 〈A4〉一來是多分離欲所顯住果之智德，故名薄地。
- 〈A5〉不還是斷下五分結所顯住果之智德，故名離欲地。下五分結者，謂三結及貪欲、瞋恚。
- 〈A6〉聲聞阿羅漢果，是斷上五分結所顯小乘之智德，名已辦地。上五分結者，謂色、無色貪，掉舉、慢、無明。
- 〈A7〉餘三聲聞果前之三向，是聲聞果向所餘智德故，同名一聲聞地。
- 〈A8〉獨覺聖現觀以是中乘現觀故，名辟支佛地。
- 以上小乘八地。
- 〈A9〉及因位菩薩九地，合為一菩薩地。
- (10) 〈A〉復次，善現！諸菩薩摩訶薩住第十地時，應圓滿十二法。云何十二？一者、應圓滿攝受無邊處所大願隨有所願皆令證得。二者、應圓滿隨諸天龍及藥叉等異類音智。三者、應圓滿無礙辯說。四者、應圓滿入胎具足。五者、應圓滿出生具足。六者、應圓滿家族具足。七者、應圓滿種姓具足。八者、應圓滿眷屬具足。九者、應圓滿生身具足。十者、應圓滿出家具足。十一者、應圓滿莊嚴菩提樹具足。十二者、應圓滿一切功德成辦具足。善現！諸菩薩摩訶薩住第十地時，應勤圓滿此十二法。善現當知！若菩薩摩訶薩住第十地已，與諸如來應言無別。」（大般若波羅蜜多經卷第四百一十五）

[別釋 O17 對治資糧]

〈A'〉見修諸道中，所能取分別，由滅除彼故，說八種對治。

◎大乘見道、修道之中，由滅除所取、能取八種分別故，其對治資糧正行故亦說八種。

(75b) 〈A'〉『如是大乘從何處出？至何處住』者，謂此大乘從三界中出，至一切智智中住，然以無二為方便故，無出無住。『誰復乘是大乘出』者，都無乘是大乘出者。所以者何？能乘、所乘，如是二法，俱無所有，無所有中，誰乘何法，可名乘者？」

【第 10 義】：出生正行 (I-10)

- 〈B1〉所為及 〈B2〉平等，〈B3〉利有情 〈B4〉無功用，
 〈B5〉超二邊出生，〈B6〉證得相出生。

〈B7〉一切相智性道 〈B8〉有境出生，當知此八種，是出生正行。

◎出生正行差別有八，謂：

〈B1〉三種所為事（心大、斷德大、智德大）。

〈B2〉通達一切法空性平等。

〈B3〉能作無邊有情利益。

〈B4〉任運利他不加功用。

——此三種是心大之差別。

〈B5〉超出常斷二邊出生無住涅槃。

——此是斷德大之差別。

(76) 〈B1〉, 〈B2〉具壽善現復白佛言：「如是大乘，普勝一切世間天人、阿素洛等，如是大乘，與虛空等，譬如虛空，普能容受無量無數無邊有情，大乘亦爾，普能容受無量無數無邊有情。又如虛空，無來無去無住可見，大乘亦爾，無來無去無住可見。又如虛空，前、後、中際皆不可得，大乘亦爾，前、後、中際皆不可得，三世平等，故名大乘。」(缺 〈B3〉 - 〈B5〉)

(77) 佛告善現：「善哉！善哉！如是！如是！如汝所說。」

〈B6〉永離一切所治證得一切所證為相之出生。

——此是斷德大之差別。

(78) 〈B6〉時滿慈子便白佛言：「世尊先教大德善現為諸菩薩摩訶薩眾宣示般若波羅蜜多，而今何故乃說大乘？」

(79) 爾時，善現即白佛言：「我說大乘，將無違越所說般若波羅蜜多？」

(80) 佛告善現：「汝說大乘，皆順般若波羅蜜多，無所違越。」

(81a) 具壽善現復白佛言：「我都不得前際後際中際菩薩。色無邊故，菩薩亦無邊；受想行識無邊故，菩薩亦無邊。即色，離色，菩薩無所有不可得；即受想行識，離受想行識，菩薩亦無所有不可得。

如是，世尊！我於此等一切法，以一切種、一切處、一切時，求諸菩薩都無所見，竟不可得，云何令我為諸菩薩宣示般若波羅蜜多？

(81b) 復次，世尊！言菩薩者，但有假名，都無自性，如說我等，畢竟不生，但有假名，都無自性，諸法亦爾，畢竟不生，但有

假名，都無自性。此中何等是色畢竟不生？若畢竟不生，則不名色。何等是受想行識畢竟不生？若畢竟不生，則不名受想行識。

世尊！色是菩薩不可得，受想行識是菩薩亦不可得，此不可得亦不可得。我於如是一切法，以一切種、一切處、一切時，求諸菩薩皆不可得，當教何等法？修何等法？於何等處、時，證何等法？

(81c) 復次，世尊！諸佛菩薩甚深般若波羅蜜多但有假名，都無自性，如說我等，畢竟不生，但有假名，都無自性，諸法亦爾，但有假名，都無自性。何等是色既不可取，亦不可生？何等是受想行識既不可取，亦不可生？諸法自性既不可取，亦不可生，若法無性亦不可生，此無生法亦不可生，我豈能以畢竟不生甚深般若波羅蜜多教畢竟不生菩薩摩訶薩？

世尊！離不生法無法可得，亦無菩薩能行無上正等菩提。

(81d) 世尊！若菩薩摩訶薩聞說是語，不驚不怖，當知是菩薩摩訶薩能行深般若波羅蜜多。所以者何？若時菩薩摩訶薩行深般若波羅蜜多，觀察諸法，是時菩薩摩訶薩即不取色。所以者何？色無生，即非色；色無滅，亦非色。即無生無滅，即無二無別。若說色，即入無二法數。

若時菩薩摩訶薩行深般若波羅蜜多，觀察諸法，是時菩薩摩訶薩即不取受想行識。所以者何？受想行識無生，即非受想行識；受想行識無滅，亦非受想行識。既無生無滅，即無二無別。若說受想行識，即入無二法數。」

〈B7〉現證十法之究竟智謂一切相智。

——此是智德大之差別。

(82) 〈B7〉時舍利子謂善現言：「如我領解仁所說義，諸菩薩等畢竟不生。若爾，何緣有諸菩薩為度無量無數有情，修多百千難行苦行，備受無量生死大苦？」

(83) 善現報言：「非我於彼無生法中許有菩薩為度無量無數有情，修多百千難行苦行，備受無量生死大苦。然諸菩薩雖為此事，而於其中無苦行想。

何以故？舍利子！若於苦行作苦行想，不能饒益無邊有情，是故菩薩於諸苦行作樂行想，於難行行作易行想，於諸有情作父

母及己身想，為度彼故，發菩提心，由此乃能作大饒益。爾時，菩薩作是思惟：『如我自性，於一切法，以一切種、一切處、時，求不可得，內外諸法亦復如是，都無所有，皆不可得。』若住此想，便不見有難行苦行，由此能為無邊有情修多百千難行苦行，與有情類作大饒益。」

- (84) 時舍利子問善現言：「是諸菩薩實無生不？」
- (85) 善現答言：「如是！如是！一切菩薩皆實無生。」
- (86) 舍利子言：「為但菩薩實是無生？為一切智亦實無生？」
- (87) 善現答言：「此一切智亦實無生。」
- (88) 舍利子言：「為但一切智實是無生？為諸異生類亦實無生？」
- (89) 善現答言：「諸異生類亦實無生。」
- (90) 舍利子言：「若諸菩薩皆實無生，諸菩薩法亦應無生；若一切智實是無生，一切智法亦應無生；若異生類實是無生，異生類法亦應無生。若爾，菩薩得一切智，應無生法能證無生。」
- (91) 善現答言：「我意不許無生法中有得有證。何以故？無生法中，證、得無故。」
- (92) 舍利子言：「為許生法證生法，為許無生法證無生法耶？」
- (93) 善現答言：「我意不許生法證生法，亦不許無生法證無生法。」
- (94) 舍利子言：「為許生法證無生法，為許無生法證生法耶？」
- (95) 善現答言：「我意不許生法證無生法，亦不許無生法證生法。」
- (96) 舍利子言：「若如是者，應無得、證。」
- (97) 善現答言：「雖有得、證，而非實有。」
- (98) 舍利子言：「為許未生法生，為許已生法生耶？」
- (99) 善現答言：「我意不許未生法生，亦不許已生法生。」
- (100) 舍利子言：「為許生生，為許不生生耶？」
- (101) 善現答言：「我意不許生生，亦不許不生生。」
- (102) 舍利子言：「仁者於所說無生法，樂辯說無生相耶？」
- (103) 善現答言：「我於所說無生法亦不樂辯說無生相。」
- (104) 舍利子言：「於無生法起無生言，此無生言亦無生不？」
- (105) 善現答言：「於無生法起無生言，此法及言俱無生義，而隨世俗說無生相。」
- (106) 時舍利子讚善現言：「說法人中，仁為第一，除佛世尊，無能及者。所以者何？隨所問詰種種法門，皆能酬答。」
- (107) 善現報言：「諸佛弟子於一切法無依著者，法爾皆能隨所問詰，

- 一一酬答，自在無畏。所以者何？以一切法無所依故。」
- (108) 時舍利子謂善現言：「善哉！善哉！若諸菩薩能作如是隨問而答，為由何等波羅蜜多威力所辦？」
- (109a) 善現報言：「此是般若波羅蜜多威力所辦。所以者何？說一切法無所依止，要由般若波羅蜜多達一切法無所依故。」
- 〈B8〉能生一切相智之勝進道金剛喻定之有境（即能緣心也）出生——此是智德大之差別。
- (109b) 〈B8〉舍利子！若菩薩摩訶薩聞如是語，心不迷悶，亦無疑惑，當知是菩薩能住如是住，恆不捨離，亦常不離大悲作意。」
- (110) 時舍利子謂善現言：「若諸菩薩住如是住，恆不捨離，亦常不離如是作意者，則一切有情應是菩薩。所以者何？以一切有情亦於此住及此作意常不捨離般若。大悲性平等故，則諸菩薩與諸有情應無差別。」
- (111) 善現報曰：「善哉！善哉！雖似難我，而成我義。何以故？舍利子！一切有情無自性故，當知如是住及作意亦無自性。一切有情性遠離故，當知如是住及作意性亦遠離。一切有情無覺知故，當知如是住及作意亦無覺知。由此因緣，是諸菩薩於如是住及此作意常不捨離，與諸有情亦無差別。若諸菩薩能如是知，無所滯礙，是行般若波羅蜜多，我意欲令一切菩薩以此作意行深般若波羅蜜多。」

天帝品第二

【第二事】道相智

【第 11 義】：道相智之支分（II-1）

- 〈C1〉調伏諸天故，放光令隱闇，〈C2〉境決定〈C3〉普遍，〈C4〉本性及〈C5〉事業。

◎道相智之五支：

- 〈C1〉由如來本性之光明，隱蔽欲、色諸天異熟光明者，為令了知由摧伏其增上慢心故，乃能發心及生道相智之智德。又為摧彼諸天增上慢，令堪生道相智故。此顯遠離生道相智之障礙增上慢現行。
- (01) 〈C1〉爾時，天帝釋與四萬天子俱來集會，護世四天王與二萬

天子俱來集會，索訶界主大梵天王與萬梵眾俱來集會，復有五千淨居天眾俱來集會。是諸天眾，業果身光，對佛威光，皆悉不現。

(02) 時天帝釋白善現言：「今有無量諸天子等，欲聞大德宣示般若波羅蜜多，唯願大德哀愍為說！云何菩薩應住般若波羅蜜多？」

〈C2〉次明道相智唯發菩提心者乃生起，故境各別決定。

(3a) 〈C2〉爾時，善現告帝釋言：「吾承佛力，為諸天眾宣示般若波羅蜜多，如諸菩薩所應安住。汝諸天等，未發無上菩提心者，今皆應發。諸有已入聲聞、獨覺正性離生，不復能發大菩提心。何以故？憍尸迦！彼於生死有限礙故。」

〈C3〉總謂一切有情皆可生道相智，故云普遍。

〈C4〉不求斷自身欲、有諸漏為本性。

(3b) 〈C3〉其中若有能發無上正等覺心，我亦隨喜。何以故？

〈C4〉憍尸迦！諸有勝人應求勝法，我終不礙他勝善品。」

(04) 爾時，世尊讚善現曰：「善哉！善哉！汝今善能勸諸菩薩。」

〈C5〉成就利他殊勝作用。

(05) 〈C5〉具壽善現便白佛言：「我既知恩，云何不報？謂過去佛及諸弟子教諸菩薩種種法要，方便趣入波羅蜜多。如來爾時亦於中學，今證無上正等菩提，轉妙法輪，饒益我等，故我今者，應隨佛教，攝受護念此諸菩薩，令疾證得無上菩提，轉妙法輪，利樂一切，是則名為報彼恩德。」

【第12義】：知聲聞道之道相智（II-2）

一、[自性]

〈D〉道相智理中，由諸四聖諦，行相不可得，當知聲聞道。

◎四諦無常等十六行相者，謂：

〈D1〉因緣生故無常，隨煩惱業轉故苦，無異體清淨之我故空，無自體之我故無我，是苦諦上之四相。

〈D2〉是苦之根本故名因，數數生苦故名集，招猛利苦故名生，與後生果作助緣故名緣，是集諦上之四相。

〈D3〉是斷除煩惱之離繫故名滅，是寂滅苦之離繫故名靜，是利樂自性之離繫故名妙，是苦不再生之離繫故名離，此是滅諦上之四相。
〈D4〉是趣解脫之道故名道，是對治煩惱之道故名理，由現證之體性不顛倒行故名行，能從根本拔除苦及煩惱故名出，此是道諦上之四相。

——苦諦上四相互違，餘三諦上四相義同。

二、[順決擇分因]

聖聲聞道中，由色等空故，空無別為〈E1〉煖，由彼無所得。許為至〈E2〉頂位，〈E3〉忍位於色等，破住常等理，依於十地等。由廣說無住，即名〈E4〉第一法，由佛以現智，不見諸法故。

◎了知聖聲聞道之道相智因，有四順決擇分，謂：

〈E1〉色等勝義空故，通達空性與色等無分別慧所攝持之加行道，即暖位。

〈E2〉通達色等勝義無所得慧所攝持之加行道，即頂位。

〈E3〉通達色等於勝義中破除安住常無常等理，此慧所攝持之加行道，即忍位。

〈E4〉依於十地者，謂通達極喜地等勝義無所住如《經》廣說，此慧所攝持之加行道，即世第一法。

◎何故如是十地勝義無耶？

謂十地是無，以佛世尊現知一切法，於勝義中不見有十地故。

○若爾，此處之加行道與第一品所說之加行道，有重複失？

答云：前品所說是為了知勝出聲聞之加行道。此中所說，是為令了知以通達空性慧攝持而修四諦無常等十六行相，故無過失。

〈E1〉色等勝義空故，通達空性與色等無分別慧所攝持之加行道，即暖位。

(6a) 〈E1〉爾時，善現語帝釋言：「汝等諸天皆應諦聽！當為汝說諸菩薩眾於深般若波羅蜜多所應住相。僑尸迦！諸菩薩眾大誓莊嚴，發趣大乘，應以空相安住般若波羅蜜多。

〈E2〉通達色等勝義無所得慧所攝持之加行道，即頂位。

(6b) 〈E2〉不應住色，亦不應住受想行識，不應住預流果，亦不應住一來、不還、阿羅漢果、獨覺菩提；不應住此是色，亦不應住此是受想行識，不應住此是預流果，亦不應住此是一來、不還、阿羅漢果、獨覺菩提。

〈E3〉通達色等於勝義中破除安住常無常等理，此慧所攝持之加行道，即忍位。

(6c) 〈E3〉不應住色受想行識，若常若無常、若樂若苦、若我若無我、若淨若不淨、若空若不空；不應住預流果乃至獨覺菩提皆是無為所顯，是真福田，應受供養；不應住預流果極七返有，必入涅槃；不應住一來果未至究竟，一來此間，定盡眾苦；不應住不還果往彼滅度，不復還來；不應住阿羅漢果今世定入無餘涅槃；不應住獨覺果超聲聞地，不至佛地而般涅槃；不應住佛無為所顯，是真福田，應受供養，超諸聲聞、獨覺等地，利樂無量無數有情，令人無餘般涅槃界，假使一切有情界盡，亦入無餘般涅槃界。」

〈E4〉依於十地者，謂通達極喜地等勝義無所住，此慧所攝持之加行道，即世第一法。

(07) 〈E4〉時舍利子作是念言：「若爾，菩薩當云何住？」

(08) 爾時，善現知舍利子心之所念，便謂之曰：「於意云何？如來之心為何所住？」

(09) 時舍利子語善現言：「如來之心都無所住，以無所住，故名如來，謂不住有為界，亦不住無為界，亦非不住。」

(10) 善現報言：「菩薩亦爾，如諸如來於一切法心無所住，亦非不住，謂諸菩薩於深般若波羅蜜多，以無所得而為方便，應如是住，應如是學。」

【第 13 義】：知獨覺道之道相智 (II-3)

一、[所依差別]

〈E'〉自覺自證故，亦不依他教，是故當宣說，麟喻智甚深。

◎ 〈E'〉言自覺者，指獨覺阿羅漢，此於最後有時，不須依仗他師教授自能證得菩提，其亦字者，表於彼時自亦不用言語為他說法。

此麟喻智當說較聲聞為甚深，非如聲聞可依言教能了彼智，唯以身表、現神通說法甚深智故。

- (11) 〈E'〉爾時，眾中有諸天子竊作是念：「諸藥叉等言詞咒句種種差別雖復隱密，而我等輩猶可了知；大德善現於深般若波羅蜜多雖以種種言詞顯示，而我等輩竟不能解。」
- (12) 具壽善現知諸天子心之所念，便告彼言：「我於此中無說無示，汝亦不聞，當何所解？」

〈E''〉若誰於何義，欲聞如何說，於彼彼義，無聲如是現。

◎ 〈E''〉獨覺無聲云何說法耶？

如是說法無違，若有誰等所化有情，於何等義欲聞如何行相言說，即於彼等所化，有彼彼義，雖無聲音亦如是現也。

- (13) 〈E''〉時諸天子復作是念：「尊者善現於此義中欲令易解，而轉深細，難可測量。」

二、[如何了知彼道]

〈F1〉遠所取分別，〈F2〉未離能取故，當知由〈F3〉所依，攝為麟喻道。

◎當知麟喻道，由三法差別所攝，謂：

〈F1〉遠離色等外境所取分別。

- (14) 〈F1〉具壽善現知彼天子心之所念，復告之言：「諸有欲證欲住預流、一來、不還、阿羅漢果、獨覺菩提、諸佛無上正等菩提，要依此忍，乃能證住。」

〈F2〉未能遠離內識能取實執分別。

- (15) 〈F2〉時諸天子作是念言：「大德善現於今欲為何等有情說何等法？」

(16) 具壽善現知諸天子心之所念，而告彼言：「吾今欲為如幻有情說如幻法，彼於所說，無聞、無解、無所證故。」

(17) 時諸天子復作是念：「為聽法者及法如幻？為餘有情預流果等亦皆如幻？」

(18) 善現知彼心之所念，便告之言：「餘有情類若預流果、若一來果、若不還果、若阿羅漢果、若獨覺菩提、若佛無上正等菩提

亦皆如幻。」

- (19) 時諸天子問善現言：「豈諸如來應正等覺所證無上正等菩提亦皆如幻？」
- (20) 善現答言：「如是！如是！乃至涅槃，亦復如幻。」
- (21) 時諸天子問善現言：「豈可涅槃亦復如幻？」
- (22) 善現答言：「設更有法勝涅槃者，亦復如幻，何況涅槃。何以故？諸天子！幻與有情及一切法乃至涅槃，無二無別，皆不可得，不可說故。」

〈F3〉就所依差別，是依獨覺乘所攝法之法性為所依種性故。

- (23) 〈F3〉時舍利子、執大藏、滿慈子、大飲光等，問〔善現〕言：「所說般若波羅蜜多，如是甚深，誰能信受？」
- (24) 〔善現〕答言：「有不退轉諸菩薩眾於此所說甚深般若波羅蜜多能深信受，復有無量具足正見補特伽羅及願圓滿諸阿羅漢，於此所說甚深般若波羅蜜多亦能信受。」
- (25) 爾時，善現作如是言：「如是所說甚深般若波羅蜜多，無能信受。所以者何？此中無法可顯可示故，信受者亦不可得。」
- (26) 時天帝釋作是念言：「尊者善現雨大法雨，我應化作微妙音花，奉散供養。」作是念已，即便化作微妙音花，散善現上。
- (27) 爾時，善現作是念言：「今所散花，於諸天處未曾見有，是花微妙，定非水陸草木所生，應是諸天從心化出。」
- (28) 時天帝釋既知善現心之所念，謂善現言：「此所散花，實非水陸草木所生，亦非諸天從心化出，以所散花，無生性故。」
- (29) 具壽善現語帝釋言：「此花不生，便無花性。」

三、[釋順決擇分因]

- 開闡假法性，無違相為〈G1〉煖；
- 〈G2〉頂由達色等，無滅等所顯。
- 〈G3〉忍由內空等，不執色等故，色等無生等；
- 〈G4〉相為第一法。

◎了知獨覺道之道相智因，順決擇分有四，謂：

- 〈G1〉開闡色等勝義中無，名言中假有，不遠法性，是為煖位。
- (30) 〈G1〉時天帝釋作是念言：「尊者善現覺慧深廣，不壞假名，

而說實義。」作是念已，白善現言：「如是！如是！誠如尊教。諸菩薩眾於諸法中，應隨尊者所說而學。」

(31a) 爾時，善現語帝釋言：「如是！如是！如汝所說。諸菩薩眾於諸法中，皆應隨我所說而學。憍尸迦！諸菩薩眾隨我所說，於深般若波羅蜜多如是學時，不依預流果學，不依一來、不還、阿羅漢果學；不依獨覺菩提學，若不依此諸地而學，便學諸佛一切智智；若學諸佛一切智智，則學無量無邊佛法。」

〈G2〉頂位是由通達色等勝義無減等所顯。

(31b) 〈G2〉若學無量無邊佛法，則不學色受想行識有增有減；若不學色受想行識有增有減，則不學色受想行識有取有捨；若不學色受想行識有取有捨，則不學一切法有可攝受及可滅壞。

〈G3〉忍位由通達內空等故，了知色等勝義不可執。

(31c) 〈G3〉若不學一切法有可攝受及可滅壞，則不學一切智智有可攝受及可滅壞。諸菩薩眾如是學時，名為真學一切智智，速能證得一切智智。」

〈G4〉世第一法，了知色等勝義無生等相。

(32) 〈G4〉時舍利子問善現言：「若諸菩薩不學一切智智有可攝受及可滅壞，是諸菩薩如是學時，名為真學一切智智，速能證得一切智智耶？」

(33) 善現答言：「如是！如是！以無所得為方便故。」

【第14義】：大乘見道（II-4）

由諦與諦上，忍智四剎那，說此道相智，見道具功德。

〈H1〉真如與諸智，無互能所依，故不許差別，

〈H2〉廣大〈H3〉無能量，〈H4〉無量〈H5〉無二邊，

〈H6〉住彼於色等，執為佛自性，〈H7〉無取無捨等，

〈H8〉慈等及〈H9〉空性，〈H10〉證得佛陀性，

〈H11〉遍攝諸淨法，〈H12〉除遺諸苦病。

〈H13〉滅除涅槃執，〈H14〉諸佛守護等，

〈H15〉不殺害生等，一切相智理，自住立有情，

〈H16〉所修布施等，迴向大菩提，是道智剎那。

◎道相智所攝之見道中有十六剎那，謂：

○苦諦四相：

〈H1〉苦諦真如與佛現證彼之智，於勝義中無互相能依所依之性，於勝義中不許能所依差別現證無彼之大乘見道，即苦法忍。此第一剎那是所治種子之真能治無間道。

(34) 〈H1〉爾時，天帝釋問舍利子言：「菩薩所學甚深般若波羅蜜多當於何求？」

(35) 舍利子言：「菩薩所學甚深般若波羅蜜多當於善現所說中求。」

(36) 時天帝釋問善現言：「是誰神力為依持故，令舍利子作如是說？」

(37) 善現答言：「如來神力為依持故，令舍利子作如是說。」

(38) 天帝釋言：「復誰神力為依持故，尊者能說甚深般若波羅蜜多？」

(39) 善現報言：「如來神力為依持故，令我能說甚深般若波羅蜜多。憍尸迦！汝之所問『菩薩所學甚深般若波羅蜜多當於何求』者，憍尸迦！菩薩所學甚深般若波羅蜜多，不應即色求，不應離色求；不應即受想行識求，不應離受想行識求。何以故？色非般若波羅蜜多，亦非離色別有般若波羅蜜多；受想行識非般若波羅蜜多，亦非離受想行識別有般若波羅蜜多。」

〈H2〉廣大者，謂色等由勝義實空法界體性故，其能緣之般若波羅蜜多亦成廣大，即苦法智。

〈H3〉現證苦諦於勝義中無能量之量，是苦類忍。

〈H4〉現證苦諦勝義無量，即苦類智。

——此三剎那是從彼所治種子解脫之解脫道。以下諸相准此應知。

(40) 〈H2〉，〈H3〉，〈H4〉時天帝釋白善現言：「甚深般若波羅蜜多是大波羅蜜多，是無量波羅蜜多，是無邊波羅蜜多。」

○集諦四相：

〈H5〉現證集諦勝義無常斷二邊，是集法忍。

(41a) 〈H5〉善現報言：「如是！如是！何以故？憍尸迦！色無邊故，當知般若波羅蜜多亦無邊；受想行識無邊故，當知般若波羅蜜多亦無邊。」

(41b) 復次，憍尸迦！所緣無邊故，當知般若波羅蜜多亦無邊。憍尸迦！云何所緣無邊故，當知般若波羅蜜多亦無邊？謂一切法

前、中、後際皆不可得，說為無邊，法無邊故，所緣無邊，由此般若波羅蜜多亦說無邊。

- (41c) 復次，憍尸迦！一切法無邊故，當知般若波羅蜜多亦無邊。憍尸迦！云何一切法無邊故，當知般若波羅蜜多亦無邊？謂一切法邊不可得。所以者何？色乃至識前、中、後邊皆不可得，由此般若波羅蜜多前、中、後邊亦不可得，故說無邊。
- (41d) 復次，憍尸迦！有情無邊故，當知般若波羅蜜多亦無邊。憍尸迦！云何有情無邊故，當知般若波羅蜜多亦無邊？憍尸迦！非有情類其數甚多，計算其邊不可得故，說為無邊。」
- (42) 天帝釋言：「為何義故，作如是說？」
- (43) 善現答言：「我今問汝，隨汝意答。於意云何？言有情者，何法增語？」
- (44) 天帝釋言：「言有情者，非法增語，但是假立客名所攝、無事名所攝、無緣名所攝。」

〈H6〉住彼集法忍之瑜伽師，於色等上定執佛性實空，即集法智。

- (45) 〈H6〉善現復告天帝釋言：「於意云何？此中頗有真實有情可顯示不？」
- (46) 天帝釋言：「不也，大德！」
- (47) 善現告言：「無實有情可顯示故，說為無邊。憍尸迦！於意云何？假使如來應正等覺經如殑伽沙數大劫以無邊音說有情類無量名字，此中頗有真實有情有生滅不？」
- (48) 天帝釋言：「不也，大德！何以故？以諸有情本性淨故。」
- (49) 善現告言：「由此故說有情無邊故，當知般若波羅蜜多亦無邊。無性甚深，俱無邊故。」

大般若波羅蜜多經卷第五百五十七

罕堵波品第三

〈H7〉現知集諦於勝義中無取捨等，即集類忍。

- (01) 〈H7〉爾時，眾中天帝釋等欲界諸天、大梵王等色界諸天及餘神仙，歡喜踊躍，同時三返高聲唱言：「奇哉！奇哉！法性深妙。如來出世，以神通力加善現等宣說開示，若諸菩薩不離般若波羅蜜多，我等於彼，恭敬供養，如佛世尊。」
- (02) 爾時，佛告諸天等言：「如是！如是！若諸菩薩不離般若波羅蜜多，汝諸天等皆應供養，如佛世尊。天等當知！我於往昔然

燈佛時，蓮華王都四衢道首，見然燈佛，獻五莖花，布髮掩泥，聞正法要，不離般若波羅蜜多。時彼如來與我受記：『汝於來世過無數劫，當成如來，號為能寂，宣說般若波羅蜜多，與諸有情作大饒益。』」

- (03) 時諸天等俱白佛言：「甚奇！世尊！希有！善逝！如是般若波羅蜜多具大威神，令諸菩薩速能引攝一切智智。」
- (4a) 爾時，世尊知諸天等四眾雲集，同為明證，即便顧命天帝釋言：「僑尸迦！若善男子、善女人等，能於般若波羅蜜多至心聽聞、受持、讀誦，精勤修學，如理思惟，或復為他書寫解說，魔及眷屬、人非人等，伺求其短，終不能得，災橫疾疫皆不能害。」

〈H8〉修慈悲等四無量之功德，即集類智。

- (4b) 〈H8〉若諸天子已發無上正等覺心，未善聽聞、受持、讀誦甚深般若波羅蜜多，皆應來至是善男子、善女人所，至心聽聞、受持、讀誦，令極通利，轉為他說。

○滅諦四相：

〈H9〉現證色等真實空之空性，即滅法忍。

- (4c) 〈H9〉復次，僑尸迦！若善男子、善女人等，能於般若波羅蜜多至心聽聞、受持、讀誦，精勤修學，如理思惟，或復為他書寫解說，若在空宅、曠野、險道及危難處，諸天善神常來擁護，令無驚恐。」
- (05) 時四天王及天帝釋、梵天王等，合掌恭敬，俱白佛言：「若善男子、善女人等，能於般若波羅蜜多至心聽聞、受持、讀誦，精勤修學，如理思惟，或復為他書寫解說，我等眷屬常隨守護，不令一切災橫侵惱。」

〈H10〉所修善根能得佛果，即滅法智。

- (6a) 〈H10〉時天帝釋復白佛言：「甚奇！世尊！希有！善逝！是善男子、善女人等，奉事般若波羅蜜多，攝受如是現法功德。」

〈H11〉具足遍攝滅類忍中一切淨法種類功德，即滅類忍。

- (6b) 〈H11〉世尊！若善男子、善女人等，攝受般若波羅蜜多，則

具攝受布施、淨戒、安忍、精進、靜慮、般若波羅蜜多。〉

〈H12〉具足除遣外界一切苦害及內身一切病惱之功德，即滅類智。

(07) 〈H12〉爾時，佛告天帝釋言：「如是！如是！如汝所說。復次，憍尸迦！若善男子、善女人等，能於般若波羅蜜多至心聽聞、受持、讀誦，精勤修學，如理思惟，或復為他書寫解說，所獲功德，汝應諦聽，極善作意！當為汝說。」

(08) 天帝釋言：「唯然，願說！我等樂聞。」

(9a) 佛言：「憍尸迦！若有諸惡外道梵志，若諸惡魔或魔眷屬，若餘暴惡增上慢者，欲作種種不饒益事，彼適興心，自遭殃禍，漸當殄滅，不果所願。何以故？憍尸迦！是善男子、善女人等，能於般若波羅蜜多至心聽聞、受持、讀誦，精勤修學，如理思惟，或復為他書寫解說，法爾能令起惡心者自遭殃禍，不果所願。

(9b) 憍尸迦！是善男子、善女人等，奉事般若波羅蜜多，獲如是等功德勝利。如有妙藥，名曰莫耆，是藥威勢，能銷眾毒，如是妙藥隨所在處，諸毒蟲類不能逼近。有大毒蛇，飢行求食，遇見生類，欲螫噉之，其生怖死，奔趣妙藥，蛇聞藥氣，尋便退走。何以故？憍尸迦！如是妙藥具大威勢，能益身命，銷伏眾毒。當知般若波羅蜜多具大威勢亦復如是。

○道諦四相：

〈H13〉息滅實執涅槃之戲論，即道法忍。

(9c) 〈H13〉若善男子、善女人等，至心聽聞、受持、讀誦，精勤修學，如理思惟，或復為他書寫解說，諸惡人等，欲於其所作不饒益，必當殄滅，無所能為，般若威神能摧彼故。

〈H14〉安住道法智之瑜伽師有為諸佛守護之功德，即道法智。

(9d) 〈H14〉憍尸迦！是善男子、善女人等，四大天王及餘天眾，并諸神仙，常來擁護，不令一切災橫侵惱，諸佛、菩薩亦常護念，如法所求，無不滿足。

〈H15〉能得斷除殺生等十惡，遍知十善相一切相智之因理自己安住亦安立他，此智即道類忍。

(9e) 〈H15〉言詞威肅，聞皆敬受，發言稱量，語不喧雜，堅事善友，深知恩報，不為慳嫉、忿恨、覆惱、諂誑、矯等隱蔽其心。何以故？憍尸迦！是善男子、善女人等，般若威力調伏身心，令其遠離貪瞋癡等隨眠纏結。

〈H16〉所修布施等六度回向大菩提果，即是大乘見道道類智。

(9f) 〈H16〉是善男子、善女人等，具念、正知、慈悲喜捨，常作是念：『我不應隨慳貪、破戒、忿恚、懈怠、散亂、愚癡勢力而轉，若隨彼轉，則我布施、淨戒、安忍、精進、靜慮、妙慧不成，嚴淨色身尚不能得，況得無上正等菩提，故我不應隨彼力轉。』是善男子、善女人等，由此思惟，常得正念，諸惡煩惱不蔽其心。憍尸迦！若善男子、善女人等，能於般若波羅蜜多至心聽聞、受持、讀誦，精勤修學，如理思惟，或復為他書寫解說，獲如是等功德勝利。」

【第 15 義】：大乘修道作用 (II-5)

〈I.1〉遍息 〈I.2〉敬一切，〈I.3〉能勝諸煩惱，
〈I.4〉怨敵不能害，〈I.5〉菩提 〈I.6〉供養依。

◎大乘修道作用有六：

○四士用果：

〈I.1〉起上諸道，心得自在，名遍息滅。

〈I.2〉由摧慢故，恭敬善知識等一切眾生。

(10) 〈I.1〉, 〈I.2〉時天帝釋復白佛言：「如是般若波羅蜜多甚為希有，能調菩薩，令離高心，迴向所求一切智智。」

(11) 爾時，佛告天帝釋言：「云何般若波羅蜜多甚為希有，能調菩薩，令離高心，迴向所求一切智智？」

(12) 天帝釋言：「若諸菩薩不依般若波羅蜜多，無方便善巧故，雖修諸善，而起高心，不能迴求一切智智；若諸菩薩能依般若波羅蜜多，有方便善巧故，所修諸善，能伏高心，迴向所求一切智智。」

〈I.3〉由不隨煩惱轉有，勝伏貪等諸煩惱。

(13a) 〈I.3〉爾時，佛告天帝釋言：「如是！如是！如汝所說。」

憍尸迦！若善男子、善女人等，能於般若波羅蜜多至心聽聞、受持、讀誦，不為一切災橫侵惱。若在軍旅交戰陣時，至心念誦如是般若波羅蜜多，於諸有情慈悲護念，不為刀仗之所傷殺，所對怨敵，皆起慈心，設起惡心，自然退敗。是善男子、善女人等，若在軍陣，刀箭所傷，失命喪身，終無是處。

〈I.4〉他諸怨敵不能損害。

(13b) 〈I.4〉何以故？憍尸迦！如是般若波羅蜜多是大神咒，是無上咒，若能於此精勤修學，不為自害，不為他害，不為俱害。

○等流果：

〈I.5〉自力能辦大菩提果

(13c) 〈I.5〉疾證無上正等菩提，由斯獲得一切智智，觀有情類心行差別，隨宜為轉無上法輪，令如說行，得大饒益。

○增上果：

〈I.6〉修道位菩薩隨所住處，皆成可供養處

(13d) 〈I.6〉復次，憍尸迦！若善男子、善女人等，書此般若波羅蜜多置清淨處，供養恭敬，或復精勤受持讀誦，人非人等，欲求其短，終不能得，唯除宿世惡業應受。

憍尸迦！譬如有人或傍生類入菩提樹院，或至彼院邊，人非人等，不能傷害。

何以故？憍尸迦！三世諸佛皆坐此處得大菩提，施諸有情無恐無怖，無怨無害，身心安樂。當知般若波羅蜜多隨所住處亦復如是，一切天、龍、阿素洛等，常來守護。當知是處即真制多，一切有情皆應敬禮，恭敬供養，尊重、讚歎，不應暫捨。

何以故？憍尸迦！是諸有情歸依處故。」

【第 16 義】：勝解修道 (II-6)

勝解謂〈J1〉自利，〈J2〉俱利及〈J3〉利他，當知此三種，各有 a 下 b 中 c 上。別別為三品，又以下下等 (aa-cc)，復各分為三，共二十七種。

◎勝解修道有三種，謂：

〈J1〉自利；〈J2〉自他俱利；〈J3〉利他之勝解修道故。

◎此三種勝解修道復各分下、中、上三品〈a, b, c〉；

其下、中、上品，又各分為三種，謂下下品〈aa〉等。

——如是許勝解修道為二十七種。

〈J1〉自利之勝解修道

(14) 〈J1aa〉時天帝釋復白佛言：「若善男子、善女人等，書此般若波羅蜜多，種種莊嚴，供養恭敬，尊重、讚歎，復以種種上妙花鬘乃至燈明而為供養；有善男子、善女人等，佛涅槃後，起窣堵波，七寶嚴飾，寶函成貯佛設利羅安置其中，供養恭敬，尊重、讚歎，復以種種上妙花鬘乃至燈明而為供養。二所獲福，何者為多？」

(15) 爾時，佛告天帝釋言：「我還問汝，當隨意答。於意云何？如來所得一切智智、所證無上正等菩提及所依身，依何等道修學而得？」

(16) 天帝釋言：「皆依般若波羅蜜多修學而得。」

(17a) 爾時，佛告天帝釋言：「如是！如是！如汝所說。

憍尸迦！非但獲得相好身故，說名如來應正等覺，要由證得一切智智，乃名如來應正等覺。

憍尸迦！如來所得一切智智，要由般若波羅蜜多為因故起，佛相好身但為依處，若不依止佛相好身，無由而起。是故般若波羅蜜多正為因生一切智智，欲令此智現前相續故，復修集佛相好身。由此緣故，我涅槃後，諸天、龍神、人非人等，供養恭敬我設利羅。

(17b) 憍尸迦！若善男子、善女人等，書此般若波羅蜜多，種種莊嚴，受持讀誦，復以種種上妙花鬘乃至燈明供養恭敬，尊重、讚歎，則為供養一切智智及所依止佛相好身并涅槃後佛設利羅。

何以故？憍尸迦！一切智智及相好身并設利羅，皆以般若波羅蜜多為根本故。

以是故，憍尸迦！書此般若波羅蜜多，種種莊嚴，供養恭敬，所獲福聚，勝以七寶起窣堵波，供養如來設利羅福。

何以故？憍尸迦！供養般若波羅蜜多，則為供養一切智智、佛相好身、設利羅故。」

- (18) 〈J1ab〉時天帝釋便白佛言：「瞻部洲人於此般若波羅蜜多不能書寫，受持讀誦，恭敬供養，彼豈不知如是所說功德勝利？」
- (19) 爾時，佛告天帝釋言：「我還問汝，當隨意答。於意云何？瞻部洲內有幾許人成佛證淨，成法證淨，成僧證淨？有幾許人得預流果乃至阿羅漢果？有幾許人發心定趣獨覺菩提？有幾許人發心定趣無上菩提？」
- (20) 天帝釋言：「瞻部洲內有少許人成三證淨，轉少許人得預流果乃至阿羅漢果，轉少許人發心定趣獨覺菩提，轉少許人發心定趣無上菩提。」
- (21a) 佛言：「憍尸迦！如是！如是！如汝所說。
憍尸迦！瞻部洲內極少分人發心定趣無上菩提，於中少分既發心已，精勤修學趣菩提行，於中少分精勤修學菩提行時，於此般若波羅蜜多深信受，於中少分深信受已，修行般若波羅蜜多，於中少分既修行已，漸次安住不退轉地，於中少分住此地已，疾證無上正等菩提。
- (21b) 憍尸迦！若諸菩薩已得安住不退轉地，求證無上正等菩提，乃能深信受般若，受持讀誦，恭敬供養，書寫解說。憍尸迦！無量無邊諸有情類發菩提心，於中若一若二若三得住菩薩不退轉地，多分退住聲聞、獨覺。
- (21c) 〈J1ac〉是故當知善男子等，發菩提心，修菩薩行，欲住菩薩不退轉地，疾證無上正等菩提無留難者，應於般若波羅蜜多書寫、聽聞、受持、讀誦，供養恭敬，為他演說。
何以故？憍尸迦！是諸菩薩應作是念：『如來昔住菩薩位時，常勤修學如是般若波羅蜜多，我等亦應精勤修學。如是般若波羅蜜多，是我大師，我隨彼學，所願當滿。』
憍尸迦！一切菩薩若佛住世，若涅槃後，常應依止甚深般若波羅蜜多精勤修學。
- (21d) 憍尸迦！若善男子、善女人等，於諸如來般涅槃後，為供養佛設利羅故，以妙七寶起窰堵波，種種珍奇間雜嚴飾，復持種種天妙花鬘乃至燈明，盡其形壽供養恭敬，尊重、讚歎，於意云何？是善男子、善女人等，由此因緣獲福多不？」
- (22) 天帝釋言：「甚多，世尊！甚多，善逝！」
- (23a) 〈J1ba〉佛言：「憍尸迦！有善男子、善女人等，書此般若波羅蜜多，眾寶莊嚴，受持讀誦，復持種種上妙花鬘乃至燈明供

養恭敬，尊重、讚歎，是善男子、善女人等，所獲功德，甚多於前，無量無數。

(23b) 〈J1bb〉 - 〈J1cc〉 憍尸迦！置此一事。若善男子、善女人等，於諸如來般涅槃後，為供養佛設利羅故，以妙七寶起窠堵波，種種珍奇間雜嚴飾，如是充滿 bb 一瞻部洲、或 bc 四大洲、或 ca 小千界、或 cb 中千界、或復 cc 三千大千世界，皆持種種天妙花鬘乃至燈明，盡其形壽供養恭敬，尊重、讚歎，於意云何？是善男子、善女人等，由此因緣獲福多不？」

(24) 天帝釋言：「甚多，世尊！甚多，善逝！」

(25a) 佛言：「憍尸迦！有善男子、善女人等，書此般若波羅蜜多，眾寶莊嚴，受持讀誦，復持種種上妙花鬘乃至燈明供養恭敬，尊重、讚歎，是善男子、善女人等，所獲福聚，甚多於前，無量無數。

〈J2〉 自他俱利之勝解修道

(25b) 〈J2aa〉 憍尸迦！置如是事。假使三千大千世界諸有情類，非前非後，皆得人身，此一一人為供養佛設利羅故，於諸如來般涅槃後，以妙七寶起窠堵波，種種珍奇間雜嚴飾，如是一一各滿三千大千世界，復持種種天妙花鬘乃至燈明，盡其形壽供養恭敬，尊重、讚歎，於意云何？是諸有情由此因緣獲福多不？」

(26) 天帝釋言：「甚多，世尊！甚多，善逝！」

(27) 佛言：「憍尸迦！有善男子、善女人等，書此般若波羅蜜多，眾寶莊嚴，受持讀誦，復持種種上妙花鬘乃至燈明供養恭敬，尊重、讚歎，是善男子、善女人等，所獲功德，甚多於前，無量無數。」

(28) 時天帝釋便白佛言：「如是，世尊！如是，善逝！若善男子、善女人等，供養恭敬，尊重、讚歎甚深般若波羅蜜多，當知則為供養恭敬，尊重、讚歎過去、未來、現在諸佛一切智智。世尊！且置是事。假使十方各如殑伽沙數世界一切有情，非前非後，皆得人身，此一一人為供養佛設利羅故，各於如來般涅槃後，以妙七寶起窠堵波，種種珍奇間雜嚴飾，如是一一各滿十方殑伽沙數諸佛世界，復持種種天妙花鬘乃至燈明，或經一劫，或一劫餘，供養恭敬，尊重、讚歎，是諸有情由此因緣所獲福聚，雖復無量，而復有餘。善男子等，書此般若波羅蜜多，

眾寶莊嚴，受持讀誦，復持種種上妙花鬘乃至燈明供養恭敬，尊重、讚歎，所獲功德，甚多於前，無量無數。」

(29) 爾時，佛告天帝釋言：「如是！如是！如汝所說。

憍尸迦！是善男子、善女人等，供養般若波羅蜜多功德善根，無量無數，不可稱計，不可思議。所以者何？甚深般若波羅蜜多能生如來應正等覺一切智智，一切如來應正等覺一切智智能生諸佛設利羅故。

是故，憍尸迦！若善男子、善女人等，能書般若波羅蜜多，眾寶莊嚴，受持讀誦，復持種種上妙花鬘乃至燈明供養恭敬，尊重、讚歎，所獲功德，於前所造諸窣堵波及供養福，百倍為勝，千倍為勝，乃至鄔波尼殺曇倍亦復為勝。」

神咒品第四

(01) 〈J2ab〉 爾時，眾中四萬天子同聲共白天帝釋言：「大仙！於此甚深般若波羅蜜多常應聽聞、受持、讀誦，供養恭敬，尊重、讚歎。所以者何？若能於此甚深般若波羅蜜多至心聽聞、受持、讀誦，供養恭敬，尊重讚嘆，則令一切惡法損減，善法增益。」

(02) 爾時，佛告天帝釋言：「汝應於此甚深般若波羅蜜多至心聽聞、受持、讀誦，供養恭敬，尊重、讚歎。所以者何？若阿素洛及惡朋黨起如是念：『我等當與三十三天共興戰爭。』爾時，汝等應各至誠誦念如是甚深般若波羅蜜多，供養恭敬，尊重、讚歎。時阿素洛及彼朋黨所起惡心，自然息滅。」

(03) 時天帝釋便白佛言：「若如是者，甚深般若波羅蜜多是大神咒，是大明咒，是無上咒，是無等等咒。」

(4a) 爾時，佛告天帝釋言：「如是！如是！如汝所說。何以故？憍尸迦！三世諸佛皆依如是甚深般若波羅蜜多大神咒王，證得無上正等菩提，為諸有情說微妙法。

憍尸迦！依深般若波羅蜜多，世間便有十善業道、若四靜慮、若四無量、若四無色定、若五神通、若餘無量無邊佛法，皆得出現。

憍尸迦！依深般若波羅蜜多大神咒王，世間便有菩薩出現；依菩薩故，世間便有十善業道、若四靜慮、若四無量、若四無色定、若五神通、若餘無量無邊佛法皆得出現。

憍尸迦！若諸如來應正等覺不出世時，唯有菩薩由先所聞甚深般若波羅蜜多增上勢力，為諸有情方便施設十善業道、四靜慮等，令勤修學。

憍尸迦！譬如夜分，因滿月輪，光明照觸，星宿、藥等，隨其勢力，皆得增盛。如是如來應正等覺，前已滅度，正法隱沒，後未出時，世間所有善行、正行，一切皆依菩薩出現，菩薩所有方便善巧皆依般若波羅蜜多而得成辦，是故般若波羅蜜多是諸殊勝善法根本。

- (4b) 復次，憍尸迦！若善男子、善女人等，能於般若波羅蜜多至心聽聞、受持、讀誦，當得現世種種饒益，調諸毒藥、水火、刀兵、災橫、疾疫皆不能害。若遭官事怨賊逼迫，至心誦念甚深般若波羅蜜多，若至其所，終不為彼譴罰加害，欲求其短，皆不能得。何以故？憍尸迦！甚深般若波羅蜜多威神勢力，法令爾故。憍尸迦！是善男子、善女人等，若有欲至國王、王子、大臣等處，至心誦念甚深般若波羅蜜多，定為王等歡喜問訊，供養恭敬，尊重、讚歎。何以故？憍尸迦！甚深般若波羅蜜多常於有情引發種種慈悲事故，由此因緣，諸求短者，種種方便，皆不能得。」
- (05) 時有眾多外道梵志欲求佛過，來詣佛所。時天帝釋見已，念言：「今此眾多外道梵志來趣法會，伺求佛短，將非般若留難事耶？我當誦念從佛所受甚深般若波羅蜜多，令彼邪徒復道而去。」念已，便誦甚深般若波羅蜜多。於是眾多外道梵志遙申敬禮，右繞世尊，復道而去。
- (06) 時舍利子見已，念言：「彼有何緣，適來還去？」
- (07) 佛知其意，告舍利子：「彼諸外道，來求我過，由天帝釋誦念般若波羅蜜多，令彼還去。舍利子！我都不見彼諸外道有少白法，唯懷惡心，為求我過，來至我所。舍利子！我都不見一切世間有諸天魔及外道等有情之類，說般若時，懷勃惡心，來求得便，般若威力無能壞故。」
- (08) 爾時，惡魔竊作是念：「今佛四眾恭敬圍繞，欲、色界天皆來集會，宣說般若波羅蜜多，此中必有諸大菩薩親於佛前受菩提記，當得無上正等菩提，轉妙法輪，空我境界，我當往至，破壞其眼。」作是念已，化作四軍，奮威勇銳，來詣佛所。
- (09) 時天帝釋見已，念言：「將非惡魔化作斯事欲來惱佛，并與般

若波羅蜜多而作留難？何以故？如是四軍嚴飾殊麗，諸王軍眾皆不能及，定是惡魔之所化作。惡魔長夜伺求佛短，壞諸有情所修善業，我當誦念從佛所受甚深般若波羅蜜多，令彼惡魔復道而去。」時天帝釋念已，便誦甚深般若波羅蜜多，於是惡魔漸退而去，甚深般若波羅蜜多大神咒王威力逼故。

- (10) 時有無量三十三天俱時化作天妙音花，踊身空中，而散佛上，合掌恭敬，同白佛言：「願此般若波羅蜜多在瞻部洲人中久住，乃至般若波羅蜜多在瞻部洲人間流布，當知是處佛法僧寶常不滅沒，饒益世間，令獲殊勝利益安樂。」
- (11) 時彼諸天復各化作天妙音花而散佛上，重白佛言：「若諸有情修行般若波羅蜜多，一切惡魔及彼眷屬伺求其短，不能得便。」
- (12) 時天帝釋便白佛言：「若諸有情但聞般若波羅蜜多功德名字，當知如是諸有情類已曾供養無量諸佛，於諸佛所，發弘誓願，多集善根，能成是事，非從少小善根中來，況能聽聞、受持、讀誦，精勤修學，如理思惟，轉為有情書寫解說，供養恭敬，尊重、讚歎。所以者何？欲求諸佛一切智智，應於般若波羅蜜多理趣中求，如有情類欲求大寶，應於大海方便勤求。」
- (13) 爾時，佛告天帝釋言：「如是！如是！如汝所說。諸佛所得一切智智皆依般若波羅蜜多而得成辦。」
- (14) 〈J2ac〉爾時，慶喜便白佛言：「如來何緣不讚布施乃至靜慮波羅蜜多，唯讚般若波羅蜜多？」
- (15) 佛告慶喜：「由此般若波羅蜜多能與前五波羅蜜多為尊為導，故我偏讚。復次，慶喜！於意云何？若不迴向一切智智而修布施乃至般若，此可名為真修布施乃至般若波羅蜜多不？」
- (16) 慶喜對曰：「不也，世尊！」
- (17) 佛告慶喜：「於意云何？若離般若波羅蜜多，為能真迴向一切智智不？」
- (18) 慶喜對曰：「不也，世尊！」
- (19) 佛告慶喜：「由此因緣，我說般若波羅蜜多能與前五波羅蜜多為尊為導，故我偏讚。慶喜當知！譬如大地，以種散中，眾緣和合，便得生長，應知大地與種生長，為所依止，為能建立。如是般若波羅蜜多及所迴向一切智智與布施等波羅蜜多為所依止，為能建立，令得生長，故說般若波羅蜜多能與前五波羅蜜多為尊為導，故我偏讚。慶喜當知！甚深般若波羅蜜多亦能

攝受一切智智，故偏讚說。」

- (20) 〈J2ba〉時天帝釋便白佛言：「今者如來應正等覺於深般若波羅蜜多功德勝利說猶未盡。何以故？我從世尊所受般若波羅蜜多功德勝利，甚深甚廣，量無邊際。善男子等，於深般若波羅蜜多至心聽聞、受持、讀誦，精勤修學，如理思惟，復轉為他書寫解說，或持種種上妙花鬘乃至燈明而為供養，所獲功德亦無邊際。」
- (21) 爾時，佛告天帝釋言：「我不說此甚深般若波羅蜜多但有前說功德勝利。甚深般若波羅蜜多具足無邊功德勝利，分別演說不可盡故。我亦不說於深般若波羅蜜多至心聽聞乃至供養，善男子等但有如前所說功德，彼所獲福無邊際故。」
- (22) 〈J2bb〉時天帝釋即白佛言：「我等諸天常隨守護是善男子、善女人等，不令一切人、非人等種種惡緣之所損害。」
- (23a) 爾時，佛告天帝釋言：「若善男子、善女人等，受持讀誦甚深般若波羅蜜多及廣為他宣說開示，時有無量百千天子為聽法故，皆來集會，歡喜踊躍，敬受如是甚深般若波羅蜜多。是諸天子以天威力，令說法師增益辯才，宣揚無盡；不樂說者，令其樂說；身心疲極，令得康強。憍尸迦！是善男子、善女人等，受持讀誦甚深般若波羅蜜多及廣為他宣說開示，得如是等現法勝利。
- (23b) 復次，憍尸迦！若善男子、善女人等，於四眾中宣說如是甚深般若波羅蜜多，心無怯怖，不為一切論難所伏。所以者何？彼由如是甚深般若波羅蜜多大神咒王所護持故。彼住法空，都不見有能難、所難及所說故，亦不見有於深般若波羅蜜多能求短故，亦復不見甚深般若波羅蜜多有過失故。憍尸迦！是善男子、善女人等，為眾宣說甚深般若波羅蜜多，得如是等現法勝利。
- (23c) 復次，憍尸迦！若善男子、善女人等，於深般若波羅蜜多至心聽聞、受持、讀誦，精勤修學，如理思惟，及廣為他書寫解說，是善男子、善女人等，心不沈沒，亦不憂悔，不恐不怖。所以者何？是善男子、善女人等，不見有法可令沈沒、憂悔、恐怖，於諸法中，無所執著。憍尸迦！是善男子、善女人等，由於般若波羅蜜多至心聽聞乃至解說，得如是等現法勝利。

- (23d) 〈J2bc〉復次，憍尸迦！若善男子、善女人等，能於般若波羅蜜多至心聽聞、受持、讀誦，精勤修學，如理思惟，亦轉為他書寫解說，復持種種上妙花鬘乃至燈明而為供養，是善男子、善女人等，恒為父母、師長、親友、國王、大臣及諸沙門、婆羅門等之所敬愛，亦為十方諸佛、菩薩、聲聞、獨覺之所護念，復為世間諸天、魔、梵、人及非人之所守衛。
- (23e) 〈J2ca〉一切災橫皆自消滅，外道異論皆不能伏。憍尸迦！是善男子、善女人等，由於般若波羅蜜多至心聽聞乃至供養，得如是等現法勝利。
- (23f) 〈J2cb〉復次，憍尸迦！若善男子、善女人等，書寫如是甚深般若波羅蜜多，種種莊嚴，置清淨處，供養恭敬，尊重、讚歎，時此三千大千國土及餘十方無邊世界所有四大王眾天乃至廣果天已發無上菩提心者，常來此處觀禮，讀誦，供養恭敬，尊重、讚歎，右繞禮拜，合掌而去；諸淨居天亦常來此觀禮，讀誦，供養恭敬，尊重、讚歎，右繞禮拜，合掌而去；有大威德諸龍、藥叉，廣說乃至人非人等，亦常來此觀禮，讀誦，供養恭敬，尊重、讚歎，右繞禮拜，合掌而去。憍尸迦！是善男子、善女人等，應作是念：『今此三千大千國土及餘十方無邊世界一切天、龍，廣說乃至人非人等，常來至此觀禮，讀誦我所書寫甚深般若波羅蜜多，供養恭敬，尊重、讚歎，右繞禮拜，合掌而去，此我則為已設法施。』作是念已，歡喜踊躍，令所獲福，倍復增長。憍尸迦！是善男子、善女人等，由無邊界天、龍、藥叉、阿素洛等，常隨擁護，所住之處，人非人等不能損害，唯除宿世定惡業因，現在應熟，或轉重惡，現世輕受。憍尸迦！是善男子、善女人等，由深般若波羅蜜多大威神力，獲如是等現法勝利。〉
- (24) 〈J2cc〉時天帝釋便白佛言：「是善男子、善女人等，以何驗知有此三千大千國土及餘十方無邊世界天、龍、藥叉、阿素洛等，來至其處觀禮，讀誦彼所書持甚深般若波羅蜜多，供養恭敬，尊重、讚歎，合掌右繞，歡喜護念？」

〈J3〉利他之勝解修道

- (25a) 〈J3aa〉爾時，佛告天帝釋言：「是善男子、善女人等，若見如是甚深般若波羅蜜多所在之處有妙光明，或聞其處異香氣

郁，或復聞有微細樂音，當知爾時有大神力威德熾盛諸天龍等，來至其處觀禮，讀誦彼所書持甚深般若波羅蜜多，供養恭敬，尊重、讚歎，合掌右繞，歡喜護念。

(25b) 復次，憍尸迦！是善男子、善女人等，修鮮淨行，嚴麗其處，至心供養甚深般若波羅蜜多，當知爾時有大神力威德熾盛諸天龍等，來至其處觀禮，讀誦彼所書持甚深般若波羅蜜多，供養恭敬，尊重、讚歎，合掌右繞，歡喜護念。憍尸迦！隨有如是具大神力威德熾盛諸天龍等，來至其處，此中所有惡鬼邪神驚怖退散，無敢住者。由此因緣，是善男子、善女人等，心便廣大，起淨勝解，所修善業倍復增明，諸有所為皆無障礙。以是故，憍尸迦！甚深般若波羅蜜多隨所在處，應當周匝除去糞穢，掃拭塗治，香水散灑，敷設寶座而安置之，燒香散花而為供養。

(25c) 復次，憍尸迦！是善男子、善女人等，若能如是供養恭敬，尊重、讚歎甚深般若波羅蜜多，決定當得身心無倦，身心安樂，身心調柔，身心輕利，繫心般若波羅蜜多，夜寢息時，無諸惡夢，唯得善夢，謂見如來應正等覺身真金色，相好莊嚴，放大光明，普照一切，聲聞、菩薩恭敬圍繞，身處眾中，聞佛為說布施等六波羅蜜多及餘善根相應法義。或於夢中見菩提樹，其量高廣，眾寶莊嚴，有大菩薩往詣樹下，結跏趺坐，證得無上正等菩提，轉妙法輪，度有情眾。或於夢中見有無量無數菩薩論義決擇種種法義。或於夢中見有無量無數菩薩修行六種波羅蜜多，成熟有情，嚴淨佛土，迴向攝受一切智智。或於夢中見十方界各有無量那庾多佛，亦聞其聲，謂某世界有某如來應正等覺，若干百千聲聞、菩薩恭敬圍繞說如是法。或於夢中見十方界各有無量那庾多佛入般涅槃，彼一一佛般涅槃後，各有施主為供養佛設利羅故，以妙七寶各起無量大窠堵波，復於一一窠堵波所，各持無量上妙花鬘乃至燈明，經無量劫供養恭敬，尊重、讚歎。

(25d) 憍尸迦！是善男子、善女人等，見如是類諸善夢相，若睡若覺，身心安樂，諸天神等，益其精氣，令彼自覺身體輕便，由此因緣，不多貪著飲食、醫藥、衣服、臥具，於四供養，其心輕微，如瑜伽師入勝妙定，由彼定力滋潤身心，從定出已，雖遇美膳，而心輕微，此亦如是。何以故？憍尸迦！是

善男子、善女人等，由此三千大千國土及餘十方無邊世界諸佛、菩薩、獨覺、聲聞、天、龍、藥叉、阿素洛等，慈悲護念，以妙精氣，冥澍身心，令其志勇，體充盛故。憍尸迦！若善男子、善女人等，欲得如是現法勝利，於深般若波羅蜜多應常聽聞、受持、讀誦，精勤修學，如理思惟，廣為有情宣說開示。

- (25e) 憍尸迦！若善男子、善女人等，雖於般若波羅蜜多不能聽聞、受持、讀誦，精勤修學，如理思惟，廣為有情宣說開示，而為正法久住世間，利樂有情不滅沒故，書寫如是甚深般若波羅蜜多，眾寶嚴飾，復持無量上妙花鬘乃至燈明供養恭敬，尊重、讚歎，亦得如前所說勝利。

大般若波羅蜜多經卷第五百五十八

設利羅品第五

- (25f) 〈J3ab〉復次，憍尸迦！假使充滿此瞻部洲佛設利羅以為一分，有書般若波羅蜜多深妙法門復為一分，於斯二分，汝取何者？」
- (26a) 天帝釋言：「我意寧取深妙般若波羅蜜多。所以者何？我於諸佛設利羅所，非不信受供養恭敬，然諸佛身及設利羅，皆因般若波羅蜜多深妙法門而出生故，皆由般若波羅蜜多深妙法門功德威力所薰修故，乃為一切世間天人、阿素洛等供養恭敬。
- (26b) 世尊！如我坐在三十三天善法殿中天帝座上，為諸天眾宣說正法時，有無量諸天子等，來至我所，聽我所說，供養恭敬，右邊而去。我若不在彼法座時，諸天子等亦來其處，雖不見我，如我在時，供養恭敬，咸言：『此處是天帝釋為諸天等說法之座，我等皆應如天主在，供養恭敬，右邊而去。』佛設利羅亦復如是，深妙般若波羅蜜多為因引生，一切智智之所依止故，為一切世間天人、阿素洛等供養恭敬，是故我說於二分中，我意寧取深妙般若波羅蜜多。
- (26c) 〈J3ac〉, 〈J3ba〉, 〈J3bb〉世尊！假使充滿三千世界佛設利羅以為一分，有書般若波羅蜜多深妙法門復為一分，於斯二分，我意寧取深妙般若波羅蜜多。所以者何？我於諸佛設利羅所，非不信受供養恭敬，然諸佛身及設利羅，皆因般若波羅蜜多深妙法門而出生故，皆由般若波羅蜜多深妙法門功德威

力所薰修故，乃為一切世間天人、阿素洛等供養恭敬。

- (26d) 世尊！如負債人怖畏債主，即便親近奉事國王，依王勢力得免怖畏，反為債主怖畏供養。所以者何？彼人依附國王勢力，王所攝受具威勢故。王喻般若波羅蜜多，佛設利羅喻依王者，由依般若波羅蜜多故，得世間供養恭敬。諸佛所得一切智智亦依般若波羅蜜多而得成辦故，我寧取深妙般若波羅蜜多。
- (26e) 〈J3bc〉世尊！譬如無價大寶神珠，具無量種勝妙威德，隨所住處，有此神珠，人非人等，不能為害。設有男子，或復女人，為鬼所執，身心苦惱，若有持此神珠示之，由珠威力，鬼便捨去。諸有熱病，或風或痰，或二或三，和合為病，若有繫此神珠著身，如是諸病，無不除愈。此珠在闇能作照明，熱時能涼，寒時能暖，隨地方所，有此神珠，時節調和，不寒不熱。若地方所，有此神珠，蛇蠍等毒，無敢停止。設有男子，或復女人，為毒所中，楚痛難忍，若有持此神珠令見，珠威勢故，毒即消滅。若諸有情，身嬰癩疾、惡瘡、腫吞、目眩胚等眼病、耳病、鼻病、舌病、喉病、身病、諸支節病，帶此神珠，眾病皆愈。若諸池沼泉井等中，其水濁穢，或將枯涸，以珠投之，水便盈滿，香潔澄淨，具八功德。若以青黃赤白紅紫碧綠雜綺種種色衣，裹此神珠，投之於水，水隨衣彩，作種種色。如是無價大寶神珠，威德無邊，說不能盡，若置箱篋，亦令其器具足成就無邊威德；設空箱篋，由曾置珠，其器仍為眾人愛重。」
- (27) 爾時，慶喜問帝釋言：「如是神珠為天獨有，人亦有耶？」
- (28) 天帝釋言：「人中、天上俱有此珠。若在人中，形小而重；若在地上，形大而輕。又人中珠，相不具足；在地上者，其相周圓。天上神珠，威德殊勝，無量倍數，過人所有。」
- (29a) 時天帝釋復白佛言：「深妙般若波羅蜜多亦復如是，為眾德本，能滅無量惡不善法，隨所在處，滅諸有情身心苦惱，人非人等，不能為害。如來所得一切智智及餘無量無邊功德，皆因般若波羅蜜多。佛設利羅由諸功德所薰修故，是諸功德所依器故，佛涅槃後，堪受一切世間天人、阿素洛等供養恭敬，是故我說於二分中，我意寧取深妙般若波羅蜜多。」
- (29b) 〈J3ca〉世尊！假使充滿十方各如殑伽沙界佛設利羅以為一分，有書般若波羅蜜多深妙法門復為一分，於斯二分，我意寧取

深妙般若波羅蜜多。所以者何？我於諸佛設利羅所，非不信受供養恭敬，然諸佛身及設利羅，皆因般若波羅蜜多深妙法門而出生故，皆由般若波羅蜜多深妙法門功德威力所薰修故，乃為一切世間天人、阿素洛等供養恭敬。

- (29c) 復次，世尊！深妙般若波羅蜜多能生如來一切智智，如來所得一切智智能生佛身及設利羅，是故供養如是般若波羅蜜多則為供養三世諸佛一切智智及設利羅。復次，世尊！若善男子、善女人等，欲得常見十方諸佛，當行當修甚深般若波羅蜜多。」
- (30) 〈J3cb〉爾時，佛告天帝釋言：「如是！如是！如汝所說。憍尸迦！過去、未來、現在諸佛皆依般若波羅蜜多證得無上正等菩提，是故如來供養恭敬。」
- (31) 〈J3cc〉天帝釋言：「如是般若波羅蜜多是大、無上波羅蜜多，一切如來皆依般若波羅蜜多知諸有情心行差別。」
- (32) 爾時，佛告天帝釋言：「如是！如是！如汝所說。憍尸迦！是故菩薩摩訶薩眾長夜修行甚深般若波羅蜜多，為如實知諸有情類心行差別。」
- (33) 時天帝釋復白佛言：「諸菩薩眾為但應行般若波羅蜜多？為亦應行餘五波羅蜜多？」
- (34) 爾時，佛告天帝釋言：「諸菩薩眾應具行六波羅蜜多，然行布施、淨戒、安忍、精進、靜慮，觀諸法時，皆以般若波羅蜜多而為上首。憍尸迦！如瞻部洲所有諸樹，枝條、莖幹、花葉、果實，雖有種種形類不同，而其蔭影都無差別。如是六種波羅蜜多雖各有異，而由般若波羅蜜多方便善巧攝受，迴向一切智智，諸相差別都不可得。」
- (35a) 時天帝釋復白佛言：「甚深般若波羅蜜多成就廣大、圓滿、無量、無邊功德。」

【第 17 義】：勝解修道之勝利：讚事并稱揚 (II-7)

般若波羅蜜，於諸勝解位，由三種九聚，

〈K1〉讚 〈K2〉事及 〈K3〉稱揚。

◎若於教、道、果三種般若波羅蜜多，修勝解時，佛以三類九品
〈aa, ab, ac; ba, bb, bc; ca, cb, cc〉，如其次第，後後轉勝：

〈K1〉讚美；〈K2〉承事；〈K3〉稱揚，令發歡喜故。

〈K1〉讚美

(35b) 〈K1aa〉若有書持如是般若波羅蜜多，眾寶嚴飾，復持種種上妙花鬘乃至燈明供養恭敬，尊重、讚歎，守護不捨；復有書持如是般若波羅蜜多，眾寶嚴飾，轉施他人受持讀誦。此二福聚，何者為多？」

(36) 爾時，佛告天帝釋言：「我還問汝，隨汝意答。若諸有情從他請得佛設利羅，盛以寶函，置清淨處，復持種種上妙花鬘乃至燈明供養恭敬，尊重、讚歎，守護不捨；若復有人從他請得佛設利羅，分施與他，令其供養，於意云何？此二福聚，何者為勝？」

(37) 天帝釋言：「如我解佛所說義者，此二福聚，後者為勝。」

(38a) 爾時，佛讚天帝釋言：「善哉！善哉！如汝所說。憍尸迦！書持般若波羅蜜多，若自供養，若轉施他受持讀誦，此二福聚，後者為多。」

(38b) 〈K1ab〉復次，憍尸迦！若善男子、善女人等，能以般若波羅蜜多甚深義趣，如實為他分別解說，所獲福聚，復勝施他多百千倍。敬此法師，應如敬佛。（缺〈K1ac〉）

經典品第六

(38c) 〈K1ba〉 - 〈K1cc〉復次，憍尸迦！若善男子、善女人等，教瞻部洲諸有情類，皆令安住十善業道，展轉乃至普教十方殑伽沙等諸佛世界諸有情類，皆令安住十善業道，於意云何？是善男子、善女人等，由此因緣得福多不？」

(39) 天帝釋言：「甚多，世尊！甚多，善逝！」

(40a) 佛言：「憍尸迦！若善男子、善女人等，書持般若波羅蜜多，眾寶莊嚴，施他讀誦，所獲福聚，甚多於前。」

〈K2〉承事

(40b) 〈K2aa〉 - 〈K2ca〉復次，憍尸迦！若善男子、善女人等，教瞻部洲諸有情類，皆令安住四靜慮、四無量、四無色定、五神通，展轉乃至普教十方殑伽沙等諸佛世界諸有情類，皆令安住四靜慮、四無量、四無色定、五神通，於意云何？是善

男子、善女人等，由此因緣得福多不？」

- (41) 天帝釋言：「甚多，世尊！甚多，善逝！」
- (42) 〈K2cb〉佛言：「憍尸迦！若善男子、善女人等，書持般若波羅蜜多，眾寶莊嚴，施他讀誦，所獲福聚，甚多於前。復次，憍尸迦！若善男子、善女人等，書持般若波羅蜜多，眾寶莊嚴，自恒讀誦，不如有人書持般若波羅蜜多，眾寶莊嚴，施他讀誦。復次，憍尸迦！若善男子、善女人等，書持般若波羅蜜多，眾寶莊嚴，施他讀誦，不如有人於深般若波羅蜜多善知義趣，為他解說。」
- (43) 〈K2cc〉時天帝釋便白佛言：「應為何等諸有情類解說般若波羅蜜多甚深義趣？」
- (44) 佛言：「憍尸迦！若善男子、善女人等，不知般若波羅蜜多甚深義趣，應為解說。何以故？憍尸迦！於當來世，有善男子、善女人等，求趣無上正等菩提，聞他宣說相似般若波羅蜜多，心便迷謬，退失中道。」
- (45) 時天帝釋復白佛言：「何等名為相似般若波羅蜜多？」
- (46a) 佛言：「憍尸迦！於當來世，有諸苾芻，愚癡顛倒，雖欲宣說真實般若波羅蜜多，而顛倒說相似般若波羅蜜多。云何苾芻顛倒宣說相似般若波羅蜜多？謂彼苾芻為發無上菩提心者，說色壞故，名為無常，非常無故，名為無常；說受想行識壞故，名為無常，非常無故，名為無常。復作是說：『若如是求，是行般若波羅蜜多。』憍尸迦！如是名為顛倒宣說相似般若波羅蜜多。憍尸迦！不應以色壞故，觀色無常；不應以受想行識壞故，觀受想行識無常。但應以常無故，觀色乃至識為無常。以是故，憍尸迦！若善男子、善女人等，於深般若波羅蜜多善知義趣，為他解說，其福甚多。」

〈K3〉稱揚

- (46b) 〈K3aa〉復次，憍尸迦！若善男子、善女人等，教贍部洲一切有情，皆令住預流果、或一來果、或不還果、或阿羅漢果、或獨覺菩提，展轉乃至普教十方各如殑伽沙數世界一切有情，皆令住預流果乃至獨覺菩提，於意云何？是善男子、善女人等，由此因緣得福多不？」
- (47) 天帝釋言：「甚多，世尊！甚多，善逝！」

- (48a) 〈K3ab〉佛言：「憍尸迦！有善男子、善女人等，書持般若波羅蜜多，眾寶莊嚴，施他讀誦，教授教誡彼有情言：『汝應精勤修學般若波羅蜜多相應佛法，定當證得一切智智。』是善男子、善女人等，所獲福聚，甚多於前。何以故？憍尸迦！一切預流、一來、不還、阿羅漢果、獨覺菩提，皆是般若波羅蜜多所流出故，謂彼證得一切智智，教化無量無邊有情，令成預流乃至獨覺無邊際故。
- (48b) 〈K3ac〉復次，憍尸迦！若瞻部洲諸有情類皆發無上正等覺心，展轉乃至十方各如殑伽沙界一切有情皆發無上正等覺心，有善男子、善女人等，書持般若波羅蜜多，眾寶莊嚴，施令讀誦，於意云何？是善男子、善女人等，由此因緣得福多不？」
- (49) 天帝釋言：「甚多，世尊！甚多，善逝！」
- (50a) 佛言：「憍尸迦！若善男子、善女人等，書持般若波羅蜜多，眾寶莊嚴，轉施與一已於無上正等菩提不退轉者令勤修學，是善男子、善女人等，所獲福聚，甚多於前。何以故？憍尸迦！如是菩薩修行般若波羅蜜多疾得圓滿，令深般若波羅蜜多廣行流布。
- (50b) 復次，憍尸迦！若瞻部洲諸有情類皆發無上正等覺心，展轉乃至十方各如殑伽沙界一切有情皆發無上正等覺心，有善男子、善女人等，書持般若波羅蜜多，眾寶莊嚴，施令讀誦，復以巧妙文義解釋，於意云何？是善男子、善女人等，由此因緣得福多不？」
- (51) 天帝釋言：「甚多，世尊！甚多，善逝！」
- (52a) 佛言：「憍尸迦！若善男子、善女人等，書持般若波羅蜜多，轉施與一已於無上正等菩提不退轉者令其讀誦，復以巧妙文義解釋，是善男子、善女人等，所獲福聚，甚多於前。
- (52b) 〈K3ba〉復次，憍尸迦！若瞻部洲諸有情類皆於無上正等菩提得不退轉，展轉乃至十方各如殑伽沙界一切有情皆於無上正等菩提得不退轉，有善男子、善女人等，書持般若波羅蜜多，眾寶莊嚴，施令讀誦，於意云何？是善男子、善女人等，由此因緣得福多不？」
- (53) 天帝釋言：「甚多，世尊！甚多，善逝！」
- (54a) 佛言：「憍尸迦！已於無上正等菩提得不退轉諸菩薩中，有一

菩薩作如是言：『我今欣樂疾證無上正等菩提，濟拔有情生死眾苦。』若善男子、善女人等，為成彼事，書持般若波羅蜜多，眾寶莊嚴，施令讀誦，是善男子、善女人等，所獲福聚，甚多於前，無量無數。

- (54b) 〈K3bb〉 - 〈K3cb〉復次，憍尸迦！若瞻部洲諸有情類皆於無上正等菩提得不退轉，展轉乃至十方各如殑伽沙界一切有情皆於無上正等菩提得不退轉，有善男子、善女人等，書持般若波羅蜜多，眾寶莊嚴，施令讀誦，復以巧妙文義解釋，於意云何？是善男子、善女人等，由此因緣得福多不？」
- (55) 天帝釋言：「甚多，世尊！甚多，善逝！」
- (56) 佛言：「憍尸迦！已於無上正等菩提得不退轉諸菩薩中，有一菩薩作如是言：『我今欣樂疾證無上正等菩提，濟拔有情生死眾苦。』若善男子、善女人等，為成彼事，書持般若波羅蜜多，眾寶莊嚴，施令讀誦，復以巧妙文義解釋，是善男子、善女人等，所獲福聚，甚多於前，無量無數。」
- (57) 〈K3cc〉時天帝釋便白佛言：「如是，世尊！如是，善逝！世尊！如如菩薩摩訶薩轉近無上正等菩提，如是如是應以般若波羅蜜多轉更慇懃教授教誡，應以上妙飲食、衣服、臥具、醫藥及餘資具供養恭敬，令無乏少。若善男子、善女人等，能以如是法施、財施攝受供養彼菩薩摩訶薩，是善男子、善女人等，由此因緣獲福無量。所以者何？彼菩薩摩訶薩要由如是法施、財施攝受供養，疾證無上正等菩提，為諸有情作大饒益。」
- (58) 爾時，善現讚帝釋言：「善哉！善哉！善能攝受、勸勵、護助諸菩薩摩訶薩，令疾證得所求無上正等菩提。憍尸迦！汝今已作佛聖弟子所應作事。何以故？憍尸迦！一切如來諸聖弟子為欲饒益諸有情故，法爾攝受、勸勵、護助諸菩薩摩訶薩，令疾證得所求無上正等菩提。所以者何？一切如來、聲聞、獨覺、世間勝事，皆由菩薩摩訶薩眾而得出現。何以故？憍尸迦！若無菩薩摩訶薩發菩提心，則無菩薩摩訶薩能學六種波羅蜜多；若無菩薩摩訶薩修學六種波羅蜜多，則無菩薩摩訶薩能證無上正等菩提；若無菩薩摩訶薩證得無上正等菩提，則無如來、聲聞、獨覺、世間勝事，是故如來諸聖弟子為欲利樂諸有情故，法應攝受、勸勵、護助諸菩薩眾，令學

六種波羅蜜多，能疾證得一切智智，盡未來際，利樂有情。」

迴向品第七

【第 18 義】：回向修道 (II-8)

〈L1〉殊勝遍迴向，其作用最勝，〈L2〉無所得行相，
〈L3〉不顛倒體性。〈L4〉遠離〈L5〉佛福品自性念行境，
〈L6〉有方便〈L7〉無相，〈L8〉諸佛所隨喜。
〈L9〉不繫於三界，〈L10〉下〈L11〉中及〈L12〉上品，
是餘三迴向，生大福為性。

◎此回向有十二種，謂：

〈L1〉有勝作用之回向。

(01) 〈L1〉爾時，慈氏菩薩謂善現言：「菩薩隨喜迴向俱行諸福業事，於餘有情施、戒、修等諸福業事，為最為勝，為尊為高，為妙為微妙，為上為無上。」

〈L2〉於所回向物，破除實執無所得行相之回向。

(02) 〈L2〉爾時，善現問慈氏菩薩言：「若諸菩薩所起隨喜迴向之心，普緣無量無數世界，一一世界無量無數已入涅槃諸佛世尊，從初發心乃至成佛，展轉乃至入般涅槃，如是乃至法將滅盡，於其中間所有六種波羅蜜多相應善根，若諸弟子施、戒、修等諸福業事及學、無學無漏善根，若佛戒蘊、定蘊、慧蘊、解脫蘊、解脫智見蘊，若為利樂一切有情大慈大悲及餘無量無邊佛法，若說法要，若依法要學諸善根，若佛世尊般涅槃後，諸有情類所種善根，合集稱量，現前發起，最尊最勝，最上最妙隨喜之心。復以如是隨喜俱行諸福業事，與諸有情平等共有，迴向無上正等菩提，願此善根共有情類引發無上正等菩提。於意云何？彼諸菩薩緣如是事，起如是行相隨喜迴向心，為有如是所緣可得，如彼菩薩所取相不？」

(03) 慈氏菩薩答善現言：「彼諸菩薩緣如是事，起如是行相隨喜迴向心，實無如是所緣可得，如彼菩薩所取之相。」

(04) 具壽善現謂慈氏菩薩言：「若無如是所緣諸事如彼菩薩所取相者，彼諸菩薩隨喜迴向，豈不皆成想、心、見倒？所以者何？如有執著無所有事，無常謂常，實苦謂樂，無我謂我，不淨謂

淨，由斯發起想、心、見倒。如所緣事，實無所有，菩提及心亦應如是。若爾，一切應無差別，此中何等是所緣事，何等是隨喜心，何等是菩提，何等是迴向，云何菩薩緣如是事，起隨喜心迴向無上正等菩提？」

- (05) 慈氏菩薩報善現言：「如是所起隨喜迴向，不應對彼新學大乘菩薩前說。所以者何？彼聞如是隨喜迴向，所有信樂恭敬之心皆當滅沒。如是隨喜迴向之法，應為不退轉菩薩摩訶薩或曾供養無量諸佛，久發大願，多植善根，為多善友所攝受者，分別開示。所以者何？彼聞如是隨喜迴向，不驚不怖，不退不沒。諸菩薩眾應以如是隨喜俱行諸福業事，迴向所求一切智智，當於爾時，應作是念：『所可用心隨喜迴向，此所用心盡滅離變，此所緣事及諸善根皆亦如心盡滅離變。此中何等是所用心？復以何等為所緣事及諸善根而說隨喜迴向無上正等菩提？是心於心，理不應有隨喜迴向，以無二心俱時起故，心亦不可隨喜迴向，心自性故，是故隨喜迴向之心及所緣事皆不可得。』」
- (06) 時天帝釋白善現言：「新學大乘諸菩薩眾聞如是事，其心將無驚怖退沒？云何菩薩於所緣事起隨喜心？云何攝受隨喜俱行諸福業事迴向無上正等菩提？」
- (07) 爾時，具壽善現依慈氏菩薩作如是言：「諸菩薩眾普緣十方一切如來應正等覺斷諸有路，絕戲論道，殄諸雲霧，摧諸棘刺，捨諸重擔，逮得己利，盡諸有結，正智解脫，到心自在，第一究竟，入無餘依涅槃界者，從初發心乃至成佛，展轉乃至入般涅槃，如是乃至法將滅沒，於其中間所有功德及諸弟子所種善根，合集稱量，現前發起最尊最勝，最上最妙隨喜之心，復持如是隨喜俱行諸福業事，迴向無上正等菩提，是諸菩薩云何不墮想、心、見倒？」

〈L3〉於能回向心，破除實執不顛倒體相之回向。

- (8a) 〈L3〉慈氏菩薩謂善現言：「若諸菩薩於自所起隨喜迴向心等諸法，無心等想，則不墮於想、心、見倒；若諸菩薩於自所起隨喜迴向心等諸法有心等想，則便墮於想、心、見倒。又諸菩薩以如是心念佛弟子功德善根而生隨喜，正知此心盡滅離變，非能隨喜，正知彼法其性亦然，非所隨喜，又正了達能迴向心法性亦爾，非能迴向，及正了知所迴向法其性亦爾，非

所迴向。若有能依如是所說隨喜迴向是正非邪，諸菩薩眾皆應發起如是隨喜，迴向無上正等菩提。

(8b) 又諸菩薩普緣過去、未來、現在諸佛世尊所有功德，若諸弟子所有善根，若異生類所有善根，若傍生趣聽聞正法所有善根，若餘天、龍，廣說乃至人非人等聽聞正法，發菩提心，如是一切合集稱量，現前發起最尊最勝，最上最妙隨喜之心，既隨喜已，迴向無上正等菩提。

(8c) 於如是時，若正解了諸能隨喜迴向之法盡滅離變，諸所隨喜迴向之法其性亦然，〔雖〕如是知，而能隨喜迴向無上正等菩提。復於是時，若正解了都無有法可能隨喜迴向於法，雖如是知，而能隨喜迴向無上正等菩提，便不墮於想、心、見倒。所以者何？是諸菩薩於能隨喜迴向之心及所隨喜迴向之法不生執著，是名無上隨喜迴向。

若諸菩薩於能隨喜迴向之法，起能隨喜迴向法想，於所隨喜迴向之法，起所隨喜迴向法想，而起隨喜迴向無上正等菩提，則便墮於想、心、見倒，所起隨喜迴向皆邪，菩薩應知方便遠離。

〈L4〉於回向者，破除實執遠離之回向。

(8d) 〈L4〉若諸菩薩於所修作諸福業事，如實了知遠離寂靜，於能隨喜迴向之心亦如實知遠離寂靜。如實知己，行深般若波羅蜜多，於諸法中都無取著，而起隨喜迴向無上正等菩提，則不墮於想、心、見倒。

若諸菩薩於所修作諸福業事，不如實知遠離寂靜，於能隨喜迴向之心亦不能知遠離寂靜，於一切法執著諸相，而起隨喜迴向無上正等菩提，則便墮於想、心、見倒。

〈L5〉於自善法與佛善法，破執實好惡，名念佛福德資糧自性為行境之回向。

(8e) 〈L5〉若諸菩薩於已滅度諸佛世尊及諸弟子功德善根，欲正發起隨喜迴向，應作是念：『如佛世尊及諸弟子皆已滅度，自性非有，功德善根亦復如是，我所發起隨喜迴向及所迴向無上菩提，性相亦爾，都不可得。』如實知己，於諸善根發生隨喜迴向無上正等菩提，便能不生想、心、見倒，不取相故，佛所聽許，名正隨喜迴向菩提。

若諸菩薩以取相為方便，行深般若波羅蜜多，於已滅度佛及弟子功德善根取相隨喜迴向菩提，是為非善隨喜迴向。若諸菩薩不取相為方便，行深般若波羅蜜多，於已滅度佛及弟子功德善根離相隨喜迴向菩提，是名為善隨喜迴向。」

〈L6〉於六度善法破執實好惡，名有善巧方便之回向。

- (09) 〈L6〉慈氏菩薩問善現言：「云何菩薩於佛及弟子功德善根等，皆不取相，而能隨喜迴向菩提？」
- (10) 善現答言：「應知菩薩所學般若波羅蜜多方便善巧，雖不取相，而所作成，非離般若波羅蜜多有能正起隨喜迴向，是故菩薩欲成所作，應學般若波羅蜜多。」
- (11a) 慈氏菩薩謂善現言：「莫作是說。所以者何？以甚深般若波羅蜜多中，佛及弟子功德善根都不可得，所起隨喜迴向菩提亦不可得。此中菩薩應作是觀：『過去如來及諸弟子功德善根性皆已滅，所起隨喜迴向之心及大菩提，性皆寂滅。我若於彼取相分別，發生隨喜迴向之心，諸佛世尊皆所不許。所以者何？於已滅度佛弟子等，取相分別隨喜迴向，是則名為大有所得。』過去已滅，無所有故，未來現在佛弟子等未至、不住，亦不可得。若不可得，非取相境，若取其相，發生隨喜迴向菩提，便墮顛倒。」
- (11b) 是故菩薩欲於如來及諸弟子功德善根正發隨喜迴向菩提，不應於中起有所得取相分別隨喜迴向，若於其中起有所得取相分別隨喜迴向，佛不說彼有大義利。所以者何？如是隨喜迴向之心，妄想分別，名雜毒故。

〈L7〉破執實三輪，為無相迴向。

- (11c) 〈L7〉如有飲食，雖具上妙色香美味，而雜毒藥，愚夫淺識，貪取噉之，初雖適意，後便大苦。如是一類補特伽羅，不善受持，不善觀察甚深般若波羅蜜多，不善通達甚深義趣，而告大乘種性者曰：『來，善男子！汝於三世諸佛世尊戒等五蘊及餘無量無邊功德，若佛弟子所種善根，若佛世尊授諸菩薩、聲聞、獨覺三菩提記，彼有情類所種善根，若諸天人、阿素洛等所種善根，如是一切合集稱量，現前隨喜，迴向菩提。』如是所說隨喜迴向，以有所得為方便故，譬如世間雜毒飲食，

菩薩種性補特伽羅不應隨彼所說而學。

〈L8〉知名言中緣起如幻而緣佛地，名諸佛隨喜迴向。

(11d) 〈L8〉是故大德！應說云何住菩薩乘善男子等，應於三世十方諸佛及弟子等功德善根隨喜迴向，可名無毒？」

(12a) 善現答言：「若諸菩薩欲不謗佛而發隨喜迴向心者，應作是念：『如諸如來應正等覺如實通達功德善根有如是性，有如是相，有如是法而可隨喜，我今亦應如是隨喜。如諸如來應正等覺如實通達，應以如是諸福業事迴向菩提，我今亦應如是迴向。』若作如是隨喜迴向，則不謗佛，不雜眾毒，離諸過咎，善順佛教。

〈L9〉於名言中，不迴向為三有之因，名不繫三界迴向。

(12b) 〈L9〉復次，菩薩應作如是隨喜迴向，如戒蘊等，不墮三界，非三世攝，隨喜迴向亦應如是。所以者何？如彼諸法，自性空故，不墮三界，非三世攝，隨喜迴向亦復如是。若能如是隨喜迴向，不雜眾毒，無所失壞；若不如是隨喜迴向，當知是邪隨喜迴向。若諸菩薩作如是念：『如諸如來應正等覺如實通達諸功德等，有如是法，可依此法發生無倒隨喜迴向，我今亦應依如是法發生隨喜迴向之心。』是為正發隨喜迴向。

〈L10〉下品迴向出生廣大福德為性。

〈L11〉中品迴向出生廣大福德為性。

(13a) 〈L10〉爾時，世尊讚善現曰：「善哉！善哉！汝今乃能為諸菩薩作大佛事。善現當知！假使三千大千世界諸有情類，一切皆得四靜慮、四無量、四無色定、五神通等世出世間有相功德，是一菩薩所起無倒隨喜迴向，於彼功德為最、為勝，為尊、為高，為妙、為微妙，為上、為無上。(缺〈L11〉)

〈L12〉上品迴向出生廣大福德為性。

(13b) 〈L12〉復次，善現！假使三千大千世界一切有情皆發無上正等覺心，一一住如殞伽沙劫，以有所得而為方便，皆持上妙衣服、飲食、臥具、醫藥及餘樂具恭敬供養如殞伽沙世界有情，常無間斷，於意云何？是諸菩薩由此因緣得福多不？」

- (14) 善現對曰：「甚多，世尊！如是福聚若有形色，十方各如殑伽沙界不能容受。」
- (15) 佛言：「善現！如是！如是！如汝所說。若一菩薩由深般若波羅蜜多所攝受故，發起無倒隨喜迴向所獲功德，於前菩薩有相福聚，百倍為勝，千倍為勝，乃至鄔波尼殺曇倍亦復為勝。」
- (16) 爾時，四大天王各與眷屬二萬天子俱，頂禮佛足，合掌恭敬白言：「世尊！是諸菩薩所起無倒隨喜迴向，甚深般若波羅蜜多方便善巧所攝受故，威力廣大，勝前所說有所得施多百千倍。」
- (17) 時天帝釋乃至他化自在天王各與眷屬十萬天子俱，皆持種種天妙花鬘、塗散等香、衣服、瓔珞、寶幢、幡蓋、眾妙珍奇，奏天樂音而供養佛，頂禮佛足，合掌白言：「是諸菩薩所起無倒隨喜迴向，甚深般若波羅蜜多方便善巧所攝受故，威力廣大，勝前所說有所得施多百千倍。」
- (18) 時大梵王，廣說乃至色究竟天各與無量百千天眾，前詣佛所，頂禮佛足，合掌恭敬，俱發聲言：「希有！世尊！是諸菩薩所起無倒隨喜迴向，甚深般若波羅蜜多方便善巧所攝受故，威力廣大，勝前所說有所得施多百千倍。」
- (19) 爾時，佛告淨居天等諸天眾言：「且置三千大千世界一切有情皆發無上正等覺心。假使十方殑伽沙等諸佛世界一切有情皆發無上正等覺心，一一住如殑伽沙劫，以有所得而為方便，皆持上妙衣服、飲食、臥具、醫藥及餘樂具恭敬供養如殑伽沙世界有情，常無間斷。若有菩薩普緣三世諸佛世尊所有戒蘊、定蘊、慧蘊、解脫蘊、解脫智見蘊及餘無量無邊佛法，若諸弟子所有善根，若餘有情所修善法，如是一切合集稱量，現前發起最尊最勝，最上最妙隨喜俱行諸福業事。復持如是隨喜俱行諸福業事，迴向無上正等菩提，如是所起隨喜迴向所獲功德，勝前所說有相福聚，無量無邊，不可稱計。」

【第 19 義】：隨喜修道 (II-9)

〈M〉由方便、無得，隨喜諸善根，是此中所說，修隨喜作意。

◎修道位菩薩之隨喜，由：

〈M1〉名言中有所得之方便；

〈M2〉與勝義中無所得之智慧二所攝持，於自他善根深修隨喜相應之

淨信，即此處所說大乘有漏隨喜作意修道。

——此諸修道立為有漏者，是就有分別漏而立，非所治品之有漏也。

- (20) 〈M〉爾時，善現便白佛言：「如世尊說『現前發起最尊最勝，最上最妙隨喜俱行諸福業事』，云何名為最尊最勝，最上最妙隨喜俱行諸福業事？」
- (21a) 佛告善現：「若諸菩薩於三世法不取不捨，不念不得，知無有法已、正、當生，知無有法已、正、當滅，如法實性，發生隨喜迴向無上正等菩提，如是名為最尊最勝，最上最妙隨喜俱行諸福業事。
- (21b) 復次，善現！若諸菩薩欲於三世諸佛世尊及弟子等，布施、淨戒、安忍、精進、靜慮、般若及正解脫、解脫智見相應善根，發生無倒隨喜迴向，應作是念：『如真解脫，布施、淨戒、安忍、精進、靜慮、般若相應善根亦復如是；如真解脫，戒蘊、定蘊、慧蘊、解脫蘊、解脫智見蘊相應善根亦復如是；如真解脫，所有勝解亦復如是；如真解脫，隨喜迴向亦復如是；如真解脫，一切過去已滅諸法亦復如是；如真解脫，一切未來未生諸法亦復如是；如真解脫，一切現在現轉諸法亦復如是；如真解脫，過去無量無數世界諸佛世尊及弟子等亦復如是；如真解脫，未來無量無數世界諸佛世尊及弟子等亦復如是；如真解脫，現在無量無數世界諸佛世尊及弟子等亦復如是。如是諸法真如法性，無向無背，無縛無脫，無染無淨，我於如是功德善根現前隨喜，以無移轉及無失壞、無相、無得而為方便，迴向無上正等菩提，如是名為最尊最勝，最上最妙隨喜迴向。』
- (21c) 善現當知！如是無倒隨喜迴向所獲功德，於十方各如殑伽沙數世界一切有情皆發無上正等覺心，一一住如殑伽沙劫，以有所得而為方便，皆持上妙衣服、飲食、臥具、醫藥及餘樂具恭敬供養十方各如殑伽沙界一切有情，常無間斷，所獲施福，及於十方殑伽沙等諸佛世界一切有情，一一住如殑伽沙劫，以有所得而為方便，所修淨戒、安忍、精進、靜慮、般若相應善根，百倍為勝，千倍為勝，乃至鄔波尼殺曇倍亦復為勝。」

大般若波羅蜜多經卷第五百五十九

地獄品第八

【第 20 義】：引發修道 (II-10)

- 〈N1〉此自性 〈N2〉殊勝，〈N3〉一切無作行，
〈N4〉立法不可得，是 〈N5〉大義利性。

◎引發修道就所相不同，差別為五，謂：

- 〈N1〉此修道自體性，是無倒見色等實性之慧。
- (22) 〈N1〉時舍利子便白佛言：「如是無倒隨喜迴向，皆由般若波羅蜜多威力成辦。」
- (23) 爾時，佛告舍利子言：「如是！如是！」
- (24a) 時舍利子復白佛言：「如是般若波羅蜜多能作照明，皆應敬禮，世間諸法不能染汙，能除翳闇，能發光明，能施利安，能為導首，與諸盲者作淨眼目，與涉闇徒作明燈炬，引失道者令入正路，顯諸法性即薩婆若，示一切法無滅無生，是諸菩薩摩訶薩母，能令諸佛具轉三轉十二行相無上法輪，無依護者為作依護，能除一切生死苦惱，開示諸法無性為性。
- 〈N2〉若不由此慧攝持，布施等餘五度不能成佛，故是殊勝方便。
- (24b) 〈N2〉世尊！諸菩薩摩訶薩於深般若波羅蜜多應云何住？」
- (25) 佛告舍利子：「諸菩薩摩訶薩於深般若波羅蜜多應如佛住，敬事般若波羅蜜多，應如敬事諸佛世尊。」
- (26) 時天帝釋作是念言：「今舍利子何因何緣問佛斯事？」念已，便問舍利子言：「以何因緣而作是問？」
- (27) 時舍利子報帝釋言：「前佛世尊說諸菩薩甚深般若波羅蜜多所攝受故，所起隨喜迴向俱行諸福業事，疾能證得一切智智，勝有所得菩薩所修布施、淨戒、安忍、精進、靜慮、般若相應善根，是故我今作如是問。憍尸迦！如生盲眾，若百若干，無淨眼者方便引導，近尚不能趣入正道，況能遠達豐樂大城。如是前五波羅蜜多諸生盲眾，若無般若波羅蜜多淨眼者導，尚不能趣菩薩正道，況能證入一切智城。憍尸迦！布施等五波羅蜜多，要由般若波羅蜜多，名有目者。復由般若波羅蜜多之所攝受，名到彼岸。」

- 〈N3〉此慧行相，謂知一切法無勝義生，即於一切不起實有作行。

- (28) 〈N3〉時舍利子復白佛言：「云何菩薩引發般若波羅蜜多？」
(29) 佛告舍利子：「若諸菩薩不引發色受想行識，亦不見色受想行識，是即名為引發般若波羅蜜多。」

〈N4〉即由自性殊勝等之道，將通達諸法不可得之慧，安立於行者相續。

- (30) 〈N4〉時舍利子復白佛言：「若諸菩薩引發般若波羅蜜多，為成何法？」
(31) 佛告舍利子：「若諸菩薩引發般若波羅蜜多，於一切法都無所成，無所成故，得名般若波羅蜜多。」
(32) 時天帝釋便白佛言：「如是般若波羅蜜多豈不能成一切智智？」
(33) 佛言：「憍尸迦！如是般若波羅蜜多亦不能成一切智智。何以故？憍尸迦！如有所得，如有名想，如有造立，不能成故。」
(34) 時天帝釋復白佛言：「若爾，般若波羅蜜多云何說成一切智智？」
(35) 佛言：「憍尸迦！如是般若波羅蜜多於所引發一切智智無所成故，說名為成。」
(36) 時天帝釋便白佛言：「甚奇！世尊！如是般若波羅蜜多不為生滅一切法故，不為成壞一切法故，出現世間，而與世間作饒益事。」
(37) 爾時，善現便白佛言：「若諸菩薩起如是想，則便捨遠甚深般若波羅蜜多。」
(38) 佛告善現：「如是！如是！復有因緣捨遠般若波羅蜜多，謂生是想：『甚深般若波羅蜜多空無所有。』即便捨遠甚深般若波羅蜜多。所以者何？菩薩般若波羅蜜多非空非有，無所分別。」
(39) 具壽善現復白佛言：「佛說般若波羅蜜多，為顯何法？」
(40) 佛告善現：「我說般若波羅蜜多不為顯色，亦不為顯受想行識；不為顯預流果，亦不為顯一來、不還、阿羅漢果、獨覺菩提。」

〈N5〉令得究竟義利廣大之佛果，是大義利性。

- (41) 〈N5〉具壽善現復白佛言：「甚深般若波羅蜜多即是廣大波羅蜜多。」
(42) 佛告善現：「何緣汝說甚深般若波羅蜜多即是廣大波羅蜜多？」
(43) 善現答言：「甚深般若波羅蜜多於色不作大不作小，不作集不作散；於受想行識亦不作大不作小，不作集不作散；於佛十力

不作強不作弱，於一切智不作廣不作狹。若諸菩薩起如是想，非行般若波羅蜜多。何以故？如是諸想，非深般若波羅蜜多等流果故。甚深般若波羅蜜多若起是想：『我當度脫若干有情入無餘依般涅槃界。』是則名為大有所得，非有所得能有所辦。何以故？世尊！有情無生故，當知般若波羅蜜多亦無生。有情無自性故、遠離故、不可思議故、無滅壞故、無覺知故，當知般若波羅蜜多亦無自性，廣說乃至亦無覺知。世尊！有情力積集故，當知如來力亦積集。」

【第 21 義】：清淨修道 (II-11)

一、[因差別]

〈O1〉依佛及〈O2〉施等，〈O3〉善巧諸方便，此是勝解因。

◎清淨修道勝解之因或順緣有三：

〈O1〉外緣親近諸佛

(44) 〈O1〉時舍利子便白佛言：「若諸菩薩於深般若波羅蜜多能生信解，無疑無惑，亦不迷謬，是諸菩薩從何處沒，來生此間？積行久如，於深法義，能隨覺了？」

(45a) 佛言：「舍利子！是諸菩薩從他方界所事諸佛法會中沒，來生此間。」

〈O2〉內緣修行施等

(45b) 〈O2〉舍利子！是諸菩薩已多親近諸佛世尊，曾問此中甚深法義，已經無量無數大劫修集百千難行苦行，乘大願力來生此土，於深般若波羅蜜多若見若聞，生大歡喜，便作是念：『我今見佛，聞佛所說。』由此因緣，恭敬信受。」

(46) 爾時，善現便白佛言：「甚深般若波羅蜜多可見聞耶？」

(47) 佛言：「不也。」

〈O3〉善巧方便止觀雙運

(48) 〈O3〉具壽善現復白佛言：「若諸菩薩於深般若波羅蜜多能勤修學，是諸菩薩積行久如？」

(49a) 佛言：「善現！此應分別。有諸菩薩從初發心，遇真善友方便攝受，即能修學甚深般若波羅蜜多，於深法門能生信解。」

- (49b) 有諸菩薩雖曾值遇多百千佛，於諸佛所，勤修梵行，而有所得為方便故，於深般若波羅蜜多不能修學，聞說般若波羅蜜多，不生信解，即便捨去。善現當知！是諸菩薩過去佛所聞說般若波羅蜜多，無信敬心，捨眾而去，今聞般若波羅蜜多，無信敬心，還復捨去。彼於般若波羅蜜多，若身若心，皆不和合；不和合故，造作增長感惡慧業；由此業故，聞深般若波羅蜜多，毀謗厭捨。」
- (49c) 善現當知！若諸菩薩毀謗厭捨甚深般若波羅蜜多，當知則為毀謗厭捨一切智智；若毀謗厭捨一切智智，即毀謗厭捨三世諸佛。由此因緣，造作增長害正法罪，由此罪故，經歷多時，受諸重苦，謂彼所造罪極重故，多百千歲墮大地獄，此界他方往還輪轉，受諸重苦，不得解脫，此界火水風劫起時，移置他方大地獄內，他方火水風劫起時，移置此界大地獄中。如是輪迴，經無數劫，受大地獄極難忍苦。彼害法罪業勢稍微，從地獄出，墮傍生趣，如前展轉此界他方，多劫輪迴，受諸劇苦。彼害法罪業勢漸薄，脫傍生趣，墮鬼趣中，此界他方輪迴，展轉受諸重苦，經無量劫。彼害法業餘勢將盡，免餓鬼趣，來生人中，具受人間貧窮、下賤、頑愚、疾病、醜陋等苦，尚不聞有佛法僧名，況能精勤修諸善業。以諸惡業害正法故，受如是類圓滿苦果。」
- (50) 時舍利子便白佛言：「害正法業與五無間，此二惡行為相似不？」
- (51) 爾時，佛告舍利子言：「勿謂此業似五無間。所以者何？五無間業雖感重苦，而不可比毀謗正法，謂彼聞說甚深般若波羅蜜多，毀謗拒逆，言：『此般若波羅蜜多非真佛語，不應修學，非法非律，非大師教。』由此因緣，其罪極重，不可以比五無間業。舍利子！此害法人自謗正法，亦教他謗；自壞其身，亦令他壞；自飲毒藥，亦令他飲；自失生天解脫樂果，亦令他失；自持其身足地獄火，亦令他足；自沈苦海，亦令他溺；自不信解甚深般若波羅蜜多，亦教他人令不信解，迷謬顛倒。舍利子！我於般若波羅蜜多尚不欲令害正法者聞其名字，況當為說。舍利子！害正法者，我尚不聽住菩薩乘善男子等舉目觀視，況當共住。舍利子！害正法者，我尚不聽被服袈裟，況受供養。何以故？舍利子！害正法者，墮黑闇類，如臭爛糞，如穢蝸螺，如癩病人，甚可厭惡。諸有信用害法者言，亦受如前所說大苦。」

- (52) 時舍利子復白佛言：「何緣不說害正法者當來所受惡趣身量？」
- (53) 爾時，佛告舍利子言：「止！不須說彼趣身量，勿害法者聞已驚惶，心頓憂愁，如中毒箭，身漸枯員，如被截苗。彼或聞之，當嘔熱血，喪失身命，或近死苦，故我不說彼趣身量。」
- (54) 時舍利子復重請言：「唯願為說，作後明誡。」
- (55) 爾時，佛告舍利子言：「我先說彼受苦多劫，足與後人作大明誡，當來自類善男子等，聞我前說害正法報，寧捨身命，終不謗法，勿我當來長時受苦。」
- (56) 爾時，善現便白佛言：「諸有聰明善男子等，應善守護身語意業。彼豈不由語惡業故，惡趣人中長時受苦？」
- (57) 佛言：「善現！如是！如是！於我正法毗奈耶中，當有愚癡諸出家者，彼雖稱我為其大師，而於我說甚深般若波羅蜜多毀謗拒逆。善現當知！若有毀謗甚深般若，則為毀謗無上菩提；若有毀謗無上菩提，則為毀謗三世諸佛；若有毀謗三世諸佛，則為毀謗一切智智；若有毀謗一切智智，則毀謗法；若毀謗法，則毀謗僧；若毀謗僧，則便造作無量罪業；若有造作無量罪業，則便攝受無邊苦報。」
- (58) 具壽善現復白佛言：「彼愚癡人幾因緣故，毀謗拒逆甚深般若？」

諸法衰損因：謂〈P1〉魔所魅著，〈P2〉不信解深法，
 〈P3〉執著五蘊等，〈P4〉惡友所攝持。

◎此清淨修道等法衰損之因或違緣有四，謂：

- 〈P1〉被魔所魅著；
- 〈P2〉及惡友所攝受，是外違緣；
- 〈P3〉若種性下劣不能信解深法；
- 〈P4〉及根器下劣執著五蘊等實有，是內緣違。

(59) 〈P1〉 - 〈P4〉佛告善現：「由二因緣：一、為邪魔之所扇惑；二、於深法不能信解。

復次，善現！由四因緣毀謗拒逆甚深般若：一、為惡友之所誘誑；二、為不能勤修善法；三、為懷惡，缸求他過；四、為嫉妒，自讚毀他。由具如是諸因緣故，彼愚癡人毀謗拒逆甚深般若波羅蜜多，發起無邊極重惡業。」

(60) 爾時，善現復白佛言：「彼愚癡人不勤精進，於佛所說甚深般若波羅蜜多實難信解。」

- (61) 佛告善現：「如是！如是！」
- (62) 具壽善現復白佛言：「如是般若波羅蜜多云何甚深極難信解？」
- (63) 佛告善現：「色非縛非脫。何以故？色以無性為自性故。受想行識非縛非脫。何以故？受想行識皆以無性為自性故。復次，善現！色前、後、中際非縛非脫。何以故？色前、後、中際皆以無性為自性故。受想行識前、後、中際非縛非脫。何以故？受想行識前、後、中際皆以無性為自性故。」
- (64) 具壽善現復白佛言：「甚深般若波羅蜜多若不精勤，甚難信解。」

二、[境差別]

〈Q1〉果法清淨性，〈Q2〉即色等清淨，以彼二無異，不可分故淨。

◎ 〈Q1〉沙門果解脫道，由自因無間道斷垢之清淨；

〈Q2〉彼境色等亦由彼垢斷而清淨，以由一種所治遠離所成之二種清淨，自性無異，亦不可用異理，分別令異，故說為一種清淨。

(65) 〈Q1〉 - 〈Q2〉佛言：「善現！如是！如是！所以者何？色清淨即果清淨，色清淨故，果亦清淨；受想行識清淨即果清淨，受想行識清淨故，果亦清淨。」

復次，善現！色清淨即一切智清淨，一切智清淨故，色亦清淨。是色清淨與一切智清淨，從本已來，無二無別，無斷無壞；受想行識清淨即一切智清淨，一切智清淨故，受想行識亦清淨，是受想行識清淨與一切智清淨，從本已來，無二無別，無斷無壞。」

三、[果差別]

惑所知三道，斷故〈R1〉為弟子，〈R2〉麟喻〈R3〉佛子淨，〈R4〉佛一切最淨。（缺經）

清淨品第九

四、[自性差別]

〈R'〉對治九地中，上上等諸垢，謂由下下等，諸道能清淨。

◎ 〈R'〉有作是念：此非說二乘清淨之時，云何於此宣說清淨之餘而說佛與二乘是否最清淨耶？

答：亦可述此差別，以於三界九地中，對治修所斷能取所取分別

上上品諸垢，其對治自性，如其次第，謂大乘修道下下品等道，能清淨二障，二乘不能斷二障故。

- (66) 〈R'〉爾時，舍利子白佛言：「世尊！如是清淨最為甚深。」
- (67) 佛言：「如是，極清淨故。」
- (68) 舍利子言：「如是清淨是大光明。」
- (69) 佛言：「如是，極清淨故。」
- (70) 舍利子言：「如是清淨無得、無現觀。」
- (71) 佛言：「如是，極清淨故。」
- (72) 舍利子言：「如是清淨無所生起。」
- (73) 佛言：「如是，極清淨故。」
- (74) 舍利子言：「如是清淨不生三界。」
- (75) 佛言：「如是，極清淨故。」
- (76) 舍利子言：「如是清淨無知無解。」
- (77) 佛言：「如是，極清淨故。」
- (78) 舍利子言：「如是清淨於色無知，於受想行識亦無知。」
- (79) 佛言：「如是，極清淨故。」
- (80) 舍利子言：「甚深般若波羅蜜多極清淨故，於一切智無損無益。」
- (81) 佛言：「如是，極清淨故。」
- (82) 舍利子言：「甚深般若波羅蜜多極清淨故，於一切法無取無捨。」
- (83) 佛言：「如是，極清淨故。」
- (84) 爾時，善現便白佛言：「我清淨故，色受想行識亦清淨。」
- (85) 佛言：「如是，畢竟淨故。」
- (86) 善現復言：「我清淨故，果亦清淨。」
- (87) 佛言：「如是，畢竟淨故。」
- (88) 善現復言：「我清淨故，一切智亦清淨。」
- (89) 佛言：「如是，畢竟淨故。」
- (90) 善現復言：「我清淨故，無得、無現觀。」
- (91) 佛言：「如是，畢竟淨故。」
- (92) 善現復言：「我無邊故，色受想行識亦無邊。」
- (93) 佛言：「如是，畢竟淨故。」
- (94) 善現復言：「若諸菩薩能如是覺，是為般若波羅蜜多。」
- (95) 佛言：「如是，畢竟淨故。」

〈R''〉由斷諍門中，道能量所量，由是平等性，遍對治三界。

- ◎〈R”〉佛清淨為最清淨者，由於能治所治次第斷過門中，許大乘修道由能量之智與所量實空平等性故，是能盡清淨三界諸障之真對治故。
- ◎此處之諍者，謂：下下等九種修道，斷除上上等九種實執，不應道理，譬如羸劣士夫不能摧伏強力怨敵，於劣怨敵不須強力士夫。如是下品修道不能斷除上品實執，斷下品實執不須上品修道故。
- 答云：無過，譬如浣衣，洗除粗垢，不待勤勞，洗除細垢，須大劬勞，如是能治所治亦應理故。（〈R”〉經略）

【第三事】一切智

【第 22 義】：智不住三有之道相智（III-1）

【第 23 義】：悲不滯涅槃之道相智（III-2）

〈S1〉非此岸彼岸，〈S2〉不住其中間，〈S3〉知三世平等，故名般若度。

- ◎〈S1〉菩薩一切智道般若波羅蜜多，由慧故不住生死此岸，由悲故不住涅槃彼岸，於彼二岸中間亦勝義不住，以是雙破二邊現證空性智所攝持之現觀故。
 - ◎〈S2〉如是不住三有寂滅二邊之一切智，即是近諸佛菩薩者，以是現證三世諸法平等無實自性智所攝持之現觀故。
 - ◎〈S3〉此中兼說聲聞獨覺之一切智，是遠離真一切智道般若波羅蜜多者，以彼不知三世諸法平等實空故。
- (96) 〈S1〉-〈S3〉善現復言：「如是般若波羅蜜多非此岸，非彼岸，非中間。」
- (97) 佛言：「如是，畢竟淨故。」

【第 24 義】：與果般若波羅蜜多遠離之一切智（III-3）

【第 25 義】：與果般若波羅蜜多鄰近之一切智（III-4）

〈S4〉彼由緣相門，非方便故遠，〈S5〉由善巧方便，即說為鄰近。

- ◎有作是難：「聲聞與菩薩之一切智不應分遠近，以通達三世諸法平等性，即知一切法性，聲聞菩薩皆知彼法性故，如龍猛菩薩云『因緣所生法，我說即是空』，此說空即緣起義，二乘亦通達緣起性故。」

○為答此難，故說：

◎〈S4〉此處所說二乘之一切智可說為遠，由緣一切法與道執有實相，非修果般若波羅蜜多之方便故。彼由遠離大乘善知識，及遠離通達無自性慧等之善巧方便故。

◎〈S5〉菩薩聖者之一切智可說為近，由生果般若波羅蜜多善巧方便所攝持故。彼由長時親近大乘善知識聽受無倒教授，於引生聞、思等慧善巧方便故。

(98) 〈S4〉-〈S5〉善現復言：「若諸菩薩起如是想，捨、遠般若波羅蜜多。」

(99) 佛言：「善哉！善哉！善現！是諸菩薩著名、著相。」

(100) 具壽善現便白佛言：「希有！世尊！善為菩薩於深般若波羅蜜多開示分別究竟著相。」

【第 26 義】：所治品一切智 (III-5)

〈S6〉色蘊等空性，三世所繫法，施等菩提分，行想所治品。

◎〈S6〉若於如所有性所攝之色蘊等補特伽羅我空，盡所有性所攝三界繫諸法，及於布施等菩提分道，起真實行想，此想所縛之道，即是菩薩道所治品，以是彼歧誤處故。

(101) 〈S6〉時舍利子問善現言：「云何菩薩於深般若波羅蜜多所起著相？」

(102) 善現答言：「若諸菩薩於色調空，是名為著；於受想行識調空，是名為著；於三世法調三世法，是名為著，謂諸菩薩初發心時，無量福生，是名為著。」

(103) 時天帝釋問善現言：「何緣如是亦名為著？」

(104a) 善現答言：「執有心故，謂執此心能正迴向無上菩提，故名為著。僑尸迦！心本性空，不能迴向。」

【第 27 義】：能治品一切智 (III-6)

〈S7〉施等無我執，於此令他行，此滅貪著邊。〈S8〉執佛等微細。

〈S9〉法道最甚深，自性遠離故。〈T〉知諸法性一，故能斷貪著。

〈U〉由遣除見等，故說難通達，〈V〉色等不可知，故為不思議。

如是一切智，所治能治品，無餘諸差別，當知如《經》說。

◎〈S7〉自於布施等六度住無我執，亦於此上安立諸餘眾生令他修行，

如是通達所依道相三法皆無實之智，即能於所依及道滅除貪著之邊，以是彼貪正對治故。

(104b) 〈S7〉若諸菩薩欲教他人趣大菩提，應隨實相示現、勸導、讚勵、慶喜，於自無損，亦不損他，諸佛世尊同所開許，遠離一切分別執著。」

◎ 〈S8〉於佛等境起微細實執繫縛，修禮拜等，雖是福德資糧之因而能對治不信等，然是菩薩道之所治品，以是彼歧誤處故。

(105) 〈S8〉爾時，世尊讚善現曰：「善哉！善哉！汝善能為諸菩薩說分別著相，令諸菩薩覺知遠離。復有此餘微細執著，當為汝說，汝應諦聽！」

(106) 善現白言：「唯然，願說！」

(107) 佛告善現：「若菩薩乘善男子等，於諸佛所取相憶念，隨所取相，皆名執著；若於三世諸佛世尊無漏法中深生隨喜，既隨喜已，共諸有情迴向菩提，亦名執著。諸法實性非三世攝，不可取相，不可攀緣，亦無見聞覺知事故，於無上覺不可迴向。」

◎ 〈S9〉於果上微細實執，亦是菩薩道之所治品，以諸法道究竟真義最為甚深，是自性遠離之法性故。

(108) 〈S9〉爾時，善現便白佛言：「諸法實性最為甚深。」

(109) 佛言：「如是，本性離故。」

(110) 善現復言：「如是般若波羅蜜多皆應敬禮。」

(111) 佛言：「如是，法性無作，無覺知故。」

◎ 〈T〉現知諸法同一自性所謂實空，由此菩薩智能斷果上實執，以是彼真對治故。

(112) 〈T〉善現復言：「諸法本性無所造作，無覺知耶？」

(113) 佛言：「如是諸法本性唯一無二，無造無作，不可覺知，不可分別，若諸菩薩能如是知，即能遠離一切執著。」

◎ 〈U〉說勝義諦難通達者，以唯是究竟內智所證，遮遣見色等之名言量所能知故。

(114) 〈U〉善現復言：「如是般若波羅蜜多難可覺知。」

(115) 佛言：「如是，無知者故。」

◎〈V〉又勝義諦說為不可思議，以名言量不能了知從色等乃至佛不共法是世俗法性，其究竟實性唯是聖根本智所見故。

(116) 〈V〉善現復言：「如是般若波羅蜜多不可思議。」

(117) 佛言：「如是，非心、心所能了知故。」

(118) 善現復言：「如是般若波羅蜜多無所造作。」

(119) 佛言：「如是，以諸作者不可得故。」

【第 28 義】：一切智品所說菩薩加行 (III-7)

〈W1〉色等 〈W2〉無常等，〈W3〉未圓滿圓滿，

〈W4〉及於無貪性，破實行加行，〈W5〉不變 〈W6〉無造者。

〈W7〉三難行加行，〈W8〉如根性得果，故許為有果，

〈W9〉不依仗於他，〈W10〉證知七現事。

◎此中所說菩薩一切智加行有十種：

就境分四，就自性分三，就作用分二，就證知譬喻有一。

○就境之四種，謂：

〈W1〉於色等事破實執行之加行。

(120) 〈W1〉善現復言：「云何菩薩應行般若波羅蜜多？」

(121a) 佛言：「菩薩若不行色，亦復不行受想行識，是行般若波羅蜜多。

〈W2〉於彼別法無常等破實執行之加行。

(121b) 〈W2〉若不行色空，亦復不行受想行識空，是行般若波羅蜜多。

〈W3〉於功德所依圓滿未圓滿破實執行之加行。

(121c) 〈W3〉若不行色不圓滿相，亦復不行受想行識不圓滿相，是行般若波羅蜜多。所以者何？色不圓滿即非色，受想行識不圓滿即非受想行識，若不如是行，是行般若波羅蜜多。」

〈W4〉於無實貪性破實執行之加行。

(122) 〈W4〉爾時，善現便白佛言：「甚奇！世尊！希有！善逝！能

於執著說無著相。」

- (123) 佛告善現：「若不行色受想行識無執著相，是行般若波羅蜜多。若諸菩薩能如是行，便於諸色受想行識不生執著，於預流果乃至無上正等菩提不生執著。所以者何？超一切著，無障礙覺，名薩婆若。如是，善現！若諸菩薩欲超諸著，應行般若波羅蜜多。」

○就自性之三種，謂：

〈W5〉於所作業破除實執謂不變加行。

- (124) 〈W5〉具壽善現復白佛言：「希有！世尊！甚深法性，若說不說，俱無增減。」

- (125a) 佛告善現：「如是！如是！譬如虛空，假使諸佛盡其壽量或讚或毀，而彼虛空無增無減，甚深法性亦復如是，若說不說，俱無增減。」

〈W6〉於造者破除實執謂無造者加行。

- (125b) 〈W6〉譬如幻土，於讚毀時，無喜無憂，不增不減，甚深法性亦復如是，若說不說，如本無異。」

〈W7〉於果破除實執謂三種難行加行。三種難行者，謂三智之中：

- a 一切相智於勝義無所得，於世俗須經三無數劫修二資糧萬能證得，是所為難行。
- b 道相智於勝義無所得，於世俗須學三道，乃至未圓滿成熟嚴淨不證彼果，是加行難行。
- c 一切智須自身生起由此門中利益二乘種性，然自不證唯斷煩惱之果，是所作難行也。

- (126) 〈W7〉具壽善現復白佛言：「諸菩薩眾行深般若波羅蜜多甚為難事，謂深般若波羅蜜多若修不修，無增無減，無進無退。諸菩薩眾修行般若波羅蜜多，如修虛空，都無所有。諸菩薩眾，我等有情皆應敬禮，尊重、讚歎。所以者何？諸菩薩眾為度有情被功德鎧，如有欲與虛空戰諍，被堅固鎧；諸菩薩眾為度有情被功德鎧，如有健者欲拔虛空置高勝處。諸菩薩眾為如虛空諸有情類求趣無上正等菩提，名大勇猛，得大精進波羅蜜多。」

(127)時有苾芻作如是念：「應禮般若波羅蜜多，此中都無諸法生滅。」

○就作用之二種，謂：

〈W8〉如三種所化根性而令得果，故許為有果加行。

(128) 〈W8〉時天帝釋問善現言：「菩薩欲學甚深般若波羅蜜多，當如何學？」

(129) 善現答言：「菩薩欲學甚深般若波羅蜜多，當如虛空，精勤修學。」

〈W9〉由勝利門救護等事，不依仗他加行。

(130) 〈W9〉時天帝釋便白佛言：「若諸有情能學般若波羅蜜多，云何守護？」

(131) 爾時，善現語帝釋言：「汝見是法可守護不？」

(132) 天帝釋言：「不也，大德！」

○就證知譬喻之一種，謂：

〈W10〉就七種現事，證知無自性加行。證知七現事及喻者，謂：

a 諸有漏緣起皆非實有，唯由執著習氣所變現故，譬如夢事。

b 又即前宗，唯是因緣和合所現故，譬如幻事。

c 又即前宗，雖如是現若如是有成相違故，譬如陽焰。

d 又即前宗，唯仗緣現故，譬如谷響。

e 又即前宗，唯從習氣相如是現故，譬如影像。

f 又即前宗，無實所依如是現故，譬如乾達婆城。

g 又即前宗，無實作者如是現故，譬如變化。

(133) 〈W10〉善現語言：「若諸菩薩如大般若波羅蜜多所說而行，即為守護。若離般若波羅蜜多，人非人等，皆得其便。僑尸迦！若欲守護行深般若波羅蜜多諸菩薩者，不異有人發動精進守護虛空，唐設劬勞，都無所益。僑尸迦！有能守護響聲等不？」

(134) 天帝釋言：「不也，大德！」

(135a) 善現語言：「若欲守護行深般若波羅蜜多諸菩薩者亦復如是，唐設劬勞，都無所益。」

【第29義】：菩薩加行平等性 (III-8)

〈X〉不執著色等，四種平等性。

◎此處所說之加行有四平等性，謂：

〈X1〉於色等自性、〈X2〉青等相、〈X3〉差別、〈X4〉有境，無實執著之加行有四種故。

(135b) 〈X〉憍尸迦！諸菩薩眾行深般若波羅蜜多，雖知諸法皆如響等而不觀見，亦不顯示，能如是住，是行般若波羅蜜多。」

【第 30 義】：一切智品大乘見道 (III-9)

苦等諸聖諦，法智及類智，忍智剎那性，一切智見道：

◎緣苦等四諦所生〔法智忍、法智、類智忍、類智〕等，謂無間道所攝之八忍，解脫道所攝之八智。此十六剎那體性，即一切智品所說之大乘見道也。

(136) 爾時，世尊威神力故，令此三千大千世界四大天王及天帝釋、大梵王等一切天眾來詣佛所，頂禮雙足，卻住一面。以佛神力，於十方界各見千佛宣說般若波羅蜜多，名字相狀皆同於此，請說般若波羅蜜多苾芻眾首皆名善現，問難般若波羅蜜多諸天眾首皆名帝釋。

(137) 爾時，世尊告善現曰：「慈氏菩薩當證無上正等覺時，即以此名，亦於此處宣說般若波羅蜜多。」

(138) 爾時，善現便白佛言：「慈氏菩薩當證無上正等覺時，以何等名即於此處宣說般若波羅蜜多？」

〈Y1〉色非常無常，〈Y2〉出二邊〈Y3〉清淨，〈Y4〉無生無滅等，〈Y5〉如虛空〈Y6〉離貪。〈Y7〉脫離諸攝持，〈Y8〉自性不可說，〈Y9〉由宣說此義，不能惠施他。〈Y10〉皆悉不可得，〈Y11〉畢竟淨〈Y12〉無病，〈Y13〉斷除諸惡趣，〈Y14〉證果無分別。〈Y15〉不繫屬諸相，〈Y16〉於義名二種，其識無有生，一切智剎那，如是此及此，

◎〈Y1〉色等無常相者，謂勝義中離常、無常，故非常非無常。

◎〈Y2〉苦相者，謂勝義中離苦、非苦，故出常斷二邊。

◎〈Y3〉空相者，謂勝義中離空、不空，故名清淨。

◎〈Y4〉無我相者，謂勝義中非我、無我性，故無生無滅，等取非染非淨。

——是苦諦諸相。

- ◎ 〈Y5〉有漏業及愛取，謂苦因、非因，勝義非有，故如虛空。
- ◎ 〈Y6〉又彼於勝義中，非集、非無集，故離貪等一切煩惱。
- ◎ 〈Y7〉又彼於勝義，生苦、不生苦皆不繫屬，故脫離諸攝持。
- ◎ 〈Y8〉又彼脫離，是苦緣、非苦緣，故自性不可說。

——此是集諦諸相。

- ◎ 〈Y9〉滅諦離煩惱義，於勝義中若滅無滅皆不繫屬，故宣說此滅諸義，於勝義中不可惠施於他。
- ◎ 〈Y10〉又彼於勝義中無苦靜不靜，故皆不可得。
- ◎ 〈Y11〉又彼於勝義中離妙非妙，故遠離常斷二邊畢竟清淨。
- ◎ 〈Y12〉又彼於勝義中無離不離，故具足不生一切疾病之勝利。

——此是滅諦諸相。

- ◎ 〈Y13〉道諦現證真空之智，由勝義中離道非道，故斷除地獄等惡趣。
- ◎ 〈Y14〉又彼於勝義中，是理、非理不相雜亂，故於證預流果等之方便，無諸分別。
- ◎ 〈Y15〉又後於勝義中脫離，是行、非行，故與諸法實有相不相繫屬。
- ◎ 〈Y16〉又彼於勝義中，無出、不出生涅槃，故於所詮所知義與能詮聲，皆不生有能所取二相之識。

——此是道諦諸相。

——如是行相之一切智剎那，即是菩薩之見道也。

- (139) 〈Y〉佛告善現：「慈氏菩薩當證無上正等覺時，不說色空法，不說受想行識空法；不說色縛脫法，不說受想行識縛脫法。」
- (140) 具壽善現復白佛言：「甚深般若波羅蜜多最為清淨。」
- (141) 佛告善現：「色清淨故，甚深般若波羅蜜多最為清淨；受想行識清淨故，甚深般若波羅蜜多最為清淨；虛空清淨故，甚深般若波羅蜜多最為清淨；色無染故，甚深般若波羅蜜多最為清淨；受想行識無染故，甚深般若波羅蜜多最為清淨；虛空無染故，甚深般若波羅蜜多最為清淨。」
- (142) 具壽善現復白佛言：「若諸有情受持讀誦甚深般若波羅蜜多，終不橫死，亦無橫病及橫殃禍，常為無量百千天神恭敬圍繞，隨逐守護。若善男子、善女人等，於黑白月各第八日、第十四日、第十五日，在在處處讀誦講說甚深般若波羅蜜

多，當獲無邊功德勝利。」

〈Z1-Z3〉又此三段文，當知即顯示，此三品圓滿。

——如是廣說三智已：

◎〈Z1〉《經》云：「善現！於一切法非有自在等」，此段經文，總結一切智。

(143a) 〈Z1〉佛告善現：「如是！如是！如汝所說。善現當知！甚深般若波羅蜜多說、聽等時，多有留難。所以者何？甚深般若波羅蜜多是大珍寶，多諸怨賊，於一切法無著無取。何以故？以一切法都無所有，不可得故。

◎〈Z2〉又云：「善現！如是境非捨三界等」，此段經文，總結道相智。

(143b) 〈Z2〉善現當知！甚深般若波羅蜜多於一切法無所得故，非能染汙，非所染汙。何以故？無法不能染無法故。以無染故，說名無染波羅蜜多，由此般若波羅蜜多無染汙故，餘一切法亦無染汙。若於如是亦不分別，是行般若波羅蜜多。

◎〈Z3〉又云：「善現！如是般若波羅蜜多，從佛法乃至獨覺法不取不捨等」，此段經文，總結一切相智。

(143c) 〈Z3〉善現當知！甚深般若波羅蜜多無分別故，於一切法無見不見，無取無捨。」

(144) 時有無量百千天子住虛空中，歡喜踊躍，互相慶慰，同聲唱言：「我等今者，於瞻部洲見佛**第二轉妙法輪**。」

(145) 爾時，世尊告善現曰：「如是法輪非第一轉，亦非第二，甚深般若波羅蜜多無轉還故。」

(146) 爾時，善現便白佛言：「甚深般若波羅蜜多是為廣大波羅蜜多，於一切法無縛無著。雖證菩提，而無所證，雖轉法輪，而無所轉，無法可示，無法可顯，無法可得，無法可轉，無法可還，以一切法畢竟不生，亦復不滅，不生滅故，無轉無還。」

(147) 爾時，世尊告善現曰：「如是！如是！所以者何？以空、無相、無願、無作、無生、無滅、無性法中，若轉若還，俱不可得。若能如是宣說開示，是名善淨宣說般若波羅蜜多，此中都無說者、受者，亦無作證得涅槃者，亦無說法作福田者，福田

無故，福性亦空。表示名言皆不可得故，名廣大波羅蜜多。」

【第四事】一切相加行

【第 31 義】：菩薩能治品之智相（IV-1）

一切智差別，行相為能相，由三種智故，許行相為三：

◎了知四諦上無常等十六行相一切智之諸差別，由善現起對治執五蘊常等所治品之能治行相，而摧伏彼執等之菩薩瑜伽，為此所說能修對治之能相。

此能對治之行相，許有三種，由三智決定故。【共一百七十三相】

一、[一切智相]（有二十七相）

《A1》-《D15》始從無邊相，乃至無動相，三諦各有四，道中說十五。

◎從《經》云：「如是般若波羅蜜多是無邊波羅蜜多」，說苦諦無常相，至云：「如是般若波羅蜜多是無動波羅蜜多」，說道諦無動相。此諸經文，於前三諦各說四相，於道諦上說十五相，共說一切智二十七種相。

◎前三諦各有四相者，謂：

《A1》〔無常勝義無生〕；

《A2》〔苦勝義無生〕；

《A3》遠離異體我；

《A4》自我分別不能屈伏；

——如其次第，即苦諦無常、苦、空、無我四相。

《B1》生苦之愛因，勝義無住；

《B2》集，勝義如虛空；

《B3》尋伺，勝義不可說；

《B4》感後有之受愛緣，勝義無名；

——如其次第，即集諦因、集、生、緣四相。

《C1》滅勝義無行；

《C2》靜緣不可奪；

《C3》妙解脫無意盡；

《C4》離垢之滅無生；

——如其次第，即滅諦滅、靜、妙、離四相。

◎道諦說十五者，分為三種：屬煩惱障無漏對治；屬所取分別所知障有漏對治，及彼無漏對治。

初有四相，謂：

《D1》現證無作者補特伽羅我之菩薩見道，是道諦相；

《D2》如是現證無知者補特羅我；

《D3》無移轉者補特伽羅我；

《D4》無調伏煩惱補特伽羅我之菩薩見道；

——如其次第，即道諦上道、理、行、出四相。

所知障有漏對治有五相，謂：

《D5》外境無自性如夢；

《D6》外境勝義無生如響；

《D7》外境無滅如影像；

《D8》外境本來寂靜如陽焰；

《D9》外境自性涅槃如幻事。

——此是大乘修道五後得智。

所知障無漏對治有六相，謂：

《D10》現證所執外境無染；

《D11》外境無淨；

《D12》無習氣薰染；

《D13》無差別戲論；

《D14》無味著智德之慢；

《D15》已得不退之無動轉相。

——此是菩薩見道現證無所取之六根本智。

(148a) 《A1》-《D15》爾時，善現復白佛言：「甚深般若波羅蜜多是為無邊波羅蜜多，如太虛空無邊際故；是為正等波羅蜜多，以一切法性平等故；是為遠離波羅蜜多，以一切法畢竟空故；是為難伏波羅蜜多，以一切法不可得故；是為無跡波羅蜜多，以一切法無名體故；是為無行波羅蜜多，以一切法無往來故；是為無奪波羅蜜多，以一切法不可取故；是為無盡波羅蜜多，以一切法不可盡故；是為無生波羅蜜多，以一切法不可生故；是為無作波羅蜜多，以諸作者不可得故；是為無知波羅蜜多，以諸知者不可得故；是為無轉波羅蜜多，諸死生者不可得故；是為無垢波羅蜜多，煩惱淨故；是為無染波羅蜜多，以所依處不可得故；是為無壞波羅蜜多，離前

際故；是為如幻波羅蜜多，以一切法皆不生故；是為如夢波羅蜜多，是諸意識平等性故；是無戲論波羅蜜多，覺諸戲論平等性故；是無思慮波羅蜜多，諸思慮法畢竟無故；是無動轉波羅蜜多，住法界故。

二、[道相智相]（有三十六相）

《E1》-《H16》於因道及苦，滅中如次第，說彼有八七，五及十六相。

◎道相智有三十六相，謂如其次第，緣集諦因之道相智有八相，緣道諦有七，緣苦諦有五，緣滅諦有十六，是《經》中所說故。

初，緣集諦有八者，謂：

《E1》大乘見道身中，現證無我之智，遠離染著欲塵之欲；

《E2》於彼不執著而住；

《E3》寂滅樂後有愛相；

——如其次第，即集諦之「因相」上，愛境界欲、愛不離貪、樂後有愛之對治。

《E4》又如是智，現證無貪著境；

《E5》無瞋恚境；

《E6》無愚癡境；

——即「集相」上貪、瞋、癡之對治。

《E7》又如是智，現證無非理作意之煩惱境；

——即「生相」上，執著常、樂、我、淨等之對治。

《E8》又如是智，現證無自在有情相；

——即「緣相」上，執著自在有情之對治。

第二，緣道諦有七者，謂：

《F1》於無量有情，啟開解脫道之道智相；

《F2》啟開之理，須不繫生死、涅槃二邊之道智相；

——此二是「道相」。

《F3》了知法界無離壞之道智相；

《F4》了知之理，須現證無取著聲聞、獨覺道，永離戲論之道智相；

——此二是「理相」。

《F5》不分別實有之道智相；

《F6》此須現證無限量法性之道智相；

——此二是「行相」。

《F7》無實滯礙之道智相——即是「出相」。

第三，緣苦諦有五者，謂：

《G1》五取蘊剎那壞，故是「無常相」；

《G2》行苦性，故是「苦相」；

《G3》遠離異體之作者，故是「空相」；

《G4》無補特伽羅之我性，故是「無我相」；

《G5》實體空，故是「無相相」。

第四，緣滅諦有十六者，謂：

《H1-H3》離煩惱之「滅相」，有內空、外空、內外空三相。

《H4-H11》「靜相」中，有空空、大空、勝義空、有為空、無為空、畢竟空、無際空、無散空八相。

《H12》「妙相」即本性空相。

《H13-15》「出離相」中，有一切法空、自相空、不可得空三相。

《H16》「唯出離相」者，謂無性自性空一相。

——此就十六種有法，而明十六種離垢法性之滅諦。

◎如是道相智三十六種相：

a 集諦相，是就能治所治門中說；

b 道諦相，就所立與能立門中說；

c 苦諦相，就自相共相門中說；

d 滅諦相，是就勝利門中說。

(148b) 《E1》-《H16》是為離染波羅蜜多，以一切法不虛妄故；是無作用波羅蜜多，於一切法無分別故；是為寂靜波羅蜜多，一切法相不可得故；是無煩惱波羅蜜多，離過失故；是無有情波羅蜜多，有情實際不可得故；是為無斷波羅蜜多，以一切法無等起故；是無二邊波羅蜜多，於一切法無執著故；是無取著波羅蜜多，於二乘地無分別故；是無分別波羅蜜多，覺諸分別平等性故；是為無量波羅蜜多，無量法故；是為無起波羅蜜多，離我法故；是為虛空波羅蜜多，於一切法皆無礙故；是為不生波羅蜜多，以一切法皆不起故；是為無常波羅蜜多，以一切法常無性故；是名為苦波羅蜜多，是逼惱法平等性故；是為無我波羅蜜多，於一切法無執著故；是名為空波羅蜜多，以一切法不可得故；是為無相波羅蜜多，以一切法離諸相故；是為無願波羅蜜多，以一切法無所成故。

三、[一切相智相]（有一百一十相）

《I.1》-《K7》始從四念住，究竟諸佛相，道諦隨順中，由三智分別。
弟子及菩薩，諸佛如次第，許為三十七，卅四三十九。

◎從念住相，乃至佛相，分為三聚：

謂隨順聲聞弟子所有者三十七；

隨順菩薩所有者三十四；

唯佛所有者三十九。

○如是分為三智之理，謂隨順三類補特伽羅身中之道諦，分為三智故。

◎宣說一切相智之相時，何故宣說共聲聞、獨覺、菩薩之相耶？由一切相智攝盡一切聖人之智德種類，故無過失。

○此中分三：隨順聲聞弟子所有一切智相、隨順菩薩所有道相智相、一切相智不共相。

初者，謂：

《I.1》以慧觀察：有漏身不淨，受是苦，心無常，法無我之別相，及觀察無常、苦、空、無我皆真實空之共相，安住正念，即四念住。其自性謂緣身、受、心、法四事，各修別共二相，念、慧隨一之入道現觀，為入四諦之取捨而修也。

《I.2》不善已生令斷，未生令不生，善已生令增長，未生令生之四正斷。自性謂於能治、所治，勇悍取捨之精進入道現觀，為斷已生不善等而修也。

《I.3》依止欲三摩地，依止精進，依止心三摩地，依止簡擇諸法之觀三摩地，觸證心一境性之四神足。自性謂對治五過失，修八斷行所得三摩地入道之現觀。五過失者，謂懈怠、忘教授、沈掉、不作行、作行。八斷行者謂懈怠對治之信、欲、勤、安，忘教授對治之正念，沈掉對治之正知，不作行對治之作行，作行對治之不作行。此為變化種種相而修也。

《I.4》深忍諦理之信，勇悍取捨之精進，不忘所緣行相之念，心一境性之三摩地，簡擇實性之慧根，是為五根。自性謂於引生自果聖道能自在轉，加行道暖位以上之信等五法。為速證聖諦及速圓滿加行道而修。

《I.5》深信四諦之信，趣證四諦之精進，不忘所緣行相之念，心一境性之三摩地，簡擇四諦相之慧力，是為五力。自性謂加行道忍位以上之信等五法。所為與根同。

《I.6》專緣四諦，不散亂支謂念，自體支謂擇法，出離支謂精進，饒益身心勝利支謂喜，無染汙支謂輕安，安住支謂定，自性支謂捨，是七菩提分。自性謂見道所得之念等七法，為斷見所斷及速圓滿滅、道而修。

《I.7》見道以上根本智見，在後得時以觀察慧簡擇諸法，名為正見。欲為他說發起言語之尋，名正思惟。語業清淨之智，名正語。身業清淨之智，名正業。身語二業清淨之智，名正命。斷修所斷勇悍精進，名正精進。任持不忘奢摩他所緣之念，名正念。於念所取境專注之三摩地，名正定。是為八聖道支。自性謂發生自果聖道之因，聖者身中之智。見道未生令生，已生為令圓滿而修。——如是七聚三十七法，諸聲聞弟子亦有，菩薩亦修，由一切智道相而說也。

○此七聚法界限，若如《俱舍》，初聚立於資糧道，次四聚立於暖等四加行位，聖道支立為見道，菩提分立為修道。

若依《集論》，初三聚如其次第在下中上三資糧道，中二聚在加行，後二聚如其次第在見道修道。

第二，隨順菩薩所有道智之相，此有六類：

《J1》第一對治道類，謂對治我見：空解脫門，對治彼相續非理作意：無相解脫門，對治願求三界為勝義應得：無願解脫門。

《J2》第二變化道類，謂修瑜伽師由內住有色想觀外色解脫，即有色觀色解脫。又瑜伽師由內住無色想觀外色解脫，即無色觀色解脫。勝解一切色相同一淨味解脫，即淨解脫。

《J3》第三現法樂住道類，謂四無色定各從自定障解脫，即四無色解脫，又滅粗受想而解脫，即滅解脫。前三解脫名變化道者，以成就種種變化作用故。後五解脫名現法樂住道者，謂即於現法成就三摩地安樂住之作用故。

《J4》第四出世間道類，差別有九，謂出世間道性之四靜慮、四無色等至及滅盡等至。此九由前前漸次而得後後，故名九次第定。

《J5》第五能斷道類，謂苦法忍、集法忍、滅法忍、道法忍，此是見道無間道所攝之四。

《J6》第六成佛道類十度，謂從布施波羅蜜多乃至般若波羅蜜多之六，更加方便波羅蜜多、願波羅蜜多、力波羅蜜多、智波羅蜜多為十。

——此是隨順菩薩所有道相智道三十四相。

第三，唯佛所有一切相智之相，有三十九：

《K1》初十力者，謂知從布施感大資財是為處，感貧乏是非處之智力；知微細業異熟智力；知種種勝解智力，謂樂善趣，樂三乘。知世間界之自性住種及修所成種非一智力；知信等根上中下三勝非勝智力；知往增上生及決定勝一切道及彼相違，無礙著智力；知染淨智力；隨念自他往昔一切生智力；知一切眾生死生智力；知聲聞、獨覺盡煩惱障，諸佛盡一切垢漏盡智力。

《K2》四無畏者，自云我成正覺無能如法攻難，謂智無所畏。為利他故宣說煩惱障所知障礙解脫與一切智，無能如法攻難，謂說障礙法無所畏。宣說一切智等道定能出生三菩提，無能如法攻難，謂說出離道無所畏。云我已盡一切漏無能如法攻難，謂說自斷德圓滿無所畏。

《K3》四無礙解者，謂無障礙了知諸法異名謂法無礙解，能無障礙了知諸法自相共相謂義無礙解，能無障礙了知諸有情語謂詞無礙解，能無障礙了知諸法自性及行相差別謂辨無礙解。

《K4》十八不共佛法者，謂六不共行、六不共證、三不共事業、三不共智。

初者，謂 a 如來〔不為醉象等所害〕，身行無失；

b 不在稠林發無義狂叫，語行無失；

c 不忘失所作及遲誤時等念無失；

d 無時不住空定；

e 生死涅槃無勝義取捨異想；

f 於可化所化時至、未至，無不觀察放捨，〔意行無失〕。

第二，謂 a 希求利有情之欲，b 樂往利所化處之精進，c 不忘調伏有情方便之念，d 於此專一之定，e 簡擇一切法之慧，f 永斷諸障之解脫，皆無退失。

第三，a 四威儀中，調伏有情之身業，b 宣說具法、具義之語業，c 大慈、大悲等意樂，皆智為先，與智俱行智隨行轉。

第四，謂於 a 過去、b 未來、c 現在智無障礙轉。

《K5》如來相者，謂佛身如所有智，於離一切垢真如常不起定。

《K6》自然相者，謂佛身盡所有智，於一切盡所有法，心自在轉。

《K7》正等覺相者，謂具前二分，於如所有、盡所有一切相，現正等覺者。

——如是三智中：

一切智三十七相者，謂諸聲聞以斷煩惱障為主，名無煩惱漏。
道相智三十四相者，謂諸菩薩不以斷煩惱障為主，假名有漏。
一切相智三十九相者，謂諸佛盡斷二障，故唯是無漏。

(148c) 《L1》-《K7》是名為力波羅蜜多，以一切法不可屈故；是無量佛法波羅蜜多，過數量故；是無所畏波羅蜜多，心無怯故；是為真如波羅蜜多，以一切法不虛妄故；是為自然波羅蜜多，以一切法無自性故。」

(149) 佛告善現：「如是！如是！如汝所說。」

不思議品第十

【第 32 義】：一切相加行品正說之加行 (IV-2)

一、[積善根之身]

《L1》昔承事諸佛，佛所種善根，善知識攝受，是聞此法器。

《L2》親近佛問答，及行施戒等，諸勝者許此，是受持等器。

◎《L1》若於往昔承事諸佛，並於佛所供飲食等種諸善根，具足大乘善知識之資糧道菩薩，乃是聽聞此教、道、果般若之器。

◎《L2》又彼資糧道菩薩，親近無數諸佛，請問疑惑之文義，於所問義如理修布施、持戒等，諸佛勝者許為受持文義等之法器。

(01) 《L1-2》時天帝釋作是念言：「若有但聞甚深般若波羅蜜多，當知已曾供養諸佛，發弘誓願，況能受持、讀誦、書寫，為他演說，如教修行，當知是人已於過去無量佛所親近供養，多種善根，曾聞般若波羅蜜多，聞已，受持、讀誦、書寫，為他演說，如教修行，或於此經能問能答，由先福力，今辦此事。若諸有情已曾供養無量諸佛，功德純淨，聞深般若波羅蜜多，其心不驚不恐不怖。」

(02) 時舍利子知天帝釋心之所念，便白佛言：「若諸菩薩於深般若波羅蜜多能生信解，當知是人如不退轉諸大菩薩。所以者何？如是般若波羅蜜多理趣甚深，極難信解，若於前世不久修行甚深般若波羅蜜多，不於佛前請問聽受，不於佛所多種善根，豈暫得聞，即能信解？若有聞說甚深般若波羅蜜多毀謗拒逆，當知是人先世已於甚深般若波羅蜜多毀謗拒逆。所以者何？如是愚人善根少故，於深般若波羅蜜多不生淨信，未曾請問佛及弟子甚深義故，聞說般若波羅蜜多甚深義趣，毀謗拒逆。」

- (03) 爾時，天帝釋謂舍利子言：「如是般若波羅蜜多理趣甚深，極難信解，諸有未久信樂修行甚深般若波羅蜜多，聞說此中甚深義趣，不生信解，未為希有。若人禮敬甚深般若波羅蜜多，即為禮敬一切智智。」
- (04) 舍利子言：「如是！如是！如汝所說。何以故？憍尸迦！如來所得一切智智，皆從般若波羅蜜多而得生故，甚深般若波羅蜜多復由如來一切智智而得有故。憍尸迦！諸菩薩眾應如是行，應如是住，應如是學甚深般若波羅蜜多。」

二、[正明加行]

《M1》不住色等故，《M2》遮彼加行故，《M3》彼真如深故，
 《M4》此等難測故。《M5》此等無量故，《M6》劬勞久證故，
 《M7》授記《M8》不退轉，《M9》出離及《M10》無間。
 《M11》近菩提《M12》速疾，《M13》利他《M14》無增減，
 《M15》不見法非法，《M16》色等不思議。《M17》色等諸行相，
 自性無分別，《M18》能與珍寶果，《M19》清淨及《M20》結界。

◎《M1》大乘加行道根本智，於所緣境破除實執，名於勝義不住色等。

◎《M2》於能緣心破實執，名於色等勝義不加行而於真實義加行。

◎《M3》色等實空之真如甚深。

◎《M4》諸道之法性難測度。

◎《M5》諸行相之法性無量。

——通達此五之加行是就加行自體而分。

◎《M6》又資糧道鈍根菩薩智，於真空性多起驚恐，由是初業菩薩之加行故，須大劬勞，要經長時乃能成佛，名劬勞長久之加行。

◎《M7》大乘加行道暖位，由於空性成就無畏，名得授記之加行。

◎《M8》大乘加行道頂位，勝出於暖，聽聞、受持般若等故，名不退轉加行。

◎《M9》大乘加行道忍位，由遠離二乘作意等障礙法故，名出離加行。

◎《M10》大乘加行道世第一法，為見道正因常修法故，名無間加行。

◎《M11》大乘見道是大乘道無漏法所依故，名近大菩提加行。

◎《M12》從二地至七地智，速能成辦法身果故，名速疾證大菩提加行。

◎《M13》第八地智，是普於三種種姓轉法輪之淨地智故，名利他加行。

——此八加行是就補特伽羅而分。

◎《M14》又八地智是於勝義不見增、減之淨地智故，名無增減加行。

◎《M15》又彼智是於勝義不見法、非法等之加行。

◎《M16》又彼智是破色等不思議相之加行。

◎《M17》又彼智是於所相事色等，彼行相變礙等，所相自性不分別之加行。

——此四加行是就圓滿加行之方便而分。

◎《M18》第九地智，是於預流等果能安立他之淨地智，名能與寶果之加行。

◎《M19》第十地智，是從色乃至一切相智修習清淨之淨地智故，名清淨加行。

◎《M20》速修般若之菩薩瑜伽，是分日月、年時，勤修般若，精進不捨之菩薩瑜伽，名結界（指，時限）加行。

——此三是就果與時間而分。

——共為大乘二十種加行。

《M1》大乘加行道根本智，於所緣境破除實執，名於勝義不住色等。

(05)《M1》時天帝釋便白佛言：「諸菩薩眾云何行深般若波羅蜜多，名住深般若波羅蜜多，名學深般若波羅蜜多？」

(6a)爾時，佛讚天帝釋言：「善哉！善哉！汝承佛力，能問如來如是深義。憍尸迦！諸菩薩眾行深般若波羅蜜多，若不住色，亦不住此是色，是為學色；若不住受想行識，亦不住此是受想行識，是為學受想行識。

《M2》於能緣心破實執，名於色等勝義不加行而於真實義加行。

(6b)《M2》復次，憍尸迦！諸菩薩眾行深般若波羅蜜多，若不學色，亦不學此是色，是不住色；若不學受想行識，亦不學此是受想行識，是不住受想行識。憍尸迦！是名菩薩行深般若波羅蜜多，亦名住深般若波羅蜜多，亦名學深般若波羅蜜多。」

《M3》色等實空之真如甚深。

《M4》諸道之法性難測度。

《M5》諸行相之法性無量。

(07)《M3-5》時舍利子便白佛言：「如是般若波羅蜜多最為甚深，

難可測量，難可執取，無有限量。」

- (08) 爾時，佛告舍利子言：「如是！如是！如汝所說。舍利子！諸菩薩眾行深般若波羅蜜多，若不住色甚深性，亦不住此是色甚深性，是為學色甚深性；若不住受想行識甚深性，亦不住此是受想行識甚深性，是為學受想行識甚深性。復次，舍利子！諸菩薩眾行深般若波羅蜜多，若不學色甚深性，亦不學此是色甚深性，是為不住色甚深性；若不學受想行識甚深性，亦不學此是受想行識甚深性，是為不住受想行識甚深性。」

《M6》又資糧道鈍根菩薩智，於真空性多起驚恐，由是初業菩薩之加行故，須大劬勞，要經長時乃能成佛，名劬勞長久之加行。

《M7》大乘加行道暖位，由於空性成就無畏，名（過一佛或二佛當）得授記之加行。

- (09) 《M7》時舍利子復白佛言：「如是般若波羅蜜多既最甚深，難可測量，難可執取，無有限量，則難信解，但應為彼不退轉位諸菩薩說，彼於此中無疑無惑，不迷謬故。」

- (10) 《M6》時天帝釋問舍利子言：「若為未受記諸菩薩說，當有何答？」

- (11) 舍利子言：「彼聞驚怖，或生毀謗，由此因緣，久受大苦，難得無上正等菩提。」

- (12) 天帝釋言：「頗有菩薩未得受記，聞深般若波羅蜜多，心不驚怖，不生毀謗，深信解耶？」

- (13) 舍利子言：「有，是菩薩久發無上正等覺心，久修菩薩摩訶薩行，雖未得受大菩提記，不過一佛或二佛所，定當得受大菩提記。」

- (14) 爾時，佛告舍利子言：「如是！如是！如汝所說。舍利子！若諸菩薩未得受記，聞深般若波羅蜜多，心不驚怖，深信解，當知久發大菩提心，多種善根，事多善友。」

- (15) 時舍利子便白佛言：「我今樂說少分譬喻，唯願聽許！」

- (16) 爾時，佛告舍利子言：「隨汝意說。」

- (17a) 時舍利子白言：「世尊！如菩薩乘善男子等，自夢見坐妙菩提座，當知是人近證無上正等菩提。」

《M8》大乘加行道頂位，勝出於暖，聽聞、受持般若等故，名不退轉

加行。

(17b) 《M8》若有得聞甚深般若波羅蜜多，心不驚怖，深生信解，亦復如是，當知是人久發無上正等覺心，善根成熟，或已得受大菩提記，或近當受大菩提記，疾證無上正等菩提。

《M9》大乘加行道忍位，由遠離二乘作意等障礙法故，名出離加行。

(17c) 《M9》世尊！譬如有人遊行曠野，經過險道，百踰繕那，或二或三，乃至五百，見諸城邑王都前相，謂放牧人園林田等。見是相已，便作是念：『城邑王都去此非遠。』作是念已，身意泰然，不畏惡獸、惡賊、飢渴。如是菩薩得聞般若波羅蜜多，深心信敬，當知不久受菩提記，疾證無上正等菩提，無墮聲聞、獨覺地畏。何以故？已得見聞恭敬信受甚深般若波羅蜜多無上菩提之前相故。

《M10》大乘加行道世第一法，為見道正因常修法故，名無間加行。

(17d) 《M10》世尊！譬如有人欲觀大海，漸次往趣，經歷多時，不見山林，便作是念：『今觀此相，大海非遠。所以者何？近大海岸，地必漸下，無諸山林。』彼人爾時雖未見海，而見近相，歡喜踊躍。如是菩薩得聞般若波羅蜜多，深心信敬，當知不久受菩提記，疾證無上正等菩提。何以故？已得見聞甚深般若波羅蜜多無上菩提之前相故。

《M11》大乘見道是大乘道無漏法所依故，名近大菩提加行。

(17e) 《M11》世尊！譬如春時，花果樹等，故葉已墮，枝條滋潤，眾人見之，咸作是念：『新花果葉，當出非久。所以者何？此諸樹等新花果葉先相現故。』如是菩薩得聞般若波羅蜜多，深心信敬，當知不久受菩提記，疾證無上正等菩提。時眾會中有諸天子，見已歡喜，作是念言：『先諸菩薩得此相已，不久便受大菩提記，今此菩薩亦得是相，不久當受大菩提記。』

《M12》從二地至七地智，速能成辦法身果故，名速疾證大菩提加行。

(17f) 《M12》世尊！譬如女人懷妊漸久，其身轉重，動止不安，飲食睡眠悉皆減少，不缸多語，厭常所作，受苦痛故，眾事頓息，有異母人見是相已，即知此女不久產生。如是菩薩得聞般若波

羅蜜多，深心信敬，當知不久受菩提記，疾證無上正等菩提，能盡未來利樂一切。」

(18) 爾時，佛讚舍利子言：「善哉！善哉！汝今善說菩薩譬喻，皆是如來威神之力。」

大般若波羅蜜多經卷第五百六十

《M13》第八地智，是普於三種種姓轉法輪之淨地智故，名利他加行。

(19) 《M13》爾時，善現便白佛言：「甚奇！世尊於諸菩薩善能付囑，善能護念。」

(20) 佛言：「善現！如是！如是！所以者何？諸菩薩眾為欲長夜利樂多生，哀愍世間『大眾生』故，欲令天人獲大義利安樂事故，求證無上正等菩提，為諸有情宣說法要。」

《M14》又八地智是於勝義不見增、減之淨地智故，名無增減加行。

(21) 《M14》具壽善現復白佛言：「諸菩薩眾行深般若波羅蜜多，云何修習甚深般若波羅蜜多令速圓滿？」

(22a) 佛告善現：「若諸菩薩依深般若波羅蜜多，不見色增，不見色減而行般若波羅蜜多；不見受想行識增，不見受想行識減而行般若波羅蜜多。」

《M15》又彼智是於勝義不見法、非法等之加行。

(22b) 《M15》不見是法，不見非法而行般若波羅蜜多，是諸菩薩修習般若波羅蜜多速得圓滿。」

《M16》又彼智是破色等不思議相之加行。

(23) 《M16》具壽善現復白佛言：「如來所說不可思議。」

(24) 佛告善現：「如是！如是！色亦不可思議，受想行識亦不可思議。若諸菩薩行深般若波羅蜜多，於色不起不思議想而行般若波羅蜜多，於受想行識亦復不起不思議想而行般若波羅蜜多，是諸菩薩修習般若波羅蜜多速得圓滿。」

《M17》又彼智是於所相事色等，彼行相變礙等，所相自性不分別之加行。

(25) 《M17》具壽善現復白佛言：「如是般若波羅蜜多義趣甚深，

誰能信解？」

(26) 佛告善現：「若諸菩薩久修勝行，於深般若波羅蜜多能生信解。」

(27) 具壽善現復白佛言：「諸菩薩眾云何得名久修勝行？」

(28) 佛告善現：「若諸菩薩行深般若波羅蜜多，不分別如來十力，不分別四無所畏，不分別十八不共法，不分別一切智。所以者何？如來十力不可思議乃至一切智亦不可思議，色亦不可思議，受想行識亦不可思議，一切法亦不可思議。若諸菩薩如是行者，都無行處，是行般若波羅蜜多，是諸菩薩乃可名為久修勝行。」

《M18》第九地智，是於預流等果能安立他之淨地智，名能與寶果之加行。

(29a) 《M18》具壽善現復白佛言：「甚深般若波羅蜜多是珍寶聚。

《M19》第十地智，是從色乃至一切相智修習清淨之淨地智故，名清淨加行。

(29b) 《M19》是清淨聚，如淨虛空，離雲煙等。奇哉！般若波羅蜜多義趣甚深，多諸留難，而今廣說，留難不生。」

《M20》速修般若之菩薩瑜伽，是分日月、年時，勤修般若，精進不捨之菩薩瑜伽，名結界（指，時限）加行。

(30) 《M20》佛告善現：「如是！如是！佛神力故，留難不生。是故大乘善男子等，於深般若波羅蜜多，若欲書持、讀誦、演說，乃至一歲，必令摠了。所以者何？甚深般若波羅蜜多大寶神珠多諸障礙。」

【第 33 義】：加行功德（IV-3）

《N1-N14》摧伏魔力等，十四種功德。

○修一切相加行有十四種功德，謂：

◎《N1》修無倒加行獲得喜悅之菩薩，於未來世摧伏魔力之功德。

(31) 《N1》具壽善現復白佛言：「奇哉！惡魔常於如是甚深般若波羅蜜多大寶神珠欲作留難。」

(32) 佛告善現：「一切惡魔雖於般若波羅蜜多常欲留難，令諸菩薩

所作不成，而願不遂。」

(33) 時舍利子便白佛言：「是誰神力令彼惡魔於深般若不能留難？」

(34a) 爾時，佛告舍利子言：「是佛神力，亦是十方一切世界諸佛神力。舍利子！一切如來應正等覺皆共護念行深般若波羅蜜多諸菩薩眾，令諸惡魔不能留難。何以故？舍利子！若諸菩薩行深般若波羅蜜多，法爾皆蒙十方無量無邊世界一切如來應正等覺共所護念，若蒙如來應正等覺所護念者，惡魔法爾不能留難。」

◎ 《N2》 諸佛護念之功德。

(34b) 《N2》 又舍利子！若有淨信善男子等，於深般若波羅蜜多書寫、受持、讀誦、修習、思惟、演說無障礙者，應作是念：『我今書寫、受持、讀誦、修習、思惟、演說般若波羅蜜多，皆是十方一切世界諸佛世尊神力護念，令得成辦。』」

(35) 時舍利子便白佛言：「若菩薩乘善男子等，於深般若波羅蜜多書寫、受持、讀誦、修習、思惟、演說，皆是十方諸佛神力慈悲護念，令彼所作殊勝善業，一切惡魔不能留難。」

(36) 爾時，佛告舍利子言：「如是！如是！如汝所說。」

◎ 《N3》 由依止諸佛加行勝進（佛眼現見）之功德。

(37) 《N3》 時舍利子復白佛言：「若菩薩乘善男子等，於深般若波羅蜜多書寫、受持、讀誦、修習、思惟、演說，十方世界諸佛世尊皆共識知，歡喜護念。十方世界諸佛世尊常以佛眼皆共觀見，慈悲護念，令彼所修，無不成辦。」

(38a) 爾時，佛告舍利子言：「如是！如是！如汝所說。若菩薩乘善男子等，於深般若波羅蜜多書寫、受持、讀誦、修習、思惟、演說，常為十方一切世界諸佛世尊佛眼觀見，識知護念，令諸惡魔不能燒惱，所作善業皆速成辦。」

◎ 《N4》 接近菩提之功德。

(38b) 《N4》 若菩薩乘善男子等，能於般若波羅蜜多書寫、受持、讀誦、修習、思惟、演說，當知已近無上菩提，惡魔眷屬不能留難。」

◎ 《N5》 轉趣利他大異熟果之功德。

(38c) 《N5》若菩薩乘善男子等，能書般若波羅蜜多，種種莊嚴，受持讀誦，供養恭敬，常為諸佛之所護念，由此因緣，獲大饒益。

◎ 《N6》生有甚深般若國土，請問、持誦等功德。

(38d) 《N6》復次，舍利子！如是般若波羅蜜多甚深經典，佛涅槃後，流至南方，漸當興盛，後從南方流至北方，漸當興盛。非佛所得法、毗奈耶無上正法有滅沒相，如來所得法、毗奈耶無上正法即是般若波羅蜜多甚深經典。如是經典，住菩薩乘善男子等，書寫、受持、讀誦、修習、思惟、演說、恭敬供養，一切如來應正等覺常以佛眼觀見護念，稱揚讚歎，令無憂苦。」

(39) 時舍利子便白佛言：「如是般若波羅蜜多甚深經典，後時後分於東北方廣行流布。」

(40) 爾時，佛告舍利子言：「如是！如是！舍利子！後時後分彼東北方住菩薩乘善男子等，聞此般若波羅蜜多甚深經典，若能信樂、書寫、受持、讀誦、修習、思惟、演說、恭敬供養，當知彼人久發無上正等覺心，久修菩薩摩訶薩行。」

(41) 時舍利子復白佛言：「彼東北方後時後分當有幾許住菩薩乘善男子等，得聞般若波羅蜜多甚深經典，能生信樂、書寫、受持、讀誦、修習、思惟、演說、恭敬供養？」

(42a) 爾時，佛告舍利子言：「彼東北方後時後分雖有無量住菩薩乘善男子等，而少得聞甚深般若波羅蜜多，深心信樂、書寫、受持、讀誦、供養；雖有無量住菩薩乘善男子等，聞深般若波羅蜜多，深心信樂、書寫、受持、讀誦、供養，而有少分修習思惟，若能為他宣說開示甚深義趣，甚為難得。」

◎ 《N7》圓滿一切無漏功德（菩薩行）之功德。

(42b) 《N7》舍利子！若菩薩乘善男子等，聞說般若波羅蜜多，心不沈沒，不驚不怖，深生信樂，書寫、受持、讀誦、修習、思惟、演說，當知是人已曾親近供養恭敬無量如來應正等覺及諸菩薩，請問般若波羅蜜多甚深義趣。是菩薩乘善男子等，定當圓滿諸菩薩行，疾證無上正等菩提，與諸有情作大饒益。

◎ 《N8》一切生中，為能宣說甚深般若丈夫之功德。

(42c) 《N8》何以故？舍利子！我常為彼住菩薩乘善男子等，說一切智相應之法，是人轉身常能修集諸菩薩行，速趣無上正等菩提，為諸有情說微妙法，令趣無上正等菩提。

◎ 《N9》魔等不能破壞菩提之功德。

(42d) 《N9》是菩薩乘善男子等，身心安定，諸惡魔王及彼眷屬尚不能壞求趣無上正等覺心，何況其餘樂行惡者！

◎ 《N10》引生不供二乘善根之功德。

(42e) 《N10》舍利子！住菩薩乘善男子等，聞深般若波羅蜜多，心得廣大清淨喜樂，亦能安立無量有情無上菩提相應善法。

◎ 《N11》誓行利他如實而行之功德。

(42f) 《N11》舍利子！是菩薩乘善男子等，今於我所發弘誓願：『定當安立無量百千諸有情類，令發無上正等覺心，修菩薩行，示現、勸導、讚勵、慶喜，令於無上正等菩提乃至得受不退轉記。』我於彼類深生隨喜。何以故？舍利子！我觀彼人所發弘願，心語相稱，彼於當來定能安立無量百千諸有情類，令發無上正等覺心，修菩薩行，示現、勸導、讚勵、慶喜，令於無上正等菩提乃至得受不退轉記。

(42g) 是菩薩乘善男子等，亦於過去無量佛所發如是願，過去如來應正等覺亦於彼願深生隨喜，觀彼心語定相稱故。

◎ 《N12》攝受廣大善果之功德。

(42h) 《N12》是菩薩乘善男子等，信解廣大，修廣大行。

◎ 《N13》引發有情義利之功德。

(42i) 《N13》願生他方諸佛國土，現有如來應正等覺宣說般若波羅蜜多甚深法處，彼聞般若波羅蜜多甚深法已，復能安立彼佛土中無量百千諸有情類，令發無上正等覺心，修菩薩行，示現、勸導、讚勵、慶喜，令於無上正等菩提得不退轉。」

(43a) 時舍利子便白佛言：「甚奇！世尊！佛於過去、未來、現在所有諸法及諸有情心行差別，佛、菩薩等，無不證知，無不覺了。」

◎《N14》轉生亦定得甚深般若之功德。

(43b)《N14》世尊！若諸菩薩能於般若波羅蜜多至心聽聞、受持、讀誦，精勤修學，如理思惟，書寫解說，廣令流布，是諸菩薩於當來世求深般若波羅蜜多精勤不息，彼於般若波羅蜜多為有得時、不得時不？」

(44)爾時，佛告舍利子言：「是諸菩薩於深般若波羅蜜多常求不息，一切時得，無不得時，**或有不求，自然而得**，諸佛、菩薩常護念故。」

(45)時舍利子復白佛言：「是諸菩薩為於般若波羅蜜多相應經典一切時得，無不得時？為於六種波羅蜜多相應經典亦能常得？」

(46)爾時，佛告舍利子言：「若諸菩薩常於般若波羅蜜多相應經典勇猛信求，不顧身命，有時不得諸餘經典，無有是處。何以故？舍利子！是諸菩薩為趣無上正等菩提，示現、勸導、讚勵、慶喜諸有情類，令於般若波羅蜜多相應經典及餘經典受持讀誦，亦自於中精勤修學，由斯福力，隨所生處，**法爾常遇甚深般若波羅蜜多相應經典**及餘六種波羅蜜多相應經典，恒不捨離。」

魔事品第十一

【第 34 義】：加行過失 (IV-4)

《01-046》當知諸過失，有四十六種。

○修加行之過失有四十六種魔事：

◎依自違緣有二十種，謂：

《01》修加行時，長時勤勞乃能得知，由此疲厭；

《02》又修加行時，速得辯才，由此憍逸；

——此二是依辯才而生。

《03》又修加行時，頻申欠喏、無端戲笑等，由身粗重令心散亂；

《04》又修加行時，由心粗重，令心散亂；

《05》又修加行時，非理發起持誦等事；

——此三是由粗重而生。

《06》又修加行時，執取推轉般若之因；

《07》又修加行時，於得一切相智之因甚深般若等，退失信心；

《08》又修加行時，棄捨甚深般若，趣小乘道，退失妙味；

《09》又修加行時，於二乘法尋求一切相智，退失攝持大乘；

《010》又修加行時，棄捨所得般若，而於二乘法尋求一切相智，退

失所為；

《011》又修加行時，唯修二乘法便欲得一切相智，退失隨順因果；

《012》又修加行時，執大乘法同二乘法，退失無上三身之因；

——此七是退失大乘之因。

《013》又修加行時，於色聲等眾多欲塵，起下劣尋伺辯才；

《014》又修加行時，棄捨義理，唯著書寫為般若波羅蜜多；

《015》又修加行時，執著無性為真實義；

《016》又修加行時，執著文字為般若波羅蜜多；

《017》又修加行時，執無文字為般若波羅蜜多；

《018》又修加行時，貪著境界，作意國土等；

《019》又修加行時，味著利養、恭敬、稱譽；

《020》又修加行時，棄捨佛道，於魔法中尋求善巧方便；

——此八是散失大乘之因。

◎依自他隨一缺乏順緣又二十三種，謂：

《021》修加行時，聞者欲樂增上，說者懶惰增上，不能和合，退失法行；

《022》又聞者欲於此方聽聞，說者欲往他方講說；

《023》又聞者少欲，說者大欲；

《024》又聞者具足杜多功德，說者不具杜多功德；

《025》又聞者勤修善業，說者勤作不善業；

《026》又聞者廣大好施，說者上品慳吝；

《027》又聞者欲施，說者不受；

《028》又聞者略說便領，說者廣演乃知；

《029》又聞者欲知三藏十二分教，說者不知；

《030》又聞者成就六度，說者不具六度；

《031》又聞者於大乘法有方便善巧，說者無方便善巧；

《032》又聞者已得陀羅尼，說者未得陀羅尼；

《033》又聞者欲得書寫，說者不欲書寫；

《034》又聞者遠離五蓋，說者未離五蓋，不能和合退失法行；

——此十四種是依說者過失。

《035》又聞毀說地獄等諸苦，深生怖畏，背棄利他而不往惡趣；

《036》又聞讚說天趣等安樂，貪愛善趣，退失大乘；

——此二依自過失。

《037》又修加行時，說者欲獨處遠離，聞者好領徒眾，不能和合退

失法行；

《038》又聞者欲隨行，說者不許；

《039》又說者為名利故而為說法，聞者不施；

《040》又說者欲往有命難處，聞者不欲隨往；

《041》又說者欲往饑饉難處，聞者不欲隨往；

《042》又說者欲往多諸盜賊、兵亂等處，聞者不欲隨往；

《043》又說者數數顧施主家，歡喜散亂，聞者不樂，兩不和合退失法行；

——此七是俱依自他過失。

◎依餘違緣有三種，謂：

《044》修加行時，有諸惡魔作比丘形，離間人、法，方便破壞；

《045》又魔說偽假般若波羅蜜多；

《046》又有諸惡魔作佛形像，亂菩薩心，令於非實發生愛樂。

——此上共為四十六種魔事。

◎又彼二十三種缺乏順緣中，有二十一種屬於師資觀待成過，或反上說，如弟子懶惰，師長欲樂增上等，亦成過失。

(01) 爾時，具壽善現便白佛言：「世尊所說住菩薩乘善男子等修善法時有諸魔事，云何名為菩薩魔事？」

《01》修加行時，長時勤勞乃能得知，由此疲厭；

《02》又修加行時，速得辯才，由此憍逸。

(2a) 《01》，《02》佛告善現：「若諸菩薩欲說法要，辯久乃生，菩薩當知是為魔事；或說法要，辯乃卒生，菩薩當知是為魔事；或說法要，辯過量生，菩薩當知是為魔事；或所欲說，未盡便止，菩薩當知是為魔事；或說法要，言詞亂雜，菩薩當知是為魔事；或說法要，言詞間斷，菩薩當知是為魔事；或說法時，諸橫事起，令所欲說，不遂本心，菩薩當知是為魔事。」

《03》又修加行時，頻申欠喏、無端戲笑等，由身粗重令心散亂；

《04》又修加行時，由心粗重，令心散亂；

《05》又修加行時，非理發起持誦等事。

(2b) 《03-05》復次，善現！若諸菩薩於深般若波羅蜜多相應經典書寫等時，或頻申欠喏，或更相嗤笑，或互相輕凌，或身心躁

擾，或失念散亂，或文句顛倒，或迷惑義理，或不得滋味，心生厭捨，或橫事卒起，或互相乖諍，由斯等事，所作不成，菩薩當知是為魔事。

《O6》又修加行時，執取推轉般若之因。

(2c) 《O6》復次，善現！若諸菩薩聞說般若波羅蜜多相應經時，或作是念：『我於此中不得受記，何用聽為？』或作是念：『此中不說我等名字，何用聽為？』或作是念：『此中不說我等生處城邑聚落，何用聽為？』由此等緣，心不清淨，即從座起，厭捨而去，無顧戀心，菩薩當知是為魔事。

《O7》又修加行時，於得一切相智之因甚深般若等，退失信心。

(2d) 《O7》善現當知！若諸菩薩聞說般若波羅蜜多相應經時，心不清淨，厭捨去者，隨彼所起不清淨心，厭捨此經，舉步多少，便減爾所劫數功德，獲爾所劫障菩提罪，受彼罪已，更爾所時，發勤精進，修菩薩行，方可復本，是故名為菩薩魔事。

《O8》又修加行時，棄捨甚深般若，趣小乘道，退失妙味。

(2e) 《O8》復次，善現！若諸菩薩棄捨能引一切智智甚深般若波羅蜜多相應經典，學不能引一切智智隨順二乘諸餘經典，棄捨根本，而攀枝葉，菩薩當知是為魔事。何以故？甚深般若波羅蜜多相應經典能生菩薩世出世間殊勝功德，由斯能引一切智智。若學般若波羅蜜多相應經典，即學菩薩世出世間殊勝功德，速能引發一切智智。

《O9》又修加行時，於二乘法尋求一切相智，退失攝持大乘。

(2f) 《O9》善現當知！如癡餓狗，棄捨主食，反從僕使而求覓之，如是當來有諸菩薩棄深般若波羅蜜多，求學二乘相應經典，是愚癡類，棄本求末，終不能得一切智智。

(2g) 復次，善現！譬如有人，欲觀香象身量大小，形類勝劣，得而不觀，反尋其跡，當知彼類甚為愚癡。如是當來有諸菩薩棄深般若波羅蜜多，求學二乘相應經典，是愚癡類，棄本尋末，終不能得一切智智。

《O10》又修加行時，棄捨所得般若，而於二乘法尋求一切相智，退失所為。

(2h) 《O10》復次，善現！譬如有人，為珍寶故，求趣大海，既至海岸，不入大海，反觀牛跡，作是念言：『大海中水，其量深廣，豈及此耶？此中亦應有諸珍寶。』當知彼類甚為愚癡。如是當來有諸菩薩棄深般若波羅蜜多，求學二乘相應經典，是愚癡類，棄本求末，終不能得一切智智。

《O11》又修加行時，唯修二乘法便欲得一切相智，退失隨順因果。

(2i) 《O11》復次，善現！如有工匠或彼弟子，欲造大殿如天帝釋殊勝殿量，見彼殿已，而反規模日月宮殿，當知彼類甚為愚癡。如是當來有諸菩薩棄深般若波羅蜜多，求學二乘相應經典，是愚癡類，棄大求小，終不能得一切智智。

《O12》又修加行時，執大乘法同二乘法，退失無上三身之因

(2j) 《O12》復次，善現！如有欲見轉輪聖王，見已不識，捨至餘處，見小國王，觀其形相，作如是念：『轉輪聖王形相威德豈勝於此？』當知彼類甚為愚癡。如是當來有諸菩薩棄深般若波羅蜜多，求學二乘相應經典，是愚癡類，棄勝求劣，終不能得一切智智。

(2k) 復次，善現！如有飢人，得百味美食，棄而求噉六十日穀飯，當知彼類甚為愚癡。如是當來有諸菩薩棄深般若波羅蜜多，求學二乘相應經典，是愚癡類，棄勝求劣，終不能得一切智智。

(2l) 復次，善現！如有貧人，得無價寶，棄而翻取迦遮末尼，當知彼類甚為愚癡。如是當來有諸菩薩棄深般若波羅蜜多，求學二乘相應經典，是愚癡類，捨勝取劣，終不能得一切智智。

《O13》又修加行時，於色聲等眾多欲塵，起下劣尋伺辯才

(2m) 《O13》復次，善現！有諸菩薩，若正書寫、受持、讀誦、思惟、修習甚深般若波羅蜜多相應經時，眾辯卒起，樂說種種差別法門，令書寫等不得究竟，菩薩當知是為魔事。」

(03) 爾時，善現便白佛言：「甚深般若波羅蜜多可書寫不？」

《O14》又修加行時，棄捨義理，唯著書寫為般若波羅蜜多；

《O15》又修加行時，執著無性為真實義；

《O16》又修加行時，執著文字為般若波羅蜜多；

《O17》又修加行時，執無文字為般若波羅蜜多。

(4a) 《O14-O17》世尊告曰：「不也，善現！若菩薩乘善男子等，書寫般若波羅蜜多相應經時，作如是念：『我以文字書寫般若波羅蜜多，如是文字即是般若波羅蜜多。』或依文字執有般若波羅蜜多，菩薩當知是為魔事。爾時，應誡彼菩薩言：『汝今不應執有文字能書般若波羅蜜多，若作是執，是為魔事；若捨此執，便捨魔事。』」

《O18》又修加行時，貪著境界，作意國土等

(4b) 《O18》復次，善現！若諸菩薩書寫、受持、讀誦、修習、思惟、演說甚深般若波羅蜜多相應經時，或念國土、城邑、王都、方處、師友，或念父母、妻子、眷屬、伴侶、王臣，或念盜賊、諸惡禽獸、惡人、惡鬼，或念眾集、伎樂、遊戲、報恩、報怨，或念飯食、衣服、臥具及餘資財，或念製造文頌書論，或念時節寒熱豐儉，或念象、馬、水、火等事，或念諸餘所作事業，菩薩當知皆是魔事。

《O19》又修加行時，味著利養、恭敬、稱譽。

(4c) 《O19》復次，善現！若諸菩薩書寫、受持、讀誦、修習、思惟、演說甚深般若波羅蜜多相應經時，得大名利，恭敬供養，彼由此緣，廢所作業，菩薩當知是為魔事。

《O20》又修加行時，棄捨佛道，於魔法中尋求善巧方便。

(4d) 《O20》復次，善現！若諸菩薩書寫、受持、讀誦、修習、思惟、演說甚深般若波羅蜜多相應經時，惡魔方便執持種種世俗書論，或復二乘相應經典，授與菩薩，作如是言：『如是書典，義味深奧，應勤修學，捨所習經。』若此菩薩方便善巧，不應受著，彼不能引一切智智。若此菩薩受著惡魔所授書典，捨所習經，菩薩當知是為魔事。

《O21》修加行時，聞者欲樂增上，說者懶惰增上，不能和合，退失法行；

- 《022》又聞者欲於此方聽聞，說者欲往他方講說；
- 《023》又聞者少欲，說者大欲；
- 《024》又聞者具足杜多功德，說者不具杜多功德；
- 《025》又聞者勤修善業，說者勤作不善業；
- 《026》又聞者廣大好施，說者上品慳吝；
- 《027》又聞者欲施，說者不受；
- 《028》又聞者略說便領，說者廣演乃知；
- 《029》又聞者欲知三藏十二分教，說者不知；
- 《030》又聞者成就六度，說者不具六度；
- 《031》又聞者於大乘法有方便善巧，說者無方便善巧；
- 《032》又聞者已得陀羅尼，說者未得陀羅尼；
- 《033》又聞者欲得書寫，說者不欲書寫；
- 《034》又聞者遠離五蓋，說者未離五蓋，不能和合退失法行
- (4e) 《O21-O34》復次，善現！能聽法者樂聞般若波羅蜜多；能說法者著樂懈怠，不欲為說。
或上相違，兩不和合，不獲說受，菩薩當知是為魔事。
- (4f) 復次，善現！能聽法者具念慧力，樂聞般若波羅蜜多；能說法者欲往他方，不獲為說。
或上相違，兩不和合，不獲說受，菩薩當知是為魔事。
- (4g) 復次，善現！能說法者愛重名利；能聽法者不欲惠施。
或上相違，兩不和合，不獲說受，菩薩當知是為魔事。
- (4h) 復次，善現！能聽法者有信樂心，欲聞般若波羅蜜多；能說法者習誦不利，不能為說。
或能說者習誦通利，樂為他說；能聽法者疑不通利，不欲聽受。
兩不和合，不獲說聽，菩薩當知是為魔事。
- (4i) 復次，善現！能說法者樂為他說甚深般若波羅蜜多；能聽法者不欲聽受。
或上相違，兩不和合，不獲說聽，菩薩當知是為魔事。
- (4j) 復次，善現！能聽法者樂聞般若波羅蜜多；能說法者身重疲極，睡眠所覆，不能為說。
或上相違，兩不和合，不獲說聽，菩薩當知是為魔事。
- 《O35》又聞毀說地獄等諸苦，深生怖畏，背棄利他而不往惡趣
- 《O36》又聞讚說天趣等安樂，貪愛善趣，退失大乘

(4k) 《O35》復次，善現！若諸菩薩書寫、受持、讀誦、修習、思惟、演說甚深般若波羅蜜多相應經時，或有人來說三惡趣種種苦事，勸捨菩提；

《O36》或有人來說人天趣種種樂事皆是無常、苦、空、非我，勸入圓寂。彼由此言，書寫等事，不得究竟，心懷愁惱，菩薩當知是為魔事。

《O37》又修加行時，說者欲獨處遠離，聞者好領徒眾，不能和合退失法行；

《O38》又聞者欲隨行，說者不許；

《O39》又說者為名利故而為說法，聞者不施；

《O40》又說者欲往有命難處，聞者不欲隨往；

《O41》又說者欲往饑饉難處，聞者不欲隨往；

《O42》又說者欲往多諸盜賊、兵亂等處，聞者不欲隨往；

《O43》又說者數數顧施主家，歡喜散亂，聞者不樂，兩不和合退失法行。

(4l) 《O37-O43》復次，善現！能說法者好領徒眾，樂營他事，不憂自業；能聽法者一身無累，專修己事，不憂他業。

或上相違，兩不和合，不獲說聽，菩薩當知是為魔事。

(4m) 復次，善現！能說法者樂處喧雜；能聽法者不樂喧雜。

或上相違，兩不和合，不獲說聽，菩薩當知是為魔事。

(4n) 復次，善現！能說法者欲往他方危身命處；能聽法者恐失身命，不欲共往。

或上相違，兩不和合，不獲說聽，菩薩當知是為魔事。

(4o) 復次，善現！能說法者欲往他方多賊、疾疫、飢渴國土；能聽法者慮彼艱辛，不肯共往。

或上相違，兩不和合，不獲說聽，菩薩當知是為魔事。

(4p) 復次，善現！能說法者欲往他方，所經道路，曠野險阻，多諸賊難及梅毒、惡獸、獵師、毒蛇等怖；能聽法者欲隨其去，能說法者方便試言：『汝今何故無事隨我欲往如是諸險難處？宜善審思，勿後憂悔。』能聽法者聞已，念言：『師應不欲令我隨往，設固隨往，何必聞法？』由此因緣，不隨其去。兩不和合，不獲說聽，菩薩當知是為魔事。

(4q) 復次，善現！能說法者多有施主數相追隨，聽法者來請說般若

波羅蜜多，或請書寫，受持讀誦，如說修行，彼多緣礙，無暇教授；能聽法者起嫌恨心，後雖教授，而不聽受。兩不和合，不獲教授、聽受、書持、讀誦、修習甚深般若波羅蜜多，菩薩當知是為魔事。

《O44》修加行時，有諸惡魔作比丘形，離間人、法，方便破壞。

- (4r) 《O44》復次，善現！有諸惡魔作種種形，至菩薩所方便破壞，令於般若波羅蜜多相應經典不得書寫、受持、讀誦、修習、思惟、為他演說。是故，善現！住菩薩乘善男子等，於深般若波羅蜜多書寫等時所有障礙，菩薩當知皆是魔事。」
- (05) 具壽善現便白佛言：「何緣惡魔作諸形像，至菩薩所方便破壞，令於般若波羅蜜多相應經典不得書寫乃至演說？」
- (06) 佛告善現：「甚深般若波羅蜜多能生如來一切智智，如來所有一切智智能生佛教，佛教能生有情妙慧，有情妙慧能證無邊諸煩惱斷，煩惱斷者，一切惡魔不得其便，彼諸惡魔不得便故，多生憂苦，如箭入心，勿我由斯甚深般若波羅蜜多境界空缺。是故惡魔作諸形像，至菩薩所方便破壞，令於般若波羅蜜多相應經典不得書寫乃至演說。」
- (07) 具壽善現復白佛言：「云何惡魔作諸形像，至菩薩所方便破壞？」

《O45》又魔說偽假般若波羅蜜多。

- (8a) 《O45》佛告善現：「有諸惡魔作種種形，至菩薩所方便破壞，令其毀厭甚深般若波羅蜜多，謂作是言：『汝所習誦無相經典，非真般若波羅蜜多，我所習誦有相經典，是真般若波羅蜜多。』作是語時，有諸菩薩未得受記，便於般若波羅蜜多甚深經典心生疑惑；由疑惑故，便於般若波羅蜜多而生毀厭；由毀厭故，遂不書寫乃至演說，菩薩當知是為魔事。」

《O46》又有諸惡魔作佛形像，亂菩薩心，令於非實發生愛樂。

- (8b) 《O46》復次，善現！有諸惡魔作種種形，至菩薩所，謂菩薩曰：『諸菩薩眾行深般若波羅蜜多，唯證實際得聲聞果，或能證得獨覺菩提，決定不能證得佛果，何緣於此唐設劬勞？』菩薩當知是為魔事。

真如品第十二

- (8c) 復次，善現！甚深般若波羅蜜多書寫等時，多諸魔事為作留難，菩薩應覺，覺已，精勤正念正知，方便遠離。」
- (09) 爾時，善現便白佛言：「如是，世尊！如是，善逝！甚深般若波羅蜜多書寫等時，多諸留難。譬如無價大寶神珠，難得具能，多諸怨賊。如是般若波羅蜜多理趣甚深，具勝功德，諸菩薩眾書寫等時，多有惡魔為作留難，雖有樂欲，而不能成。所以者何？有愚癡者為魔所魅，新學大乘善男子等，於深般若波羅蜜多書寫等時，為作留難。」
- (10a) 佛告善現：「如是！如是！有愚癡者，福慧薄劣，於廣大法，心不信樂，新學大乘善男子等，於深般若波羅蜜多書寫等時，為作留難。於當來世有愚癡者，福慧薄劣，自於般若波羅蜜多不能信樂，見他於彼書寫等時，承魔威力，為作障礙，當知彼類獲罪無邊，多劫輪迴，受諸劇苦。」
- (10b) 復次，善現！若諸菩薩於深般若波羅蜜多書寫等時，無魔事者，當知皆是佛威神力。所以者何？惡魔眷屬雖勤方便欲障般若波羅蜜多，而諸如來應正等覺亦勤方便護念攝受，令書寫等，無諸留難。
- (10c) 復次，善現！譬如女人，多有諸子，或五或十，乃至百千，其母得病，諸子各別勤求醫藥，咸作是念：『云何令我母病除愈，令無障礙，身名不滅，久住安樂，苦受不生，諸妙樂具咸歸我母？所以者何？生育我等，示世間事，甚大艱辛。』作是念已，競設方便，求安隱事，覆護母身，勿為蚊虻、蛇蠍、風雨、人非人等，非愛所觸，勤加修飾，令離眾病，六根清淨，無諸憂苦。復以種種上妙樂具供養恭敬，而作是言：『我母慈悲生育我等，誨示一切世間事業，我等豈得不報母恩？』如是如來應正等覺常以種種善巧方便護念般若波羅蜜多。若有受持、讀誦、修習、思惟、演說或書寫者，如來亦以種種方便，勤加護念，令無損惱。

【第 35 義】：道般若波羅蜜多 (IV-5)

由何相當知，即性相分三，謂智、勝、作用，自性亦所相。

◎由何能相而相加行自性，當知即是加行之性相。此說性相有三種，謂：

1 能相三智加行之「智相」；

2 能相勝出聲聞、獨覺加行之「勝相」；

3 能相具足殊勝利他作用加行之「作用相」。

○所有十六種加行自性，亦能相加行故，亦名〔自性相〕。

◎又性相之梵語為「盧札」，通於能作及作業：

前三種性相，是就能作而立，以能表相菩薩三智加行故。

後一性相，是就作業而立，以彼十六自性是所相事故。

一、[智相]

[一切智加行相]

《P1》知如來出現，《P2》世界無壞性，《P3》有情諸心行，
《P4》心略及《P5》外散。《P6》知無盡行相，
《P7》有貪等及《P8》無，《P9》廣《P10》大《P11》無量心，
《P12》識無見無對。《P13》及心不可見，《P14》了知心出等，
《P15》除此等所餘，知真如行相。《P16》能仁證真如，復為他開示，
是攝一切智，品中諸智相。

○一切智加行有十六相，謂：

◎《P1》由修一切智加行為依，知如來出現世間。

(10d) 《P1》十方現在餘世界中，一切如來應正等覺哀愍利樂諸有情者，亦以種種善巧方便護念般若波羅蜜多，令諸惡魔不能毀滅，久住利樂一切世間。所以者何？甚深般若波羅蜜多能生如來應正等覺，能正顯了一切智智，能示世間諸法實相，一切智智亦從彼生。

(10e) 善現當知！三世諸佛皆依如是甚深般若波羅蜜多精勤修學，證得無上正等菩提。是故般若波羅蜜多能生如來應正等覺，能正顯了一切智智，能示世間諸法實相。」

◎《P2》通達世間勝義無壞慧所攝智。

(11) 《P2》爾時，善現便白佛言：「云何般若波羅蜜多能示世間諸法實相，佛說何法名為世間？」

(12a) 佛告善現：「佛說五蘊，名為世間。甚深般若波羅蜜多能示世間色等五蘊無變壞相，故說般若波羅蜜多能示世間諸法實相。所以者何？色等五蘊無自性故，說名為空、無相、無願，即真法界非空等法可有變壞，故說般若波羅蜜多能示世間諸

法實相。

◎《P3》了知眾生無量心行。

(12b)《P3》復次，善現！一切如來應正等覺皆依般若波羅蜜多普能證知無量無數無邊有情施設心行種種差別，故說般若波羅蜜多能示世間諸法實相。

◎《P4》於補特伽羅無我知心攝略。

◎《P5》於彼知心外散。

◎《P6》猶如虛空知心無盡相。

◎《P7》又知心有貪等，「等」取有瞋、有癡。

◎《P8》又知無貪無瞋無癡等。

◎《P9》又知心行廣大。

◎《P10》又知於名言中大心。

◎《P11》又知於勝義無量心。

◎《P12》知心於眼識等無見無對。

◎《P13》知以五眼心不可見。

(12c)《P4-13》復次，善現！一切如來應正等覺皆依般若波羅蜜多如實證知無量無數無邊有情所有散心，由法性故，無散心性。所有略心，盡故、離故，無略心性。諸有貪心，由如實性，非有貪心。諸有瞋心，由如實性，非有瞋心。諸有癡心，由如實性，非有癡心。諸離貪心，離中非有。諸離瞋心，離中非有。諸離癡心，離中非有。所有廣心，無增無減，亦非遠離，已遠離故，無廣心性。所有大心，無來無去，亦無所住，無大心性。諸無量心，無生無滅，無住無異，無所依止，如太虛空，非無量心。諸無見心，無相可得故，離種種境故，非無見心。不可見心，非三眼境故，無心性故，非不可見心。由此等義，故說般若波羅蜜多能示世間諸法實相。

◎《P14》又知心出等，「等」取沒、屈、申，皆依蘊起，皆是補特伽羅無我。

○又出、沒、屈、申四心，即十四種不可記見，十四見者：

a 依前際有四，謂執我及世間，是常、是無常、二俱、二非。

b 依後際有四，謂執我及世間，有邊、無邊、二俱、二非。

c 依涅槃有四，謂執如來死後，有、非有、二俱、二非。

d 依身命有二，謂執命者即身、命者異身。

其中：

- (1) 執我及世間是常、是無邊，如來死後有者，名出心，以此執著是於境轉趣相故，如數論外道之見。
- (2) 其執我及世間無常、有邊，如來死後非有者，名沒心，以此執著是於境遮止相故，如斷見外道之見。
- (3) 其執我及世間亦常亦無常，亦有邊亦無邊，如來死後亦有亦無者，名申心，以此執著於進退二相平等轉故，如無慚外道之見。
- (4) 其執我及世間非常非無常，非有邊非無邊，如來死後非有非非有者，名屈心，以彼執著，於進退二相俱遮止故，如犢子部見。
- (5) 其執命者即身，如勝論師；執命者異身，如數論師，亦是出心，以彼執著是於境進趣相故。

○又彼十四見皆可收為出沒二心：

a 於境轉趣者即出心；b 退縮者即沒心故。

(12d) 《P14》復次，善現！一切如來應正等覺皆依般若波羅蜜多，如實證知無量無數無邊有情若出若沒，謂如實知彼有情類心、心所法若出、若沒，皆依色受想行識生。謂諸有情心、心所法，或有依色受想行識，執如來死後或有或非有、或亦有亦非有、或非有非非有，此是諦實，餘皆愚妄。或有依色受想行識，執我及世間或常或無常、或亦常亦無常、或非常非無常，此是諦實，餘皆愚妄。或有依色受想行識，執我及世間或有邊或無邊、或亦有邊亦無邊、或非有邊非無邊，此是諦實，餘皆愚妄。或有依色受想行識，執命者即身或復異身，此是諦實，餘皆愚妄。如是，善現！一切如來應正等覺皆依般若波羅蜜多，如實證知無量無數無邊有情若出若沒。

◎《P15》又知除此人無我相而知其餘出、沒心等真實空之真如相。

(12e) 《P15》復次，善現！一切如來應正等覺皆依般若波羅蜜多，如實證知無量無數無邊有情若出若沒，謂如實知諸所有色受想行識，皆如真如，無二無別。

善現當知！如來真如即五蘊真如，五蘊真如即世間真如，世

間真如即一切法真如，一切法真如即預流果真如，預流果真如即一來果真如，一來果真如即不還果真如，不還果真如即阿羅漢果真如，阿羅漢果真如即獨覺菩提真如，獨覺菩提真如即一切菩薩摩訶薩行真如，一切菩薩摩訶薩行真如即諸佛無上正等菩提真如，諸佛無上正等菩提真如即一切如來應正等覺真如，一切如來應正等覺真如即一切有情真如。

善現當知！如是真如，皆不相離，非一非異，無盡無二，亦無二分，不可分別。

- (12f) 善現當知！一切如來應正等覺皆依般若波羅蜜多，證一切法真如究竟，方得無上正等菩提，由斯故說甚深般若波羅蜜多能生如來應正等覺，是如來母，能示如來應正等覺世間實相。善現當知！一切如來應正等覺皆依般若波羅蜜多，能如實覺諸法真如不虛妄性、不變異性。由如實覺真如相故，說名如來、應、正等覺。」

◎ 《P16》又知能仁自證彼真如復為他開示建立。

——如是十六種菩薩智，當知皆攝為一切智品中之智相。

- (13) 《P16》具壽善現便白佛言：「甚深般若波羅蜜多所證真如不虛妄性、不變異性，極為甚深，難見難覺。一切如來應正等覺，皆用如是諸法真如不虛妄性、不變異性，宣說、開示、分別、顯了一切菩薩摩訶薩行、諸佛無上正等菩提。如是真如不虛妄性、不變異性，誰能信解？唯有不退轉菩薩摩訶薩及諸願滿大阿羅漢，并具正見善男子等，聞佛說此甚深真如不虛妄性、不變異性，能生信解，如來為彼依自所證真如之相顯示分別。」
- (14a) 佛告善現：「如是！如是！所以者何？真如無盡，是故甚深。唯有如來現等正覺無盡真如甚深之相，為諸菩薩摩訶薩眾宣說開示，令生信解。」
- (14b) 善現當知！色無盡故，真如無盡，色甚深故，真如甚深，色與真如無差別故；受想行識無盡故，真如無盡，受想行識甚深故，真如甚深，受想行識與真如無差別故。
- (14c) 善現當知！眼處無盡故，真如無盡，眼處甚深故，真如甚深，眼處與真如無差別故；耳鼻舌身意處無盡故，真如無盡，耳鼻舌身意處甚深故，真如甚深，耳鼻舌身意處與真如無差別

故。

- (14d) 善現當知！色處無盡故，真如無盡，色處甚深故，真如甚深，色處與真如無差別故；聲香味觸法處無盡故，真如無盡，聲香味觸法處甚深故，真如甚深，聲香味觸法處與真如無差別故。
- (14e) 善現當知！眼界無盡故，真如無盡，眼界甚深故，真如甚深，眼界與真如無差別故；耳鼻舌身意界無盡故，真如無盡，耳鼻舌身意界甚深故，真如甚深，耳鼻舌身意界與真如無差別故。
- (14f) 善現當知！色界無盡故，真如無盡，色界甚深故，真如甚深，色界與真如無差別故；聲香味觸法界無盡故，真如無盡，聲香味觸法界甚深故，真如甚深，聲香味觸法界與真如無差別故。
- (14g) 善現當知！眼識界無盡故，真如無盡，眼識界甚深故，真如甚深，眼識界與真如無差別故；耳鼻舌身意識界無盡故，真如無盡，耳鼻舌身意識界甚深故，真如甚深，耳鼻舌身意識界與真如無差別故。
- 善現當知！一切法無盡故，真如無盡，一切法甚深故，真如甚深，一切法與真如無差別故，是故真如極難信解。」

大般若波羅蜜多經卷第五百六十一

甚深相品第十三

[道相智加行相]

《Q1》空性及《Q2》無相，并《Q3》捨棄諸願，
《Q4》無生《Q5-11》無滅等，《Q12》法性無破壞。
《Q13》無作《Q14》無分別，《Q15》差別《Q16》無性相，
道相智品中，許為諸智相。

○此加行相有十六種，謂：

- ◎《Q1》依道相智加行般若波羅蜜多，了知空性。
- ◎《Q2》了知無相。
- ◎《Q3》了知無願。
- ◎《Q4》了知勝義無生。
- ◎《Q5》了知勝義無滅。

- ◎ 《Q6》了知勝義無染。
- ◎ 《Q7》了知勝義無淨。
- ◎ 《Q8》了知勝義無所取性。
- ◎ 《Q9》了知勝義無自體性。
- ◎ 《Q10》了知勝義無所依。
- ◎ 《Q11》了知勝義如虛空相。

- (01) 爾時，欲界十千天子，天主帝釋而為上首，復有梵世二萬天子，大梵天王而為上首，俱詣佛所，頂禮雙足，卻住一面，同白佛言：「世尊所說諸甚深法，以何為相？」
- (02) 《Q1-11》爾時，佛告諸天眾言：「我所宣說諸甚深法，以空、無相、無願、無作、無生、無滅、無所依止、無性為相。」
- (3a) 時諸天眾復白佛言：「佛所說法，無所依止，譬如虛空，不可表示。」

- ◎ 《Q12》又依彼加行，了知法性勝義無破壞相。
- ◎ 《Q13》了知於勝義中以覺為先無造作性。
- ◎ 《Q14》了知勝義無分別。
- ◎ 《Q15》了知能相所相等差別勝義非有。
- ◎ 《Q16》又依道相智加行般若波羅蜜多，了知於勝義中無性相。

——許此即是道相智品中諸智相故。

- (3b) 《Q12-16》如來所說甚深法相，世間天人、阿素洛等，不能安立，亦不能壞。何以故？世間天人、阿素洛等，皆是相故。諸有相者，於無相相不能安立，亦不能壞。如來所說甚深法相，不墮色數，亦不墮受想行識數，亦復不墮人非人數，人非人等，不能成壞。」
- (04) 爾時，佛告諸天眾言：「設有人來，作如是問：『虛空誰作？誰能壞耶？』汝謂彼人為正問不？」
- (05) 諸天眾曰：「不也，世尊！所以者何？虛空無體、無為、無相，寧可問言有成壞者。」
- (06) 爾時，佛告諸天眾言：「如是！如是！如汝所說。天眾當知！我所宣說甚深法相亦復如是，不可安立，不可破壞。有佛無佛，法爾常住，佛於此相如實覺知，故名如來應正等覺。」
- (07) 時諸天眾復白佛言：「如來所覺如是諸相，極為甚深，難見難覺，如來現覺如是相故，於一切法智無滯礙。一切如來應正

等覺住如是相，分別開示甚深般若波羅蜜多，為諸有情集諸法相，方便開示，令於般若波羅蜜多得無礙智。甚深般若波羅蜜多是諸如來常所行處，佛行是處，證薩婆若，為諸有情分別開示。」

(08) 爾時，佛告諸天眾言：「如是！如是！如汝所說。天眾當知！一切法相如來如實覺為無相，由此因緣，我說諸佛得無礙智，無能及者。」

[一切相智加行相]

《R1》依真如法住，《R2》恭敬善知識，《R3》尊重及《R4》承事，《R5》供養《R6》無作用。及《R7》了知遍行，《R8》能示現無見，《R9》世間真空相，《R10》說《R11》知及《R12》現見。

《R13》不思議《R14》寂靜，《R15》世間滅《R16》想滅，一切相智中，是說諸智相。

◎此相亦有十六種，謂：

◎《R1》由依止一切相智加行，了知如來依真如法現法樂住。

◎《R2》了知恭敬善知識。

◎《R3》了知尊重善知識不違師教。

◎《R4》了知承事善知識令師歡喜。

◎《R5》了知以香花等供養善知識。

(09) 《R1-5》爾時，世尊告善現曰：「甚深般若波羅蜜多是諸佛母，能示世間諸法實相，是故諸佛依法而住，供養恭敬，尊重、讚歎，攝受護持所依住法，此法即是甚深般若波羅蜜多。一切如來應正等覺無不依止甚深般若波羅蜜多供養恭敬，尊重、讚歎，攝受護持。所以者何？甚深般若波羅蜜多能生諸佛，能與諸佛作依止處，能示世間諸法實相。復次，善現！一切如來應正等覺是知恩者、能報恩者，若有問言：『誰是知恩能報恩者？』應正答言：『佛是知恩能報恩者。』何以故？一切世間知恩報恩無過佛故。」

(10) 具壽善現便白佛言：「云何如來應正等覺知恩報恩？」

(11a) 佛告善現：「一切如來應正等覺乘如是乘，行如是道，來至無上正等菩提，得菩提已，於一切時供養恭敬，尊重、讚歎，攝受護持是乘是道，無時暫廢，此乘此道，當知即是甚深般若波羅蜜多，是名如來應正等覺知恩報恩。」

◎ 《R6》了知勝義無作用。

(11b) 《R6》復次，善現！一切如來應正等覺無不皆依甚深般若波羅蜜多覺一切法無實作用，以能作者無所有故。一切如來應正等覺無不皆依甚深般若波羅蜜多覺一切法無所成辦，以諸形質不可得故。善現當知！以諸如來應正等覺知依如是甚深般若波羅蜜多覺一切法皆無作用，無所成辦，於一切時供養恭敬，尊重、讚歎，攝受護持，曾無間斷，故名真實知恩報恩。

◎ 《R7》了知遍行一切所知。

(11c) 《R7》復次，善現！一切如來應正等覺無不皆依甚深般若波羅蜜多於一切法無作無成，無生智轉，復能知此無轉因緣，是故應知甚深般若波羅蜜多能生如來應正等覺，亦能如實示世間相。」

◎ 《R8》了知於勝義中示現真實義全無所見。

(12) 《R8》爾時，善現便白佛言：「如來常說一切法性無生無起，無知無見，如何可說甚深般若波羅蜜多能生如來應正等覺，亦能如實示世間相？」

(13) 佛告善現：「如是！如是！如汝所說。一切法性無生無起，無知無見，云何法性無生無起，無知無見？以一切法空無所有，無所依止，無所繫屬，由此因緣，無生無起，無知無見。善現當知！甚深般若波羅蜜多雖能生佛，示世間相，而無所生，亦無所示。善現當知！甚深般若波羅蜜多不見色受想行識故，名示色受想行識相。」

(14) 具壽善現便白佛言：「云何般若波羅蜜多不見色受想行識故，名示色受想行識相？」

(15a) 佛告善現：「由此般若波羅蜜多不緣諸色受想行識而起於識，名不見色受想行識，由不見故，名示色受想行識相。由如是義，甚深般若波羅蜜多能示世間諸法實相。」

◎ 《R9》了知世間空相。

◎ 《R10》了知宣說世間空性。

◎ 《R11》了知證知世間空性。

- ◎ 《R12》了知現見世間空性。
- ◎ 《R13》了知顯示諸法法性無分別心不可思議。
- ◎ 《R14》了知顯示於勝義中戲論寂靜。
- ◎ 《R15》了知世間滅真實有。
- ◎ 《R16》又依彼加行，了知滅除此世他世取捨異想。
——當知即是一切相智品中諸智相故。

(15b) 《R9-16》復次，善現！甚深般若波羅蜜多能示如來應正等覺世間空故、離、淨、寂故，說名能示世間實相，以諸世間無不皆以空、離、淨、寂為實相故。」

二、[勝相]

由難思等別，勝進諦行境，十六剎那心，說名殊勝相：

- 《S1》不思議《S2》無等，《S3》超越諸量《S4》數，
- 《S5》攝聖《S6》智者了，《S7》證知諸不共。
- 《S8》通疾《S9》無增減，《S10》修行及《S11》正行，
- 《S12》所緣與《S13》所依，《S14》一切并《S15》攝受。
- 《S16》及無味當知，十六殊勝性，由此勝餘道，故名殊勝道。

○由四諦等法性不思議等差別，勝出聲聞、獨覺所有加行，以如是勝進四諦為行境之見道忍智十六剎那最超勝故說名殊勝相。

○此說見道者僅是一例，若就通達不思議等十六種勝法而論，則從資糧道通最後心。

- ◎ 《S1》外增上緣由諸佛菩薩攝受智慧力故，了知苦等法性不可思議。
- ◎ 《S2》無事能喻，名為無等。
- ◎ 《S3》超過諸名言量所能稱量。
- ◎ 《S4》知彼法性超出數量。

(16) 《S1》-《S4》爾時，善現便白佛言：「甚深般若波羅蜜多為大事故出現世間，為不可思議事故、不可稱量事故、無數量事故、無等等事故出現世間。」

(17) 佛告善現：「如是！如是！如汝所說。善現！云何甚深般若波羅蜜多為大事故出現世間？謂諸如來應正等覺皆以濟拔一切有情無時暫捨而為大事，甚深般若波羅蜜多為此事故出現世間。善現！云何甚深般若波羅蜜多為不可思議事故、不可稱量事故、無數量事故、無等等事故出現世間？謂諸如來應正

等覺所有佛性、如來性、自然覺性、一切智性，皆不可思議、不可稱量、無數量、無等等，甚深般若波羅蜜多為此事故出現世間。」

- (18) 具壽善現復白佛言：「為但如來應正等覺所有佛性、如來性、自然覺性、一切智性不可思議、不可稱量、無數量、無等等？為色受想行識乃至一切法亦不可思議、不可稱量、無數量、無等等？」
- (19) 佛告善現：「非但如來應正等覺所有佛性、如來性、自然覺性、一切智性不可思議、不可稱量、無數量、無等等，色受想行識乃至一切法亦不可思議、不可稱量、無數量、無等等。所以者何？於一切法真實性中，心及心所皆不可得。善現當知！諸所有色受想行識及一切法皆不可施設故，不可思議、不可稱量、無數量、無等等。何以故？如是諸法無自性故、不可得故、自性空故。復次，善現！諸所有色受想行識及一切法皆不可得故，不可思議、不可稱量、無數量、無等等。何以故？如是諸法無限量故、無所有故、自性空故。復次，善現！諸所有色受想行識及一切法皆無限量故，不可思議、不可稱量、無數量、無等等。」
- (20) 具壽善現便白佛言：「何因緣故，諸所有色受想行識及一切法皆無限量？」
- (21) 佛告善現：「於意云何？虛空為有心、心所法能限量不？」
- (22) 善現對曰：「不也，世尊！」
- (23a) 佛告善現：「諸所有色受想行識及一切法亦復如是，自性空故，心、心所法不能限量。由此因緣，諸所有色受想行識及一切法無限量故，皆不可思議、不可稱量、無數量、無等等。善現當知！以一切法皆不可思議、不可稱量、無數量、無等等故，一切如來應正等覺所有佛法、如來法、自然覺法、一切智法亦不可思議、不可稱量、無數量、無等等。」
- (23b) 善現當知！如是諸法皆不可思議，思議滅故；不可稱量，稱量滅故；無數量，數量滅故；無等等，等等滅故。善現當知！如是諸法皆不可思議，過思議故；不可稱量，過稱量故；無數量，過數量故；無等等，過等等故。善現當知！不可思議、不可稱量、無數量、無等等者，但有增語，都無真實。善現當知！不可思議、不可稱量、無數量、無等等者，皆如虛空，

都無所有。由此因緣，一切如來應正等覺所有佛法、如來法、自然覺法、一切智法皆不可思議、不可稱量、無數量、無等等，聲聞、獨覺、世間天人、阿素洛等，皆悉不能思議、稱量、數量、等等此諸法故。」

- (24) 如來說此不可思議、不可稱量、無數量、無等等法時，會中有五百苾芻、二十苾芻尼諸漏永盡，心得解脫；復有六萬鄔波索迦、三萬鄔波斯迦於諸法中遠塵離垢，生淨法眼；復有二十菩薩摩訶薩得無生法忍，世尊記彼於賢劫中當得作佛，度有情眾。

◎《S5》總攝一切聖者功德。

- (25) 《S5》爾時，善現復白佛言：「甚深般若波羅蜜多實為大事出世間不？」
- (26) 佛告善現：「如是！如是！甚深般若波羅蜜多實為大事出於世間。所以者何？甚深般若波羅蜜多具能成辦一切智地，若聲聞地、若獨覺地皆在此攝。善現當知！如剎帝利灌頂大王，威德自在，降伏一切，以諸國事付囑大臣，端拱無為，安隱受樂。如來亦爾，為大法王，威德自在，降伏一切，以諸佛法、若獨覺法、若聲聞法，悉皆付囑甚深般若波羅蜜多，普令成辦。是故，善現！甚深般若波羅蜜多實為大事出於世間。善現當知！甚深般若波羅蜜多不為攝受、執著色故乃至識故出於世間，不為攝受、執著預流果故乃至一切智智故出於世間。」
- (27) 具壽善現便白佛言：「云何般若波羅蜜多亦不為攝受、執著一切智智故出於世間？」
- (28) 佛言：「善現！於意云何？汝頗見有阿羅漢果可攝受、執著不？」
- (29) 善現對曰：「不也，世尊！我不見有阿羅漢果可於其中攝受、執著。」
- (30) 佛言：「善現！善哉！善哉！我亦不見有如來法可於其中攝受、執著。是故，善現！甚深般若波羅蜜多亦不為攝受、執著一切智智故出於世間。」

◎《S6》了知智者之覺了，謂如所有性及盡所有性。

- (31a) 《S6》爾時，欲界梵世天子俱白佛言：「如是般若波羅蜜多最

為甚深，難見難覺，極難信解。若諸有情曾於過去無量佛所發弘誓願，多種善根，乃能信解。

◎《S7》了知甚深廣大諸不共法非聲聞等所行境界。

(31b)《S7》假使三千大千世界諸有情類，一切皆成隨信行等，彼有情類若經一劫，若一劫餘，修自地行，不如有人一日於此甚深般若波羅蜜多忍樂思惟，稱量觀察，所獲功德，勝彼無量。」

◎《S8》大乘神通最為速疾。

(32a)《S8》爾時，佛告諸天子言：「如是！如是！如汝所說。天子當知！若善男子、善女人等，聞深般若波羅蜜多，疾得涅槃。

◎《S9》通達勝義、世俗二諦，一切諸法於勝義中性無增減。

(32b)《S9》勝前所說隨信行等，若經一劫，若一劫餘，修自地行，況忍樂等。」

(33)時諸天子聞佛所說，歡喜踊躍，頂禮如來，右遶三匝，辭退還宮，去眾未遠，忽然不現，隨所屬界，各住本宮，勸進諸天，修殊勝行。

◎《S10》於勝義中，能施、所施、施物等三輪清淨，而修行布施等六波羅蜜多。

(34)《S10》具壽善現便白佛言：「若諸菩薩能於般若波羅蜜多深生信解，從何處沒，來生此間？」

(35)佛告善現：「若諸菩薩聞深般若波羅蜜多，能生信解，不疑不悶，樂見樂聞，憶念思惟甚深義趣，常樂隨逐能說法者，如犢隨母，曾無暫離，乃至未得甚深般若波羅蜜多相應義趣，究竟通利，能為他說，終不遠離甚深般若波羅蜜多及說法師經須臾頃，是諸菩薩從人中沒，來生此間，依宿勝因，能成是事。」

◎《S11》由殷重、無間加行，經無量劫修集福智。

(36)《S11》爾時，善現復白佛言：「頗有菩薩成就如是殊勝功德，承事供養他方佛已，從彼處沒，來生此耶？」

- (37a) 佛告善現：「有諸菩薩成就如是殊勝功德，承事供養他方佛已，從彼處沒，來生此間。復次，善現！有諸菩薩成就如是殊勝功德，先世已於喜足天上承事供養慈氏菩薩，聞深般若波羅蜜多，請問其中甚深義趣，從彼處沒，來生此間。
- (37b) 復次，善現！有諸菩薩先世雖聞甚深般若波羅蜜多，而於其中不能請問甚深義趣，今生人中，聞說般若波羅蜜多，疑惑迷悶，難可開悟。所以者何？不了義者，心多疑惑、迷悶、難喻。
- (37c) 復次，善現！有諸菩薩先世雖聞甚深般若波羅蜜多，亦曾請問其中義趣，或經一日，乃至五日，而不精進如說修行，今生人中，聞說如是甚深般若波羅蜜多，雖經少時，其心堅固，無能壞者，若離般若波羅蜜多及說法師請問深義，尋便退失。所以者何？此諸菩薩雖於前世得聞般若波羅蜜多，亦能請問甚深義趣，而不精進如說修行，故於今生於深般若波羅蜜多，或時樂聞，或時不樂，或時堅固，或時退失，其心輕動，進退非恒，如堵羅綿，隨風飄轉。如是菩薩新學大乘，雖有信心，而不堅淨，於深般若波羅蜜多不能長時信樂隨轉，於二乘地或當墮一。

船等喻品第十四

◎《S12》方便所攝緣一切法之無分別智。

- (37d) 《S12》復次，善現！譬如商侶，遊泛大海，其船卒破，於中諸人若能取木器物、浮囊、板片、死屍為所依附，當知彼類終不沒死，得至安隱大海彼岸，無損無害，受諸快樂。諸菩薩眾亦復如是，若於大乘有信、有忍、有樂、有欲、有精進、有勝解、有不放逸、有勝意樂、有捨、有敬、有清淨心、有於無上正等菩提不捨善軛，復能攝受甚深般若波羅蜜多為所依附，當知此類終不中道退入聲聞或獨覺地，定證無上正等菩提。

◎《S13》法界體性為菩薩道之所依止。

- (37e) 《S13》復次，善現！如有男子，或諸女人，持燒熟瓶，詣河取水，若池若井、若泉若渠，當知此瓶終不爛壞。何以故？是瓶善熟，堪任盛水，極堅牢故。諸菩薩眾亦復如是，若於大乘有信、有忍、有樂、有欲、有精進、有勝解、有不放逸、

有勝意樂、有捨、有敬、有清淨心、有於無上正等菩提不捨善軛，復能攝受甚深般若波羅蜜多方便善巧，當知此類終不中道退入聲聞或獨覺地，定證無上正等菩提。

◎《S14》成就大願等十種波羅蜜多，圓滿一切資糧。

(37f)《S14》復次，善現！如有商人，具善巧智，先在海邊固修船已，方牽入水，知無穿穴，後持財物置上而行，當知彼船必不壞沒，人物安隱達所至處。諸菩薩眾亦復如是，若於大乘有信、有忍、有樂、有欲、有精進、有勝解、有不放逸、有勝意樂、有捨、有敬、有清淨心、有於無上正等菩提不捨善軛，復能攝受甚深般若波羅蜜多方便善巧，當知此類終不中道退入聲聞或獨覺地，定證無上正等菩提。

◎《S15》為宣說圓滿道大乘善知識之所攝受。

(37g)《S15》復次，善現！譬如有人，年百二十，老耄衰朽，復加眾病，調風、熱、痰，或三雜病，是老病人欲從床座起往他處而自不能。有二健人各扶一腋，徐策令起，而告之言：『莫有所難，隨意欲往，今我二人終不相棄，必達所趣，安隱無損。』諸菩薩眾亦復如是，若於大乘有信、有忍、有樂、有欲、有精進、有勝解、有不放逸、有勝意樂、有捨、有敬、有清淨心、有於無上正等菩提不捨善軛，復能攝受甚深般若波羅蜜多方便善巧，當知此類終不中道退入聲聞或獨覺地，定證無上正等菩提。與上相違，是名黑品。」

如來品第十五

◎《S16》於生死涅槃一切法皆無味著。

——當知此即十六種殊勝相，由此菩薩道勝出所餘聲聞、獨覺加行，故名勝道。

(01)《S16》爾時，善現便白佛言：「新學菩薩云何應學甚深般若波羅蜜多？」

(02)佛告善現：「新學菩薩欲學般若波羅蜜多，先應親近承事善友，若能宣說甚深般若波羅蜜多，教誡教授諸菩薩者，是名善友，謂作是言：『來，善男子！汝應勤修布施、淨戒、安忍、精進、靜慮、般若波羅蜜多。汝勤修時，應無所得而為方便，迴向無上正等菩提。汝迴向時，勿以色受想行識故而取菩提。所以者

何？一切智智性非所取。汝善男子！於諸聲聞、獨覺等地勿生貪著。』若能如是教誡教授新學菩薩，令其漸入甚深般若波羅蜜多，當知是為菩薩善友。」

(03) 具壽善現復白佛言：「是諸菩薩發菩提心，欲趣菩提，甚為難事。」

三、[作相]

《T1》作利《T2》樂《T3》濟拔，《T4》諸人歸依處，
《T5》宅舍《T6》示究竟，《T7》洲渚及《T8》導師。
《T9》并任運所作，《T10》不證三乘果，最後《T11》作所依，
此即作用相。

○此作用相有十一種：

◎《T1》安立所化於解脫樂是作未來之利益。

◎《T2》為諸所化息滅憂苦等安立現法樂。

◎《T3》於生死苦濟披有情成辦無苦法性。

——此三表示菩薩身中成就殊勝作用之一切智加行。

◎《T4》諸人者，謂諸所化，安立於畢竟安樂之涅槃，名作歸依處。

◎《T5》安立所化令滅除苦因。名作宅舍。

◎《T6》安立所化令知生死涅槃平等，名作示究竟。

◎《T7》令諸所化離貪愛水安立解脫成自他利之所依止，名作洲渚。

◎《T8》成辦所化現時究竟二種義利，名作導師。

◎《T9》令諸所化於利他事任運而轉。

◎《T10》雖為所化說三乘果，不令非時現證實際。

——此七表示菩薩身中成就殊勝作用之道相智加行。

◎《T11》由修一切相智加行而為世間作所依處。

——此一表示菩薩身中成就殊勝作用之一切相智加行。

——如是十一種作用相所攝之菩薩三智加行，具足利他之作用，故名作用相。

(4a) 《T1》-《T9》佛告善現：「如是！如是！諸菩薩眾所作甚難，
謂為利樂諸世間故，發趣無上正等菩提，作是誓言：『我為濟
拔諸世間故，為諸世間作舍宅故，為諸世間作歸依故，為諸世
間作洲渚故，示諸世間究竟道故，為諸世間作導師故，為諸世
間作所趣故，發勤精進，趣大菩提。』」

- (4b) 《T1》-《T3》善現！云何諸菩薩眾誓為濟拔諸世間故，發勤精進，趣大菩提？謂諸菩薩見諸世間沒生死苦，不能出離，發勤精進，趣大菩提，為拔彼苦，說正法要。
- (4c) 《T5》善現！云何諸菩薩眾為諸世間作舍宅故，發勤精進，趣大菩提？謂諸菩薩欲為世間說一切法皆不和合，發勤精進，趣大菩提。」
- (05) 善現白言：「云何菩薩欲為世間說一切法皆不和合？」
- (6a) 佛言：「善現！諸菩薩眾欲為世間宣說五蘊及一切法皆不和合，無縛無解，無生無滅，由此便能覆護一切，猶如舍宅。
- (6b) 《T4》善現！云何諸菩薩眾為諸世間作歸依故，發勤精進，趣大菩提？謂諸菩薩欲令世間解脫一切生老病死愁歎憂苦，發勤精進，趣大菩提，方便善巧說正法要。
- (6c) 《T7》善現！云何諸菩薩眾為諸世間作洲渚故，發勤精進，趣大菩提？謂諸菩薩趣大菩提，欲為世間說五取蘊前後際斷。由此斷故，一切法斷。此一切斷，即是寂滅微妙涅槃，亦是如實無顛倒性。譬如小大海河池中，高地可居，說為洲渚。涅槃亦爾，安隱處故。
- (6d) 《T6》善現！云何諸菩薩眾示諸世間究竟道故，發勤精進，趣大菩提？謂諸菩薩趣大菩提，欲為世間說色究竟，不名為色受想行識，餘法亦爾，究竟法性非色等故。」
- (7) 具壽善現白言：「世尊！若色等法究竟法性不名色等，應諸菩薩已得菩提，究竟性中無分別故。」
- (8a) 佛告善現：「如是！如是！究竟性中都無分別，而諸菩薩甚為難事，雖能如是觀一切法，而不作證，亦不沈沒，作是念言：『我於此法現等覺已，為諸世間宣說開示，令知如是究竟道相。』
- (8b) 《T8》善現！云何諸菩薩眾為諸世間作導師故，發勤精進，趣大菩提？謂諸菩薩趣大菩提，欲為世間說色本性無生無滅，受想行識亦復如是，欲為世間說預流果乃至無上正等菩提諸法本性無生無滅。
- (8c) 《T9》善現！云何諸菩薩眾為諸世間作所趣故，發勤精進，趣大菩提？謂諸菩薩趣大菩提，欲為世間宣說開示色以虛空為所趣，受想行識及一切法亦以虛空為所趣，欲為世間宣說開示色無所趣，與虛空等，受想行識及一切法亦無所趣，與虛空等。

如太虛空，無來無去，無作無住，無生無滅，諸法亦爾，皆如虛空，無所分別。何以故？諸色空故，無來無去，受想行識及一切法亦皆空故，無來無去。所以者何？以一切法無不用空、無相、無願、無造、無作、無生、無性、如夢、如幻、無我、無邊、寂靜、涅槃、無取、無捨、無來、無去、最極寂滅而為所趣，彼於是趣不可超越。」

(09) 爾時，善現便白佛言：「誰能信解如是深法？」

(10) 佛告善現：「若諸菩薩久修大行，已曾供養無量諸佛，於諸佛所，發弘誓願，所種善根，皆已成熟，無量善友攝受護念，於此深法能生信解。」

四、[自性相]

《U1》離煩惱《U2》狀《U3》貌，《U4》障品及對治，

《U5》難性與《U6》決定，《U7》所為《U8》無所得。

《U9》破一切執著，及名《U10》有所緣，

《U11》不順《U12》無障礙，《U13》無跡《U14》無去、《U15》生。

《U16》真如不可得，此十六自性，由如所相事，許為第四相。

○此自性相有十六種，謂：

◎《U1》遠離貪等煩惱加行自性。

◎《U2》遠離煩惱狀身粗重等加行自性。

◎《U3》遠離煩惱貌非理作意等加行自性。

◎《U4》了知貪等所治品及無貪等能治品，取捨真實皆空。

——此慧所攝持之菩薩四種加行，即菩薩一切智加行自性。

◎《U5》勝義無有情，而於名言須披甲令般涅槃，是難行加行自性。

◎《U6》不墮餘乘決定趣一佛乘之加行自性。

◎《U7》長時修習三種所為之加行自性。

(11) 具壽善現復白佛言：「是諸菩薩以何為性？」

(12) 《U1》-《U3》佛告善現：「是諸菩薩調伏、遠離而為其性，由此性故，能知能了甚深般若波羅蜜多。」

(13) 《U7》具壽善現復白佛言：「是諸菩薩能知能了甚深般若波羅蜜多，當何所趣？」

(14) 佛告善現：「是諸菩薩趣一切智。」

(15) 具壽善現復白佛言：「若諸菩薩證是趣已，能為無量無邊有情

作所歸趣。」

- (16) 佛告善現：「如是！如是！若諸菩薩證得無上正等菩提，能為無量無邊有情作所歸趣。」
- (17) 《U5》具壽善現復白佛言：「是諸菩薩能為難事，謂著如是堅固甲冑，欲度無量無邊有情令人涅槃，而有情類都不可得。」
- (18) 佛告善現：「如是！如是！如汝所說。復次，善現！是諸菩薩所著甲冑，不屬諸色受想行識，不屬聲聞、獨覺、菩薩、一切智智及一切法。所以者何？以一切法皆無所屬。」
- (19) 具壽善現復白佛言：「若諸菩薩行深般若波羅蜜多，不住聲聞、獨覺等地。」

◎ 《U8》通達能修所修法皆勝義無所得之加行自性。

- (20) 《U8》佛告善現：「汝觀何義，作如是說？」
- (21) 善現答言：「甚深般若波羅蜜多無所住著。若修般若波羅蜜多，於一切法都無所修，亦無修者，修時、修處及由此修皆不可得。世尊！甚深般若波羅蜜多無決定法，若修虛空，修一切法，修無邊際，修無攝受，是修般若波羅蜜多。」

◎ 《U9》破除一切執著實事之加行自性；

——上五是菩薩道相智加行自性。

- (22) 《U9》佛告善現：「如是！如是！如汝所說。復次，善現！應依如是甚深般若波羅蜜多觀察不退轉菩薩摩訶薩，謂諸菩薩若不貪著甚深般若波羅蜜多，不執他語及他教敕以為真要，非但信他而有所作，聞說如是甚深般若波羅蜜多，其心不驚、不恐、不怖、不沈、不沒、無疑、無悔，亦不迷悶，歡喜樂聞，深信受，是諸菩薩定不退轉，如是菩薩先世已問甚深般若波羅蜜多所有義趣，故今得聞，心無驚等。」

◎ 《U10》一切智及道相智所緣境中所攝之事與道，緣此之加行自性。

- (23) 《U10》具壽善現復白佛言：「若諸菩薩聞深般若波羅蜜多，心無驚等，是諸菩薩云何觀察甚深般若波羅蜜多？」
- (24) 佛告善現：「是諸菩薩應以隨順一切智心觀察般若波羅蜜多。」
- (25) 具壽善現復白佛言：「云何隨順一切智心觀察般若波羅蜜多？」
- (26) 佛告善現：「若諸菩薩隨順虛空觀察般若波羅蜜多，是為隨順

一切智心觀察般若波羅蜜多。所以者何？以一切智無量無邊，若無量無邊，即非色亦非受想行識，無得無現觀，無智無識，無生無滅，無修無作，無所從來，亦無所去，無方無域，亦無所住，唯可說為無量無邊。善現當知！虛空無量無邊故，一切智亦無量無邊；一切智無量無邊故，無能證者。非色能證乃至非識能證，非布施波羅蜜多能證乃至非般若波羅蜜多能證。所以者何？色乃至識即一切智，無二無別；布施波羅蜜多乃至般若波羅蜜多即一切智，無二無別。」

◎《U11》破除執著有性世間實有與無性出世實有等，通達生死、涅槃平等性，故名不順愚夫之加行自性。

(27)《U11》爾時，欲界梵世天子俱詣佛所，同白佛言：「如是般若波羅蜜多極為甚深，難見難覺。」

(28)爾時，佛告諸天子言：「如是！如是！如汝所說。我觀此義，初成佛時，宴坐思惟，不樂說法，謂作是念：『我法甚深，非諸世間卒能信受。』我所證法即是般若波羅蜜多，此法甚深，非能證、非所證、無證處、無證時，由此而證亦不可得。天子當知！虛空甚深故，此法甚深；我甚深故，此法甚深；一切法性無來去故，此法甚深。」

(29)時諸天子復白佛言：「甚奇！世尊！佛所說法，一切世間極難信解；佛所說法，無取無捨，世間有情行取捨故。」

(30)爾時，佛告諸天子言：「如是！如是！如汝所說。」

◎《U12》了知色等無障礙加行自性。

◎《U13》能知所知皆於勝義無跡可得之加行自性。

(31)《U12》-《U13》具壽善現便白佛言：「佛所說法微妙甚深，於一切法皆能隨順無所障礙，與虛空等。佛所說法畢竟不生，一切生法不可得故；佛所說法都無處所，一切處所不可得故。」

(32)佛言：「善現！如是！如是！」

◎《U14》通達空性真如於勝義中全無所去之加行自性。

◎《U15》通達色等由勝義無性故無有生之加行自性。

(33)《U14》-《U15》時諸天子便白佛言：「大德善現，是真佛子，隨如來生，諸有所說，一切皆與空相應故。」

- (34a) 爾時，善現語諸天子：「汝等說我隨如來生，云何善現隨如來生？謂隨如來真如生故，一切生法不可得故。如來真如無來無去，本性不生，善現真如亦無來去，本性不生，故說善現隨如來生。如來真如即一切法真如，一切法真如即如來真如，『如來』真如無真如性，亦無不真如性，善現真如亦復如是，故說善現隨如來生。如來真如無變異無分別，遍一切處，善現真如亦復如是，故說善現隨如來生。
- (34b) 如來真如常住為相，而無所住，善現真如亦復如是，故說善現隨如來生。如來真如無所罣礙，一切法真如亦無所罣礙，善現真如亦復如是，故說善現隨如來生。如來真如與一切法真如，同一真如，無二無別，無造無作，如是真如常真如相，無時非真如相，是故真如無二無別，善現真如亦復如是，故說善現隨如來生。如來真如於一切處無憶念無分別，一切法真如於一切處亦無憶念無分別，善現真如亦復如是，故說善現隨如來生。如來真如無別異，不可得，一切法真如亦無別異，不可得，善現真如亦復如是，故說善現隨如來生。
- (34c) 如來真如不離諸法真如，諸法真如不離如來真如，如來真如常真如相，無時非真如相，善現真如亦復如是，故說善現隨如來生。雖說隨生，而無所隨生，以善現真如不異佛故。如來真如非去來今，一切法真如亦非去來今，善現真如亦復如是，故說善現隨如來生。
- (34d) 如來即是如來真如，如來真如隨過去真如，過去真如隨如來真如，如來真如隨未來真如，未來真如隨如來真如，如來真如隨現在真如，現在真如隨如來真如，如來真如隨三世真如，三世真如隨如來真如，如來真如與三世真如無二無別，一切法真如、善現真如亦無二無別，故說善現隨如來生。
- (34e) 菩薩真如即佛真如，諸菩薩眾由真如故，得菩提時，說名如來應正等覺。如來證得此真如時，三千世界六種變動。我於如是諸法真如深生信解，故說善現隨如來生。
- (34f) 天子當知！然我善現不由色故乃至識故，隨如來生；亦不由預流果故乃至獨覺菩提故，隨如來生；亦不由一切智故，隨如來生。但由真如故，隨如來生。天子當知！然我善現不隨色受想行識生，不隨預流果乃至獨覺菩提生，故我善現隨如來生。」

◎《U16》通達有性無性二俱之本性真如於勝義中無所得之加行自性；
——上七是菩薩一切相智加行自性。

——如是三智十六種加行自性，由能表顯所相事故許為第四相。

——此上諸加行相總義，謂：

a 遠離煩惱狀貌等四種自性相，表示大乘一切智加行，以了知如來出現等通達補特伽羅無我之十六智為體，是具足作利益、安樂等三種作用之加行故。

b 又難行及決定等五種自性相，表示道相智加行，以了知空性及無相等道真實十六智為體，是具足作皈依等七種作用之加行故。

c 又不順、無障礙等七種自性相，表示一切相智加行，以了知如來依真如現法樂住等果位智相真實十六種智為體，是具足作世間依止處一種作用之加行故。

d 又道相智與一切相智之加行，表示勝出二乘加行，以是通達不可思議等法無我所顯之加行故。

(35) 《U16》時舍利子便白佛言：「如是如來甚深微妙。」

(36) 爾時，佛告舍利子言：「如是！如是！如汝所說。如是如來甚深微妙。」

(37) 當說如是如來相時，三千苾芻諸漏永盡，心得解脫，成阿羅漢；五百苾芻尼，遠塵離垢，生淨法眼；五千天人得無生法忍；六十菩薩諸漏永盡，心得解脫。

(38) 爾時，佛告舍利子言：「今此眾中六十菩薩曾於過去五百佛所親近供養，雖修布施、淨戒、安忍、精進、靜慮，而不攝受甚深般若波羅蜜多方便善巧，起別異想，修別異行，故於今時，雖聞大法，而盡諸漏，心得解脫故。舍利子！諸菩薩眾雖有菩薩道、空、無相、無願，而不攝受甚深般若波羅蜜多方便善巧，便證實際，墮於聲聞或獨覺地。舍利子！譬如有鳥，其身廣大，百踰繕那，乃至五百，翅羽未成，或已衰朽，是鳥從彼三十三天投身而下，趣瞻部洲，於其中道歎作是念：『我今還上三十三天。』於汝意云何？是鳥能還三十三天不？」

(39) 舍利子曰：「不也，世尊！」

(40) 佛告舍利子：「是鳥中路或作是願：『至瞻部洲，當令我身無損無苦。』於意云何？是鳥所願可得遂不？」

(41) 舍利子曰：「不也，世尊！是鳥至此瞻部洲時，其身決定有損有苦，或復近死，或致命終。何以故？是鳥身大，從遠而墮，

翅羽未成，或衰朽故。」

- (42a) 佛告舍利子：「有菩薩乘善男子等亦復如是，雖發無上正等覺心，已經殞伽沙數大劫勤修布施、淨戒、安忍、精進、靜慮，亦修空、無相、無願解脫門，而不攝受甚深般若波羅蜜多方便善巧，便證實際，墮於聲聞或獨覺地。
- (42b) 舍利子！是諸菩薩雖念三世諸佛戒蘊乃至解脫智見蘊，而心取相，不如實知如是五蘊真實功德，但聞空聲，取相執著迴向菩提，便墮聲聞或獨覺地。何以故？舍利子！是諸菩薩遠離般若波羅蜜多方便善巧，法應爾故。」
- (43) 時舍利子便白佛言：「如我解佛所說義者，若諸菩薩遠離般若波羅蜜多方便善巧，雖具無量福德資糧，而於菩提或得不得。是故菩薩欲得菩提，決定不應遠離般若波羅蜜多方便善巧。」
- (44) 爾時，佛告舍利子言：「如是！如是！如汝所說。」

大般若波羅蜜多經卷第五百六十二

【第 36 義】：大乘順解脫分 (IV-6)

無相善施等，正行而善巧，一切相品中，謂順解脫分：

《V1》緣佛等淨信，《V2》精進行施等，《V3》意樂圓滿念，《V4》無分別等持。《V5》知一切諸法，智慧共為五，《V'》利易證菩提，《V''》許鈍根難證。

◎通達空性之菩薩資糧道，善巧正行通達勝義無相慧所攝持之布施等乃至一切相智，故許彼為圓滿現證一切相加行品中順解脫分。

○此攝道為五法而明聰睿所化機，謂：

◎《V1》緣佛等道果諸法所發淨信；

◎《V2》於布施等行境勇悍之精進；

◎《V3》意樂圓滿大乘發心所攝之正念；

◎《V4》虛空藏等無分別三摩地；

◎《V5》二諦所攝一切諸法一切種了知之勝慧。

——《現觀莊嚴論》正所為機資糧位菩薩，即善巧彼五境者。

(45) 《V1》-《V5》爾時，欲界梵世天子恭敬合掌，俱白佛言：「如是般若波羅蜜多最為甚深，極難信解，諸佛無上正等菩提亦最甚深，極難信得。」

(46) 爾時，佛告諸天子言：「如是！如是！如汝所說。」

○然非一切機皆能易證無上菩提：

◎《V'》以信等五根利者易得無上正等菩提；

(47) 《V'》具壽善現便白佛言：「如我解佛所說義者，無上菩提非難信得。何以故？以一切法畢竟空故，空中無法信證餘法。所以者何？以一切法自性皆空，若為永斷如是法故，說如是法，此法亦空。由此因緣，於佛無上正等菩提，能證、所證、能知、所知，一切空寂。是故無上正等菩提非難信解，非難證得，以一切法無不皆空，如是信知，便證得故。」

(48) 佛告善現：「無上菩提能信證者不可得故，無上菩提非實有故、無積集故，說難信得。」

◎《V''》諸鈍根者則難得故。

(49) 《V''》時舍利子語善現言：「以一切法畢竟空故，無上菩提極難信得。所以者何？以一切法都無自性，皆如虛空。譬如虛空，不作是念：『我當信得無上菩提。』諸法亦爾，是故無上正等菩提極難信得。復次，善現！若佛菩提非難信得，則不應有如殑伽沙諸菩薩眾發趣無上正等菩提，後還退轉，故佛菩提極難信得。」

(50) 善現對曰：「於意云何？色於菩提有退轉不？」

(51) 舍利子言：「不也，善現！」

(52) 「受想行識於菩提有退轉不？」

(53) 舍利子言：「不也，善現！」

(54) 「離色，有法於菩提有退轉不？」

(55) 舍利子言：「不也，善現！」

(56) 「離受想行識，有法於菩提有退轉不？」

(57) 舍利子言：「不也，善現！」

(58) 「色真如於菩提有退轉不？」

(59) 舍利子言：「不也，善現！」

(60) 「受想行識真如於菩提有退轉不？」

(61) 舍利子言：「不也，善現！」

(62) 「離色真如，有法於菩提有退轉不？」

(63) 舍利子言：「不也，善現！」

(64) 「離受想行識真如，有法於菩提有退轉不？」

- (65) 舍利子言：「不也，善現！」
- (66) 「真如於菩提有退轉不？」
- (67) 舍利子言：「不也，善現！」
- (68) 「離真如，於菩提有退轉不？」
- (69) 舍利子言：「不也，善現！」
- (70) 時具壽善現謂舍利子言：「若一切法諦故、住故，都無所有，皆不可得，說何等法可於無上正等菩提而有退轉？」
- (71) 舍利子言：「如汝所說，實無有法，亦無有情可於菩提說有退轉。若爾，何故佛說三種住菩薩乘但應說一？又不應立三乘有異，唯應有一正等覺乘。」
- (72) 時滿慈子便白具壽舍利子言：「應問善現：『為許有一菩薩乘不？』然後可難：『應無三乘建立差別，唯應有一正等覺乘。』」
- (73) 時舍利子問善現言：「為許有一菩薩乘不？」
- (74) 善現報言：「真如頗有三種菩薩及三乘耶？」
- (75) 舍利子言：「不也，善現！」
- (76) 「真如頗有一菩薩乘、一佛乘不？」
- (77) 舍利子言：「不也，善現！」
- (78) 「真如頗有一法可見，名一菩薩及一乘耶？」
- (79) 舍利子言：「不也，善現！」
- (80) 時具壽善現謂舍利子言：「若一切法諦故、住故，都無所有，皆不可得，菩薩三乘亦復如是，如何可責有一、有三？若諸菩薩聞說真如無差別相，不驚不怖，亦不沈沒，是諸菩薩疾證菩提，定無退轉。」
- (81) 爾時，世尊讚善現曰：「善哉！善哉！汝今乃能為諸菩薩善說法要，汝之所說，承佛威神，一切如來隨喜汝說。若諸菩薩於法真如無差別相深生信解，聞說如是諸法真如，不驚不怖，亦不沈沒，是諸菩薩疾證無上正等菩提，定無退轉。」
- (82) 時舍利子便白佛言：「若諸菩薩成就此法，定證無上正等覺耶？」
- (83) 爾時，佛告舍利子言：「如是！如是！是諸菩薩決定不墮聲聞等地。」

【第 37 義】：大乘順抉擇分 (IV-7)

《W1》-《W10》此煖等所緣，讚一切〔有情〕，緣彼心平等，說有十種相。

《X1》-《X3》自滅除諸惡，安住布施等，亦令他住彼，讚同法為頂。
《Y》如是當知忍，自他住聖諦。
《Z》如是第一法，成熟有情等。

◎大乘加行道暖等之所緣，此處《經》中讚為是一切有情。《經》說此加行道緣彼有情，心觀平等十種相故。十種相者，謂：

《W1》於有情破貪瞋執而修習捨，謂平等心。
《W2》修悅意之大慈心；
《W3》究竟利益之大悲心；
《W4》無瞋恚心；
《W5》無惱害心；
《W6》於年老男女起父母心；
《W7》於年等者起兄弟姊妹心；
《W8》於年幼者起子女心；
《W9, W10》於中容人起朋友心及親族心；

——此是加行道暖位十相。

《X1》自滅除諸惡安住布施等諸善，亦安立他止惡修善。
《X2》若他有情未待勤勉即自能行，應當稱讚。
《X3》見同法者如是行時，應讚善哉。

——此三是加行道頂位相。

《Y》如是自住了知四諦，亦安立他——是加行道忍位相。
《Z》如是令諸有情成熟解脫等——當知是加行道世第一法相。

(84) 爾時，善現便白佛言：「若諸菩薩欲證菩提，應云何住？應云何學？」

(85) 《W1》-《W10》佛告善現：「若諸菩薩欲證菩提，於諸有情應平等住，謂於彼類應起等心、慈心、悲心、喜心、捨心、不異心、謙下心、利益心、安樂心、無瞋惱心、如父母心，亦以此心應與其語。善現當知！若諸菩薩欲證菩提，應如是住，應如是學。」(缺《X》，《Y》，《Z》)

不退品第十六

【第 38 義】：不退轉相菩薩僧 (IV-8)

從順抉擇分，見修諸道中，所住諸菩薩，是此不退眾。

◎從安住順抉擇分利根菩薩，乃至見修諸道中所有利根菩薩，即此處

所說不退轉無上正等菩提之菩薩眾。以於色等遠離分別實執現行等隨得一相之菩薩故。

一、[加行道不退轉相]

由說於色等，轉等二十相，即住決擇分，所有不退相：

- (煖) 『A1』由於色等轉，『A2』盡疑惑『A3』無暇，
『A4』自安住善法，亦令他安住。『A5』於他行施等，
『A6』深義無猶豫，『A7』身等修慈行，『A8』不共五蓋住。
『A9』摧伏諸隨眠，『A10』具正念正知，『A11』衣等恆潔淨。
- (頂) 『A12』身不生諸蟲，『A13』心無曲『A14』杜多，
『A15』及無慳吝等，『A16』成就法性行，
『A17』利他求地獄。
- (忍) 『A18』非他能牽引，『A19』魔開顯似道，了知彼是魔。
- (世第一法) 『A20』諸佛歡喜行。

由此二十相，諸住煖頂忍，世第一法眾，不退大菩提。

◎由《經》所說遮轉色等分別實執現行等二十種相，當知即是住順決擇分利根菩薩不退轉大菩提之相。

- 『A1』遮轉色等分別實執現行；
- 『A2』於真皈依處，滅盡疑惑為是為非；
- 『A3』斷盡八無暇處；
- 『A4』自住善行亦安立他；
- 『A5』由修自他換菩提心，於他行布施等；
- 『A6』於甚深義無復猶豫；
- 『A7』三業諸行修慈憫行；
- 『A8』不與貪欲、瞋恚、昏沉睡眠、掉舉惡作、疑等五蓋共住；
- 『A9』摧伏無明、惡見等一切隨眠；
- 『A10』常時具足正念、正知；
- 『A11』受用衣服等潔淨，非聖所呵責；

——此十一相是暖位不退轉相。

- 『A12』身不生諸蟲類；
- 『A13』心無曲屈自利作意；
- 『A14』修行十二杜多功德；
- 『A15』無慳吝、毀戒等過；
- 『A16』成就般若波羅蜜多瑜伽，不違真空法性行；
- 『A17』為利他故欲往地獄；

——此六相是頂位不退轉相。

『A18』修所說道，非他能引；

『A19』於開顯相似道之魔，了知是魔；

——此二相是忍位不退轉相。

『A20』三業一切行，皆佛歡喜之行；

——此一是世第一法不退轉相。

◎如是二十種相，當知即住暖、頂、忍、世第一法利根菩薩不退轉大菩提之相。

- (01) 爾時，善現便白佛言：「我等當以何行、狀、相，知是不退轉菩薩摩訶薩？」
- (2a) 佛告善現：「若諸菩薩能如實知異生、聲聞、獨覺、菩薩及如來地，雖說有異，而於諸法真如性中無變異無分別，皆無二無二分，是諸菩薩雖實悟入諸法真如，而於真如無所分別。雖聞真如與一切法無二無別，而無疑滯。雖聞諸法種種異相，而於其中無所執著。是諸菩薩終不輕爾而發語言，諸有所說，皆引義利，終不觀他好惡長短，平等憐愍而為說法。若諸菩薩成就如是諸行、狀、相，定於無上正等菩提不復退轉。(缺『A1』)」
- (2b) 『A2』復次，善現！是諸菩薩不觀外道、沙門、梵志形相言說，謂彼於法實知實見，或能施設正見法門，無有是處。終不禮敬外道天神，亦不供養而求勝福。
- (2c) 『A3』復次，善現！是諸菩薩不墮惡趣，不受女身，亦不生於卑賤種族，除為度脫彼有情類，示同類生，方便攝受。
- (2d) 『A4』復次，善現！是諸菩薩常樂受行十善業道，亦能方便勸他受行，乃至夢中亦無所犯。
- (2e) 『A5』復次，善現！是諸菩薩諸所受持、思惟、讀誦種種經典，令極通利，皆為利樂一切有情，恆作是念：『我以此法為諸有情宣說開示，當令一切法願滿足。』復持如是法施善根，與諸有情平等共有，迴向所求一切智智。
- (2f) 『A6』復次，善現！是諸菩薩於佛所說甚深法門，決定不生疑惑猶豫，亦不迷悶，歡喜信受。
- (2g) 『A7』諸所發言，法為饒益，知量而說，言詞柔軟。
- (2h) 『A8』寢寐輕少。
- (2i) 『A9』煩惱不行。

- (2j) 『A10』入出往來，心不迷謬，恒時安住正念正知，進止威儀亦復如是；諸所遊履，必觀其地，安詳繫念，正視而行，運動語言，常無卒暴。
- (2k) 『A11』諸所受用臥具衣服，皆常香潔，無諸臭穢，亦無垢膩蟻虱等蟲，恒樂清閑，常無疾病。
- (2l) 『A12』身中無有八萬戶蟲。所以者何？是諸菩薩善根增上，出過世間。如如善根漸漸增長，如是如是身心清淨。』
- (03) 『A13』爾時，善現便白佛言：「是菩薩心云何清淨？」
- (4a) 佛告善現：「是諸菩薩如如善根漸漸增長，如是如是心中一切諂曲、矯誑皆永不行。由此因緣，一切煩惱及餘不善皆永息滅，亦超聲聞及獨覺地，疾趣無上正等菩提，由此應知心常清淨。
(缺『A14』
- (4b) 『A15』復次，善現！是諸菩薩不重利養，不徇名譽，心離嫉慳，身無愆失。
- (4c) 『A16』聞甚深法，心不迷謬，智慧深固，恭敬信受，隨所聽聞，皆能會入甚深般若波羅蜜多，諸所造作世間事業，亦依般若波羅蜜多方便善巧會入法性，不見一事出法性者，設有不與法性相應，亦能方便會入般若波羅蜜多甚深理趣，由斯不見出法性者。
- (4d) 『A17』復次，善現！是諸菩薩設有惡魔現前化作八大地獄，一一獄中化作無量百千菩薩，皆被猛焰交徹燒燃，告菩薩言：『此諸菩薩皆由受得不退轉記，故墮如是大地獄中，恒受如斯猛利大苦。汝等既受不退轉記，當如此類受斯大苦，是故汝等應疾捨棄大菩提心，可脫斯苦，當生天上，或生人中，富貴自在，受諸快樂。』時諸菩薩見聞此事，其心不動，亦不驚疑，但作是念：『若諸菩薩已受菩提不退轉記，更墮惡趣，受諸苦惱，如愚異生，必無是處。今見聞者，定是惡魔所作所說，皆非實有。』
- (4e) 『A18』復次，善現！是諸菩薩設有惡魔作沙門像，來至其所，說如是言：『汝先所聞受持讀誦甚深般若波羅蜜多相應經典皆是邪說，應疾捨棄，勿謂為真。汝等若能速疾捨棄，我當教汝真淨佛法，令汝速證無上菩提。汝先所聞，非真佛語，是文頌者虛誑撰集，我之所說，是真佛語。』善現當知！若諸菩薩聞如是語，心動驚疑，應知未受不退轉記。若諸菩薩聞如是語，

心不驚疑，但隨無作、無相、無生法性而住，應知已受不退轉記，是諸菩薩諸有所作，不信他語，不隨他教而便動轉，如阿羅漢，諸有所為，不信他語，現證法性，無惑無疑，一切惡魔不能傾動。不退菩薩亦復如是，一切聲聞、獨覺、外道、諸惡魔等不能破壞，令於菩提而生退屈。

(4f) 『A19』復次，善現！是諸菩薩設有惡魔來詣其所，詐現親友，作如是言：『汝等所行是生死法，非菩提行，汝等今應修盡苦道，速盡眾苦，得般涅槃。現在苦身尚應厭捨，況更樂受當來苦身。宜自審思，捨先所信。』是諸菩薩聞彼語時，心不驚疑，但作是念：『如是說者，定是惡魔。』時彼惡魔復語菩薩：『欲聞菩薩無益行耶？謂諸菩薩經如殞伽沙數大劫，以無量種上妙供具供養諸佛，復於殞伽沙等佛所，修無量種難行梵行，親近承事如殞伽沙諸佛世尊，請問無量無邊菩薩所應修道云何應住？云何應行？云何應學諸菩薩道？殞伽沙等諸佛世尊如所請問，次第為說，彼諸菩薩如教而住，如教而行，如教而學，經無量劫，尚不能證所求無上正等菩提，況今汝等可能證得。』是時，菩薩雖聞其言，而心不動，亦無疑惑。

(4g) 時彼惡魔復於是處化作無量苾芻形像，告菩薩曰：『此諸苾芻皆於過去經無數劫修無量種難行梵行，而不能得無上菩提，今皆退住阿羅漢果，云何汝等能證菩提？』是諸菩薩見聞此已，即作是念：『定是惡魔為擾亂我，作如是事，定無菩薩修行般若波羅蜜多至圓滿位，不證無上正等菩提，退住聲聞、獨覺等地。』復作是念：『若諸菩薩如佛所說修菩提行，不證無上正等菩提，必無是處。當知今者所見所聞，定是惡魔所作所說。』
(缺『A20』)

二、[見道不退轉相]

見道中忍智，十六剎那心，當知此即是，菩薩不退相：

(苦) 『B1』遣除色等想，『B2』心堅『B3』退小乘，『B4』永盡靜慮等。

(集) 『B5』所有諸支分，身心輕利性，『B6』巧便行諸欲，『B7』常修淨梵行，『B8』善清淨正命。

(滅) 『B9』蘊等『B10』諸留難，『B11』資糧及『B12』根等戰事

(道) 『B13』慳吝等。『B14』加行及隨行，破彼所依處，不得塵許

法，『B15』安住三地中，於自地決定。『B16』為法捨身命。
此十六剎那，是住見道位，智者不退相。

◎由見道位忍智十六剎那所引後得身語殊勝名言，當知即是住見道菩薩不退轉大菩提之相。

○初依苦諦有四相，謂：

『B1』住見道中根菩薩，於色等法遣除分別實執；

『B2』世俗、勝義二菩提心最極堅固；

『B3』於小乘道令心退捨；

『B4』雖得靜慮及無色等至，然斷盡由彼力受生之功能。

○依於集諦有四相，謂：

『B5』身心輕利，具足輕安之樂；

『B6』善巧方便受用諸欲而無染著；

『B7』常修梵行；

『B8』斷除邪命，正命清淨。

○依於滅諦有四相，謂：

『B9』於蘊、界、處等，破除實執加行及隨加行處。

『B10』於諸留難法，破除實執加行及隨加行處。

『B11』於布施等菩提資糧，破除實執加行及隨加行處。

『B12』「聚落」言所顯諸根，「城邑」言所顯諸根依處，「國土」言所顯諸境，「士夫」言所顯諸識，執此為實有之實執，與通達彼為無我之智，能治、所治之「戰事」，破除執此實有之加行與隨加行處。

○依於道諦有四相，謂：

『B13』於慳吝、毀戒等，破除實執加行及隨加行處；

『B14』所證之道及菩提果法，於勝義中無微塵許可得；

『B15』自安住一切智等三地中雖魔破壞，然於自所住之地決定無疑；

『B16』為求一切相智等正法故，能捨身命。

——如是忍、智十六剎那所攝諸相，即是安住見道不退轉相。

(4h) 『B2』復次，善現！是諸菩薩設有惡魔作苾芻像來至其所，作如是言：『一切智智與虛空等，無性為性，自相本空，諸法亦然，都無所有，此中無法可名能證，亦無有法可名所證，證處、證時及由此證皆不可得。既一切法與虛空等，無性為性，自相本空，汝等何緣唐受勤苦，求證無上正等菩提？汝先所聞諸菩

薩眾應求無上正等菩提，皆是魔說，非真佛語，汝等應捨大菩提心，勿妄為他虛受勤苦。』是諸菩薩聞彼語時，能如實知：『是惡魔事，欲退敗我大菩提心，我今更應堅固其心，不應信受惡魔所說。』（缺『B1』，『B3』）

- (4i) 『B4』復次，善現！是諸菩薩若欲調心入四靜慮，隨意能入，遊觀自在，為度有情，還生欲界，雖生欲界，而不染欲，亦不退失所修靜慮。
- (4j) 『B5』復次，善現！是諸菩薩不貴名聲，不著稱譽，於有情類無恚恨心，常欲令其得勝利樂，往來入出，無散亂心，進止威儀，恒住正念。
- (4k) 『B6』為有情故，雖處居家，而於其中不生貪著，雖現受欲，而常厭怖，如涉險路，心恒驚恐，雖有所食，惶懼不安，但念何時出斯險難。
- (4l) 『B7』雖現受用種種珍財，而於其中不起貪愛，不以邪命非法自活，寧自殞歿，不損於人。所以者何？是諸菩薩行深般若波羅蜜多，是人中尊、人中善士、人中龍象、人中蓮華、人中調御、人中勇健，本為利樂一切有情，現處居家，方便饒益，豈為自活，侵損於人？所以者何？是諸菩薩甚深般若波羅蜜多方便善巧力所持故。
- (4m) 『B8』復次，善現！是諸菩薩有執金剛藥叉神主常隨左右，密為守護，不為一切人非人等邪魅威力損害身心。由此因緣，是諸菩薩乃至無上正等菩提，身意泰然，常不狂亂，具丈夫相，諸根圓滿，心行調善，恒修淨命，不行幻術、占相、吉凶、咒禁、鬼神、合和湯藥、誘誑卑夫、結好貴人、侮陀聖賢、親昵男女，不為名利自讚毀他，不以染心瞻顧戲笑，戒見清淨，志性淳質。（缺『B9』 - 『B11』）
- (4n) 『B12』復次，善現！是諸菩薩於諸世間文章、伎藝，雖得善巧，而不愛著，達一切法不可得故，皆雜穢語邪命攝故；於諸世俗外道書論，雖亦善知，而不樂著，達一切法本性空故。又諸世俗外道書論所說理事多有增減，於菩薩道非隨順故。
- (4o) 復次，善現！是諸菩薩復有所餘諸行、狀、相，吾當為汝分別解說。謂彼菩薩行深般若波羅蜜多，達諸法空，不樂觀察論說眾事、王事、賊事、軍事、戰事、城邑、聚落、象馬、車乘、衣服、飲食、臥具、華香、男女、好醜、園林、池沼、山海等

事，不樂觀察論說藥叉、羅刹娑等諸鬼神事，不樂觀察論說街衢、市肆、樓閣、商賈等事，不樂觀察論說歌舞、伎樂、俳優、戲謔等事，不樂觀察論說洲渚、舡匣、橋梁、珠寶等事，不樂觀察論說星辰、寒熱、風雨、吉凶等事，不樂觀察論說種種法義相違、文頌等事，不樂觀察論說異生、獨覺、聲聞相應之事，但樂觀察論說般若波羅蜜多相應之事。(缺『B13』，『B14』)

(4p)『B15』是諸菩薩常不遠離甚深般若波羅蜜多相應作意，常不遠離一切智心，不好乖違，樂和諍訟，常希正法，不愛非法，恒慕善友，不樂惡友，好出法言，離非法言，樂見如來，欣出家眾，十方國土有佛世尊宣說法要，願往生彼親近供養，聽聞正法。是諸菩薩多從欲界、色界天歿，生瞻部洲中國人趣，善於伎藝、咒術、經書、地理、天文及諸法義，或生邊地大國大城，與諸有情作大饒益。

(4q)復次，善現！是諸菩薩終不自疑：『我為退轉？為不退轉？』於自地法亦不生疑：『為有？為無？』於諸魔事善能覺了。如預流者，於自地法終不生疑，設有惡魔種種惑亂，不能傾動。如有造作無間業者，彼無間心恒常隨逐，乃至命盡不能捨離，設起餘心，不能遮伏。此諸菩薩亦復如是，不退轉心恒常隨逐，安住菩薩不退轉地，世間天人、阿素洛等不能動壞自所得法，於諸魔業若能覺知，所證法中常無疑惑，雖生他世，亦不發起聲聞、獨覺相應之心，亦不自疑：『我於來世能證無上佛菩提。』不安住自地，不隨他緣，於自地法無能壞者。所以者何？是諸菩薩成就無動無退轉智，一切惡緣不能傾動，其心堅固，踰於金剛。

(4r)設有惡魔作佛形像來至其所，作如是言：『汝今應求阿羅漢果，永盡諸漏，入般涅槃。汝未堪受大菩提記，亦未證得無生法忍，汝今未有不退轉地諸行、狀、相，如來不應授汝無上大菩提記。』是諸菩薩聞彼語時，心無變動，亦不退沒，無驚無怖，但作是念：『此定惡魔或魔眷屬化作佛像來至我所，作如是說，若真佛說，不應有異。』若諸菩薩聞彼語時，能作如是觀察憶念：『定是惡魔化為佛像，令我遠離甚深般若，令我棄捨無上菩提，是故不應隨彼所說。』時魔驚怖，即便隱沒。是諸菩薩定已安住不退轉地，過去諸佛久已授彼大菩提記。所以者何？是諸菩薩具不退地諸行、狀、相故，能覺知惡魔事業，令彼隱沒，

更不復現。

- (4s)『B16』復次，善現！是諸菩薩攝護正法，不惜身命，況餘珍財、朋友、眷屬。為護正法，勇猛精進，恒作是念：『如是正法即是諸佛清淨法身，一切如來恭敬供養。我今攝護如是正法，即為攝護諸佛法身。』復作是念：『如是正法通屬三世諸佛世尊，我亦墮在未來佛數，佛已授我大菩提記，諸佛正法即我所有，我今即為護自正法，我未來世得作佛時，亦為有情宣說此法。』是諸菩薩見斯義利，攝護如來所說正法，不惜身命、親屬、珍財，乃至菩提，常無懈倦。復次，善現！是諸菩薩聞佛說法，無惑無疑，聞已受持，常不忘失。」
- (05)爾時，善現便白佛言：「是諸菩薩但聞佛語無惑無疑，常不忘失？為聞菩薩及聲聞等所說正法，亦能如是？」
- (06)佛告善現：「是諸菩薩普聞一切有情言音文字義理，皆能通達，無惑無疑，常不忘失。所以者何？是諸菩薩於諸法中得無生忍，已善通達諸法實性，聞皆耳順，並無疑惑。又得聞持陀羅尼故，常能憶念，終不忘失。善現當知！是為不退轉菩薩摩訶薩諸行、狀、相。」

貪行品第十七

三、[修道不退轉相]

- 『C1』修道謂甚深，其深空性等，甚深離增益，及損減邊際。
- 『C2』於順決擇分，見道修道中，有數思稱量，及觀察修道。
- 『C3』此常相續故，諸下中上品，由下下等別，許為九種相。
- 『C4』《經》說無數等，非勝義可爾，佛許是世俗，大悲等流果。
- 『C5』不可說性中，不可有增減，則所說修道，何斷復何得。
- 如所說菩提，此辦所欲事，菩提真如相，此亦彼為相。
- 『C6』初心證菩提，非理亦非後，由燈喻道理，顯八深法性：
- 『D1』生『D2』滅與『D3』真如，『D4』所知及『D5』能知，
- 『D6』正行并『D7』無二，『D8』巧便皆甚深。

◎『C1』大乘修道甚深，是證甚深空性等之慧故。空性甚深，是離增益損減二邊之法界故。

- (07)『C1』爾時，善現便白佛言：「希有！世尊！是諸菩薩成就如是大功德聚。世尊能如殞伽沙劫說不退轉諸行、狀、相，唯願如

來應正等覺復為宣說甚深般若波羅蜜多相應義處，令諸菩薩安住其中，修菩提行，疾得圓滿。」

- (08) 佛告善現：「善哉！善哉！汝今乃能問如是事。諦聽！諦聽！當為汝說。善現當知！甚深般若波羅蜜多相應義處，謂空、無相、無願、無作、無生、無滅，非有寂靜、離染、涅槃增語所顯。」
- (09) 具壽善現復白佛言：「為但此法名深般若波羅蜜多相應義處？為一切法皆得名為甚深般若波羅蜜多相應義處？」
- (10a) 佛告善現：「餘一切法亦得名為甚深般若波羅蜜多相應義處。所以者何？謂一切色受想行識亦名甚深。」
- (10b) 善現！云何色乃至識亦名甚深？謂真如甚深故，色乃至識亦名甚深。復次，善現！若處無色，名色甚深，廣說乃至若處無識，名識甚深。」
- (11) 爾時，善現復白佛言：「希有！世尊微妙方便遮遣五蘊，顯示涅槃。」

◎『C2』大乘順抉擇分及見道與修道之中，於所見義三智行相，數數思惟，以量稱量，審細觀察。

- (12a) 『C2』佛告善現：「如是！如是！若諸菩薩能於如是甚深般若波羅蜜多相應義處審諦觀察。」
- (12b) 作如是念：『我今應如甚深般若波羅蜜多所教而住，我今應如甚深般若波羅蜜多所說而學。』
是諸菩薩由能如此依深般若波羅蜜多相應義處審諦觀察，精進修行乃至一日，所獲福聚無量無邊。
- (12c) 如貪行人復多尋伺，與他美女共為邀契，彼女隈礙不獲赴期，此人欲心熾盛流注。善現！於意云何？其人欲心於何處轉？」
- (13) 「世尊！此人欲心於女處轉，謂作是念：『彼何當來，共會於此歡娛戲樂？』」
- (14) 「善現！於意云何？其人晝夜幾欲念生？」
- (15) 「世尊！此人晝夜欲念甚多。」
- (16a) 佛告善現：「若諸菩薩依深般若波羅蜜多相應義處審諦觀察，精進修行乃至一日，所超生死流轉劫數，與貪行人經一晝夜所起欲念，其數量等。善現當知！是諸菩薩隨依如是甚深般若波羅蜜多相應義處審諦觀察，精進修行，隨能解脫能礙無上正等

菩提所有過失，是故菩薩依深般若波羅蜜多相應義處審諦觀察，精進修行無懈倦者，疾證無上正等菩提。

◎『C3』故此大乘修道常相續轉。如是大乘修道，許為九品，若於勝義由是空性之體性故不可分別，然於名言，就所斷所知障能取所取分別，有上中下三品，一一品中各分三品而為九品，如是能對治之修道亦由下下等差別分九品故，九品行相相續而生故。

(16b)『C3』善現當知！若諸菩薩依深般若波羅蜜多相應義處審諦觀察，精勤修行，經一晝夜所獲功德，勝諸菩薩離深般若波羅蜜多，經如殞伽沙數大劫布施功德，無量無邊。

(16c)復次，善現！若諸菩薩依深般若波羅蜜多相應義處審諦觀察，精進修行，經一晝夜所獲功德，勝諸菩薩離深般若波羅蜜多，經如殞伽沙數大劫以諸供具供養預流、一來、不還、應果、獨覺、菩薩、如來布施功德，無量無邊。

(16d)復次，善現！若諸菩薩依深般若波羅蜜多所說而住，經一晝夜，精勤修學布施、淨戒、安忍、精進、靜慮、般若所獲功德，勝諸菩薩離深般若波羅蜜多，經如殞伽沙數大劫精勤修學布施、淨戒、安忍、精進、靜慮、般若所獲功德，無量無邊。

(16e)復次，善現！若諸菩薩依深般若波羅蜜多所說而住，經一晝夜以微妙法施諸有情所獲功德，勝諸菩薩離深般若波羅蜜多，經如殞伽沙數大劫以微妙法施諸有情所獲功德，無量無邊。

(16f)復次，善現！若諸菩薩依深般若波羅蜜多所說而住，經一晝夜修三十七菩提分法及餘善根所獲功德，勝諸菩薩離深般若波羅蜜多，經如殞伽沙數大劫修三十七菩提分法及餘善根所獲功德，無量無邊。

(16g)復次，善現！若諸菩薩依深般若波羅蜜多所說而住，經一晝夜修行種種財施、法施，住空閑處，繫念思惟先所修行種種福業，迴向無上正等菩提所獲功德，勝諸菩薩離深般若波羅蜜多，經如殞伽沙數大劫修行種種財施、法施，住空閑處，繫念思惟先所修行種種福業，迴向無上正等菩提所獲功德，無量無邊。

(16h)復次，善現！若諸菩薩依深般若波羅蜜多所說而住，經一晝夜普緣三世佛及弟子功德善根，和合稱量，現前隨喜，迴向無上正等菩提所獲功德，勝諸菩薩離深般若波羅蜜多，經如殞伽

沙數大劫普緣三世佛及弟子功德善根，和合稱量，現前隨喜，迴向無上正等菩提所獲功德，無量無邊。」

- (17) 爾時，善現便白佛言：「如來常說諸行皆是分別所作，都非實有，以何因緣，此諸菩薩所獲功德無量無邊？」
- (18a) 佛告善現：「是諸菩薩行深般若波羅蜜多，亦常觀察所作善事空無所有，虛妄不實。如如觀察所作善事空無所有，虛妄不實，如是如是便能不離甚深般若波羅蜜多。」
- (18b) 如如不離甚深般若波羅蜜多，如是如是所獲功德無量無邊。」

◎『C4』他作是難：云何大乘修道九品決定？不應道理，佛在廣中略三部《般若經》中，於九品修道說一一品皆能引生無數無量無邊福德果故。

答曰：《經》說生無數等福德果者，非依勝義而說，於名言中無不應理之過，以於世俗大乘修道九品決定與生無數等福果不相違故。如來許彼是無緣大悲通達法界之等流果故。

- (19) 『C4』具壽善現便白佛言：「無量、無邊義有何別？」
- (20) 佛告善現：「言無量者，謂於此中，其量永息；言無邊者，謂於是處，數不可盡。」
- (21) 具壽善現復白佛言：「頗有因緣，色乃至識亦無量無邊耶？」
- (22) 佛告善現：「亦有因緣，色乃至識無量無邊。」
- (23) 具壽善現復白佛言：「何因緣故，色乃至識無量無邊？」
- (24) 佛告善現：「色乃至識皆性空故，無量無邊。」
- (25) 具壽善現復白佛言：「為但色受想行識空，為一切法皆悉空耶？」
- (26) 佛告善現：「我說諸法無不皆空。」
- (27) 具壽善現復白佛言：「無量無邊是何增語？」
- (28) 佛告善現：「無量無邊是空、無相、無願增語。」
- (29) 具壽善現復白佛言：「無量無邊為但是空、無相、無願，為更有餘義耶？」
- (30) 佛告善現：「於意云何？我豈不說一切法門無不皆空？」
- (31) 善現答言：「如來常說一切法門無不皆空。」
- (32) 佛告善現：「空即無盡，空即無量，空即無邊，空即餘義。是故，善現！一切法門雖有種種言說差別，而義無異。善現當知！諸法空理皆不可說，如來方便說為無盡，或說無量，或說無邊，或說為空，或說無相，或說無願，或說無作，或說無生，或說

無滅，或說非有，或說寂靜，或說離染，或說涅槃，諸如是等無量法門，義實無異，皆是如來方便演說。」

- (33) 爾時，善現便白佛言：「希有！世尊方便善巧，諸法實性皆不可說，而為有情方便顯示。如我解佛所說義者，諸法實性皆不可說。」
- (34) 佛告善現：「如是！如是！所以者何？一切法性皆畢竟空，無能宣說畢竟空者。」

◎『C5』他又難云：所說修道有何可斷及何可得？應無所得，以勝義非有故。於勝義不可說之修道性中，斷除所治增長能治不應理故。答曰：雖大乘修道勝義無增減，然斷除所治增長能治非不應理，例如菩提智慧法身雖勝義非有，然名言中可作有情事，如是大乘修道雖勝義無，然於名言許斷除所治等成辦義利故，此二亦無法喻不合之過，以此二於名言中利益有情亦同，菩提智慧法身以真如為相，修道亦以真如為相故。

- (35) 『C5』具壽善現復白佛言：「不可說義有增減不？」
- (36) 佛告善現：「不可說義無增無減。」
- (37) 具壽善現復白佛言：「若不可說義無增無減者，即應布施乃至般若波羅蜜多亦無增減。若此六種波羅蜜多亦無增減，云何菩薩以無增減波羅蜜多求證無上正等菩提，能近無上正等菩提？若諸菩薩增減六種波羅蜜多，便不能近無上菩提。」
- (38) 佛告善現：「如是！如是！不可說義波羅蜜多皆無增減，然諸菩薩行深般若波羅蜜多方便善巧，不作是念：『如是六種波羅蜜多有增有減。』但作是念：『唯有名想謂為布施乃至般若波羅蜜多。』是諸菩薩修行布施乃至般若波羅蜜多，持此六種俱行作意，并依此起心及善根，與諸有情平等共有，迴向無上正等菩提，如佛無上正等菩提微妙甚深而起迴向，由此迴向方便善巧增上勢力，能證無上正等菩提。」
- (39) 爾時，善現便白佛言：「何謂無上正等菩提？」
- (40) 佛告善現：「諸法真如是謂無上正等菩提。善現當知！諸法真如無增減故，諸佛無上正等菩提亦無增減。若諸菩薩數多安住如是真如相應作意，便近無上正等菩提。如是，善現！不可說義雖無增減，而不退失真如作意；波羅蜜多雖無增減，而不退失所求無上正等菩提。若諸菩薩安住如是真如作意，修行六種

波羅蜜多，便近無上正等菩提。」

◎『C6』他又難云：大乘修道所攝二種發心，應不能生大菩提果，以彼前前剎那皆不能生，前後剎那同時亦不能生，後後剎那亦不能生故。

答曰：依大乘發心漸次而起前後剎那，無不能生大菩提之過，喻如燈燭依漸次起前後剎那而能盡焦脂炷，如是大乘發心前後漸起無量剎那，而能引生大菩提果，及能瞭解八種甚深法性故。

(41)『C6』具壽善現便白佛言：「是諸菩薩為初心起能近菩提？為後心起能近菩提？若初心起能近菩提，初心起時，後心未起，無和合義；若後心起能近菩提，後心起時，前心已滅，無和合義。如是前後心、心所法，進退推徵，無和合義，如何可得積集善根？若諸善根不可積集，云何菩薩能近菩提？」

(42)佛告善現：「於意云何？如燃燈時，為初焰能焦炷？為後焰能焦炷？」

(43)善現答言：「如我意解，非初焰能焦炷，亦不離初焰；非後焰能焦炷，亦不離後焰。」

(44)佛告善現：「於意云何？炷為焦不？」

(45)善現答言：「世間現見其炷實焦。」

(46)佛告善現：「菩薩亦爾，非初心起能近菩提，亦不離初心；非後心起能近菩提，亦不離後心，而諸菩薩行深般若波羅蜜多方便善巧，令諸善根增長圓滿，能近菩提。」

○第八地菩薩通達八種甚深，謂：

◎『D1』所發心非唯以前後剎那而生菩提，亦非彼二隨一之體而能生，然知於名言中由修習與殊勝所證，互相觀待而生，名通達生甚深。

(47)『D1』具壽善現便白佛言：「如是緣起理趣甚深，非即前後諸心起故，能近菩提，非離前後諸心起故，能近菩提，而諸菩薩能近菩提。」

(48)佛告善現：「於意云何？若心滅已，更可生不？」

(49)善現對曰：「不也，世尊！是心已滅，不可更生。」

◎『D2』又已生諸法皆無自性勝義無滅，然於名言有滅亦不相違，名通達滅甚深。

(50)『D2』「於意云何？若心已生，有滅法不？」

「如是，世尊！若心已生，定有滅法。」

(51)「於意云何？有滅法，心非當滅不？」

「不也，世尊！有滅法，心決定當滅。」

◎『D3』又有學位中雖恒修真如，然非時不應作證，名通達真如甚深。

(52)『D3』「於意云何？無滅法，心為可生不？」

「不也，世尊！無滅法，心無可生義。」

(53)「於意云何？無生法，心為可滅不？」

「不也，世尊！無生法，心無可滅義。」

(54)「於意云何？無生滅法，心為可生滅不？」

「不也，世尊！無生滅法，心無可生滅義。」

(55)「於意云何？若法已滅，更可滅不？」

「不也，世尊！若法已滅，不可更滅。」

(56)「於意云何？若法已生，更可生不？」

「不也，世尊！若法已生，不可更生。」

(57)「於意云何？諸法實性有生滅不？」

「不也，世尊！諸法實性無生無滅。」

(58)「於意云何？心住為如，心真如不？」

「如是，世尊！如心真如，心如是住。」

(59)「於意云何？若心住如真如，是心為如真如、實際性常住不？」

「不也，世尊！是心非如真如、實際，其性常住。」

(60)「於意云何？諸法真如極甚深不？」

「如是，世尊！諸法真如極為甚深。」

◎『D4』又真如自性雖勝義無，然於一切法可隨修施等，名通達所知甚深。

(61)『D4』「於意云何？即真如是心不？」「不也，世尊！」

(62)「於意云何？離真如有心不？」「不也，世尊！」

(63)「於意云何？即心是真如不？」「不也，世尊！」

(64)「於意云何？離心有真如不？」「不也，世尊！」

『D5』又一切法真如為性雖於勝義都無所見而云見真實，名通達能知甚深。

(65)『D5』「於意云何？真如為能見真如不？」「不也，世尊！」

(66)「於意云何？汝為見有實真如不？」「不也，世尊！」

◎『D6』又真空法性於一切法都無可行，而是行真實義，名行甚深。

(67)『D6』「於意云何？若諸菩薩能如是行，是行深般若波羅蜜多不？」

「如是，世尊！若諸菩薩能如是行，是行深般若波羅蜜多。」

大般若波羅蜜多經卷第五百六十三

(68)佛告善現：「若諸菩薩能如是行，為行何處？」

(69)善現白言：「若諸菩薩能如是行，都無行處。所以者何？諸現行法皆不轉故。」

◎『D7』又於勝義無二性中修一切道，名無二甚深。

(70)『D7』佛告善現：「若諸菩薩行深般若波羅蜜多，為行何義諦？」

(71)善現白言：「若諸菩薩行深般若波羅蜜多，行勝義諦。」

(72)佛告善現：「於意云何？若諸菩薩行勝義諦，於勝義諦為取相不？」

(73)善現對曰：「不也，世尊！」

(74)佛告善現：「於意云何？是諸菩薩於勝義諦雖不取相，而行相不？」

(75)善現對曰：「不也，世尊！」

(76)佛告善現：「於意云何？是諸菩薩於勝義諦既不行相，為壞相不？」

(77)善現對曰：「不也，世尊！」

(78)佛告善現：「於意云何？是諸菩薩於勝義諦雖不壞相，而遣相不？」

(79)善現對曰：「不也，世尊！」

◎『D8』又圓滿一切資糧，而於勝義不得佛果，名通達巧便甚深。

(80)『D8』佛告善現：「是諸菩薩於勝義相若不壞遣，云何能斷取相想耶？」

(81)善現白言：「是諸菩薩不作是念：『我今壞相、遣相、斷想，亦未修學斷想之道。』若諸菩薩精進修行斷想道者，未具佛法，應墮聲聞或獨覺地，是諸菩薩方便善巧，雖於諸相及取相想深

知過失，而不壞遣，速斷此想，證於無相。何以故？一切佛法未圓滿故。」

(82) 佛告善現：「如是！如是！」

【第 39 義】：生死涅槃平等加行 (IV-9)

『E』諸法同夢故，不分別〔有寂〕，無業等問難，如《經》已盡答。

◎『E1』第八地根本智，是生死「有」與涅槃〔寂〕平等加行，由於勝義不分別生死、涅槃異性，是現證生死、涅槃真空之淨地智故。以通達所治生死與能治淨法，皆勝義無，名言幻影悉同夢故。

◎『E2』他作是難：若爾應無業果建立，以一切法皆勝義無故。

答云：不定。此等答難，《經》已盡說，即能斷諍故。

(83) 『E』時舍利子語善現言：「若諸菩薩夢中修行三解脫門，於深般若波羅蜜多有增益不？若諸菩薩覺時修行三解脫門，於深般若波羅蜜多既有增益，彼夢中修亦應增益。何以故？佛說夢、覺無差別故。」

(84) 善現報言：「若諸菩薩覺時修行甚深般若波羅蜜多，既名安住甚深般若波羅蜜多。是諸菩薩夢中修行甚深般若波羅蜜多，亦名安住甚深般若波羅蜜多。三解脫門於深般若波羅蜜多能為增益亦復如是，若夢若覺，義無別故。」

(85) 舍利子言：「夢中造業，有增益不？佛說諸法不實如夢，故於夢中所造諸業，應無增益，要至覺時憶想分別，乃有增益。」

(86) 善現報曰：「若諸有情夢斷他命，未至覺位，憶想分別，便自慶幸，彼所造業，不增益耶？」

(87) 舍利子言：「無所緣事，若思若業，俱不得生，要有所緣，思業方起。夢中思業，緣何而生？」

(88) 善現報言：「如是！如是！若夢若覺，無所緣事，思業不生，要有所緣，思業方起。何以故？舍利子！要於見聞覺知諸相有覺慧轉，由斯起染，或復起淨。若無見聞覺知諸相，無覺慧轉，亦無染淨。由此故知，若夢若覺，有所緣事，思業乃生，若無所緣，思業不起。」

(89) 時舍利子問善現言：「佛說所緣皆離自性，如何可說有所緣事，思業乃生，若無所緣，思業不起？」

(90) 善現答言：「雖諸思業及所緣事皆離自性，而由自心取相分別，

- 世俗施設說有所緣，起諸思業，非此所緣，離心別有。」
- (91) 時舍利子問善現言：「若諸菩薩夢中行施，施已，迴向無上菩提，是諸菩薩為實以施迴向無上佛菩提不？」
- (92) 善現報言：「慈氏菩薩久已受得大菩提記，宜可請問，定當為答。」
- (93) 時舍利子如善現言，恭敬請問慈氏菩薩。
- (94) 時慈氏菩薩語舍利子言：「何等名為慈氏菩薩，而謂能答尊者所問？為色耶？為受想行識耶？為色空耶？為受想行識空耶？且色非慈氏菩薩，亦不能答尊者所問；受想行識非慈氏菩薩，亦不能答尊者所問；色空非慈氏菩薩，亦不能答尊者所問；受想行識空非慈氏菩薩，亦不能答尊者所問。我都不見有法可名慈氏菩薩，亦都不見有法能答、有法所答，答處、答時及由此答皆亦不見。我都不見有法能記，有法所記，記處、記時及由此記皆亦不見。何以故？舍利子！以一切法本性皆空，畢竟推徵不可得故。」
- (95) 時舍利子問慈氏言：「仁者所說法，為如所證不？」
- (96) 慈氏答言：「我所說法，非如所證。所以者何？我所證法，不可說故。」
- (97) 時舍利子作是念言：「慈氏菩薩覺慧甚深，長夜修行甚深般若波羅蜜多，能作是說。」
- (98) 爾時，世尊知舍利子心之所念，即便告曰：「於意云何？汝由是法成阿羅漢，為見此法是可說不？」
- (99) 舍利子曰：「不也，世尊！」
- (100a) 佛言：「菩薩行深般若波羅蜜多，所證法性亦復如是，不可宣說。是諸菩薩方便善巧，不作是念：『我由此法，於大菩提已得受記，今得受記，當得受記。』不作是念：『我由此法，當證菩提。』若諸菩薩能如是行，是行般若波羅蜜多，於得菩提亦無怖畏，決定自知我當證故。是諸菩薩行深般若波羅蜜多，聞甚深法，不驚不怖，亦不沈沒。」

【第 40 義】：嚴淨佛土加行 (IV-10)

『F』如有情世間，器世未清淨，修治令清淨，即嚴淨佛土。

◎ 『F』 八地菩薩成就嚴淨佛土之加行，依善根成熟力，由所淨情器

世間之差別，佛土亦分二種：

如有情世間有饑渴等過，其能封治修天受用等；

如器世間塊石荊棘等過，其能對治修純金為地等；

——證得如是嚴淨佛土之加行故。

(100b) 『F』是諸菩薩若在曠野有惡獸處亦無怖畏。所以者何？是諸菩薩為欲饒益諸有情故，能捨一切內外所有，恒作是念：『諸惡獸等，欲噉我身，我當施與，令其充足。由此善根，令我布施波羅蜜多速得圓滿，疾證無上正等菩提。我當如是勤修正行，證得無上正等覺時，我佛土中，得無一切傍生、餓鬼。』

(100c) 是諸菩薩若在曠野有惡賊處亦無怖畏。所以者何？是諸菩薩為欲饒益諸有情故，能捨一切內外所有，樂修諸善，於身命財無所顧吝，恒作是念：『若諸有情競來劫奪我諸資具，或有因斯害我身命，我當於彼不生瞋恨。由此因緣，令我安忍波羅蜜多速得圓滿，疾證無上正等菩提。我當如是勤修正行，證得無上正等覺時，我佛土中，得無一切劫害、冤賊，由我佛土極清淨故，亦無餘惡。』

(100d) 是諸菩薩若在曠野無水之處亦無怖畏，作是念言：『我當宣說無上妙法，斷諸有情渴愛之病。設我由此渴乏命終，於諸有情必不捨離大悲作意，施妙法水。奇哉薄福！是諸有情居在如斯無水世界。我當如是勤修正行，證得無上正等覺時，我佛土中，得無如是一切焦渴乏水曠野。我當方便勸諸有情修勝福業，隨所在處，皆令具足八功德水。』

(100e) 是諸菩薩處飢饉土亦無怖畏，作是念言：『我當精進嚴淨佛土，當證無上正等覺時，我佛土中，得無如是一切飢饉，諸有情類具足快樂，隨意所須，應念即至，如諸天上，所念皆得。我當發起堅猛精進，令諸有情法願滿足，一切時處一切有情於一切種資緣無乏。』若諸菩薩無斯怖畏，定證無上正等菩提。

(100f) 是諸菩薩遇疾疫時亦無怖畏。何以故？是諸菩薩恒審思惟：『無法名病，亦無病者，一切皆空，不應怖畏。我當如是勤修正行，證得無上正等覺時，我佛土中，諸有情類等無三病，精進修行殊勝善法，如佛所說，常無懈廢。』

(100g) 是諸菩薩若念菩提，經久乃得，亦無怖畏。所以者何？前際劫數雖有無量，而一念頃憶念分別積集所成，後際劫數應知

亦爾，是故菩薩不應於中作久遠想而生怖畏。何以故？前際、後際劫數短長，皆一剎那心相應故。如是菩薩於可畏事能審思惟，不生怖者，疾證無上正等菩提。」

姊妹品第十八

- (101) 爾時，會中有一天女，從座而起，頂禮佛足，偏覆左肩，右膝著地，合掌恭敬白言：「世尊！我於此中亦無怖畏，願當來世得作佛時，亦為有情說如斯法。」作是語已，取妙金花，恭敬至誠散如來上。佛神力故令此金花上踊虛空，繽紛而住。
- (102) 爾時，世尊即便微笑，從面門出金色光明，普照十方，還從頂入。
- (103) 時阿難陀見聞是已，恭敬合掌白言：「世尊！何因何緣現此微笑？諸佛現笑非無因緣？」
- (104) 爾時，世尊告慶喜曰：「今此天女於未來世當成如來應正等覺，劫名星喻，佛號金花。慶喜當知！今此天女即是最後所受女身，捨此身已，便受男身，盡未來際，不復為女。從此歿已，生於東方不動佛國，勤修梵行，此女彼界便字金花。從不動佛世界歿已，復生他方有佛世界，隨所生處，常不離佛。如轉輪王從一臺殿至一臺殿，歡娛受樂，乃至命終，足不履地。此女亦爾，從一佛國至一佛國，隨所生處，常不遠離諸佛世尊乃至菩提，恒修梵行。」
- (105) 時阿難陀竊作是念：「今此姊妹當作佛時，亦應如今菩薩眾會。」
- (106) 佛知其念，告慶喜言：「如是！如是！如汝所念。金華菩薩當作佛時，亦為眾會宣說如是甚深般若波羅蜜多，彼會菩薩，其數多少，亦如我今菩薩眾會。聲聞弟子，其數難知，但可摠說無量無數。彼佛世界惡獸、惡賊、飢渴、病等，一切皆無，亦無諸餘煩惱怖畏。」
- (107) 爾時，慶喜復白佛言：「今此姊妹先於何佛初發無上正等覺心，種諸善根，迴向發願？」
- (108) 佛告慶喜：「此女過去燃燈佛所初發大心，亦以金華散彼佛上，迴向發願，今得值我。慶喜當知！我於過去燃燈佛所，以五莖華奉散彼佛，迴向發願，燃燈如來應正等覺知我根熟，與我受記：『汝於來世，當得作佛，號為能寂，界名堪忍，劫號為賢。』天女爾時聞佛授我大菩提記，歡喜踊躍，即以天華散彼佛上，迴向發願：『使我來世於此菩薩得作佛時，亦如今

佛現前授我大菩提記。」故我今者，與彼授記。」

(109) 爾時，慶喜聞佛所說，歡喜踊躍，白言：「世尊！今此姊妹久已修習大菩提心，迴向發願，今得成熟。」

(110) 佛告慶喜：「如是！如是！如汝所說。」

【第 41 義】：方便善巧加行 (IV-11)

境及此加行，『G1』超過諸魔怨，『G2』無住『G3』如願力，『G4』及不共行相。『G5』無著『G6』無所得，『G7』無相『G8』盡諸願，『G9』相狀與『G10』無量，十方便善巧。

○心境和合之方便善巧加行有十種，謂：

◎『G1』超過四魔之方便善巧加行；

○此處之四魔體性：

a 五蘊魔，謂五取蘊；

b 煩惱魔，謂三界一切煩惱；

c 死魔，謂不自在而命斷；

d 天魔，謂障礙修善之他化自在天眾。

——由彼等能障不死涅槃，故名曰魔。

○小乘證見道位：

a 於三寶所獲得證信，即降伏粗分天魔；

b 得有餘依涅槃時永斷一切煩惱，故降煩惱魔；

c 若證俱解脫阿羅漢，能加持壽行得自在，故降伏死魔；

d 證得無餘依涅槃時，盡滅惑業所感有漏取蘊，降伏粗分五蘊魔。

○大乘證得不退轉相：

a 於三寶所獲得證信，即降伏粗分天魔；

b, c, d 得八地，已於無分別智得自在，故降餘粗分三魔。

○微細四魔者，謂：

a 依無明習氣地及無漏業所起之意生身，即微細蘊魔；

b 無明習氣地，即微細煩惱魔；

c 不可思議變化生死，即微細死魔；

d 欲超彼三魔凡能作障之法，即微細天魔。

——降伏微細四魔，是法身功德，故降伏微細四魔與成佛同時也。

(111) 爾時，善現便白佛言：「云何菩薩行深般若波羅蜜多現入空定？」

- (112) 佛告善現：「若諸菩薩行深般若波羅蜜多，觀諸色受想行識空，作此觀時，不令心亂；若心不亂，則如實見法；**雖如實見法，而不作證。**」
- (113) 具壽善現復白佛言：「**云何菩薩雖見空法而不作證？**」
- (114a) 佛告善現：「是諸菩薩觀法空時，先作是念：『我應觀法諸相皆空，而於其中不應作證。我為學故，觀諸法空，不為證故，觀諸法空。**今是學時，非為證時。**』是諸菩薩未入定位，攝心於境，非入定時。菩薩爾時雖不退失菩提分法，而不盡漏。所以者何？是諸菩薩成就廣大智慧善根，能自審思：『我於空法，今時應學，不應作證。我應攝受甚深般若波羅蜜多，觀諸法空，圓滿一切菩提分法，**不應今時證於實際，墮二乘地，不得菩提。**』
- (114b) 『G1』譬如有人，勇健威猛，所立堅固，形貌端嚴，六十四能無不具足，於餘伎術，學至究竟，具多最勝功德尸羅，聰慧巧言，善能酬對，具慈具義，有大勢力，諸有所為，皆能成辦，善事業故，功少利多，由此眾人無不敬愛。有因緣故，將其父母妻子眷屬發趣他方，中路經過險難曠野，其中多有惡獸、怨賊，眷屬大小無不驚惶。其人自恃多諸伎術，威猛勇健，身意泰然，安慰父母妻子眷屬，勿有憂懼，必令無苦，疾度曠野，至安隱處。彼人爾時化作種種勇銳兵仗，遇諸怨敵，令彼見之，自然退散。故彼壯士於曠野中，惡獸、怨賊無傷害意，善權方便，將諸眷屬，疾度曠野，至安樂處。
- (114c) 諸菩薩眾亦復如是，愍生死苦諸有情類，繫念安住慈悲喜捨，攝受般若波羅蜜多殊勝善根，方便善巧如佛所許，持諸功德迴向無上正等菩提。雖具修空，而不作證，深心愍念一切有情，緣諸有情欲施安樂。是諸菩薩超煩惱品，亦超魔品及二乘地，雖住空定，而不盡漏；雖善習空，而不作證。爾時，菩薩住空定中，雖於相不執，而不證無相。

◎ 『G2』 **雖修空性不證實際無住之方便善巧加行；**

- (114d) 『G2』如堅翅鳥，飛騰虛空，自在翱翔，久不墮落，雖依空戲，而不住空，亦不為空之所拘礙。諸菩薩眾亦復如是，雖學空、無相、無願解脫門，而不住空、無相、無願，乃至佛法未極圓滿，終不依彼永盡諸漏。

◎ 『G3』 由昔願力引發利他之方便善巧加行；

(114e) 『G3』 如有壯夫，善閑射術，欲顯已伎，仰射虛空，為令空中箭不墮地，復以後箭射前箭筈，如是展轉，經於多時，箭箭相承，不令其墮，若欲令墮，便止後箭，爾時諸箭，方頓墮落。此諸菩薩亦復如是，行深般若波羅蜜多，攝受殊勝方便善巧，乃至善根未極成熟，終不中道證於實際。若時善根已極成熟，便證實際，得大菩提。是故菩薩行深般若波羅蜜多，方便善巧，皆應如是於深法性審諦觀察，若諸佛法未極圓滿，不應作證。」

◎ 『G4』 不共二乘之方便善巧行；

(115) 『G4』 爾時，善現便白佛言：「甚奇！世尊！希有！善逝！是諸菩薩能為難事，雖學深法，而不作證。」

(116a) 佛告善現：「如是！如是！此諸菩薩誓不棄捨一切有情，能辦斯事，謂諸菩薩發廣大心，為脫有情生死苦故，雖數引發三解脫門，而於中道不證實際。所以者何？所欲度脫不應捨故，方便善巧所護持故，不應中間證於實際。」

◎ 『G5』 於一切法無實執著之方便善巧加行；

◎ 『G6』 經無量劫修空解脫門之方便善巧加行；

(116b) 『G5』，『G6』 復次，善現！若諸菩薩於甚深處，欲以般若波羅蜜多審諦觀察，謂空、無相、無願等持三解脫門所行之處。是諸菩薩應作是念：『有情長夜起有情想，執有所得，引生種種邪惡見趣，輪迴生死，受苦無窮。我為斷彼邪惡見趣，應求無上正等菩提，為諸有情說深空法，令斷彼執，出生死苦。是故雖學空解脫門，而於中間不證實際。』是諸菩薩由起此念方便善巧，雖於中間不證實際，而不退失慈悲喜捨四種勝定。所以者何？是諸菩薩甚深般若波羅蜜多方便善巧所攝受故，倍增白法，諸根漸利，力、覺、道支轉復增益。」

◎ 『G7』 經無量劫修無相解脫門之方便善巧加行；

(116c) 『G7』 復次，善現！是諸菩薩應作是念：『有情長夜行諸相中，起種種執，由斯輪轉，受苦無窮。我為斷彼諸相執故，應求

無上正等菩提，為諸有情說無相法，令斷相執，出生死苦，由斯數入無相等持。』是諸菩薩由先成就方便善巧及所起念，雖數現入無相等持，而於中間不證實際。雖於中間不證實際，而不退失四無量定。所以者何？是諸菩薩甚深般若波羅蜜多方便善巧所攝受故，倍增白法，諸根漸利，力、覺、道支轉復增益。

◎『G8』經無量卻修無願解脫門之方便善巧加行；

(116d)『G8』復次，善現！是諸菩薩應作是念：『有情長夜其心常起常想、樂想、我想、淨想，由此引生顛倒執著，輪轉生死，受苦無窮。我為斷彼四顛倒故，應求無上正等菩提，為諸有情說無倒法，謂說生死無常、無樂、無我、無淨，唯有涅槃微妙寂靜，具足種種真實功德，由斯數入無願等持。』是諸菩薩由先成就方便善巧及所起念，雖數現入無願等持，而諸佛法未極圓滿，終不中間證於實際。雖於中間不證實際，而不退失四無量定。所以者何？是諸菩薩甚深般若波羅蜜多方便善巧所攝受故，倍增白法，諸根漸利，力、覺、道支轉復增益。

(116e)復次，善現！是諸菩薩應作是念：『有情長夜先已行有所得，今亦行有所得；先已行有相，今亦行有相；先已行顛倒，今亦行顛倒；先已行和合想，今亦行和合想；先已行虛妄想，今亦行虛妄想；先已行邪見，今亦行邪見，由斯輪轉，受苦無窮。我為斷彼如是過失，應求無上正等菩提，為諸有情說甚深法，令彼過失皆永斷除，不復輪迴，受生死苦，速證常樂真淨涅槃。』是諸菩薩由深愍念一切有情，成就殊勝方便善巧，甚深般若波羅蜜多所攝受故，於深法性常樂觀察，謂空、無相、無願、無作、無生、無滅、無性、實際。是諸菩薩成就如是殊勝智見，若墮無相無作之法，或住三界，俱無是處。是諸菩薩成就如是殊勝功德，捨諸有情而趣圓寂，不證無上正等菩提，饒益有情，亦無是處。

◎『G9』自善示現不退轉相狀之方便善巧加行；

(116f)『G9』復次，善現！若諸菩薩欲得無上正等菩提，應當請問諸餘菩薩：『云何菩薩修習一切菩提分法，引發何心，能令菩

薩學空、無相、無願、無作、無生、無滅、無性、實際而不作證，然修般若波羅蜜多？』若餘菩薩得此問時，作如是答：『諸菩薩眾但應思惟空、無相等，不為顯示，應念不捨一切有情，攝受殊勝方便善巧。』當知彼菩薩先未蒙諸佛授與無上正等菩提不退轉記。所以者何？彼諸菩薩未能開示、分別、顯了不退轉地諸菩薩眾不共法相，不如實知他所請問不退轉地諸行、狀、相，亦不能答。」

◎『G10』善巧五明處，經無量劫修真實義之無量加行。

(117)『G10』爾時，善現便白佛言：「頗有因緣知諸菩薩不退轉不？」

(118)佛告善現：「亦有因緣知諸菩薩是不退轉，謂有菩薩於深般若波羅蜜多，若聞不聞，能如實答先所請問，能如實行不退轉地諸菩薩行，由此因緣，知彼菩薩是不退轉。」

(119)具壽善現復白佛言：「以何因緣，有多菩薩行菩提行，少有能作如實答者？」

(120a)佛告善現：「雖多菩薩行菩提行，而少菩薩得受如是不退轉地微妙慧記，若有得受如是記者，皆於此中能如實答。善現當知！是諸菩薩善根明利，智慧深廣，世間天人、阿素洛等皆不能壞大菩提心。」

夢行品第十九

【第五事】頂加行

【第 42 義】：暖頂加行 (V-1)

夢亦於諸法，觀知如夢等，是至頂加行，
所有『H1』-『H12』十二相。

○《般若經》說，得暖位頂加行者，雖於夢中亦能觀一切諸法皆如夢境等十二種相，謂：

◎『H1』住加行道暖位利根菩薩，由醒覺時緣真空性薰修毗鉢舍那故，則於夢中亦能觀一切諸法皆如夢境。

◎『H2』又由醒時多修菩提心力，則於夢中亦能不發愛樂小乘道之心。

(120b)『H1』，『H2』復次，善現！若諸菩薩乃至夢中不著三界及二乘地，亦不稱譽，雖觀諸法如夢所見，而於實際能不證受，是不退轉諸菩薩相。

◎『H3』又由醒時不離見佛善跟成熟力，則於夢中亦能見如來百千大眾圍繞說法。

(120c)『H3』復次，善現！若諸菩薩夢中見佛，無量百千大眾圍遶而為說法，或見自身有如是事，是不退轉諸菩薩相。

◎『H4』又於夢中亦見佛騰空現通說法。

(120d)『H4』復次，善現！若諸菩薩夢中見佛，具諸相好，常光一尋，周匝照曜，與無量眾踊在虛空，現大神通，說正法要，化作化士，令往他方無邊佛國作諸佛事，或見自身有如是事，是不退轉諸菩薩相。

◎『H5』又於夢中亦能為無邊眾生發心說法謂我醒時當說一切諸法皆如夢事。

(120e)『H5』復次，善現！若諸菩薩夢見狂賊破壞村城，或見火起，焚燒聚落，或見惡獸欲來害身，或見怨家欲斬其首，或見父母臨當命終，或見自身眾苦來逼。雖見此等諸怖畏事，而不驚懼，亦無憂惱，從夢覺已，能正思惟：『三界非真，皆如夢見，我得無上正等覺時，當為有情說三界法，一切虛妄，皆如夢境。』是不退轉諸菩薩相。

◎『H6』又隨於覺、夢，若見地獄等有情，皆能發願願我成佛國土全無惡趣之名，隨念遠離惡趣。

(120f)『H6』復次，善現！若諸菩薩乃至夢中見有地獄、傍生、鬼界諸有情類，便作是念：『我當精勤修菩薩行，速趣無上正等菩提。我佛土中，得無地獄、傍生、鬼界惡趣及名。』從夢覺已，亦作是念。善現當知！是諸菩薩當作佛時，國土清淨，定無惡趣及彼名聲，是不退轉諸菩薩相。

◎『H7』又隨於覺、夢，見焚燒聚落等發諦實語加持令息。

(120g)『H7』復次，善現！若諸菩薩夢中見火燒地獄等諸有情類，或復見燒城邑、聚落，便發願言：『我若已受不退轉記，願此大火變為清涼。』若此菩薩作是願時，夢中見火即為頓滅，當知已受不退轉記；若此菩薩作是願時，夢中見火不為頓滅，

當知未受不退轉記。覺時見火燒諸城邑，火隨願滅、不滅亦然。

(120h) 復次，善現！若諸菩薩覺時見火燒諸城邑，便作是念：『我若實有不退轉相，願此大火即為頓滅，變作清涼。』念已發言，火不頓滅，然燒一里，越置一里，復燒一里，或燒一家，越置一家，復燒一家，如是展轉，其火乃滅，是諸菩薩當知亦已受不退記。然被燒者，謗法餘殃，或表當來謗法苦相。

◎ 『H8』 若見他人為藥叉等非人魅著，說諦實語令無魔害。

(120i) 『H8』 復次，善現！若諸菩薩見有男子，或有女人，現為非人之所魅著，受諸苦惱，不能遠離，便作是念：『若諸如來知我已得清淨意樂，知我已受不退轉記，已離聲聞、獨覺等地，必得無上正等菩提，願垂照察我心所念。我若實能修菩薩行，疾證無上正等菩提，濟拔有情生死苦者，願是男子，或此女人，不為非人之所擾惱，彼隨我語，即當捨去。』是諸菩薩作此語時，若彼非人不為去者，當知未受不退轉記；若彼非人即為去者，當知已受不退轉記。

(120j) 復次，善現！有諸菩薩實未受得不退轉記，見有男子，或有女人，現為非人之所魅著，受諸苦惱，不能遠離，即便輕爾發誠諦言：『若我已得不退轉記，令此男子或此女人，不為非人之所擾惱，彼隨我語，速當捨去。』爾時，惡魔為誑惑彼，即便驅逼非人令去。所以者何？惡魔威力勝彼非人，是故非人受魔教敕，即便捨去。時彼菩薩作是念言：『非人今去，是吾威力。所以者何？非人隨我所發誓願，即便放捨男子女人，無別緣故。』是諸菩薩既不覺知惡魔所作，謂是自力，輕餘菩薩，起增上慢，雖勤精進，終不能得無上菩提，墮二乘地，數為惡魔之所誑惑，是故菩薩應善覺知諸惡魔事，修諸善業。

(120k) 復次，善現！有諸菩薩實未受得不退轉記，遠離般若波羅蜜多方便善巧，未免魔惑，謂有惡魔為誑惑故，方便化作種種形像，至菩薩所，作如是言：『汝自知耶？過去諸佛已曾授汝大菩提記，汝身眷屬乃至七世名字差別，我悉善知，汝身生在某方某國某城某邑某聚落中，汝在某年某月某日某時某宿相王中生。』如是惡魔若見菩薩稟性柔軟，諸根暗鈍，便詐記言：『汝於先世所稟根性已曾如是。』若見菩薩稟性剛強，

諸根明利，便詐記言：『汝於先世亦曾如是。』若見菩薩具足種種多功德及餘勝行，便詐記言：『汝於先世亦曾如是具諸功德，應自慶慰，勿得自輕。』時彼菩薩聞此惡魔說其過現名等功德，歡喜踊躍，起增上慢，凌蔑毀罵諸餘菩薩。惡魔知己，復告之言：『汝定成就殊勝功德，佛已授汝大菩提記，已有殊勝瑞相現前。』爾時，惡魔為擾亂故，復矯化作種種形像，至菩薩所，現親愛言：『汝今已具不退轉德，應自敬重，勿輒尊人。』時此菩薩聞彼語已，增上慢心轉復堅固，令一切智遠而更遠，是故菩薩欲得菩提，應善覺知諸惡魔事。

(120l) 復次，善現！有諸菩薩不善了知名字實相，但聞名字，妄生執著，謂有惡魔方便化作種種形像，來告之言：『汝所修行，願行已滿，不久當證無上菩提，汝成佛時，當得如是殊勝功德、尊貴名號。』謂彼惡魔知此菩薩長夜思願：『我成佛時，當得如是尊貴名號。』隨其思願而記說之。時此菩薩遠離般若波羅蜜多方便善巧，聞魔記說，作是念言：『此人奇哉！為我記說當得成佛尊貴名號，與我長夜思願相應，由此故知，我定當得成佛，名號勝過餘人。』如如惡魔記彼名號，如是如是憍慢轉增，輕蔑諸餘實德菩薩，由斯轉遠無上菩提，當墮聲聞或獨覺地。是諸菩薩或有此身親近善友，至誠悔過，雖經多時流轉生死，而後當證無上菩提；若有此身，不遇善友，至誠悔過，彼定流轉生死多時，愚癡顛倒，後雖精進修諸善業，而墮聲聞或獨覺地。如是憍慢，輕餘菩薩，罪過四重及五無間無量倍數，是故菩薩應善覺知如是記說虛名號等微細魔事，不應憍慢，輕餘菩薩。

(120m) 復次，善現！有諸菩薩居山曠野，修遠離行，時有惡魔來至其所，恭敬讚歎，作如是言：『大士能修真遠離行，此遠離行賢聖稱譽，諸天龍神皆共守護。』善現當知！我不稱讚此遠離行以為真實。」

(121) 善現白言：「此遠離行若非真實，餘復是何？」

(122a) 佛告善現：「若諸菩薩或居城邑，或居山野，但離煩惱、二乘作意，行深般若波羅蜜多，是名菩薩真遠離行。此遠離行，諸佛世尊稱讚開許，菩薩應學，令諸菩薩疾證菩提。善現當知！魔所稱讚常居山野，宴坐思惟，猶雜煩惱、二乘作意，離深般若波羅蜜多，不能圓滿一切智智。有諸菩薩雖樂修行

魔所稱讚遠離行法，而心輕蔑恒居村城修真遠離諸餘菩薩。善現當知！是諸菩薩遠離般若波羅蜜多，雖經多時居深山野，修遠離行，而不了知真遠離法，增長憍慢，於二乘地深生樂著，終不能得無上菩提，非佛世尊稱讚開許，亦非菩薩所應修行。

(122b) 善現當知！我所稱讚諸菩薩眾真淨遠離法，是諸菩薩都不成就，彼於真淨遠離行中亦不見有相似行相。而諸惡魔為誑惑彼，令生憍慢，輕餘菩薩，來至空中，慇懃讚勸，言：『是真淨遠離行法。』善現當知！是諸菩薩雖居山野而心喧雜，不能修學真遠離行。有諸菩薩雖居村城而心寂靜，常能修學真遠離行。善現當知！是諸菩薩於常修學真遠離行諸菩薩眾，輕弄、毀訾如旃荼羅；於不能修真遠離行諸菩薩眾，供養、尊重如佛世尊。

(122c) 善現當知！是諸菩薩遠離般若波羅蜜多，發起種種分別執著，作是念言：『我所修學是真遠離，故為非人來至我所稱讚護念。居城邑者，身心擾亂，誰當護念，稱讚敬重？』是諸菩薩心多憍慢，煩惱惡業晝夜增長。善現當知！是諸菩薩於菩薩眾為旃荼羅穢汙菩薩摩訶薩眾，亦是天上人中大賊，誑惑天人、阿素洛等，其身雖服沙門法衣，而心常懷怨賊意樂。諸有發趣菩薩乘者，不應親近供養恭敬。所以者何？此諸人等，懷增上慢，外似菩薩，內多煩惱，惡業增盛。是故，善現！若諸菩薩真實不捨一切智智，求證無上正等菩提，普為利樂諸有情者，不應親近如是惡人。

(122d) 善現當知！諸菩薩眾常應精進修真事業，厭離生死，不著三界，於彼惡賊旃荼羅人，常應發生慈悲喜捨，應作是念：『我不應起如彼惡人所起過患，設當失念，如彼暫起，即應覺知，令速除滅。』是故菩薩欲證無上正等菩提，當善覺知諸惡魔事，應勤精進遠離除滅如彼菩薩所起過患，勤求無上正等菩提。若諸菩薩如是學者，是為善巧覺知魔事。

大般若波羅蜜多經卷第五百六十四

勝意樂品第二十

◎ 『H9』又由自具通神，能親近映蔽魔業之善知識。

(122e) 『H9』復次，善現！若諸菩薩以勝意樂欲證無上正等菩提，

常應親近供養恭敬，尊重、讚歎真淨善友。」

(123) 爾時，善現便白佛言：「何等名為菩薩善友？」

(124a) 佛告善現：「諸佛皆名菩薩善友，若能宣說甚深般若波羅蜜多，教誡教授諸菩薩眾，令於般若波羅蜜多甚深法門能悟入者，亦得名為菩薩善友。布施、淨戒、安忍、精進、靜慮、般若波羅蜜多當知亦名菩薩善友。如是六種波羅蜜多與諸菩薩為師為導，為明為炬，為光為照，為舍為護，為歸為趣，為洲為渚，為父為母，過去、未來、現在諸佛皆依六種波羅蜜多而得成辦功德事業。所以者何？如是六種波羅蜜多，普能攝受一切佛法。是故，善現！若諸菩薩欲證無上正等菩提，應學六種波羅蜜多。」

◎ 『H10』 又一切種為利他故修學般若波羅蜜多。

(124b) 『H10』復次，善現！若諸菩薩欲學六種波羅蜜多，應於般若波羅蜜多甚深經典至心聽聞、受持、讀誦，觀察義趣，請決所疑。所以者何？如是般若波羅蜜多甚深經典，能與六種波羅蜜多為尊為導，為生養母。善現當知！若諸菩薩欲得不隨他教行，欲住不隨他教地，欲斷一切有情疑，欲滿一切有情願，應學如是甚深般若波羅蜜多。」

◎ 『H11』 又於一切法無真實執著。

(125) 『H11』具壽善現便白佛言：「甚深般若波羅蜜多以何為相？」

(126) 佛告善現：「甚深般若波羅蜜多無礙為相。」

(127) 爾時，善現復白佛言：「頗有因緣，甚深般若波羅蜜多無礙之相，餘一切法亦得有耶？」

(128) 佛告善現：「有因緣故，甚深般若波羅蜜多無礙之相，餘一切法亦可說有。所以者何？以一切法無不皆如甚深般若波羅蜜多是空、遠離。」

(129) 具壽善現復白佛言：「若一切法皆空、遠離，云何有情有染有淨？所以者何？非空、遠離法可說有染淨，非空、遠離能證菩提，非離空、遠離有別法可得，云何令我解如是義？」

(130) 佛告善現：「於意云何？有情長夜有我等心，執我等不？」

(131) 善現對曰：「如是，世尊！」

(132) 佛告善現：「於意云何？有情所執我及我所空、遠離不？」

- (133) 善現對曰：「如是，世尊！」
- (134) 佛告善現：「於意云何？豈不有情由我我所，流轉生死？」
- (135) 善現對曰：「如是，世尊！」
- (136) 佛告善現：「如是有情流轉生死，施設雜染及清淨者。由諸有情虛妄執著我及我所，說有雜染，而於其中無雜染者；由諸有情不妄執著我及我所，說有清淨，而於其中無清淨者。是故，善現！雖一切法皆空、遠離，而諸有情亦可施設有染有淨，若諸菩薩能如是行，名行般若波羅蜜多。」

◎ 『H12』 又近佛菩提。

- (137) 『H12』 具壽善現便白佛言：「希有！世尊！雖一切法皆空、遠離，而諸有情有染有淨。若諸菩薩能如是行，則不行色受想行識，世間天人、阿素洛等，皆不能伏，普勝一切聲聞、獨覺所行之行，至無勝處，是諸菩薩由此般若波羅蜜多相應作意，晝夜安住方便善巧，趣向無上正等菩提，疾證無上正等菩提。」

【第 43 義】：頂位頂加行 (V-2)

『I.1』 - 『I.16』 盡瞻部有情，供佛善根等，眾多善為喻，說十六增長。

○安住頂位頂加行之菩薩智，此以瞻部洲眾生為喻，乃至盡其三千大千世界有情供養諸佛所有善根等眾多為喻，此福較彼尤多以十六種增長為體也。福德十六增長者，謂：

◎ 『I-1』 瞻部洲等三千世界諸有情類，以香花等供養如來，較此福德尤為增長。

- (138) 『I.1』 佛告善現：「如是！如是！復次，善現！於意云何？假使於此瞻部洲中一切有情，非前非後，皆得人身，發菩提心，盡壽布施，持此布施迴向菩提，由此因緣得福多不？」
- (139) 善現對曰：「甚多，世尊！」
- (140a) 佛告善現：「若有菩薩下至一日安住般若波羅蜜多相應作意，所獲功德，甚多於前，無量無數。所以者何？如是菩薩如安住甚深般若波羅蜜多相應作意，如是如是堪為一切有情福田，由此菩薩所起慈心，諸有情類無能及者，唯除如來應正等覺。」

(140b) 如是菩薩具勝妙慧，由勝妙慧，見諸有情受大苦惱，如被刑戮，起大悲心。復以天眼見有情類成無間業，墮無暇處，受諸苦惱，或為見網之所覆蔽，不得正道。見已悲愍，生大厭怖，普緣一切有情世間，起大慈悲相應作意：『我當普為一切有情作大導師，令脫眾苦。』雖作是念，而不住此想，亦不住餘想，是名菩薩大慧光明。

(140c) 由住此住，能作一切世間福田，雖未證得一切智智，而於菩提已不退轉，堪受施主一切供養。如是菩薩善住般若波羅蜜多，既能畢竟報施主恩，亦能親近一切智智。是故菩薩欲不虛受世間信施，欲示有情真淨道路，欲為有情作大饒益，欲為世間作大明照，欲脫有情生死牢獄，欲施有情清淨法眼，應常安住甚深般若波羅蜜多相應作意。

◎ 『I-2』 成就思惟甚深般若波羅蜜多，較前福德尤為超勝。

(140d) 『I.2』 由此作意，所有言說皆與般若波羅蜜多理趣相應，諸餘作意，無容暫起。所以者何？如是菩薩甚深般若波羅蜜多相應作意，流注相續。譬如有人，先未曾有末尼寶珠，後時遇得，歡喜自慶，遇緣還失，生大憂惱，常懷歎惜，未曾離念，思當何計，還得此珠。彼人由是相應作意，緣此寶珠，無時暫捨。菩薩亦爾，應常安住甚深般若波羅蜜多相應作意，若不安住如是作意，則為喪失一切智智相應作意。」

(141) 爾時，善現便白佛言：「若一切法及諸作意皆離自性，云何菩薩不離般若一切智智相應作意？」

(142) 佛告善現：「若諸菩薩知一切法及諸作意皆離自性，是諸菩薩不離般若一切智智。所以者何？甚深般若一切智智及諸作意自性皆空，無增無減。」

◎ 『I-3』 若得無生法忍較前福德尤為超勝。

(143) 『I.3』 具壽善現復白佛言：「若深般若波羅蜜多自性常空，無增無減，云何菩薩增長般若波羅蜜多，能近菩提？」

(144) 佛告善現：「若諸菩薩行深般若波羅蜜多，知一切法無增無減，於深般若波羅蜜多亦無增減。若諸菩薩能如是知，聞一切法無增無減，不驚不怖，亦不沈沒。是諸菩薩行深般若波羅蜜多已到究竟，安住菩薩不退轉地，疾證無上正等菩提。」

- (145) 具壽善現白言：「世尊！為即般若波羅蜜多，能行般若波羅蜜多不？」「不爾，善現！」
- (146) 「世尊！為離般若波羅蜜多，有法可得，能行般若波羅蜜多不？」「不爾，善現！」
- (147) 「世尊！為即般若波羅蜜多空，能行般若波羅蜜多不？」「不爾，善現！」
- (148) 「世尊！為離般若波羅蜜多空，有法可得，能行般若波羅蜜多不？」「不爾，善現！」
- (149) 「世尊！為即空，能行般若波羅蜜多不？」「不爾，善現！」
- (150) 「世尊！為離空，有法可得，能行般若波羅蜜多不？」「不爾，善現！」
- (151) 「世尊！為即空，能行空不？」「不爾，善現！」
- (152) 「世尊！為離空，有法可得，能行空不？」「不爾，善現！」
- (153) 「世尊！為即般若波羅蜜多，能行空不？」「不爾，善現！」
- (154) 「世尊！為離般若波羅蜜多，有法可得，能行空不？」「不爾，善現！」
- (155) 「世尊！為即色受想行識等，能行般若波羅蜜多及行空不？」「不爾，善現！」
- (156) 「世尊！為離色受想行識等，有法可得，能行般若波羅蜜多及行空不？」「不爾，善現！」
- (157) 「世尊！為即色受想行識等空，能行般若波羅蜜多及行空不？」「不爾，善現！」
- (158) 「世尊！為離色受想行識等空，能行般若波羅蜜多及行空不？」「不爾，善現！」
- (159) 爾時，善現便白佛言：「若爾，菩薩以何等法能行般若波羅蜜多及能行空？」
- (160) 佛告善現：「於意云何？汝見有法能行般若波羅蜜多及行空不？」
- (161) 善現對曰：「不也，世尊！」
- (162) 佛告善現：「於意云何？汝見有般若波羅蜜多及見有空是諸菩薩所行處不？」
- (163) 善現對曰：「不也，世尊！」
- (164) 佛告善現：「於意云何？汝所不見法，是法可得不？」
- (165) 善現對曰：「不也，世尊！」

- (166) 佛告善現：「於意云何？不可得法，頗有生不？」
(167) 善現對曰：「不也，世尊！」
(168) 佛告善現：「汝所不見、所不得法所有實相即是菩薩無生法忍，菩薩成就如是忍者，便於無上正等菩提堪得受記，亦名如來無所畏道。若諸菩薩勤行此道，不得無上正等覺智、大智、妙智、自然人智、一切智智及如來智，無有是處。」

◎ 『I-4』 若由頂加行力瞭解能證所證諸法皆於勝義無所得較前福德尤為超勝。

- (169) 『I.4』 具壽善現復白佛言：「菩薩為以諸法無生，於佛菩提得受記不？」
(170) 「不爾，善現！」
(171) 「世尊！若爾，菩薩云何受菩提記？」
(172) 佛告善現：「於意云何？汝見有法於佛菩提得受記不？」
(173) 善現對曰：「不也，世尊！我不見法於佛菩提堪得受記，亦不見法於佛菩提有能證者，證時、證處及由此證、若所證法皆亦不見。」
(174) 佛告善現：「以一切法不可得故，不應念言：『於佛菩提，此是能證，此是所證。』」

◎ 『I-5』 較瞻部洲一切有情皆行十善、得四靜慮、四無色定尤為超勝。

- (175) 『I.5』 時天帝釋便白佛言：「如是般若波羅蜜多最為甚深，難見難覺，畢竟離故，非少善根諸有情類能於如是甚深般若波羅蜜多書寫、聽聞、受持、讀誦。」
(176) 爾時，佛告天帝釋言：「如是！如是！如汝所說。憍尸迦！假使於此瞻部洲中，一切有情悉皆成就十善業道，如是福聚，於能書寫、聽聞、受持、讀誦般若波羅蜜多甚深經典所獲功德，百分不及一，千分不及一，乃至鄔波尼殺曇分亦不及一。」
(177) 時有苾芻告天帝釋：「有於般若波羅蜜多書寫、聽聞、受持、讀誦所獲功德，勝於仁者？」
(178a) 天帝釋言：「彼有情類初發心時尚勝於我，況於般若波羅蜜多書寫、聽聞、受持、讀誦，精勤修學，如理思惟。苾芻當知！彼有情類即是菩薩。如是菩薩所獲福聚，普勝一切世間

天人、阿素洛等。如是菩薩所獲福聚，亦勝預流、一來、不還、應果、獨覺，亦勝菩薩遠離般若波羅蜜多方便善巧，修行布施、淨戒、安忍、精進、靜慮波羅蜜多及餘功德。苾芻當知！若諸菩薩如說修行甚深般若波羅蜜多方便善巧，是諸菩薩普勝一切世間天人、阿素洛等，世間天人、阿素洛等皆應供養。所以者何？是諸菩薩於深般若波羅蜜多，能如說行，究竟隨轉。是諸菩薩能紹一切智智種性，令不斷絕，常不遠離諸佛世尊，常不遠離妙菩提座，常能濟拔溺生死泥諸有情類。是諸菩薩如是學時，常學菩薩所應學法，不學二乘所應學法。

◎『I-6』又由證得頂加行之力諸天眾皆來自所。

(178b)『I.6』諸天神等常隨擁護，四大天王來至其所，供養恭敬，咸作是言：『善哉大士！當勤精進學菩薩眾所應學法，疾當安坐妙菩提座，速證無上正等菩提，如昔天王所奉四鉢，我亦當奉。』苾芻當知！是諸菩薩，我等天帝尚往其所供養恭敬，況餘天神。苾芻當知！是諸菩薩如是學時，一切如來及諸菩薩、諸天龍等，常隨守護。由此因緣，世間危厄，身心憂苦，皆不侵害，所有疾病亦復不起。苾芻當知！是諸菩薩獲如是等現法勝利，後世功德無量無邊。」

◎『I-7』又由頂加行力，映蔽一切諸魔。

(179)『I.7』時阿難陀竊作是念：「天主帝釋為自辯才讚說如是菩薩功德？為是如來威神加被？」

(180)時天帝釋承佛威神，知阿難陀心之所念，白言：「大德！非我辯才，皆是如來威神加被。」

(181a)爾時，佛告阿難陀言：「如是！如是！今天帝釋承佛威神，能如是說。慶喜當知！若時菩薩於深般若波羅蜜多思惟修學，三千世界一切惡魔皆生疑怖，咸作是念：『此諸菩薩為於中間便證實際，墮二乘地？為趣無上正等菩提，轉妙法輪，空我境界？』」

修學品第二十一

(181b)復次，慶喜！若時菩薩修學般若波羅蜜多，晝夜精勤，常不捨離，時魔眷屬如箭入心，怖戰憂惶，不任自處。復次，慶

喜！若時菩薩修學般若波羅蜜多，晝夜精勤，將至究竟，時魔眷屬來至其所，化作種種可怖畏事，欲令菩薩身心驚惶，於大菩提暫退便足。

- (181c) 復次，慶喜！非諸菩薩修學般若波羅蜜多皆為惡魔之所擾亂，若諸菩薩先世聞此甚深般若波羅蜜多，無信解心，毀訾誹謗，是諸菩薩修學般若波羅蜜多，便為惡魔之所擾亂。復次，慶喜！若諸菩薩聞深般若波羅蜜多，疑惑猶豫為有為無，是諸菩薩修學般若波羅蜜多，便為惡魔之所擾亂。
- (181d) 復次，慶喜！若諸菩薩遠離善友，惡友攝持，不聞般若波羅蜜多甚深義處；由不聞故，不知不見，云何修學甚深般若波羅蜜多？是諸菩薩修學般若波羅蜜多，便為惡魔之所擾亂。復次，慶喜！若諸菩薩攝受邪法，爾時，惡魔便作是念：『今此菩薩與我為伴，令無量人棄捨正法，滿我所願。』是諸菩薩修學般若波羅蜜多，便為惡魔之所擾亂。
- (181e) 復次，慶喜！若諸菩薩聞說般若波羅蜜多甚深經時，告餘菩薩：『如是般若波羅蜜多理趣甚深，難信難解，何用書寫、受持、讀誦？我尚不能得其源底，況餘薄福淺智者哉。』是諸菩薩修學般若波羅蜜多，便為惡魔之所擾亂。復次，慶喜！若諸菩薩輕餘菩薩，謂作是言：『我能安住真遠離行，汝等皆無。』爾時，惡魔歡喜慶快，是諸菩薩修學般若波羅蜜多，便為惡魔之所擾亂。
- (181f) 復次，慶喜！若時菩薩自恃名姓及所修行杜多功德，輕蔑諸餘修勝善法諸菩薩眾，常自稱讚，毀訾他人，無不退轉諸行、狀、相而謂自有，起煩惱業。爾時，惡魔便大歡喜，作如是念：『今此菩薩令我境土宮殿不空，增益地獄、傍生、鬼界。』是時，惡魔助其神力，令轉增益威力辯才，由此多人信受其語，因斯勸發同彼惡見；同惡見已，隨彼邪學；隨邪學已，煩惱熾盛，心顛倒故，所起三業皆能感得不可愛果。由此因緣，增長惡趣，令魔宮殿轉更充滿，由此惡魔歡喜踊躍，諸有所作，隨意自在，是諸菩薩修學般若波羅蜜多，便為惡魔之所擾亂。
- (181g) 復次，慶喜！若時菩薩與求聲聞、獨覺乘者更相毀蔑，鬥諍誹謗。爾時，惡魔便作是念：『今此菩薩雖遠菩提，而不極遠，雖近惡趣，而不甚近。』若時菩薩與菩薩乘善男子等更相毀

蔑，鬥諍誹謗。爾時，惡魔便作是念：『此二菩薩極遠菩提，甚近惡趣。』作是念已，歡喜踊躍，增其威勢，令二朋黨鬥諍不息，使餘無量無邊有情皆於大乘深心厭離，是諸菩薩修學般若波羅蜜多，便為惡魔之所擾亂。

- (181h) 復次，慶喜！若諸菩薩未得菩提不退轉記，於得菩提不退轉記諸菩薩所，起損害心，鬥諍輕蔑，罵辱誹謗，是諸菩薩隨起爾所念不饒益心，還退爾所劫曾修勝行，經爾所時遠離善友，還受爾所生死繫縛。若不棄捨大菩提心，還爾所劫被弘誓鎧，勤修勝行，時無間斷，然後乃補爾所功德。」
- (182) 爾時，慶喜便白佛言：「是諸菩薩所起惡心生死罪苦，為要流轉經爾所時？為於中間亦得出離？是諸菩薩所退勝行，為要精勤經爾所劫，時無間斷，然後乃補？為於中間有復本義？」
- (183a) 佛告慶喜：「我為菩薩、獨覺、聲聞說有出罪還補善法。慶喜當知！若諸菩薩造此罪後，心無慚愧，懷惡不捨，不能如法發露悔過，我說彼類於其中間無出罪苦還補善義。若諸菩薩造此罪後，深生慚愧，心不繫惡，尋能如法發露悔過，作如是念：『我今已得難得人身，何容復起如是過惡，失大善利？我應饒益一切有情，何乃於中反作衰損？我應恭敬一切有情，如僕事主，何乃於中反生憍慢，毀辱凌蔑？我應忍受一切有情捶打訶罵，何容於彼反以暴惡身語加報？我應和解一切有情，令相敬愛，何容復起勃惡語言，與彼乖諍？我應堪耐一切有情長時履踐，猶如道路，亦如橋梁，何容於彼反加凌辱？我求無上正等菩提，為拔有情生死大苦，令得究竟安樂涅槃，何容反欲加之以苦？我應從今，盡未來際，如愚如啞，如聾如盲，於諸有情無所分別，假使斬截頭足手臂，挑目割耳，剝鼻截舌，鋸解一切身分支體，於彼有情終不起惡，若我起惡，即便退壞所發無上正等覺心，障礙所求一切智智，不能利益安樂有情。』慶喜當知！是諸菩薩，我說中間有出罪苦還補善義，非要經於爾所劫數，惡魔於彼不能擾亂，疾證無上正等菩提。」
- (183b) 復次，慶喜！諸菩薩眾與求聲聞、獨覺乘者，不應交涉；設與交涉，不應共住；設與共住，不應與彼論義決擇。勿因此故，起忿恚心，或復令生羸惡言說，便礙無上正等菩提，亦壞無邊菩薩行法。

◎ 『I-8』 恭敬其他菩薩等同大師。

(183c) 『I.8』 若諸菩薩與菩薩乘善男子等，共住相視，尊重敬事，應如大師。復作是念：『彼是我等真淨善友，同載一船，同一所趣，同行一道，同一事業，學時、學處及所學法、若由此學，皆無有異。』復作是念：『若彼菩薩住雜作意，我當於中不同彼學；若彼菩薩離雜作意，我當於中常同彼學。』若諸菩薩如是學時，疾證所求一切智智。」

◎ 『I-9』 於一切種慧學清淨善巧方便二種資糧。

◎ 『I-10』 由頂加行力，得佛種性。

◎ 『I-11』 獲得殊勝發心等得佛果之因。

(184) 『I.9』 爾時，善現便白佛言：「若諸菩薩為盡故學，為不生故學，為離故學，為滅故學，是學一切智智不？」

(185) 佛告善現：「若諸菩薩如是學時，非學一切智智。」

(186) 具壽善現復白佛言：「何緣菩薩如是學時，非學一切智智？」

(187) 佛告善現：「於意云何？佛證真如極圓滿故，說名如來應正等覺，如是真如可說為盡，乃至滅不？」

(188) 善現對曰：「不也，世尊！何以故？真如無相，不可說盡，乃至滅故。」

(189a) 佛告善現：「是故菩薩如是學時，非學一切智智。若諸菩薩不為盡故學，乃至不為滅故學，如是學時，是學一切智智，亦學般若波羅蜜多，亦學佛地、力、無畏等無邊佛法。善現當知！若諸菩薩如是學時，至一切學究竟彼岸，天、魔、外道皆不能伏，息除諸惡，眾善圓滿，少分有情能如是學，是故菩薩欲墮極少有情數者，當勤修學甚深般若波羅蜜多方便善巧。(缺『I.10』,『I.10』)」

根栽品第二十二

◎ 『I-12』 由頂加行力不生六度所治品之心。

◎ 『I-13』 不於色等起執實之心。

(189b) 『I.12』 復次，善現！若諸菩薩如是修學甚深般若波羅蜜多方便善巧，不起根栽俱行之心，不起慳吝、犯戒、瞋忿、懈怠、散動、惡慧、猶豫俱行之心。(缺『I.13』)

◎『I-14』了知〔甚深般若波羅蜜多〕攝餘波羅蜜多。

(189c)『I.14』復次，善現！若諸菩薩如是修學甚深般若波羅蜜多方便善巧，能攝一切波羅蜜多。譬如身見，能具攝受六十二見，如是般若波羅蜜多攝受一切波羅蜜多。譬如命根，遍能攝受所餘諸根，命根滅時，諸根隨滅，如是般若波羅蜜多攝受一切波羅蜜多，若失般若波羅蜜多，則失一切波羅蜜多。所以者何？甚深般若波羅蜜多能持一切殊勝善法，能滅一切惡不善法。是故，善現！若諸菩薩欲攝一切波羅蜜多，應學般若波羅蜜多。

◎『I-15』獲得圓滿三乘智德。

- (189d)『I.15』若諸菩薩能學般若波羅蜜多，於諸有情最尊最勝。復次，善現！於意云何？於此三千大千世界諸有情類寧為多不？」
- (190)善現對曰：「甚多，世尊！瞻部洲中諸有情類其數尚多，況三千界。」
- (191)佛告善現：「假使三千大千世界一切有情皆成菩薩，一一皆以上妙樂具，盡壽供養一切有情，於意云何？是諸菩薩由此因緣得福多不？」
- (192)善現對曰：「甚多，世尊！」
- (193)佛告善現：「若有菩薩修學般若波羅蜜多如彈指頃，其福勝彼，無量無邊。所以者何？甚深般若波羅蜜多具大義用，能攝無上正等菩提。是故，善現！若諸菩薩欲證無上正等菩提，欲為一切有情上首，欲普饒益一切有情，欲為一切有情依怙，欲證一切圓滿佛法，欲行諸佛所行境界，欲遊戲佛所遊戲處，欲作諸佛大師子吼，欲以一音為三千界一切有情宣說正法，普令一切獲大饒益，當學般若波羅蜜多。善現當知！我曾不見有諸菩薩修學般若波羅蜜多，而不能得世出世間功德勝利。」
- (194)爾時，善現便白佛言：「菩薩修學甚深般若波羅蜜多，豈亦能得聲聞、獨覺功德善根？」
- (195a)佛告善現：「聲聞、獨覺功德善根，此菩薩眾亦皆能得，但於其中心不樂住。以勝智見，無倒觀察，超過聲聞及獨覺地，為彼開示，令皆證得。復次，善現！若諸菩薩如是學時，則

為一切世間天人、阿素洛等真淨福田，超諸世間聲聞、獨覺福田之上，疾能證得一切智智，常不捨離甚深般若波羅蜜多。菩薩若能修行般若波羅蜜多，當知已於一切智智得不退轉，遠離聲聞、獨覺等地，親近無上正等菩提。

◎『I-16』由頂加行力，近〔大菩提〕。

(195b)『I.16』善現當知！若諸菩薩作如是念：『此是般若波羅蜜多，我由般若波羅蜜多，當能引發一切智智。』是諸菩薩非行般若波羅蜜多，亦於般若波羅蜜多不知不見。若諸菩薩不作是念：『此是般若波羅蜜多，我由般若波羅蜜多，當能引發一切智智。』是諸菩薩是行般若波羅蜜多，亦於般若波羅蜜多能知能見。復次，善現！若諸菩薩不見般若波羅蜜多，不聞、不覺、不知般若波羅蜜多，於不見、聞、覺、知諸法亦不分別，是行般若波羅蜜多。」

【第44義】：忍位頂加行（V-3）

由三智諸法，圓滿最無上，不捨利有情，說名為堅穩。

◎大乘加行道忍位，成就自利智德所攝圓滿發心等表示三智智德種類之無上妙慧，及利他德不捨有情利益堅穩方便。《經》中說名堅穩頂加行。

(196a) 時天帝釋作是念言：「若諸菩薩修行般若波羅蜜多，尚勝一切有情之類，況得無上正等菩提。若諸有情聞說一切智智名字，深生信解，尚為獲得人中善利及得世間最勝壽命，況發無上正等覺心，或能聽聞甚深般若波羅蜜多。是諸有情，世間敬愛，當能調御一切有情。」

(196b) 作是念已，即便化作微妙音花，捧散如來及諸菩薩，既散華已，作是願言：「若諸菩薩求趣無上正等菩提，以我所生善根功德，願彼佛法速得圓滿，願彼所求一切智法及無漏法速得圓滿。」

(196c) 作是願已，便白佛言：「若菩薩乘善男子等，已發無上正等覺心，我終不生一念異意，令其退轉大菩提心；我終不生一念異意，令諸菩薩厭大菩提，退住聲聞、獨覺等地；我終不起一念異心，令諸菩薩退失大悲相應作意。」

若諸菩薩已發大心，我願彼心倍復增進，願彼菩薩見生死中種種苦已，為欲利樂世間天人、阿素洛等，發起種種堅固大願：『我既自度，亦當精勤度未度者。我既自脫，亦當精勤脫未脫者。我既自安，亦當精勤安未安者。我既自證究竟涅槃，亦當精勤令未證者皆同證得究竟涅槃。』

【第 45 義】：世第一法頂加行 (V-4)

四洲及小千，中大千為喻，以無量福德，宣說三摩地。

◎大乘世第一法之智，以四洲，小千，中千，大千世界微塵，及諸水塵用發端滴數可知其量為喻，若隨喜四菩薩之善根其福極多。《經》中以此表示宣說世第一法頂加行之三摩地也。

○四菩薩者，謂初地，二地至七地，第八地，及住十地，以住加行道世第一法之菩薩隨喜彼四菩薩之善根故。

○如是圓滿六度所攝一切現觀種類殊勝三摩地之世第一法頂加行，即名心遍住頂加行也。

(196d) 世尊！若有情類於初發心菩薩功德深心隨喜，得幾所福？於久發心修諸勝行菩薩功德，於不退轉地菩薩功德，於一生所繫菩薩功德深心隨喜，得幾所福？」

(197) 爾時，佛告天帝釋言：「妙高山王可知兩數，此有情類隨喜俱心所生福德不可知量，乃至三千大千世界可知兩數，此有情類隨喜俱心所生福德不可知量。」

(198) 時天帝釋復白佛言：「若諸有情於諸菩薩從初發心乃至得佛功德善根不生隨喜，或復於彼隨喜功德不聞不知，當知皆是魔所執持，魔所魅著，魔之朋黨，魔天界歿，來生此間。所以者何？若諸菩薩發菩提心，修菩薩行，得不退轉，至究竟位，有能於彼起隨喜心，定能破壞眾魔眷屬，疾能證得一切智智。若諸有情深心敬愛佛法僧寶，隨所生處，常欲見佛、聞法、遇僧，於諸菩薩功德善根應深隨喜，迴向菩提，不生執著。若能如是，疾證無上正等菩提，利樂有情，破魔軍眾。」

(199) 爾時，佛告天帝釋言：「如是！如是！如汝所說。憍尸迦！若諸有情於菩薩功德善根深心隨喜，迴向菩提，速能圓滿諸菩薩行，疾證無上正等菩提。若諸有情於諸菩薩功德善根深心隨喜，迴向菩提，是諸有情具大勢力，常能奉事諸佛世尊，

於深經典善知義趣，隨所生處，一切世間恭敬供養，不見惡色，不聞惡聲，不嗅惡香，不嘗惡味，不覺惡觸，不思惡法，不墮惡趣，生人天中，恒受勝樂。何以故？憍尸迦！是諸有情能於無量菩薩功德深心隨喜，迴向菩提，善根增進，疾能證得一切智智，饒益無量無數有情，令住無餘般涅槃界。以是故，憍尸迦！住菩薩乘善男子等，於諸菩薩功德善根皆應隨喜迴向菩提，利樂無邊諸有情類。」

【第 46 義】：見道頂加行 (V-5)

一、[所治分別]

轉趣及退還，其所取分別，當知各有九，非如其境性。

由異生聖別，分有情實假，是能取分別，彼各有九性。

若所取真如，彼執為誰性，如是彼執著，自性空為相。

◎大乘見所斷，於轉趣、退還事執為實有所取之分別，各有九種，當知彼九非如其境之體性而妄起執著，是於所著境錯亂之識故。

◎大乘見所斷，能取分別亦有二種：由於異生執實有有情，及由聖者差別執為假有士夫，皆於彼二，執為實有能受用者故。

◎當知彼執各有九種，由有九種境故。

○此諸分別皆是錯亂，不得境之實性故，以彼所取於真如無故，故彼所執，為誰境之性耶，都非彼境之性故。如是當知彼諸執著皆以性空為相也。

[轉趣所取分別]

『J1』自性及『J2』種姓，『J3』正修行『J4』諸道智所緣無亂，

『J5』所治品能治。『J6』自內證『J7』作用，

『J8』彼業『J9』所造果，是為轉趣品，所有九分別。

◎如是於大乘道果執為實所受用中，初轉趣所取分別，差別有九，謂：

『J1』菩薩總所趣事，由六度因勝義非有，於勝義非有之無上菩提果亦勝義無得，然名言有可得之果，緣此執為實所受用。

『J2』又由趣入不動地等，故緣佛種性決定；

『J3』又緣道自性見道等正修行；

『J4』又緣道所緣不錯亂智境；

『J5』又緣能除所治之殊勝功能，由先見功德而取與先見過失而捨，便能生所知障之對治及得永害所治品之功能故；

『J6』又依道果自利，緣大乘自內證；

『J7』又依道果利他功能，緣大乘種性決定者遠離聲聞等地之作用；
『J8』又依利他業，緣稱所化意樂，現變化身而利有情；
『J9』由善巧方便力，安立一切眾生於涅槃果，緣彼執為實所應趣之
所取分別。

——由此等皆是所應行事，故名轉趣；緣彼執實即是分別。

[退還所取分別]

『K1』墮三有寂滅，故智德下劣，『K2』無有攝受者，
『K3』道相不圓滿。『K4』由他緣而行，『K5』所為義顛倒，
『K6』少分及『K7』種種，『K8』於住行愚蒙。
『K9』及於隨行相，九分別體性，是所退還品，聲聞等心起。

◎第二所取分別，謂退還分別，此亦有九，謂：

『K1』二乘道由墮三有與寂滅邊，故智德下劣。
『K2』由無方便妙慧攝持，故增上緣下劣。
『K3』修利他行，道相不圓滿。
『K4』修自利行，方便下劣，故隨他緣而往解脫，謂最後有亦須待如
來等教授。
『K5』修俱利行下劣，所為顛倒，不趣三大。
『K6』斷德下劣，但斷少分。
『K7』智德下劣，得初果等種類智德。
『K8』雖得二乘阿羅漢果，亦未能斷無明隨眠，故於自利住定及利他
正行不如實知。
『K9』由大乘能攝三乘一切功德，故一切相智須隨小乘一切涅槃行，
故二乘涅槃俱有過失。

——如是九境，是二乘心中所起，非定性菩薩所應趣事，故名退還也。

(200)『J』爾時，善現便白佛言：「心既如幻，云何菩薩能證無上正
等菩提？」

(201)佛告善現：「於意云何？汝為見有如幻心不？」

(202)善現對曰：「不也，世尊！」

(203)佛告善現：「於意云何？汝見幻不？」

(204)善現對曰：「不也，世尊！」

(205)佛告善現：「於意云何？若汝不見幻，不見如幻心，若處無幻，
無如幻心，汝見有是心能得菩提不？」

(206)善現對曰：「不也，世尊！」

(207)佛告善現：「於意云何？若處離幻，離如幻心，汝見有是法能

得菩提不？」

- (208) 善現對曰：「不也，世尊！我都不見即、離心法，說何等法若有若無，以一切法畢竟離故，不可施設是有是無；若法不可施設有無，則不可說能得菩提，非無所有法能得菩提故。由此般若波羅蜜多亦畢竟離，不應修遣，亦復不應有所引發，無上菩提亦畢竟離，云何可說諸菩薩眾依深般若波羅蜜多能證菩提？是故般若波羅蜜多應不可說能證無上正等菩提，離法不得離法故。」
- (209) 佛告善現：「善哉！善哉！如是！如是！甚深般若波羅蜜多、無上菩提俱畢竟離。甚深般若波羅蜜多畢竟離故，得畢竟離無上菩提。若深般若波羅蜜多非畢竟離，應非般若波羅蜜多。是故，善現！非不依止甚深般若波羅蜜多得大菩提。雖非離法能得離法，而得菩提，非不依止甚深般若波羅蜜多，是故菩薩欲得無上正等菩提，應勤修學甚深般若波羅蜜多。」

大般若波羅蜜多經卷第五百六十五

- (210) 爾時，善現便白佛言：「此諸菩薩行甚深義。」
- (211) 佛告善現：「如是！如是！此諸菩薩行甚深義。善現當知！此諸菩薩能為難事，謂所行義雖復甚深，而於聲聞、獨覺地法能不作證。」
- (212a) 具壽善現復白佛言：「如我解佛所說義者，此諸菩薩所作不難，不應說彼能為難事。所以者何？此諸菩薩所證深義既不可得，能證般若波羅蜜多亦不可得，證法、證者、證處、證時亦不可得。若諸菩薩聞如是語，心不沈沒，亦不憂悔，不驚不怖，是行般若波羅蜜多。此諸菩薩如是行時，不見眾相，亦復不見我行般若波羅蜜多，而近無上正等菩提，遠離聲聞、獨覺等地，此諸菩薩於如是事亦不分別。」
- (212b) 譬如虛空，不作是念：『我去彼事若遠若近。』所以者何？虛空無動無分別故。甚深般若波羅蜜多亦復如是，不作是念：『聲聞、獨覺去我為遠，無上菩提去我為近。』所以者何？甚深般若波羅蜜多於一切法無分別故。譬如幻士，不作是念：『幻質、幻師去我為近，傍觀眾等去我為遠。』所以者何？所幻化者，無分別故。甚深般若波羅蜜多亦復如是，不作是念：『聲聞、獨覺去我為遠，無上菩提去我為近。』所以者何？甚深般若波羅蜜多於一切法無分別故。影像等喻應知亦然。

- (212c) 譬如如來應正等覺，於一切法無愛無憎。所以者何？如來永斷一切分別愛憎等故，甚深般若波羅蜜多亦復如是，於一切法無愛無憎。所以者何？甚深般若波羅蜜多，一切分別皆永斷故。譬如如來所變化者，雖有所作，而無分別，甚深般若波羅蜜多亦復如是，雖能成辦所作事業，而無分別。
- (212d) 譬如巧匠造男女等種種機關，此諸機關雖有動作，而無分別，甚深般若波羅蜜多亦復如是，雖作種種所應作事，而無分別。」
(缺『K』)

[實執分別]

- 『L1』所取及所捨，『L2』作意與『L3』繫屬，所作意三界，
『L4』安住與『L5』執著。『L6』法義唯假立，
『L7』貪欲及『L8』對治，『L9』失壞如欲行，當知初能取。
- ◎見道頂加行時所斷於執補特伽羅為實物有，更執彼為勝義能受用者。此見所斷初能取分別，亦有九種，謂：
- 『L1』緣取功德、捨過失之補特伽羅；
『L2』緣作意實有者；
『L3』緣繫屬所作意之實有三界者；
『L4』緣執一切法實有而安住者；
『L5』緣執著一切皆無我者；
『L6』緣了知法義皆唯假立者；
『L7』緣所治品貪欲者；
『L8』緣執相之能對治者；
『L9』緣失壞如欲往一切相智經久稽留之補特伽羅，分別為實有故。
——當知此九即初能取分別。

- (213) 『L』時舍利子謂善現言：「若諸菩薩行深般若波羅蜜多，為行堅固法？為行不堅固法？」
- (214) 善現報言：「若諸菩薩行深般若波羅蜜多，行不堅固法，不行堅固法。」
- (215) 時有無量欲界天子作是念言：「若諸菩薩能發無上正等覺心，雖行般若波羅蜜多甚深義趣，而於實際能不作證，不墮聲聞及獨覺地，由此因緣，甚為希有，能為難事，一切世間皆應敬禮。」
- (216) 具壽善現知諸天子心之所念，便告之言：「若諸菩薩行深般若

波羅蜜多，不證實際，不墮聲聞及獨覺地，非甚希有，未為難事。若諸菩薩知一切法及諸有情畢竟非有，皆不可得，而發無上正等覺心，被精進甲，誓度無量無邊有情，令人無餘般涅槃界，乃甚希有，能為難事。天子當知！若諸菩薩雖知諸法及諸有情皆不可得，而發無上正等覺心，被精進甲，為欲調伏諸有情類，如有為欲調伏虛空，被堅固鎧與虛空戰。何以故？諸天子！虛空離故，有情亦離；有情離故，鎧甲亦離；有情離故，饒益事亦離；有情離故，五蘊亦離；有情離故，一切法亦離。若諸菩薩聞如是語，心不沈沒，亦不憂悔，不驚不怖，是行般若波羅蜜多。」

[假執分別]

『M1』不如所為生，『M2』執道為非道，『M3』謂生俱有滅，『M4』具不具道性。『M5』安住『M6』壞種性，『M7』無希求『M8』無因，及『M9』緣諸敵者，是餘取分別。

◎假執能取分別有九：

- 『M1』緣唯修小乘道不能如所為事出生三大之假士夫；
- 『M2』緣離小乘道，執六度為非道之假士夫；
- 『M3』緣果生須俱因滅，離世俗性執有餘勝義之士夫；
- 『M4』緣執一切道性實有相續具不具之士夫；
- 『M5』緣執色等實有而安住之士夫；
- 『M6』緣由發心等失壞聲聞等種性之士夫；
- 『M7』緣唯以空性便執為足，更不希求佛果之士夫；
- 『M8』緣不修般若波羅蜜多因之士夫；
- 『M9』緣魔等障礙菩提之諸敵者事。

——此九分別，即緣彼彼境，執為實受用者之分別，此即除前實執分別之所餘〔假執能取分別〕也。

- (217) 『M』爾時，世尊告善現曰：「何因緣故，是諸菩薩聞如是語，心不沈沒，亦不憂悔，不驚不怖？」
- (218) 具壽善現白言：「世尊！以一切法皆遠離故，無所有故。所以者何？是諸菩薩於一切法，若能沈等、若所沈等、若沈等處、若沈等時、若沈等者、由此沈等，皆無所得，以一切法不可得故。若諸菩薩聞如是事，心不沈沒，亦不憂悔，不驚不怖，是行般若波羅蜜多。若諸菩薩如是行時，諸天帝釋、大梵天

王、世界主等，皆共敬禮。」

- (219a) 佛告善現：「若諸菩薩能如是行甚深般若波羅蜜多，非但恒為諸天帝釋、大梵天王、世界主等，皆共敬禮，是諸菩薩亦為過此極光淨天、若遍淨天、若廣果天、若淨居天及餘天、龍、阿素洛等，皆共敬禮，亦為十方無量無數無邊世界諸佛、菩薩皆共護念。善現當知！是諸菩薩常為諸佛、諸菩薩眾及諸天、龍、阿素洛等，憶念守護，功德善根念念增長，疾證無上正等菩提。善現當知！是諸菩薩已住菩薩不退轉位。假使十方殞伽沙等諸佛世界一切有情皆變為魔，是諸魔眾各復化作爾所惡魔，此諸惡魔皆有無量無數神力，是諸惡魔盡其神力不能留難此諸菩薩，令其不行甚深般若波羅蜜多，及於菩提或有退轉。」
- (219b) 善現當知！若諸菩薩成就二法，一切惡魔不能留難。何等為二？一者、觀察一切法空；二者、不捨一切有情。復次，善現！若諸菩薩成就二法，一切惡魔不能障礙。何等為二？一者、如說皆悉能行；二者、常為諸佛護念。善現當知！若諸菩薩成就如是二種勝法，諸天神等，常來禮敬，親近供養，請問勸發，作如是言：『善哉大士！汝能如實行深般若波羅蜜多方便善巧，疾能安住諸佛智地，一切有情無依怙者能作依怙，無救護者能作救護，無舍宅者能作舍宅，無投趣者能作投趣，無洲渚者能作洲渚，無歸依者為作歸依，與闇冥者能作光明，與聾盲者能作耳目。何以故？善男子！若能安住甚深般若波羅蜜多方便善巧，疾證無上正等菩提，一切惡魔不能留難。』
- (219c) 善現當知！若諸菩薩能善安住甚深般若波羅蜜多，則為十方無量無數無邊世界諸佛世尊處大眾中自然歡喜稱揚讚歎名字、種姓、色相功德。如我今者，在大眾中自然歡喜稱揚讚歎寶幢菩薩及餘現住不動佛所淨修梵行，住深般若波羅蜜多諸菩薩等名字、種姓、色相功德。」
- (220) 爾時，善現便白佛言：「一切如來應正等覺皆於眾中自然歡喜稱揚讚歎一切菩薩名字、種姓、色相功德不？」
- (221) 佛言：「不也，若諸菩薩已於無上正等菩提得不退轉，行深般若波羅蜜多方便善巧，是諸菩薩蒙諸如來應正等覺在大眾中自然歡喜稱揚讚歎名字、種姓、色相功德。」

- (222) 具壽善現復白佛言：「頗有菩薩未於無上正等菩提得不退轉，而蒙如來應正等覺在大眾中自然歡喜稱揚讚歎名字、種姓、色相功德不？」
- (223a) 佛言：「亦有。調諸菩薩雖於無上正等菩提未得不退，而修般若波羅蜜多方便善巧，是諸菩薩亦蒙如來應正等覺在大眾中自然歡喜稱揚讚歎名字、種姓、色相功德。如有菩薩隨不動佛為菩薩時所修而學，所行而住，修行般若波羅蜜多方便善巧。復有菩薩隨寶幢菩薩等所修而學，所行而住，修行般若波羅蜜多方便善巧，是諸菩薩雖於無上正等菩提未得不退，而蒙如來應正等覺在大眾中自然歡喜稱揚讚歎名字、種姓、色相功德。
- (223b) 復次，善現！有諸菩薩行深般若波羅蜜多，於一切法無生性中雖深信解，而未證得無生法忍；於一切法畢竟空性雖深信解，而於菩薩不退轉地未得自在；雖住諸法皆寂靜性，而未得入不退轉地。是諸菩薩亦蒙如來應正等覺在大眾中自然歡喜稱揚讚歎名字、種姓、色相功德。善現當知！若諸菩薩蒙諸如來應正等覺在大眾中自然歡喜稱揚讚歎名字、種姓、色相功德，是諸菩薩超二乘地，近大菩提，或已得受不退轉記，或近當受不退轉記。

付囑品第二十三

- (223c) 復次，善現！若諸菩薩聞說般若波羅蜜多所有義趣，深生信解，無惑無疑，不迷不悶，但作是念：『如佛所說，理趣必然，定非顛倒。』是諸菩薩決定當於不動佛所及諸菩薩摩訶薩所，廣聞般若波羅蜜多，於深義趣能生信解；既信解已，勤修梵行，當得住於不退轉地；住是地已，疾證菩提。善現當知！若諸菩薩但聞般若波羅蜜多，尚獲無邊功德勝利，況深信解，如說修行。是諸菩薩近一切智，安住真如，疾證菩提，宣說法要。」
- (224) 爾時，善現便白佛言：「法離真如，無別可得，為說何法近一切智，安住真如？誰證菩提？誰說法要？」
- (225) 佛告善現：「如是！如是！法離真如，都不可得，說何等法近一切智，能住真如，疾證菩提，宣說法要？真如自性尚不可得，況有餘法能有所作。隨世俗故，作如是說。」
- (226) 時天帝釋便白佛言：「如是般若波羅蜜多理趣甚深，極難信解，

若諸菩薩行深般若波羅蜜多，雖知諸法皆不可得，而求無上正等菩提，欲為有情宣說法要，甚為難事。諸菩薩眾聞說此語，心不沈沒，無惑無疑，不迷不悶，如是等事甚為希有。」

二、[分別之對治]

『M'1』為他示菩提，『M'2』其因謂付囑，證彼無間因，具多福德相。

◎『M' 1』為他開示證菩提之方便於大菩提而安立他。其大菩提之因，謂付囑般若波羅蜜多之文義。

(227)『M'1』爾時，善現謂帝釋言：「如汝所說『諸菩薩眾聞如是語，心不沈沒，無惑無疑，不迷不悶，如是等事，甚希有』者，僑尸迦！諸菩薩眾行深般若波羅蜜多，觀法皆空，都無所有，誰沈誰沒？誰惑誰疑？誰迷誰悶？是故此事，未為希有。然為有情愚癡顛倒，不能通達諸法皆空，故求菩提，欲為宣說方便善巧，非極為難。」

(228)天帝釋言：「尊者善現諸有所說，無不依空，是故所言常無滯礙，如有以箭仰射虛空，若近若遠，俱無滯礙。」

(229)時天帝釋便白佛言：「我與尊者善現所說，為順如來實語、法語，於法隨法，為正說耶？」

(230a)爾時，世尊告天帝釋：「汝與善現諸有所言，皆順如來實語、法語，於法隨法，皆為正說。何以故？僑尸迦！具壽善現所有辯才，無不依空而施設故。所以者何？具壽善現觀一切法皆畢竟空，尚不得般若波羅蜜多，況得能行般若波羅蜜多者；尚不得無上正等菩提，況得能證無上正等菩提者；尚不得一切智智，況得能證一切智智者；尚不得真如，況得能證真如成如來者；尚不得無生性，況得能證無生性者；尚不得菩薩，況得能證佛菩提者；尚不得十力、四無所畏，況得能成十力、四無所畏者；尚不得法，況得能說法者。」

(230b)僑尸迦！具壽善現於一切法住遠離住、無所得住，比諸菩薩所住般若波羅蜜多微妙行住，百分不及一，千分不及一，乃至鄔波尼殺曇分亦不及一。僑尸迦！是諸菩薩所住般若波羅蜜多微妙行住，除如來住，於餘菩薩及諸聲聞、獨覺等住，為最為勝，為尊為高，為妙為微妙，為上為無上。以是故，僑尸迦！若諸菩薩欲於一切有情眾中為最為勝，為尊為高，

為妙為微妙，為上為無上者，當住般若波羅蜜多。」

- (231) 爾時，眾中無量無數三十三天聞法歡喜，各取天上微妙音花，奉散世尊及諸菩薩。
- (232) 六百苾芻俱從座起，右膝著地，向佛合掌。佛神力故，各於掌中微妙音花自然盈滿，是苾芻眾踊躍歡喜，各以此花奉散佛上。既散花已，同發願言：「我等用斯勝善根力，願常安住甚深般若波羅蜜多微妙行住，速趣無上正等菩提。」
- (233) 爾時，世尊即便微笑。如佛常法，從其面門放種種光，青黃赤白紅紫碧綠金銀頗胝，傍照無邊諸佛國土，上至梵世，下徹風輪，漸復還來，繞佛右轉，經三匝已，從頂上入。
- (234) 時阿難陀即從座起禮佛，合掌白言：「世尊！何因何緣現此微笑？」
- (235a) 爾時，佛告阿難陀言：「此諸苾芻於當來世星喻劫中，皆得作佛，同名散花，具足十號，聲聞僧數，一切皆等，佛壽亦等二十千劫。隨所住處，雨五色花。由此因緣，故我微笑。若諸菩薩欲得安住最勝住者，當住般若波羅蜜多；若諸菩薩欲得安住如來住者，當住般若波羅蜜多。」

◎『M' 2』能證彼頂加行之無間因，謂自於定中修般若波羅蜜多等具足眾多福德為相之大乘加行世第一法，即見道頂加行之因也。

- (235b) 『M'2』慶喜當知！若諸菩薩精進修行甚深般若波羅蜜多令究竟者，是諸菩薩先世或從人中沒已，還生此處，或從睹史多天上沒，來生人間。所以者何？如是二處，易行般若波羅蜜多，非餘處故。慶喜當知！如來現見若諸菩薩精進修行甚深般若波羅蜜多，於身命財無所顧者，定於無上正等菩提得不退轉。
- (235c) 復次，慶喜！若諸菩薩聽聞、受持、讀誦、書寫甚深般若波羅蜜多，示現、勸導、讚勵、慶喜住菩薩乘善男子等，是諸菩薩曾於過去無量佛所種諸善根，非唯聲聞、獨覺等所。
- (235d) 復次，慶喜！若諸菩薩修學般若波羅蜜多，不驚不怖，受持讀誦，繫念思惟，若法若義、若文若意，皆善通達，隨順修行，是諸菩薩則為現見我等如來應正等覺。復次，慶喜！若諸菩薩聞說如是甚深般若波羅蜜多所有義趣，深生信解，不生毀謗，不可沮壞，是諸菩薩已曾供養無量諸佛，於諸佛所，

多種善根，亦為無量善友所攝。

- (235e) 復次，慶喜！若諸有情能於如來應正等覺勝福田所，種諸善根，雖定當得或聲聞果、或獨覺果、或如來果，而證無上正等菩提，要於般若波羅蜜多甚深義趣善達無礙，精進修行諸菩薩行，令極圓滿。是故，慶喜！我以般若波羅蜜多甚深經典付囑於汝，應正受持讀誦，通利，莫令忘失。
- (235f) 慶喜當知！除此般若波羅蜜多甚深經典，受持諸餘我所說法，設有忘失，其罪尚輕；若於般若波羅蜜多甚深經典不善受持，下至一句有所忘失，其罪甚重。慶喜當知！若於般若波羅蜜多甚深經典，下至一句能善受持不忘失者，獲福無量；若於般若波羅蜜多甚深經典不善受持，下至一句有忘失者，所獲重罪，同前福量。是故，慶喜！我以般若波羅蜜多甚深經典懇勸付汝，當正受持讀誦，通利，如理思惟，廣為他說，分別開示，令受持者究竟解了文義意趣。所以者何？若諸菩薩於深般若波羅蜜多受持讀誦，究竟通利，如理思惟，廣為他說，分別開示，令其易了，是諸菩薩則為受持過去、未來、現在諸佛甚深法藏，廣為有情宣說開示。
- (235g) 慶喜當知！若有情類起殷淨心，現於我所，欲持種種上妙供具供養恭敬無懈倦者，當於般若波羅蜜多至心聽聞、受持、讀誦，精勤修學，如理思惟，廣為有情分別解說，或復書寫，種種莊嚴，供養恭敬，勿得暫捨。
- (235h) 慶喜當知！若諸菩薩供養恭敬，尊重、讚歎甚深般若波羅蜜多，則為現前供養恭敬，尊重、讚歎我及十方三世諸佛。慶喜當知！若諸菩薩聞深般若波羅蜜多，起殷淨心，恭敬愛樂，即於過去、未來、現在諸佛無上正等菩提起殷淨心，恭敬愛樂。慶喜！汝若愛樂於我，不捨於我，亦當愛樂、不捨般若波羅蜜多甚深經典，下至一句，勿令忘失。
- (235i) 慶喜！我說如是般若波羅蜜多甚深經典付囑因緣，設經一劫，乃至殞伽沙數大劫，亦不能盡，舉要言之，如我既是汝等大師，甚深般若波羅蜜多當知亦是汝等大師，如三世佛是諸天人、阿素洛等無上大師，甚深般若波羅蜜多當知亦是世間天人、阿素洛等無上大師，汝等天人、阿素洛等敬重於我，亦當敬重甚深般若波羅蜜多。是故，慶喜！我以無量善巧方便付汝般若波羅蜜多甚深經典，汝當受持，無令忘失。我今

持此甚深般若波羅蜜多，對諸天人、阿素洛等無量大眾，付囑於汝，應正受持，勿令忘失。

- (235j) 慶喜！我今實言告汝，諸有淨信善男子等，若欲不捨佛法僧寶、三世諸佛無上菩提，定不應捨甚深般若波羅蜜多，如是名為我等諸佛教誡教授諸弟子法。慶喜當知！若有愛樂聽聞般若波羅蜜多，受持讀誦，究竟通利，如理思惟，書寫解說，疾證無上正等菩提。所以者何？諸佛無上正等菩提皆依般若波羅蜜多而得生故。是故，慶喜！若諸菩薩欲得無上正等菩提，當勤精進修學般若波羅蜜多。所以者何？甚深般若波羅蜜多是諸菩薩摩訶薩母，能令菩薩疾證菩提。
- (235k) 慶喜當知！若諸菩薩法欲滅時，護持般若波羅蜜多，則為護持三世諸佛一切智智，亦為護持三世諸佛無上法藏。
- (235l) 慶喜當知！若諸菩薩勤學六種波羅蜜多，疾證無上正等菩提。是故，慶喜！我以六種波羅蜜多更付囑汝，當正受持勿令忘失。所以者何？如是六種波羅蜜多是三世佛無盡法藏。慶喜當知！十方三世諸佛世尊所說法要，皆是六種波羅蜜多無盡法藏之所流出。十方三世佛及弟子，皆依如是無盡法藏精勤修學，已、正、當證無上菩提，已、正、當入無餘涅槃。
- (235m) 復次，慶喜！假使汝為聲聞乘人說聲聞法，由此法故，三千大千世界有情一切皆得阿羅漢果，猶未為我作弟子事，我於汝事未甚隨喜。汝若能為菩薩乘人宣說一句甚深般若波羅蜜多相應之法，即名為我作弟子事，我於此事深生隨喜。
- (235n) 復次，慶喜！假使三千大千世界一切有情俱時證得阿羅漢果，彼所成就施、戒、修性諸福業事，於意云何？寧為多不？」
- (236) 慶喜對曰：「甚多，世尊！」
- (237) 佛告慶喜：「若有聲聞能為菩薩宣說般若波羅蜜多相應之法，經一晝夜，展轉乃至經彈指頃，是聲聞人所獲福聚，甚多於前。何以故？此聲聞人所獲福聚，超過一切聲聞、獨覺諸善根故。復次，慶喜！若有菩薩為聲聞人說聲聞法，假使三千大千世界一切有情由此法故，悉皆證得阿羅漢果，於意云何？如是菩薩所獲福聚寧為多不？」
- (238) 慶喜對曰：「甚多，世尊！」
- (239) 佛告慶喜：「若有菩薩為諸有情宣說般若波羅蜜多相應之法，經一晝夜，展轉乃至經彈指頃，如是菩薩所獲福聚，甚多於

前。何以故？甚深般若波羅蜜多相應法施，超過一切聲聞、獨覺相應法施及彼二乘諸善根故。慶喜當知！若諸菩薩成就憶念如是善根，復於無上正等菩提有退轉者，無有是處。」

見不動佛品第二十四

- (01) 爾時，如來四眾圍繞，讚說般若波羅蜜多，付阿難陀，令受持已，復於一切苾芻、苾芻尼、鄔波索迦、鄔波斯迦、天、龍、藥叉、健達縛等大眾會中，現神通力，令眾皆見不動如來應正等覺，聲聞、菩薩大眾圍繞，為如大海不可動會宣說正法，及見彼土嚴淨之相。其聲聞僧皆阿羅漢，諸漏已盡，無復煩惱，得真自在，心善解脫，慧善解脫，如調慧馬，亦如大龍，已作所作，已辦所辦，棄諸重擔，逮得己利，盡諸有結，正智解脫，至心自在，第一究竟。其菩薩僧，一切皆是眾望所識，得陀羅尼及無礙辯，成就無量不可思議，不可稱量微妙功德。佛攝神力，令此四眾、天、龍、藥叉、健達縛等，不復見彼不動如來應正等覺、聲聞、菩薩及餘大眾，并彼佛土嚴淨之相。彼佛眾會及嚴淨土，皆非此土眼根所照。所以者何？佛攝神力，於彼遠境，無見緣故。
- (02) 爾時，佛告阿難陀言：「不動如來應正等覺國土眾會，汝更見不？」
- (03) 阿難陀言：「我不復見彼事，非此眼所行境故。」
- (4a) 時佛復告阿難陀言：「如彼如來眾會國土，非此土眼所行境界，當知諸法亦復如是，非眼根等所行境界。慶喜當知！法不行法，法不見法，法不知法，法不證法。慶喜當知！一切法性無能行者、無能見者、無能知者、無能證者、無動、無作。所以者何？以一切法皆無作用，能取、所取俱如虛空，性遠離故；以一切法不可思議，能、所思議皆如幻土，性遠離故；以一切法無作、受者，如光影等，不堅實故。慶喜當知！若諸菩薩能如是行，名行般若波羅蜜多，於諸法相無所執著；若諸菩薩能如是學，名學般若波羅蜜多，於一切法無所取捨。
- (4b) 慶喜當知！若諸菩薩欲得一切波羅蜜多速疾圓滿，至一切法究竟彼岸，應學般若波羅蜜多。所以者何？如是學者，於諸學中為最為勝，為尊為高，為妙為微妙，為上為無上，利益安樂一切世間。慶喜當知！若諸菩薩能如是學，無依怙者為作依怙，諸佛世尊開許稱讚修學般若波羅蜜多。慶喜當知！諸佛菩薩學

此學已，安住此中，能以右手若右足指，舉取三千大千世界，擲置他方，或還本處，其中有情不知不覺，無損無怖。所以者何？甚深般若波羅蜜多功德威力不可思議。過去、未來、現在諸佛及諸菩薩，學此般若波羅蜜多，於去、來、今及無為法，悉皆獲得無礙智見。是故，慶喜！我說能學甚深般若波羅蜜多，於諸學中為最為勝，為尊為高，為妙為微妙，為上為無上。

(4c) 慶喜當知！諸有欲取甚深般若波羅蜜多量、邊際者，如愚癡者欲取虛空量及邊際。何以故？甚深般若波羅蜜多功德無量、無邊際故。慶喜當知！我終不說甚深般若波羅蜜多如名、身等，有量、邊際。所以者何？名句、文身是有量法，甚深般若波羅蜜多功德勝利非有量法，非名、身等能量般若波羅蜜多功德勝利，亦非般若波羅蜜多功德勝利是彼所量。」

『M' 3』 垢盡無生智，說為大菩提，無盡無生故，彼如次應知。

◎『M' 3』《經》說垢盡智與無生智即是大菩提，然非垢先實有而後永盡，亦非先無而後新生，是故當知了達本來永盡及無生之究竟智，如其次第，即盡智與無生智。

無滅自性中，謂當以見道，盡何分別種，得何無生相。

若有餘實法，而於所知上，說能盡諸障，吾以彼為奇。

◎諸實事師謂：先有真實垢法，後以壞想於彼盡相了知為盡，名為盡智。又許實法相續生斷，以無生想於不生相了知不生，名無生智。

○此破彼云：大乘見道，何能盡其實有之所知障能取所取分別種類耶？定不應盡，何能得其斷相續生之無生相耶？定不能得。以汝所許先有之真實障法〔今乃新滅〕，無此滅性故，以彼障先未有故。是故當許中觀宗也。

○又實事宗既說實有能治、所治諸法，復說愚蒙所知之垢障可盡，吾慈氏實覺彼甚奇稀有，以障若實有，則對治不可斷故。

此中無所遣，亦無少可立，於正性正觀，正見而解脫。

◎今此法中，諸世俗法由損減門無可除遣，諸勝義法由增益門無少法可安立，故於世俗正有性，正觀勝義無自性之法性。如是遠離增減二邊所決擇之正見，若能精勤修習，便能現見真實義，解脫二障而成正覺也。

(05) 『M'3』 具壽慶喜便白佛言：「何因緣故，甚深般若波羅蜜多說為無量？」

- (06) 佛告慶喜：「甚深般若波羅蜜多性無盡故，性遠離故，說為無量。慶喜當知！三世諸佛皆學般若波羅蜜多，究竟圓滿證得無上正等菩提，為諸有情宣說開示，而此般若波羅蜜多常無減盡。所以者何？甚深般若波羅蜜多如太虛空不可盡故，諸有欲盡甚深般若波羅蜜多則為欲盡虛空邊際。是故，慶喜！甚深般若波羅蜜多說為無盡，由無盡故，說為無量。」
- (07) 爾時，善現作是念言：「此處甚深，我當問佛。」作是念已，便白佛言：「甚深般若波羅蜜多，如來何故說為無盡？」
- (08) 佛告善現：「甚深般若波羅蜜多猶如虛空不可盡故。」

『M'4』施等一一中，彼等互攝入，一剎那忍攝，是此中見道。

次由入獅子，奮迅三摩地，觀察諸緣起，隨順及迴逆。

◎『M' 4』布施等一一度中，皆能互攝六度，以一剎那苦法智忍所攝之無間道，彼頂加行即此中之見道故。

言「此中見道」者，表示頂加行品中，由一一度互攝六度而顯見道，諸餘品中則以餘相而明見道也。

◎見道頂加行斷障相之後，又說見道頂加行，正習彼加行之瑜伽師，根本定時安住獅子奮迅三摩地；於後得位，觀察緣起順逆也。

十二緣起，謂無明、行、識、名色、六處、觸、受、愛、取、有、生、老死。

a 其中從無明緣行，乃至生緣老死，是雜染品隨順緣起。

b 後老死由生起，乃至行由無明起，是雜染品迴逆緣起。

c 從無明滅故行滅，乃至生滅故老死滅，是清淨品隨順緣起。

d 從由心滅故老死滅，乃至由無明滅故行滅，是清淨品迴逆緣起。

a 如是修習雜染品隨順緣起者，便能通達集諦自性以了知惑業之主即無明與行故。

b 修彼迴逆緣起者，便能通達苦諦自性，以了知生與老死，是惑業之果究竟成熟性故。

c 修習清淨品隨順緣起者，便能通達道諦自性，以知無明對治，證無我慧能斷無明之根本故。

d 修彼迴逆緣起者，便能通達滅諦自性，以知永斷染汙無明之究竟果，即滅除生與老死故。

○是故修習順逆緣起，即是通達四諦之最勝方便也。

(09) 『M'4』具壽善現復白佛言：「云何菩薩引發般若波羅蜜多？」

- (10a) 佛告善現：「諸菩薩眾應觀諸色受想行識皆無盡故，引發般若波羅蜜多；應觀無明乃至老死皆無盡故，引發般若波羅蜜多。如是，善現！諸菩薩眾應作如是引發般若波羅蜜多。善現當知！諸菩薩眾如是觀察十二緣起遠離二邊，如是觀察十二緣起無中無邊，是諸菩薩不共妙觀，調要安坐妙菩提座，方能如是如實觀察十二緣起理趣甚深，如太虛空不可盡故，便能證得一切智智。善現當知！若諸菩薩以如虛空無盡行相，行深般若波羅蜜多，如實觀察十二緣起，不墮聲聞及獨覺地，疾證無上正等菩提。
- (11b) 善現當知！諸菩薩眾若於無上正等菩提有退轉者，皆由不依如是作意方便善巧，不如實知諸菩薩眾行深般若波羅蜜多，云何應以無盡行相引發般若波羅蜜多，如實觀察十二緣起？善現當知！諸菩薩眾若於無上正等菩提有退轉者，皆由遠離引發般若波羅蜜多方便善巧。善現當知！諸菩薩眾若於無上正等菩提不退轉者，一切皆依引發般若波羅蜜多方便善巧。是諸菩薩由依如是方便善巧，行深般若波羅蜜多，以如虛空無盡行相，如實觀察十二緣起，如是觀察緣起法時，不見有法無因而生，不見有法性相常住，不見有法有作受者。是諸菩薩行深般若波羅蜜多，以如虛空無盡行相，如實觀察十二緣起，引發般若波羅蜜多，能疾證得一切智智。
- (11c) 善現當知！若時菩薩如實觀察十二緣起，引發般若波羅蜜多，是時菩薩都不見色受想行識，不見此佛世界，不見彼佛世界，不見有法能見此彼諸佛世界。若諸菩薩能如是行甚深般若波羅蜜多，是時惡魔極生憂惱，如中毒箭，譬如有人父母卒喪，身心苦痛，惡魔亦爾。」
- (12) 具壽善現便白佛言：「為一惡魔見諸菩薩行深般若波羅蜜多，極生憂惱，如中毒箭？為遍三千大千世界一切惡魔皆亦是？」
- (13a) 佛告善現：「遍滿三千大千世界一切惡魔，見諸菩薩行深般若波羅蜜多，極生憂惱，如中毒箭，各於本座不能自安。所以者何？若諸菩薩住深般若波羅蜜多，世間天人、阿素洛等，伺求其短，皆不能得，亦復不能擾亂退壞。
- (13b) 是故，善現！若諸菩薩欲證無上正等菩提，當勤安住甚深般若波羅蜜多。若諸菩薩能勤安住甚深般若波羅蜜多，則能修滿

布施、淨戒、安忍、精進、靜慮、般若波羅蜜多。若諸菩薩能正修行甚深般若波羅蜜多，便能具足修滿一切波羅蜜多方便善巧，諸魔事起，皆能如實覺知遠離。

- (13c) 是故，善現！若諸菩薩欲正攝受方便善巧，應正修行甚深般若波羅蜜多。若時菩薩修行引發甚深般若波羅蜜多，是時無量無邊世界諸佛世尊皆共護念。是諸菩薩應作是念：『彼諸如來應正等覺亦從般若波羅蜜多生一切智。』作是念已，復應思惟：『如諸如來應正等覺所應證法，我亦當證。』
- (13d) 如是，善現！若諸菩薩修行引發甚深般若波羅蜜多，作是思惟，經彈指頃所生福聚，勝有所得諸菩薩眾經如殞伽沙數大劫修行布施所獲功德，何況能於一日、半日。是諸菩薩不久當住不退轉地，常為如來應正等覺共所護念。諸菩薩眾若為諸佛所護念者，定證無上正等菩提，不墮聲聞、獨覺等地，於諸惡趣決定不生，常生天人，不離諸佛。若諸菩薩修行引發甚深般若波羅蜜多，憶念思惟諸佛功德經彈指頃，尚獲無邊功德勝利，況經一日，若過一日，勇猛精進修行引發甚深般若波羅蜜多，憶念思惟諸佛功德。如香象等諸菩薩眾，不動佛所常修梵行，不離般若波羅蜜多。」
- (14) 時薄伽梵說是經已，無量菩薩摩訶薩眾，慈氏菩薩而為上首，具壽善現、舍利子等諸大聲聞，并諸天、龍、健達縛等一切大眾，聞佛所說，皆大歡喜，信受奉行。(第五分完)

第二分般若經（459-478 卷）

大般若波羅蜜多經卷第四百五十九

相攝品第六十七

【第 47 義】：修道頂加行（V-6）

一、[修道頂加行]

滅盡等九定，修往還二相，後以欲界攝，非定心為界。

超越入諸定，超一二三四，及五六七八，至滅定不同。

◎此說修道菩薩，由加行與根本二門入超越等持，謂俱滅盡定等次第定，先修往上順行與下還逆行二相之〔獅子〕奮迅三摩地為加行，次乃進修超越等持之根本故。其修根本時，先從初靜慮直往滅盡定，全無超越修一返。次於八定間雜滅盡定而修一返，謂從滅定起入初靜慮，從初靜慮起仍入滅定，次入二靜慮，次入滅定，如是漸上乃至從滅盡定入非非想定，又入滅定，復入非非想定也。其次，起欲界攝不定心為界，入滅盡定，從滅定起不定心，次超（即置而不入也）滅盡一定而入非非想定，次起不定心，次超滅盡與非非想二定，入無所有定，次起不定心，如是乃至超三四五六七八定而入初靜慮，次從初靜慮起不定心。

◎此等何故名超越等持耶？

謂從初靜慮乃至滅盡定為所間雜，而雜不同類法欲界不定心而修定故。

《般若經》中廣說，論中初二句僅說加行，後六句僅說雜欲界心而修九定。其中直往一返及以八定雜修滅盡定一返，意為易解，故未宣說也。

（01）善現！若菩薩摩訶薩安住般若波羅蜜多，除佛等持，於餘一切聲聞、獨覺、菩薩等持，皆能自在隨意入出。是菩薩摩訶薩安住菩薩自在等持，於八解脫皆能自在順逆入出。

何等為八？一者、有色觀諸色解脫；二者、內無色想觀外諸色解脫；三者、淨勝解身作證解脫；四者、超一切色想滅有對想，不思惟種種想，入無邊空，空無邊處解脫；五者、超一切空無邊處，入無邊識，識無邊處解脫；六者、超一切識無邊處，入無少所有，無所有處解脫；七者、超一切無所有處，入非有想非無想，非想非非想處解脫；八者、超一切非想非非想處，入滅想受定，滅想受解脫。

是菩薩摩訶薩復能於九次第定，若逆若順，自在入出。
何等為九？謂四靜慮、四無色定、滅想受定，是名為九。是菩薩摩訶薩於八解脫、九次第定順逆入出，善成熟已，能入師子奮迅等持。

云何師子奮迅等持？善現！謂菩薩摩訶薩離欲惡不善法，有尋有伺，離生喜樂，入初靜慮，次第乃至超一切非想非非想處，入滅想受定，復從滅想受定起，還入非想非非想處定，次第乃至入初靜慮，是為師子奮迅等持。

善現！是菩薩摩訶薩於此師子奮迅等持善成熟已，復入菩薩超越等持。云何菩薩超越等持？善現！謂菩薩摩訶薩離欲惡不善法，有尋有伺，離生喜樂，入初靜慮；從初靜慮起，次第乃至入滅想受定；從滅想受定起，入初靜慮；從初靜慮起，入滅想受定；從滅想受定起，入第二靜慮；從第二靜慮起，入滅想受定；從滅想受定起，入第三靜慮；從第三靜慮起，入滅想受定；從滅想受定起，入第四靜慮；從第四靜慮起，入滅想受定；從滅想受定起，入空無邊處定；從空無邊處定起，入滅想受定；從滅想受定起，入識無邊處定；從識無邊處定起，入滅想受定；從滅想受定起，入無所有處定；從無所有處定起，入滅想受定；從滅想受定起，入非想非非想處定；從非想非非想處定起，入滅想受定；從滅想受定起，復入非想非非想處定；從非想非非想處定起，墮不定心；從不定心，還入滅想受定；從滅想受定起，住不定心；從不定心，入非想非非想處定；從非想非非想處定起，住不定心；從不定心，入無所有處定；從無所有處定起，住不定心；從不定心，入識無邊處定；從識無邊處定起，住不定心；從不定心，入空無邊處定；從空無邊處定起，住不定心；從不定心，入第四靜慮；從第四靜慮起，住不定心；從不定心，入第三靜慮；從第三靜慮起，住不定心；從不定心，入第二靜慮；從第二靜慮起，住不定心；從不定心，入初靜慮；從初靜慮起，住不定心；是為菩薩超越等持。若菩薩摩訶薩安住如是超越等持，得一切法平等實性。復持如是所集善根，以無所得而為方便，與諸有情同共迴向一切智智，於迴向時，無二心轉，謂誰迴向？何所迴向？善現！是為菩薩摩訶薩安住般若波羅蜜多，攝取靜慮波羅蜜多。」

大般若波羅蜜多經卷第四百六十

巧便品第六十八

- (02) 爾時，具壽善現白佛言：「世尊！若菩薩摩訶薩成就如是巧便力者，發菩提心已經幾時？」
- (03) 佛告善現：「是菩薩摩訶薩發菩提心，已經無數百千俱胝那庾多劫。」
- (04) 具壽善現復白佛言：「世尊！若菩薩摩訶薩成就如是巧便力者，已曾親近供養幾佛？」
- (05) 佛告善現：「是菩薩摩訶薩已曾親近供養殑伽沙等諸佛。」
- (06) 具壽善現復白佛言：「世尊！若菩薩摩訶薩成就如是巧便力者，已植何等殊勝善根？」
- (07) 佛告善現：「是菩薩摩訶薩發心已來，無有布施、淨戒、安忍、精進、靜慮、般若波羅蜜多所引善根，而不圓滿精勤修學，由此因緣，成就如是巧方便力。」
- (08) 具壽善現復白佛言：「世尊！若菩薩摩訶薩成就如是巧便力者，甚為希有。」
- (09) 佛告善現：「如是！如是！如汝所說。是菩薩摩訶薩甚為希有。
- a 善現當知！如日月輪，周行照觸四大洲界，作諸事業，其中所有若情非情，隨彼光明勢力而轉，各成己事。如是般若波羅蜜多照觸餘五波羅蜜多，作諸事業，布施等五波羅蜜多隨順般若波羅蜜多勢力而轉，各成己事。
- 善現當知！如轉輪王，若無七寶，不名輪王；要有七寶，乃名輪王。布施等五波羅蜜多亦復如是，若離般若波羅蜜多，不得名為波羅蜜多；不離般若波羅蜜多，乃得名為波羅蜜多。
- b 善現當知！如有女人，端嚴巨富，若無強夫所守護者，易為惡人之所凌辱；若有強夫所守護者，不為惡人之所凌辱。布施等五波羅蜜多亦復如是，若無般若波羅蜜多力所攝護，易為天魔及彼眷屬之所沮壞；若有般若波羅蜜多力所攝護，一切天魔及彼眷屬不能沮壞。
- c 善現當知！如勇軍將，妙閑兵法，善備種種堅固鎧杖，鄰國怨敵所不能害。布施等五波羅蜜多亦復如是，不離般若波羅蜜多，天魔眷屬、增上慢人乃至菩薩、旃荼羅等，皆不能壞。
- d 善現當知！如瞻部洲諸小王等，隨時朝侍轉輪聖王，依彼輪王，得至勝處。布施等五波羅蜜多亦復如是，隨助般若波羅蜜多，由彼勢力所引導故，疾能證得一切智智。

e 善現當知！如瞻部洲東方諸水，無不皆趣殑伽大河，隨殑伽河流入大海。布施等五波羅蜜多亦復如是，無不皆為甚深般若波羅蜜多之所攝引，乃能證得一切智智。

f 善現當知！如人右手，能作眾事，如是般若波羅蜜多能引一切殊勝善法。

善現當知！如人左手，所作不便，如是前五波羅蜜多不能引生諸勝善法。

g 善現當知！譬如眾流，隨其大小，若入大海，同得鹹名。如是前五波羅蜜多要入般若波羅蜜多，乃得名為能到彼岸。

h 善現當知！如轉輪王，欲有所趣，四軍導從，輪寶居先，王及四軍念欲飲食，輪即為住，既飲食已，王念欲行，輪即前去，其輪去住，隨王意欲，至所趣方，不復前去。如是前五波羅蜜多與諸善法欲趣無上正等菩提，要因般若波羅蜜多以為前導，進止俱隨，不相捨離，若至無上正等菩提，更不前進。

i 善現當知！如轉輪王，欲有所至，四軍七寶前後導從，爾時輪寶雖最居先，而不分別前後之相。如是前五波羅蜜多與諸善法欲趣無上正等菩提，必以般若波羅蜜多為其前導，然此般若波羅蜜多不作是念：『我於前五波羅蜜多最為前導，彼隨從我。』布施等五波羅蜜多不作是念：『甚深般若波羅蜜多居我等先，我隨從彼。』所以者何？如是六種波羅蜜多及一切法，自性皆鈍，無所能為，無有主宰，虛妄不實，空無所有，不自在相，譬如陽燄、光影、水月、幻事、夢等，其中都無分別作用，真實自體。」

- (10) 爾時，具壽善現復白佛言：「世尊！若一切法自性皆空，無實相用，諸菩薩摩訶薩云何修行布施、淨戒、安忍、精進、靜慮、般若波羅蜜多，求證無上正等菩提？」
- (11) 佛告善現：「諸菩薩摩訶薩於此六種波羅蜜多正修行時，常作是念：『世間有情，心恒顛倒，沈溺生死，不能自脫。我若不修巧便勝行，不能拔濟彼生死苦。我當為彼諸有情類，勤修布施乃至般若波羅蜜多巧便勝行，趣證無上正等菩提，脫諸有情生死大苦。』是菩薩摩訶薩作此念已，為諸有情捨施內外一切所有。」

既捨施已，復作是念：『我於內外，都無所捨。所以者何？此內外物，空無自性，不可捨施，非唯屬我。』是菩薩摩訶薩由此觀察，修行布施波羅蜜多，疾得圓滿，速證無上正等菩提。是菩薩摩訶薩為脫有情生死苦故，終不犯戒。所以者何？是菩薩摩訶薩常作此念：『我為解脫一切有情生死苦故，求趣無上正等菩提，決定不應斷眾生命乃至邪見，亦定不應求妙欲境，求天富樂，求作帝釋、魔、梵王等，亦定不應求聲聞地或獨覺地，唯自解脫。』是菩薩摩訶薩由此觀察，修行淨戒波羅蜜多，疾得圓滿，速證無上正等菩提。

是菩薩摩訶薩為脫有情生死苦故，終不發起忿恚等心，假使恒遭毀謗凌辱，辛楚呵責，痛徹心髓，終不發起一念瞋恨。設復恒遭刀杖、瓦石、杖塊等物捶打其身，割截斫刺，分解支節，亦不發起一念惡心。所以者何？是菩薩摩訶薩觀察一切，聲如谷響，色如聚沫，不應於中妄起瞋恨，壞諸善品。是菩薩摩訶薩由此觀察，修行安忍波羅蜜多，疾得圓滿，速證無上正等菩提。

是菩薩摩訶薩為脫有情生死苦故，勤求一切殊勝善法，乃至無上正等菩提，於其中間，常無懈怠。所以者何？是菩薩摩訶薩恒作是念：『我若懈怠，不能濟拔一切有情，令其遠離生死大苦，亦不能得一切智智。』是菩薩摩訶薩由此觀察，修行精進波羅蜜多，疾得圓滿，速證無上正等菩提。

是菩薩摩訶薩為脫有情生死苦故，修諸勝定，乃至無上正等菩提，終不發起貪瞋癡等俱行亂心。所以者何？是菩薩摩訶薩常作此念：『我若發起貪瞋癡等俱行亂心，則不能成利樂他事，亦不能證所求佛果。』是菩薩摩訶薩由此觀察，修行靜慮波羅蜜多，疾得圓滿，速證無上正等菩提。

是菩薩摩訶薩為脫有情生死苦故，不離般若波羅蜜多，乃至無上正等菩提，常勤修學世出世間微妙勝慧。所以者何？是菩薩摩訶薩恒作是念：『若離般若波羅蜜多，於諸有情不能成熟，亦不能得一切智智。』是菩薩摩訶薩由此觀察，修行般若波羅蜜多，疾得圓滿，速證無上正等菩提。

善現！由此因緣，雖一切法無實相用，自性皆空，而諸菩薩摩訶薩眾勤修六種波羅蜜多，常無懈倦，求證無上正等菩提。」

(12) 爾時，具壽善現復白佛言：「世尊！若一切種波羅蜜多，性無差別，皆是般若波羅蜜多所攝受故，皆由般若波羅蜜多修成滿故，應合為一波羅蜜多，所謂般若波羅蜜多。云何可說般若波羅蜜多於五波羅蜜多為最為勝，為尊為高，為妙為微妙，為上為無上，無等無等等？」

(13) 佛告善現：「如是！如是！如汝所說。如是六種波羅蜜多，性無差別，皆是般若波羅蜜多所攝持故。若無般若波羅蜜多，布施等五，不得名為波羅蜜多；要依般若波羅蜜多，布施等五，乃得名為波羅蜜多。是故前五波羅蜜多攝在般若波羅蜜多，由此唯一波羅蜜多，所謂般若波羅蜜多，是故一切波羅蜜多性無差別。

善現當知！如有情類，雖有種種色身差別，若有親近妙高山王，咸同一色。如是前五波羅蜜多，雖有種種品類差別，而為般若波羅蜜多所攝受故，皆由般若波羅蜜多修成滿故，皆入般若波羅蜜多，不可施設差別名性。又布施等波羅蜜多依止般若波羅蜜多，方得趣入一切智智，乃得名為到彼岸者，是故六種波羅蜜多皆同一味，性無差別，不可施設此是布施波羅蜜多乃至般若波羅蜜多。所以者何？如是六種波羅蜜多，皆同趣入一切智智，能到彼岸，性無差別。由是因緣，布施等六，不可施設名性有異。」

(14) 具壽善現復白佛言：「波羅蜜多及一切法，若隨實義，皆無此彼勝劣差別，何緣故說般若波羅蜜多於五波羅蜜多為最為勝，為尊為高，為妙為微妙，為上為無上，無等無等等？」

(15) 佛告善現：「如是！如是！如汝所說。若隨實義，波羅蜜多及一切法，皆無此彼勝劣差別，但依世俗言說作用，說有此彼勝劣差別。施設布施波羅蜜多乃至般若波羅蜜多，為欲度脫諸有情類世俗作用生老病死，然諸有情生老病死，皆非實有，但假施設。所以者何？有情無故，當知諸法亦無所有，甚深般若波羅蜜多達一切法都無所有，能拔有情世俗作用生老病死，由斯故說般若波羅蜜多於五波羅蜜多，為最為勝，為尊為高，為妙為微妙，為上為無上，無等無等等。

善現當知！如轉輪王所有女寶於人中女為最為勝，為尊為高，為妙為微妙，為上為無上，無等無等等。如是般若波羅蜜多於

布施等波羅蜜多為最為勝，為尊為高，為妙為微妙，為上為無上，無等無等等。」

- (16) 具壽善現復白佛言：「世尊！何緣數數讚說甚深般若波羅蜜多於布施等波羅蜜多為最為勝，為尊為高，為妙為微妙，為上為無上，無等無等等？」
- (17) 佛告善現：「由此般若波羅蜜多，以無所得而為方便，普能攝取一切善法，和合趣入一切智智，安住不動故，我數數讚說般若波羅蜜多。」
- (18) 具壽善現復白佛言：「甚深般若波羅蜜多於諸善法有取捨不？」
- (19) 佛言：「不也，甚深般若波羅蜜多於法都無若取若捨。何以故？以一切法皆不可取不可捨故。」
- (20) 具壽善現復白佛言：「甚深般若波羅蜜多於何等法無取無捨？」
- (21) 佛告善現：「甚深般若波羅蜜多於色無取無捨，於受想行識無取無捨，於眼處乃至意處無取無捨，於色處乃至法處無取無捨，於眼界乃至眼界無取無捨，於色界乃至法界無取無捨，於眼識界乃至意識界無取無捨，於眼觸乃至意觸無取無捨，於眼觸為緣所生諸受乃至意觸為緣所生諸受無取無捨，於地界乃至識界無取無捨，於因緣乃至增上緣無取無捨，於無明乃至老死無取無捨，於布施波羅蜜多乃至般若波羅蜜多無取無捨，於內空乃至無性自性空無取無捨，於真如乃至不思議界無取無捨，於苦集滅道聖諦無取無捨，於四念住乃至八聖道支無取無捨，於四靜慮、四無量、四無色定無取無捨，於八解脫乃至十遍處無取無捨，於空、無相、無願解脫門無取無捨，於淨觀地乃至如來地無取無捨，於極喜地乃至法雲地無取無捨，於一切陀羅尼門、三摩地門無取無捨，於五眼、六神通無取無捨，於如來十力乃至十八不共法無取無捨，於三十二大士相、八十隨好無取無捨，於無忘失法、恆住捨性無取無捨，於一切智、道相智、一切相智無取無捨，於預流果乃至獨覺菩提無取無捨，於一切菩薩摩訶薩行無取無捨，於諸佛無上正等菩提無取無捨，於一切智智無取無捨。」
- (22) 具壽善現復白佛言：「甚深般若波羅蜜多云何於色無取無捨，乃至於一切智智無取無捨？」
- (23) 佛告善現：「甚深般若波羅蜜多不思惟色，是故於色無取無捨；乃至不思惟一切智智，是故於一切智智無取無捨。」

- (24) 具壽善現復白佛言：「云何般若波羅蜜多不思惟色，乃至不思惟一切智智？」
- (25) 佛告善現：「由此般若波羅蜜多於色不思惟一切相，亦不思惟一切所緣，是故不思惟色；乃至於一切智智不思惟一切相，亦不思惟一切所緣，是故不思惟一切智智。」
- (26) 具壽善現復白佛言：「若菩薩摩訶薩不思惟色，乃至不思惟一切智智，云何增長所種善根？若不增長所種善根，云何圓滿波羅蜜多？若不圓滿波羅蜜多，云何證得所求無上正等菩提？」
- (27) 佛告善現：「若時菩薩摩訶薩不思惟色，乃至不思惟一切智智，是時菩薩摩訶薩便能增長所種善根；所種善根得增長故，便能圓滿波羅蜜多；波羅蜜多得圓滿故，便能證得所求無上正等菩提。何以故？善現！諸菩薩摩訶薩要不思惟色，乃至不思惟一切智智，乃能具足修諸菩薩摩訶薩行，證得無上正等菩提。」
- (28) 具壽善現復白佛言：「何緣菩薩摩訶薩要不思惟色，乃至不思惟一切智智，方能具足修諸菩薩摩訶薩行，證得無上正等菩提？」
- (29) 佛告善現：「諸菩薩摩訶薩若思惟色，乃至思惟一切智智，則有所得；有所得故，便著欲界、色、無色界；若著欲界、色、無色界，不能具足修諸菩薩摩訶薩行，證得無上正等菩提。若菩薩摩訶薩不思惟色，乃至不思惟一切智智，便無所得；無所得故，則不著欲界、色、無色界；若不著欲界、色、無色界，乃能具足修諸菩薩摩訶薩行，證得無上正等菩提。是故，善現！若菩薩摩訶薩欲得具足修諸菩薩摩訶薩行，欲疾證得所求無上正等菩提，當勤修學甚深般若波羅蜜多，不應思惟執著諸法。」
- (30) 具壽善現復白佛言：「若菩薩摩訶薩精勤修學甚深般若波羅蜜多，當於何住？」
- (31) 佛告善現：「若菩薩摩訶薩精勤修學甚深般若波羅蜜多，不應住色，乃至不應住一切智智。」
- (32) 具壽善現復白佛言：「何緣菩薩摩訶薩精勤修學甚深般若波羅蜜多，不應住色乃至不應住一切智智？」
- (33) 佛告善現：「若菩薩摩訶薩精勤修學甚深般若波羅蜜多，於一切法無執著故，不應住色乃至不應住一切智智。何以故？善現！是菩薩摩訶薩不見有法可於其中而起執著及可安住。善

現！如是菩薩摩訶薩以無所著及無安住而為方便，精勤修學甚深般若波羅蜜多。

復次，善現！若菩薩摩訶薩作如是念：『若能如是無所執著，無所安住，精進修行甚深般若波羅蜜多，是修般若波羅蜜多，是行般若波羅蜜多。我能如是無所執著，修深般若波羅蜜多。我能如是無所執著，行深般若波羅蜜多，是行般若波羅蜜多。』善現！是菩薩摩訶薩由如是念，取相執著，遠離般若波羅蜜多。若遠離般若波羅蜜多，則遠離靜慮、精進、安忍、淨戒、布施波羅蜜多，亦遠離內空乃至無性自性空，亦遠離真如乃至不思議界，亦遠離苦集滅道聖諦，亦遠離四念住乃至八聖道支，亦遠離四靜慮、四無量、四無色定，亦遠離八解脫乃至十遍處，亦遠離空、無相、無願解脫門，亦遠離極喜地乃至法雲地，亦遠離一切陀羅尼門、三摩地門，亦遠離五眼、六神通，亦遠離如來十力乃至十八不共法，亦遠離無忘失法、恆住捨性，亦遠離一切智、道相智、一切相智，亦遠離一切菩薩摩訶薩行，亦遠離諸佛無上正等菩提，亦遠離一切智智。所以者何？甚深般若波羅蜜多於一切法無所執著，非深般若波羅蜜多有執著者及執著性。何以故？甚深般若波羅蜜多都無自性可於諸法有所執著。

是故，善現！諸菩薩摩訶薩修行般若波羅蜜多時，起如是想：『此是般若波羅蜜多，我行般若波羅蜜多。』則菩薩摩訶薩修行般若波羅蜜多，於一切法及深般若波羅蜜多皆無執著。

復次，善現！若菩薩摩訶薩修行般若波羅蜜多時，起如是想：『此是般若波羅蜜多，我行般若波羅蜜多，則是遍行諸法實相。』是菩薩摩訶薩由起此想，便退般若波羅蜜多。若退般若波羅蜜多，則退一切殊勝白法。何以故？甚深般若波羅蜜多是一切種白法根本，若退般若波羅蜜多，則為退失一切白法。

復次，善現！若菩薩摩訶薩作如是念：『甚深般若波羅蜜多攝受布施、淨戒、安忍、精進、靜慮波羅蜜多，乃至攝受一切智智。』是菩薩摩訶薩退失般若波羅蜜多。若退失般若波羅蜜多，則不能攝受布施、淨戒、安忍、精進、靜慮波羅蜜多，乃至不能攝受一切智智。何以故？善現！非離般若波羅蜜多能遍攝受菩提分法及能證得一切智智。

復次，善現！若菩薩摩訶薩作如是念：『安住般若波羅蜜多，便於無上正等菩提定得受記。』是菩薩摩訶薩則退失般若波羅蜜多。若退失般若波羅蜜多，則於無上正等菩提不得受記。何以故？善現！非離般若波羅蜜多可於無上正等菩提得受記故。復次，善現！若菩薩摩訶薩作如是念：『安住般若波羅蜜多，則能引發布施波羅蜜多乃至靜慮波羅蜜多，如是乃至能引發大慈大悲大喜大捨。』是菩薩摩訶薩則退失般若波羅蜜多。若退失般若波羅蜜多，則不能引發布施波羅蜜多乃至靜慮波羅蜜多，如是乃至不能引發大慈大悲大喜大捨。何以故？善現！非離般若波羅蜜多而能引發安住勝法。

復次，善現！若菩薩摩訶薩作如是念：『佛知諸法無攝受相，自證無上正等菩提。得菩提已，為諸有情宣說開示諸法實相。』是菩薩摩訶薩則為退失甚深般若波羅蜜多。何以故？善現！如來於法無知無覺，無說無示。所以者何？諸法實性不可知覺，不可施設，云何得有知覺說示一切法者？若言實有知覺說示一切法者，無有是處。」

- (34) 爾時，具壽善現白佛言：「世尊！諸菩薩摩訶薩修行般若波羅蜜多，云何當得遠離如是種種過失？」
- (35) 佛告善現：「若菩薩摩訶薩修行般若波羅蜜多，作如是念：『一切法無所有，不可取。若法無所有，不可取，則無有能現等覺者，亦無有能宣說開示。若如是行，是行般若波羅蜜多，離諸過失。』若菩薩摩訶薩著無所有，不可取法，則離般若波羅蜜多。何以故？善現！甚深般若波羅蜜多於一切法無所執著，無所攝受，若於諸法有所執著，有所攝受，則離般若波羅蜜多。」
- (36) 具壽善現復白佛言：「世尊！般若波羅蜜多於般若波羅蜜多為遠離？為不遠離？乃至布施波羅蜜多於布施波羅蜜多為遠離？為不遠離？如是乃至一切智智於一切智智為遠離？為不遠離？世尊！若般若波羅蜜多於般若波羅蜜多，設遠離，設不遠離，云何菩薩摩訶薩能無執著引發般若波羅蜜多？乃至若布施波羅蜜多於布施波羅蜜多，設遠離，設不遠離，云何菩薩摩訶薩能無執著引發布施波羅蜜多？如是乃至若一切智智於一切智智，設遠離，設不遠離，云何菩薩摩訶薩能無執著引發一切智智？」

(37) 佛告善現：「般若波羅蜜多於般若波羅蜜多，非遠離，非不遠離，乃至一切智智於一切智智，非遠離，非不遠離，是故菩薩摩訶薩能無執著引發般若波羅蜜多，乃至引發一切智智。何以故？善現！非即自性，非離自性，而能安住引發自性。

復次，善現！諸菩薩摩訶薩修行般若波羅蜜多，不執著色，謂此是色，此色屬彼；亦不執著受想行識，謂此是受想行識，此受想行識屬彼；如是乃至不執著一切智智，謂此是一切智智，此一切智智屬彼。

善現！是菩薩摩訶薩於如是一切法無執著故，便能引發般若波羅蜜多乃至布施波羅蜜多，乃至能引發一切智智。何以故？善現！若菩薩摩訶薩修行般若波羅蜜多，於諸法中有所執著，謂此是法，此法屬彼，則不能隨意引發安住勝妙功德。

復次，善現！諸菩薩摩訶薩修行般若波羅蜜多，不觀色若常若無常、若樂若苦、若我若無我、若淨若不淨、若寂靜若不寂靜、若遠離若不遠離，亦不觀受想行識若常若無常、若樂若苦、若我若無我、若淨若不淨、若寂靜若不寂靜、若遠離若不遠離，乃至不觀一切智智若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是菩薩摩訶薩於如是一切法不觀察故，便能引發般若波羅蜜多乃至布施波羅蜜多，如是乃至能引發一切智智。何以故？善現！若菩薩摩訶薩修行般若波羅蜜多，於諸法中有所觀察若常若無常、若樂若苦、若我若無我、若淨若不淨、若寂靜若不寂靜、若遠離若不遠離，則不能隨意引發安住勝妙功德。

復次，善現！若菩薩摩訶薩修行般若波羅蜜多，則為修行靜慮、精進、安忍、淨戒、布施波羅蜜多，亦為安住內空乃至無性自性空，亦為安住真如乃至不思議界，亦為安住苦集滅道聖諦，亦為修行四念住乃至八聖道支，亦為修行四靜慮、四無量、四無色定，亦為修行八解脫乃至十遍處，亦為修行空、無相、無願解脫門，亦為修行菩薩十地，亦為修行一切陀羅尼門、三摩地門，亦為修行五眼、六神通，亦為修行如來十力乃至十八不共法，亦為修行無忘失法、恆住捨性，亦為修行一切智、道相智、一切相智，亦為修行一切菩薩摩訶薩行，亦為修行諸佛無上正等菩提，亦為修行一切智智。

復次，善現！甚深般若波羅蜜多隨所行處，所有一切波羅蜜多及餘一切菩提分法皆悉隨行。甚深般若波羅蜜多隨所至處，所有一切波羅蜜多及餘一切菩提分法皆悉隨至。

a 善現！如轉輪王，隨所行處，四種勇軍皆悉隨行，如轉輪王，隨所至處，四種勇軍皆悉隨至。甚深般若波羅蜜多亦復如是，隨有所行及有所至，所有一切波羅蜜多及餘一切菩提分法皆悉隨行，究竟至於一切智智。

b 善現！如善御者駕四馬車，令避險路，行於正道，隨本意欲，能往所至。甚深般若波羅蜜多亦復如是，善御一切波羅蜜多及餘一切菩提分法，令避生死涅槃險路，行於自利利他正道，至本所求一切智智。」

(38) 具壽善現白言：「世尊！諸菩薩摩訶薩云何為道？云何非道？」

(39) 佛告善現：「諸異生道、若聲聞道、若獨覺道，非諸菩薩摩訶薩道，依此不能往一切智智故；甚深般若波羅蜜多所引六種波羅蜜多，是諸菩薩摩訶薩道，依此定能往一切智智故。」

(40) 具壽善現復白佛言：「甚深般若波羅蜜多出現世間，能辦大事，所謂示現諸菩薩摩訶薩道、非道相，令諸菩薩摩訶薩眾知是道、是非道，疾能證得一切智智。」

(41) 佛告善現：「如是！如是！如汝所說。甚深般若波羅蜜多出現世間，能辦大事，所謂示現諸菩薩摩訶薩道、非道相，令諸菩薩摩訶薩眾知是道、是非道，疾能證得一切智智。

復次，善現！甚深般若波羅蜜多出現世間，能辦大事，所謂度脫無量無數無邊有情，令得殊勝利益安樂。

善現當知！甚深般若波羅蜜多雖作無邊利樂他事，而於此事無所取著。

復次，善現！甚深般若波羅蜜多雖能示現色所作事，而於此事無所取著；雖能示現受想行識所作事，而於此事無所取著；如是乃至雖能示現一切智智所作事，而於此事無所取著；雖能示現聲聞、獨覺所作事，而於此事無所取著。

c 善現！甚深般若波羅蜜多雖能引導一切菩薩摩訶薩眾，令趣無上正等菩提，遠離聲聞、獨覺等地，而於諸法無生無滅，以法住性為定量故。」

- (42) 具壽善現復白佛言：「若甚深般若波羅蜜多於一切法無生無滅，云何菩薩摩訶薩行深般若波羅蜜多時，為諸有情應行布施，應持淨戒，應起安忍，應勤精進，應住靜慮，應修般若？」
- (43) 佛告善現：「諸菩薩摩訶薩修行般若波羅蜜多時，緣一切智智為諸有情應行布施，應持淨戒，應起安忍，應勤精進，應住靜慮，應修般若。善現！是菩薩摩訶薩持此善根，與諸有情同共迴向一切智智，如是迴向一切智智，則修六種波羅蜜多速得圓滿，亦修菩薩慈悲喜捨速得圓滿，乃至安坐妙菩提座，常不遠離如是六種波羅蜜多。若不遠離如是六種波羅蜜多，則不遠離一切智智。是故，善現！若菩薩摩訶薩欲疾證得一切智智，當勤精進修學六種波羅蜜多，當勤精進修行六種波羅蜜多，若菩薩摩訶薩常勤精進修學修行如是六種波羅蜜多，一切善根速得圓滿，疾能證得一切智智。是故，善現！諸菩薩摩訶薩應與六種波羅蜜多常共相應，勿相捨離。」
- (44) d 具壽善現白言：「世尊！云何菩薩摩訶薩能與六種波羅蜜多常共相應，不相捨離？」
- (45) 佛告善現：「若菩薩摩訶薩如實觀色非相應非不相應，如實觀受想行識非相應非不相應，乃至如實觀一切智智非相應非不相應，是菩薩摩訶薩能與六種波羅蜜多常共相應，不相捨離。
e 復次，善現！若菩薩摩訶薩恒作是念：『我不應住色，亦不應住非色；我不應住受想行識，亦不應住非受想行識；乃至我不應住一切智智，亦不應住非一切智智。何以故？色非能住，非所住；受想行識亦非能住，非所住；如是乃至一切智智非能住，非所住故。』善現！是菩薩摩訶薩能與六種波羅蜜多常共相應，不相捨離。善現！若菩薩摩訶薩能以如是無住方便，修行六種波羅蜜多，是菩薩摩訶薩疾能證得一切智智。
f 善現！譬如有人欲食菴沒羅果或半娜娑果，先取其子於良美田而種植之，隨時溉灌，守護營理，漸次生長芽莖枝葉，時節和合，便有花果，果成熟已，取而食之。如是，善現！若菩薩摩訶薩欲得無上正等菩提，先學六種波羅蜜多，復於有情或以布施，或以愛語，或以利行，或以同事而攝受之；既攝受已，教令安住布施、淨戒、安忍、精進、靜慮、般若波羅蜜多；既安住已，解脫一切生老病死，證得常住畢竟安樂。」

g 菩薩如是當得無上正等菩提，轉妙法輪，度無量眾。是故，善現！若菩薩摩訶薩欲於諸法不藉他緣而自悟解，欲能成熟一切有情，欲於佛土能善嚴淨，欲疾安坐妙菩提座，欲能降伏一切魔軍，欲疾證得一切智智，欲轉法輪，脫有情眾生老病死，證得常住畢竟安樂，應學六種波羅蜜多，以四攝事方便攝受諸有情眾，既攝受已，應令安住布施、淨戒、安忍、精進、靜慮、般若波羅蜜多。菩薩如是勤修學時，應於般若波羅蜜多常勤修學。」

大般若波羅蜜多經卷第四百六十一

(46) 爾時，具壽善現復白佛言：「世尊！佛說菩薩摩訶薩應於般若波羅蜜多常勤修學耶？」

(47) 佛告善現：「如是！如是！我說菩薩摩訶薩應於般若波羅蜜多常勤修學。善現！若菩薩摩訶薩欲於諸法得大自在，當學般若波羅蜜多。所以者何？甚深般若波羅蜜多具大勢力，令諸菩薩摩訶薩眾於一切法得自在故。

h 善現當知！甚深般若波羅蜜多是諸善法所趣向門，譬如大海，是一切水所趣向門。是故，善現！若聲聞乘補特伽羅、若獨覺乘補特伽羅、若菩薩乘補特伽羅，皆應於此甚深般若波羅蜜多常勤修學。

善現！諸菩薩摩訶薩於此般若波羅蜜多勤修學時，應於布施波羅蜜多乃至靜慮波羅蜜多亦常修學，應於內空乃至無性自性空亦常安住，應於真如乃至不思議界亦常安住，應於苦集滅道聖諦亦常安住，應於四念住乃至八聖道支亦常修學，應於四靜慮、四無量、四無色定亦常修學，應於八解脫乃至十遍處亦常修學，應於空、無相、無願解脫門亦常修學，應於菩薩摩訶薩地亦常修學，應於一切陀羅尼門、三摩地門亦常修學，應於五眼、六神通亦常修學，應於如來十力乃至十八不共法亦常修學，應於無忘失法、恒住捨性亦常修學，應於一切智、道相智、一切相智亦常修學，應於一切菩薩摩訶薩行亦常修學，應於諸佛無上正等菩提亦常修學，應於一切智智亦常修學。

i 善現！如善射人，甲冑堅固，弓箭如意，不懼怨敵。諸菩薩摩訶薩亦復如是，攝受般若波羅蜜多方便善巧，備諸功德，一切魔軍外道異論所不能屈。

是故，善現！若菩薩摩訶薩欲疾證得一切智智，應勤修學甚深般若波羅蜜多。善現！若菩薩摩訶薩能於般若波羅蜜多常勤修學，便為十方無量無數無邊世界諸佛世尊常共護念。」

(48) 具壽善現白言：「世尊！云何菩薩摩訶薩常勤修學甚深般若波羅蜜多，便為十方無量無數無邊世界諸佛世尊常共護念？」

(49) 佛告善現：「若菩薩摩訶薩能於般若波羅蜜多常勤修學，則能修行布施波羅蜜多乃至修行一切智智，由此十方無量無數無邊世界諸佛世尊常共護念。」

(50) 具壽善現復白佛言：「是菩薩摩訶薩云何修行布施波羅蜜多乃至修行一切智智，便為十方無量無數無邊世界諸佛世尊常共護念？」

(51) 佛告善現：「是菩薩摩訶薩修行布施波羅蜜多時，觀布施波羅蜜多不可得；乃至修行一切智智時，觀一切智智不可得故，為十方無量無數無邊世界諸佛世尊常共護念。」

復次，善現！如是十方無量無數無邊世界諸佛世尊，如色不可得故，常共護念是菩薩摩訶薩；如受想行識不可得故，常共護念是菩薩摩訶薩；乃至如一切智智不可得故，常共護念是菩薩摩訶薩。

復次，善現！如是十方無量無數無邊世界諸佛世尊，不以色故，常共護念是菩薩摩訶薩；不以受想行識故，常共護念是菩薩摩訶薩；乃至不以一切智智故，常共護念是菩薩摩訶薩。」

(52) 具壽善現復白佛言：「諸菩薩摩訶薩雖多處學，而無所學。」

(53) 佛告善現：「如是！如是！諸菩薩摩訶薩雖多處學，而無所學。所以者何？實無有法可令菩薩摩訶薩眾於中修學。」

(54) 具壽善現復白佛言：「世尊為諸菩薩摩訶薩或略或廣宣說六種波羅蜜多相應之法，若菩薩摩訶薩欲疾證得一切智智，於此六種波羅蜜多相應法教，若略若廣，皆應聽聞，受持讀誦，究竟通利；既通利已，如理思惟；既思惟已，審正觀察；正觀察已，令心、心所於所緣相皆不復轉。」

二、[所斷分別]

[轉趣所取分別]

『N1』略標及『N2』廣釋，『N3』佛所不攝受，

『N4』，『N5』，『N6』無三世功德，

及於『N7』，『N8』，『N9』三妙道。所取初分別，加行相行境。

○大乘修所斷轉趣所取分別有九，謂：

◎『N1』為攝受愛樂略說眾生，執略說法〔為實所取之俱生分別〕。

◎『N2』又為攝受樂廣眾生，執廣說法為實所取之俱生分別。

(55) 『N1』，『N2』佛告善現：「如是！如是！如汝所說。

復次，善現！諸菩薩摩訶薩於佛世尊所說六種波羅蜜多相應法教，若略若廣，勤修學時，應於諸法如實了知略廣之相。」

(56) 具壽善現白言：「世尊！云何菩薩摩訶薩於一切法如實了知略廣之相？」

(57) 佛告善現：「若菩薩摩訶薩如實了知色真如相，受想行識真如相，如實了知眼處真如相乃至意處真如相，如實了知色處真如相乃至法處真如相，如實了知眼界真如相乃至眼界真如相，如實了知色界真如相乃至法界真如相，如實了知眼識界真如相乃至意識界真如相，如實了知眼觸真如相乃至意觸真如相，如實了知眼觸為緣所生諸受真如相乃至意觸為緣所生諸受真如相，如實了知地界真如相乃至識界真如相，如實了知因緣真如相乃至增上緣真如相，如實了知無明真如相乃至老死真如相，如實了知布施波羅蜜多真如相乃至般若波羅蜜多真如相，如實了知內空真如相乃至無性自性空真如相，如實了知苦聖諦真如相，集滅道聖諦真如相，如實了知四念住真如相乃至八聖道支真如相，如實了知四靜慮真如相，四無量、四無色定真如相，如實了知八解脫真如相乃至十遍處真如相，如實了知空解脫門真如相，無相、無願解脫門真如相，如實了知淨觀地真如相乃至如來地真如相，如實了知極喜地真如相乃至法雲地真如相，如實了知一切陀羅尼門真如相、一切三摩地門真如相，如實了知五眼真如相、六神通真如相，如實了知如來十力真如相乃至十八不共法真如相，如實了知三十二大士相真如相、八十隨好真如相，如實了知無忘失法真如相、恆住捨性真如相，如實了知一切智真如相，道相智、一切相智真如相，如實了知預流果真如相乃至獨覺菩提真如相，如實了知一切菩薩摩訶薩行真如相、諸佛無上正等菩提真如相，如實了知一切智智真如相，是菩薩摩訶薩於一切法如實了知略廣之相。」

- (58) 具壽善現白言：「世尊！云何色真如相，受想行識真如相，乃至云何一切智智真如相，諸菩薩摩訶薩如實了知而於中學，於一切法如實了知略廣之相？」
- (59) 佛告善現：「色真如無生無滅，亦無住異而可施設，是名色真如相；受想行識真如無生無滅，亦無住異而可施設，是名受想行識真如相；乃至一切智智真如無生無滅，亦無住異而可施設，是名一切智智真如相。諸菩薩摩訶薩如實了知當於中學，於一切法如實了知略廣之相。
復次，善現！若菩薩摩訶薩如實了知色實際相，受想行識實際相，乃至如實了知一切智智實際相，是菩薩摩訶薩於一切法如實了知略廣之相。」
- (60) 具壽善現白言：「世尊！云何色實際相，受想行識實際相，乃至云何一切智智實際相，諸菩薩摩訶薩如實了知而於中學，於一切法如實了知略廣之相？」
- (61) 佛告善現：「無色際是名色實際相，無受想行識際是名受想行識實際相，乃至無一切智智際是名一切智智實際相，諸菩薩摩訶薩如實了知，當於中學，於一切法如實了知略廣之相。
復次，善現！若菩薩摩訶薩如實了知色法界相，受想行識法界相，乃至如實了知一切智智法界相，是菩薩摩訶薩於一切法如實了知略廣之相。」
- (62) 具壽善現白言：「世尊！云何色法界相，受想行識法界相，乃至云何一切智智法界相，諸菩薩摩訶薩如實了知而於中學，於一切法如實了知略廣之相？」
- (63) 佛告善現：「色如虛空，無障無礙，無生無滅，無斷無續而可施設，是名色法界相；受想行識如虛空，無障無礙，無生無滅，無斷無續而可施設，是名受想行識法界相；乃至一切智智如虛空，無障無礙，無生無滅，無斷無續而可施設，是名一切智智法界相。諸菩薩摩訶薩如實了知當於中學，於一切法如實了知略廣之相。」
- (64) 具壽善現白言：「世尊！諸菩薩摩訶薩復云何應知一切法略廣之相？」
- (65) 佛告善現：「若菩薩摩訶薩如實了知一切法不合不散，是菩薩摩訶薩應如是知一切法略廣之相。」
- (66) 具壽善現白言：「世尊！何等一切法不合不散？」

- (67) 佛告善現：「色不合不散，受想行識不合不散，眼處乃至意處不合不散，色處乃至法處不合不散，眼界乃至意識界不合不散，色界乃至法界不合不散，眼識界乃至意識界不合不散，眼觸乃至意觸不合不散，眼觸為緣所生諸受乃至意觸為緣所生諸受不合不散，地界乃至識界不合不散，因緣乃至增上緣不合不散，無明乃至老死不合不散，貪欲、瞋恚、愚癡不合不散，欲界、色界、無色界不合不散，布施波羅蜜多乃至般若波羅蜜多不合不散，內空乃至無性自性空不合不散，真如乃至不思議界不合不散，苦集滅道聖諦不合不散，四念住乃至八聖道支不合不散，四靜慮、四無量、四無色定不合不散，八解脫乃至十遍處不合不散，空、無相、無願解脫門不合不散，淨觀地乃至如來地不合不散，極喜地乃至法雲地不合不散，一切陀羅尼門、三摩地門不合不散，五眼、六神通不合不散，如來十力乃至十八不共法不合不散，三十二大士相、八十隨好不合不散，無忘失法、恒住捨性不合不散，一切智、道相智、一切相智不合不散，預流果乃至獨覺菩提不合不散，一切菩薩摩訶薩行不合不散，諸佛無上正等菩提不合不散，一切智智不合不散，有為界不合不散，無為界不合不散。所以者何？如是諸法，皆無自性，若無自性，則無所有，若無所有，則不可說有合有散。諸菩薩摩訶薩於一切法如是了知，則能了知略廣之相。」
- (68) 具壽善現白言：「世尊！如是名為略攝一切波羅蜜多，諸菩薩摩訶薩若於中學，能多所作。世尊！如是略攝波羅蜜多，初修業菩薩摩訶薩於中應常修學，乃至住第十地菩薩摩訶薩亦於中應常修學。世尊！若菩薩摩訶薩學此略攝波羅蜜多，於一切法能如實知略廣之相。」
- (69) 佛告善現：「如是！如是！如汝所說。善現當知！如是略攝波羅蜜多法門，諸菩薩摩訶薩利根者能入，鈍根者不能入；等引根者能入，非等引根者不能入；勤精進者能入，不勤精進者不能入；具正念者能入，不具正念者不能入；具妙慧者能入，具惡慧者不能入。
- 善現！若菩薩摩訶薩欲住不退轉地，當勤方便入此法門；若菩薩摩訶薩乃至欲住第十地，當勤方便入此法門；若菩薩摩訶薩乃至欲得一切智智，當勤方便入此法門。

善現！若菩薩摩訶薩如此般若波羅蜜多所說而學，是菩薩摩訶薩則能隨學布施波羅蜜多乃至般若波羅蜜多，亦能隨學內空乃至無性自性空，亦能隨學真如乃至不思議界，亦能隨學苦集滅道聖諦，亦能隨學四念住乃至八聖道支，亦能隨學四靜慮、四無量、四無色定，亦能隨學八解脫乃至十遍處，亦能隨學空、無相、無願解脫門，亦能隨學諸菩薩地，亦能隨學一切陀羅尼門、三摩地門，亦能隨學五眼、六神通，亦能隨學如來十力乃至十八不共法，亦能隨學無忘失法、恆住捨性，亦能隨學一切智、道相智、一切相智，亦能隨學一切菩薩摩訶薩行，亦能隨學諸佛無上正等菩提，亦能隨學一切智智。

善現！若菩薩摩訶薩如依止甚深般若波羅蜜多所說而學，是菩薩摩訶薩如是如是轉近所求一切智智。

善現！若菩薩摩訶薩如此般若波羅蜜多所說而學，是菩薩摩訶薩所有業障及諸魔事隨起即滅。是故，善現！若菩薩摩訶薩欲疾滅除一切業障及諸魔事，欲正攝受巧方便力，當學般若波羅蜜多。

◎『N3』若不如說修行則佛不攝受，執彼對治修般若波羅蜜多瑜伽為實所取之俱生分別。

『N3』復次，善現！若時菩薩摩訶薩行此般若波羅蜜多，修此般若波羅蜜多，習此般若波羅蜜多，是時菩薩摩訶薩便為十方無量無數無邊世界諸佛世尊現說法者，常共護念。所以者何？善現！過去、未來、現在諸佛無不皆從甚深般若波羅蜜多而出現故。

是故，善現！若菩薩摩訶薩能行般若波羅蜜多，當作是念：『過去、未來、現在諸佛所證得法，我亦當得。』如是，善現！諸菩薩摩訶薩應勤修學甚深般若波羅蜜多，若勤修學甚深般若波羅蜜多，疾能證得一切智智。

是故，善現！諸菩薩摩訶薩常應不捨甚深般若波羅蜜多相應作意修行般若波羅蜜多。

復次，善現！若菩薩摩訶薩於此般若波羅蜜多如實修行，經彈指頃，所獲福聚，其量甚多。假使有人教化三千大千世界一切有情，皆令安住布施、淨戒、安忍、精進、靜慮、般若，或令安住解脫及解脫智見，或令安住預流果乃至獨覺菩提，是人雖得無量福聚，而猶不及如實修行甚深般若波羅蜜多經彈指頃所

獲福聚。何以故？善現！如是般若波羅蜜多能生一切布施、淨戒、安忍、精進、靜慮、般若波羅蜜多，能生一切解脫及解脫智見，能生一切預流果乃至獨覺菩提。現在十方無量無數無邊世界諸佛世尊，無不皆由甚深般若波羅蜜多而得出現，過去、未來諸佛亦爾。

- ◎『N4』觀待見道由其已滅故，加行道功德於勝義無於名言有，執為實所取之俱生分別。
- ◎『N5』由無四句因生故，見道功德於勝義無於名言有，執為實所取之俱生分別。
- ◎『N6』由未來無實物故，大乘修道功德於見道時無，於修道時有，執為實所取之俱生分別。

『N4』-『N6』復次，善現！若菩薩摩訶薩能不遠離甚深般若波羅蜜多相應作意修行般若波羅蜜多，經須臾頃，或經半日，或經一日，或經半月，或經一月，或經一時，或經一歲，或經百歲，若復過此，是菩薩摩訶薩所獲福聚，其量甚多，勝教十方各如殞伽沙等世界一切有情，皆令安住布施、淨戒、安忍、精進、靜慮、般若，或令安住解脫及解脫智見，或令安住預流果乃至獨覺菩提所獲功德。所以者何？由此般若波羅蜜多，出生過去、未來、現在諸佛世尊，為諸有情如實施設布施、淨戒、安忍、精進、靜慮、般若波羅蜜多，如實施設解脫及解脫智見，如實施設預流果乃至獨覺菩提，如實施設諸佛無上正等菩提故，此福聚勝過於彼。

復次，善現！若菩薩摩訶薩如深般若波羅蜜多所說而住，當知是菩薩摩訶薩不復退轉，常為諸佛之所護念，成就最勝方便善巧，已曾親近供養無量百千俱胝那庾多佛，於諸佛所，已種無量微妙善根，已為無量真善知識之所攝受，已久修習布施波羅蜜多乃至般若波羅蜜多，已久安住內空乃至無性自性空，已久安住真如乃至不思議界，已久安住苦集滅道聖諦，已久修習四念住乃至八聖道支，已久修習四靜慮、四無量、四無色定，已久修習八解脫乃至十遍處，已久修習空、無相、無願解脫門，已久修習諸菩薩地，已久修習一切陀羅尼門、三摩地門，已久修習五眼、六神通，已久修習如來十力乃至十八不共法，已

久修習一切智、道相智、一切相智，已久修習一切菩薩摩訶薩行，已久修習諸佛無上正等菩提，已久修習一切智智。

當知是菩薩摩訶薩住童真地，一切所願無不滿足，常見諸佛，無時暫捨，於諸善根恒不遠離，常能成熟所化有情，常能嚴淨所居佛土，從一佛國趣一佛國，供養恭敬，尊重讚歎諸佛世尊，聽受修行無上乘法。當知是菩薩摩訶薩已得無斷無盡辯才，已得微妙陀羅尼法，成就最上微妙色身，已得諸佛授圓滿記，於隨所樂，為度有情，受諸有身，已得自在。

當知是菩薩摩訶薩善入所緣，善入行相；善入字法，善入非字法；善入言說，善入不言說；善入一語，善入二語，善入多語；善入女語，善入男語，善入非女男語；善入過去時語，善入未來時語，善入現在時語；善入諸義，善入諸文；善入色，善入受，善入想，善入行，善入識；善入蘊，善入處，善入界；善入緣起，善入緣起支；善入世間，善入涅槃；善入法相；善入有為相，善入無為相，善入有為無為相；善入行相，善入非行相；善入相相，善入非相相；善入有性，善入非有性；善入自性，善入他性；善入合，善入離，善入合離；善入相應，善入不相應，善入相應不相應；善入真如，善入不虛妄性，善入不變異性，善入法性，善入法界，善入法定，善入法住；善入緣性，善入非緣性；善入諸聖諦；善入靜慮，善入四無量，善入四無色定；善入六波羅蜜多；善入四念住乃至八聖道支；善入八解脫乃至十遍處；善入陀羅尼門，善入三摩地門；善入三解脫門；善入一切空性；善入五眼，善入六神通；善入如來十力乃至十八不共法；善入無忘失法，善入恒住捨性；善入一切智，善入道相智，善入一切相智；善入有為界，善入無為界；善入界，善入非界；善入色作意乃至識作意，善入眼處作意乃至意處作意，善入色處作意乃至法處作意，善入眼界作意乃至意識界作意，善入色界作意乃至法界作意，善入眼識界作意乃至意識界作意，善入眼觸作意乃至意觸作意，善入眼觸為緣所生諸受作意乃至意觸為緣所生諸受作意，善入地界作意乃至識界作意，善入因緣作意乃至增上緣作意，善入無明作意乃至老死作意，善入布施波羅蜜多作意乃至般若波羅蜜多作意，善入內空作意乃至無性自性空作意，善入真如作意乃至不思議界作意，善入苦集滅道聖諦作意，善入四念住作意乃至八聖道支作

意，善入四靜慮、四無量、四無色定作意，善入八解脫作意乃至十遍處作意，善入空、無相、無願解脫門作意，善入淨觀地作意乃至如來地作意，善入極喜地作意乃至法雲地作意，善入一切陀羅尼門、三摩地門作意，善入五眼、六神通作意，善入如來十力作意乃至十八不共法作意，善入三十二大士相、八十隨好作意，善入無忘失法、恒住捨性作意，善入一切智、道相智、一切相智作意，善入預流果作意乃至獨覺菩提作意，善入一切菩薩摩訶薩行作意，善入諸佛無上正等菩提作意，善入一切智智作意；善入色，色相空；善入受想行識，受想行識相空；如是乃至善入一切智智，一切智智相空。善入輕安道，善入不輕安道；善入生，善入滅，善入住異；善入正見，善入邪見；善入見，善入非見；善入貪瞋癡，善入無貪無瞋無癡；善入一切見、纏、隨眠、結、縛，善入一切見、纏、隨眠、結、縛斷；善入名，善入色，善入名色；善入所緣緣，善入增上緣，善入因緣，善入等無間緣；善入行，善入相；善入因，善入果；善入苦集滅道；善入地獄及地獄道；善入傍生及傍生道；善入鬼界及鬼界道；善入人及人道；善入天及天道；善入預流、預流果、預流果道；善入一來、一來果、一來果道；善入不還、不還果、不還果道；善入阿羅漢、阿羅漢果、阿羅漢果道；善入獨覺、獨覺菩提、獨覺菩提道；善入一切菩薩摩訶薩及一切菩薩摩訶薩行；善入一切如來應正等覺及諸佛無上正等菩提；善入一切智及一切智道，善入道相智及道相智道，善入一切相智及一切相智道；善入根，善入根圓滿，善入根勝劣；善入慧，善入疾慧，善入利慧，善入速慧，善入力慧，善入達慧，善入廣慧，善入深慧，善入大慧，善入無等慧，善入真實慧，善入珍寶慧；善入過去世，善入未來世，善入現在世；善入方便；善入顧有情；善入意樂，善入增上意樂；善入文義相；善入諸聖法；善入安立三乘方便。

善現！若菩薩摩訶薩行深般若波羅蜜多，引深般若波羅蜜多，修深般若波羅蜜多，得如是等種種勝利。」

◎『N7』由寂靜常樂我淨四倒等故，執能得涅槃之加行道為實所取之俱生分別。

◎『N8』於新證空性之見道，執為實所取之俱生分別。

◎『N9』由修習已證之勝義無自性故，執大乘修道為實所取之俱生分別。

——如是九種分別，即所取中初一類轉趣分別，是修道加行相時之所行境也。

(70) 『N7』-『N9』爾時，具壽善現白佛言：「世尊！諸菩薩摩訶薩云何行深般若波羅蜜多？云何引深般若波羅蜜多？云何修深般若波羅蜜多？」

(71) 佛告善現：「諸菩薩摩訶薩應觀色乃至識彫落故，破壞故，離散故，不自在故，不堅實故，性虛偽故，行深般若波羅蜜多。善現！汝問『諸菩薩摩訶薩云何引深般若波羅蜜多』者，諸菩薩摩訶薩應如引虛空空，引深般若波羅蜜多。善現！汝問『諸菩薩摩訶薩云何修深般若波羅蜜多』者，諸菩薩摩訶薩應破壞諸法，修深般若波羅蜜多。」

[退還所取分別]

『O1』次許心心所，轉趣時有境，不發菩提心，『O2』不作意菩提，『O3』作意二乘法。『O4』不思大菩提，『O5』有修與『O6』無修，『O7』，『O8』及與彼相反，『O9』非如義分別，當知屬修道。

○修道所斷第二所取分別，許為大乘修道心及心所無間道轉時之有境能緣心法也。彼心就境界門差別有九，謂：

◎『O1』二乘資糧道位由離大乘善知識等故不發大菩提心，執彼大乘所遮之法為實所受。

◎『O2』由無「為利他而求成佛」之殊勝福故，名不作意菩提藏。

(72) 『O1』，『O2』具壽善現復白佛言：「世尊！諸菩薩摩訶薩應經幾時行深般若波羅蜜多，引深般若波羅蜜多，修深般若波羅蜜多？」

(73) 佛告善現：「諸菩薩摩訶薩應從初發心乃至安坐妙菩提座，行深般若波羅蜜多，引深般若波羅蜜多，修深般若波羅蜜多。」

(74) 具壽善現復白佛言：「世尊！諸菩薩摩訶薩應住何等心無間，行深般若波羅蜜多，引深般若波羅蜜多，修深般若波羅蜜多？」

◎『O3』由是聲聞種性故，作意彼乘法。

◎『O4』由是獨覺種性故，現證彼乘法。

◎『05』由不修般若波羅蜜多故，不思惟正等菩提。

(75)『03』-『05』佛告善現：「諸菩薩摩訶薩應從初發心乃至安坐妙菩提座，無容橫起諸餘作意，唯常安住一切智智相應作意，行深般若波羅蜜多，引深般若波羅蜜多，修深般若波羅蜜多。善現！是菩薩摩訶薩乃至能令心、心所法於境不轉，乃得名為行深般若波羅蜜多，引深般若波羅蜜多，修深般若波羅蜜多。」

◎『06』由有所得，修般若影像。

(76)『06』「世尊！諸菩薩摩訶薩行深般若波羅蜜多，引深般若波羅蜜多，修深般若波羅蜜多，當得一切智智不？」

「不爾，善現！」

◎『07』由不能緣真實義故，不修真實義。

(77)『07』「世尊！諸菩薩摩訶薩不行深般若波羅蜜多，不引深般若波羅蜜多，不修深般若波羅蜜多，當得一切智智不？」

「不爾，善現！」

◎『08』由不緣真實義故，亦無能修彼者；由無常等不能無得，故亦非無修無常等。

(78)『08』「世尊！諸菩薩摩訶薩於深般若波羅蜜多亦行亦不行，亦引亦不引，亦修亦不修，當得一切智智不？」

「不爾，善現！」

(79)「世尊！諸菩薩摩訶薩於深般若波羅蜜多非行非不行，非引非不引，非修非不修，當得一切智智不？」

「不爾，善現！」

◎『09』由顛倒執真實義故，於不如實義，分別執著。

於彼等違菩薩道法，執為實所受用。

——當知此九分別屬於大乘修道所斷。

(80)『09』「世尊！若爾，諸菩薩摩訶薩云何當得一切智智？」

「善現！諸菩薩摩訶薩當得一切智智如真如。」

(81)「世尊！云何真如？」

「善現！如實際。」

- (82) 「世尊！云何實際？」
「善現！如法界。」
- (83) 「世尊！云何法界？」
「善現！如我界、有情界、命者界、生者界、養者界、士夫界、補特伽羅界。」

[實執分別]

- 『P1』 施設有情 『P2』 境，『P3』 施設法不空，
『P4』 貪著 『P5』 簡擇性，『P6』 為寂事 『P7』 三乘。
『P8』 受供不清淨，『P9』 破壞諸正行，經說是第一，能取應當知。

○大乘修道加行位就境差別，第一實執有九分別，謂：

◎『P1』自在補特伽羅非實有生，是依五蘊施設為有情，執為實能受用者之俱生分別。

- (84) 『P1』 「世尊！云何我界乃至補特伽羅界？」
- (85) 「善現！於意云何？若我、若有情、若命者、若生者、若養者、若士夫、若補特伽羅為可得不？」
「不也，世尊！」
- (86) 「善現！若我乃至補特伽羅既不可得，我當云何可施設我界乃至補特伽羅界？如是，善現！若菩薩摩訶薩不施設般若波羅蜜多，亦不施設一切智智，亦不施設一切法，是菩薩摩訶薩定當證得一切智智。」
- (87) 具壽善現復白佛言：「為但般若波羅蜜多不可施設，為靜慮波羅蜜多乃至布施波羅蜜多亦不可施設耶？」
- (88) 佛告善現：「非但般若波羅蜜多不可施設，靜慮波羅蜜多乃至布施波羅蜜多亦不可施設，若聲聞法、若獨覺法、若菩薩法、若如來法，亦不可施設。善現！以要言之，一切法若有為若無為皆不可施設。」
- (89) 具壽善現復白佛言：「若一切法皆不可施設，云何可施設是地獄、是傍生、是鬼界、是人、是天、是預流、是一來、是不還、是阿羅漢、是獨覺、是菩薩、是如來、是一切法耶？」
- (90) 佛告善現：「於意云何？有情施設及法施設實可得不？」
善現對曰：「不也，世尊！」

(91) 佛告善現：「若有情施設及法施設實不可得，我云何可施設是地獄、是傍生、是鬼界、是人、是天、是預流、是一來、是不還、是阿羅漢、是獨覺、是菩薩、是如來、是一切法？如是，善現！諸菩薩摩訶薩行深般若波羅蜜多時，應學一切法皆不可施設而趣無上正等菩提。」

◎『P2』又緣諸法唯由心現，故於五蘊等施設為法之補特伽羅執為實有等，准上應知。

(92) 『P2』具壽善現白言：「世尊！諸菩薩摩訶薩行深般若波羅蜜多時，豈不應於色學？豈不應於受想行識學？如是乃至豈不應於一切智智學？」

(93) 佛告善現：「諸菩薩摩訶薩行深般若波羅蜜多時，應於色學不增不減，應於受想行識學不增不減，如是乃至應於一切智智學不增不減。」

(94) 具壽善現白言：「世尊！諸菩薩摩訶薩行深般若波羅蜜多時，應云何於色學不增不減？應云何於受想行識學不增不減？如是乃至應云何於一切智智學不增不減？」

(95) 佛告善現：「諸菩薩摩訶薩行深般若波羅蜜多時，以不生不滅故，於色應學；以不生不滅故，於受想行識應學；如是乃至以不生不滅故，於一切智智應學。」

(96) 具壽善現白言：「世尊！諸菩薩摩訶薩行深般若波羅蜜多時，應云何以不生不滅故，於色學？應云何以不生不滅故，於受想行識學？如是乃至應云何以不生不滅故，於一切智智學？」

(97) 佛告善現：「諸菩薩摩訶薩行深般若波羅蜜多時，應於色不起不作諸行若修若遣故學，應於受想行識不起不作諸行若修若遣故學，如是乃至應於一切智智不起不作諸行若修若遣故學。」

(98) 具壽善現白言：「世尊！諸菩薩摩訶薩行深般若波羅蜜多時，應云何於色不起不作諸行若修若遣故學？應云何於受想行識不起不作諸行若修若遣故學？如是乃至應云何於一切智智不起不作諸行若修若遣故學？」

◎『P3』又緣觀一切法由名言有故非空之補特伽羅執為實有。

(99) 『P3』佛告善現：「諸菩薩摩訶薩行深般若波羅蜜多時，應以觀一切法自相皆空，於色不起不作諸行若修若遣故學；應以觀

一切法自相皆空，於受想行識不起不作諸行若修若遣故學；如是乃至應以觀一切法自相皆空，於一切智智不起不作諸行若修若遣故學。」

大般若波羅蜜多經卷第四百六十二

(01) 爾時，具壽善現白佛言：「世尊！云何菩薩摩訶薩行深般若波羅蜜多時，應觀一切法自相皆空？」

(02) 佛言：「善現！諸菩薩摩訶薩行深般若波羅蜜多時，應觀色由色空，應觀受想行識由受想行識空；應觀眼處由眼處空，應觀耳鼻舌身意處由耳鼻舌身意處空；應觀色處由色處空，應觀聲香味觸法處由聲香味觸法處空；應觀眼界由眼界空，應觀耳鼻舌身意處由耳鼻舌身意處空；應觀色界由色界空，應觀聲香味觸法界由聲香味觸法界空；應觀眼識界由眼識界空，應觀耳鼻舌身意識界由耳鼻舌身意識界空；應觀眼觸由眼觸空，應觀耳鼻舌身意觸由耳鼻舌身意觸空；應觀眼觸為緣所生諸受由眼觸為緣所生諸受空，應觀耳鼻舌身意觸為緣所生諸受由耳鼻舌身意觸為緣所生諸受空；應觀地界由地界空，應觀水火風空識界由水火風空識界空；應觀因緣由因緣空，應觀等無間緣、所緣緣、增上緣由等無間緣、所緣緣、增上緣空；應觀無明由無明空，應觀行、識、名色、六處、觸、受、愛、取、有、生、老死由行乃至老死空；應觀布施波羅蜜多由布施波羅蜜多空，應觀淨戒、安忍、精進、靜慮、般若波羅蜜多由淨戒、安忍、精進、靜慮、般若波羅蜜多空；應觀內空由內空空，應觀外空、內外空、空空、大空、勝義空、有為空、無為空、畢竟空、無際空、散無散空、本性空、自共相空、一切法空、不可得空、無性空、自性空、無性自性空由外空乃至無性自性空空；應觀真如由真如空，應觀法界、法性、不虛妄性、不變異性、平等性、離生性、法定、法住、實際、虛空界、不思議界由法界乃至不思議界空；應觀苦聖諦由苦聖諦空，應觀集滅道聖諦由集滅道聖諦空；應觀四念住由四念住空，應觀四正斷、四神足、五根、五力、七等覺支、八聖道支由四正斷乃至八聖道支空；應觀四靜慮由四靜慮空，應觀四無量、四無色定由四無量、四無色定空；應觀八解脫由八解脫空，應觀八勝處、九次第定、十遍處由八勝處、九次第定、十遍處空；應觀空解脫門由空解脫門空，應觀無相、無願解脫門由無相、無願解脫門空；應觀

淨觀地由淨觀地空，應觀種姓地、第八地、具見地、薄地、離欲地、已辦地、獨覺地、菩薩地、如來地由種姓地乃至如來地空；應觀極喜地由極喜地空，應觀離垢地、發光地、焰慧地、極難勝地、現前地、遠行地、不動地、善慧地、法雲地由離垢地乃至法雲地空；應觀一切陀羅尼門由一切陀羅尼門空，應觀一切三摩地門由一切三摩地門空；應觀五眼由五眼空，應觀六神通由六神通空；應觀如來十力由如來十力空，應觀四無所畏、四無礙解、大慈大悲大喜大捨、十八佛不共法由四無所畏乃至十八佛不共法空；應觀三十二大士相由三十二大士相空，應觀八十隨好由八十隨好空；應觀無忘失法由無忘失法空，應觀恒住捨性由恒住捨性空；應觀一切智由一切智空，應觀道相智、一切相智由道相智、一切相智空；應觀預流果由預流果空，應觀一來、不還、阿羅漢果、獨覺菩提由一來、不還、阿羅漢果、獨覺菩提空；應觀一切菩薩摩訶薩行由一切菩薩摩訶薩行空，應觀諸佛無上正等菩提由諸佛無上正等菩提空，應觀一切智智由一切智智空。如是，善現！諸菩薩摩訶薩行深般若波羅蜜多時，應觀一切法自相皆空。」

- (03) 具壽善現復白佛言：「若色由色空，受想行識由受想行識空，如是乃至一切智智由一切智智空，云何菩薩摩訶薩行深般若波羅蜜多？」
- (04) 佛告善現：「若菩薩摩訶薩都無所行，是行深般若波羅蜜多。」
- (05) 具壽善現復白佛言：「世尊！何緣菩薩摩訶薩都無所行，是行深般若波羅蜜多？」
- (06) 佛告善現：「由深般若波羅蜜多不可得，菩薩摩訶薩亦不可得，行亦不可得，若能行者、若由此行、行時、行處，皆不可得。是故，善現！諸菩薩摩訶薩都無所行是行深般若波羅蜜多，以於其中一切戲論不可得故。」
- (07) 具壽善現復白佛言：「世尊！若菩薩摩訶薩都無所行是行深般若波羅蜜多，初修業菩薩摩訶薩云何行深般若波羅蜜多？」
- (08) 佛告善現：「諸菩薩摩訶薩從初發心，應於一切法常學無所得，如是學已，用無所得而為方便，應修布施波羅蜜多乃至般若波羅蜜多，應住內空乃至無性自性空，應住真如乃至不思議界，應住苦集滅道聖諦，應修四念住乃至八聖道支，應修四靜慮、四無量、四無色定，應修八解脫乃至十遍處，應修空、無相、

無願解脫門，應修菩薩摩訶薩地，應修一切陀羅尼門、三摩地門，應修五眼、六神通，應修如來十力乃至十八不共法，應修無忘失法、恒住捨性，應修一切智、道相智、一切相智，應修一切菩薩摩訶薩行，應修諸佛無上正等菩提，應修一切智智。」

- (09) 具壽善現白言：「世尊！云何名有所得？云何名無所得？」
- (10) 佛言：「善現！諸有二者，名有所得；諸無二者，名無所得。」
- (11) 具壽善現復白佛言：「云何有二，名有所得？云何無二，名無所得？」
- (12) 佛告善現：「眼、色為二，乃至意、法為二，有色、無色為二，有見、無見為二，有對、無對為二，有漏、無漏為二，有為、無為為二，世間、出世間為二，生死、涅槃為二，異生法、異生為二，預流法、預流為二，乃至獨覺菩提、獨覺為二，菩薩摩訶薩行、菩薩摩訶薩為二，佛無上正等菩提、佛為二，如是一切有戲論者，皆名為二，諸有二者，皆有所得。善現！非眼、非色為無二，乃至非意、非法為無二，如是乃至非佛無上正等菩提、非佛為無二，如是一切離戲論者，皆名無二，諸無二者，皆無所得。」
- (13) 具壽善現白言：「世尊！為有所得故無所得？為無所得故無所得？」

◎『P4』又緣未斷一切執著，故於諸法起實貪著之補特伽羅執為實有。

- (14) 『P4』佛言：「善現！非有所得故無所得，非無所得故無所得，然有所得、無所得平等性，名無所得。如是，善現！諸菩薩摩訶薩於有所得、無所得平等性，應勤修學。善現！諸菩薩摩訶薩如是學時，名學般若波羅蜜多無所得者。」
- (15) 爾時，具壽善現白佛言：「世尊！若菩薩摩訶薩行深般若波羅蜜多時，不著有所得，不著無所得，是菩薩摩訶薩云何修行甚深般若波羅蜜多，能從一地至一地漸次圓滿？若無從一地至一地漸次圓滿，云何能得一切智智？」
- (16) 佛言：「善現！諸菩薩摩訶薩行深般若波羅蜜多時，非住有所得行深般若波羅蜜多，能從一地至一地漸次圓滿，得一切智智；非住無所得行深般若波羅蜜多，能從一地至一地漸次圓滿，得一切智智。所以者何？善現！甚深般若波羅蜜多無所

得，一切智智亦無所得，行深般若波羅蜜多者亦無所得，此無所得亦無所得。善現！諸菩薩摩訶薩應如是行甚深般若波羅蜜多。」

◎『P5』又緣能簡擇諸實性之補特伽羅執為實有。

- (17) 『P5』具壽善現復白佛言：「若甚深般若波羅蜜多不可得，一切智智亦不可得，能行深般若波羅蜜多者亦不可得，云何菩薩摩訶薩行深般若波羅蜜多時，於一切法常樂決擇，謂此是色，此是受想行識，此是眼處乃至意處，此是色處乃至法處，此是眼界乃至意界，此是色界乃至法界，此是眼識界乃至意識界，此是眼觸乃至意觸，此是眼觸為緣所生諸受乃至意觸為緣所生諸受，此是地界乃至識界，此是因緣乃至增上緣，此是無明乃至老死，此是布施波羅蜜多乃至般若波羅蜜多，此是內空乃至無性自性空，此是真如乃至不思議界，此是苦集滅道聖諦，此是四念住乃至八聖道支，此是四靜慮、四無量、四無色定，此是八解脫乃至十遍處，此是空、無相、無願解脫門，此是淨觀地乃至如來地，此是極喜地乃至法雲地，此是一切陀羅尼門、三摩地門，此是五眼、六神通，此是如來十力乃至十八不共法，此是三十二大士相、八十隨好，此是無忘失法、恆住捨性，此是一切智、道相智、一切相智，此是預流果乃至獨覺菩提，此是一切菩薩摩訶薩行，此是諸佛無上正等菩提，此是一切智智？」
- (18) 佛告善現：「諸菩薩摩訶薩行深般若波羅蜜多時，雖於諸法常樂決擇，而不得色，亦不得受想行識，乃至亦不得一切智智。」
- (19) 具壽善現復白佛言：「諸菩薩摩訶薩行深般若波羅蜜多時，若不得色，亦不得受想行識，乃至亦不得一切智智者，云何能圓滿布施波羅蜜多乃至般若波羅蜜多？若不能圓滿布施波羅蜜多乃至般若波羅蜜多，云何能入菩薩正性離生？若不能入菩薩正性離生，云何能成熟有情？若不能成熟有情，云何能嚴淨佛土？若不能嚴淨佛土，云何能得一切智智？若不能得一切智智，云何能轉正法輪，作諸佛事？若不能轉正法輪，作諸佛事，云何能解脫無量無數百千俱胝那庾多諸有情眾生老病死，令得究竟安樂涅槃？」

◎『P6』又緣不求三所為事而求苦寂滅事之補特伽羅執為實有。

- (20) 『P6』佛告善現：「諸菩薩摩訶薩行深般若波羅蜜多時，不為色故行深般若波羅蜜多，亦不為受想行識故行深般若波羅蜜多，乃至亦不為一切智智故行深般若波羅蜜多。」
- (21) 具壽善現復白佛言：「諸菩薩摩訶薩行深般若波羅蜜多時，為何事故行深般若波羅蜜多？」
- (22) 佛告善現：「諸菩薩摩訶薩行深般若波羅蜜多時，無所為故行深般若波羅蜜多。何以故？善現！一切法無為無作，甚深般若波羅蜜多亦無為無作，一切智智亦無為無作，諸菩薩摩訶薩亦無為無作。如是，善現！諸菩薩摩訶薩應以無為無作而為方便，行深般若波羅蜜多。」

◎『P7』又緣由色等不可得故三乘出離之補特伽羅執為實有。

- (23) 『P7』具壽善現復白佛言：「若一切法無為無作，不應施設三乘有異，謂聲聞乘、若獨覺乘、若無上乘。」
- (24) 佛告善現：「非無為無作法施設可得，要有為有作法施設可得。所以者何？善現！有諸愚夫無聞異生，執著色，執著受想行識，乃至執著一切智智。由執著故，念色，得色；念受想行識，得受想行識；乃至念一切智智，得一切智智。由念得故，作是思惟：『我定當得一切智智，脫諸有情生老病死，令得究竟安樂涅槃。』善現！是諸愚夫無聞異生，由顛倒故，作是思惟，則為謗佛。所以者何？善現！佛以五眼求色不可得，求受想行識不可得，乃至求一切智智不可得，求諸有情亦不可得。彼諸愚夫無聞異生，盲無慧目，執著諸法，若當證得一切智智，脫諸有情生老病死，令得究竟安樂涅槃，必無是處。」
- (25) 具壽善現復白佛言：「若諸如來應正等覺以淨五眼求色不可得，求受想行識不可得，乃至求一切智智不可得，求諸有情亦不可得，應無證得一切智智，脫諸有情生老病死，令得究竟安樂涅槃，云何世尊自能證得一切智智，安立有情三聚差別，謂正性定聚、邪性定聚及不定聚？」
- (26) 佛告善現：「我證無上正等菩提，以淨五眼如實觀察，決無有情實能證得一切智智，安立有情三聚差別。然諸有情愚癡顛倒，於非實法，起實法想，於非實有情，起實有情想，我為除遣彼虛妄執，依世俗說，不依勝義。」

- (27) 具壽善現復白佛言：「如來為住勝義，證得一切智智耶？」
佛言：「不爾。」
- (28) 善現復問：「如來為住顛倒，證得一切智智耶？」
佛言：「不爾。」
- (29) 善現復問：「如來若不住勝義，證得一切智智，亦不住顛倒，證得一切智智者，將無如來不能證得一切智智？」
- (30) 佛言：「不爾，善現當知！我雖證得一切智智，然無所住，謂不住有為界，亦不住無為界。善現！譬如如來所變化者，雖不住有為界，亦不住無為界，然有去來行住坐臥。善現！是所變化者，若行布施波羅蜜多乃至般若波羅蜜多，若住內空乃至無性自性空，若住真如乃至不思議界，若住苦集滅道聖諦，若修四念住乃至八聖道支，若修四靜慮、四無量、四無色定，若修八解脫乃至十遍處，若修空、無相、無願解脫門，若修極喜地乃至法雲地，若修一切陀羅尼門、三摩地門，若修五眼、六神通，若修如來十力乃至十八不共法，若修無忘失法、恆住捨性，若修一切智、道相智、一切相智，若修一切菩薩摩訶薩行，若修諸佛無上正等菩提，若證一切智智，若轉法輪，作諸佛事。是所變化者，復轉化作無量有情，於中安立三聚差別。善現！於意云何？是諸如來所變化者，為實有去來行住坐臥？乃至實有安立有情三聚別不？」
- (31) 善現對曰：「不也，世尊！」
- (32) 佛言：「善現！如來亦爾，知一切法皆如變化，說一切法亦如變化，雖有所作，而無真實，雖度有情，而無所度，如所變化者，度變化有情。如是，善現！諸菩薩摩訶薩行深般若波羅蜜多，應如如來所變化者，雖有所作，而無執著。」
- (33) 具壽善現復白佛言：「若一切法皆如變化，如來亦爾，是則如來與變化者，有何差別？」
- (34) 佛告善現：「如來與彼所變化者，及一切法，實無差別。所以者何？善現！如來所作一切事業，所變化者亦皆能作彼所作事，如來亦能，是故如來與所變化，及一切法，皆無差別。」
- (35) 具壽善現復白佛言：「若無由佛所變化者，如來獨能作所作事？若無如來，彼所變化為獨能作所作事不？」
- (36) 佛言：「能作。」
- (37) 善現問曰：「其事云何？」

(38) 佛告善現：「如有如來應正等覺，名善寂慧，自應度者，皆已度訖，時無菩薩堪受佛記，便化作一佛，令住世間，自入無餘依大涅槃界。時彼化佛於半劫中作諸佛事，過半劫已，授一菩薩大菩提記，現入涅槃。時諸天人、阿素洛等，皆謂彼佛今入涅槃，然化佛身實無起滅。如是，善現！諸菩薩摩訶薩行深般若波羅蜜多，應信知一切法皆如變化。」

◎『P8』又緣由未正知法性故施主等供養未能清淨之補特伽羅執為實有。

(39) 『P8』具壽善現復白佛言：「若如來身與所變化，等無差別，云何能作世間施主真淨福田？若諸有情為涅槃故，於如來所供養恭敬，其福無盡，乃至最後入無餘依般涅槃界，如是若有為涅槃故，供養恭敬佛變化者，所獲福聚，亦應無盡，乃至最後入無餘依般涅槃界。」

(40) 佛告善現：「如如來身，由法性故，能與天人、阿素洛等作淨福田。佛所變化亦復如是，由法性故，能與天人、阿素洛等作淨福田。如如來身，受諸施主供養恭敬，令彼施主窮生死際，其福無盡。佛所變化亦復如是，受諸施主供養恭敬，亦令施主窮生死際，其福無盡。

善現當知！且置供養恭敬如來及變化者所獲功德。若善男子善女人等，於如來所，起慈敬心，思惟憶念，是善男子善女人等，善根無盡，乃至最後作苦邊際。

善現當知！復置於佛起慈敬心，思惟憶念所獲功德。若善男子善女人等，為供養佛，下至一花，散虛空中，是善男子善女人等，善根無盡，乃至最後作苦邊際。

善現當知！復置為欲供養佛故，下至一花，散虛空中，所獲功德。若善男子善女人等，下至一稱南謨佛陀、大調御士，是善男子善女人等，善根無盡，乃至最後作苦邊際。如是，善現！於諸如來應正等覺大福田所，供養恭敬，獲如是等大功德利，其量難測。

是故，善現當知！如來與變化佛，俱為施主真淨福田，等無差別，與諸法性為定量故。

◎『P9』又緣由於布施等執實而修破壞波羅蜜多正行之補特伽羅執為

實有能受用者之俱生分別。

——此九分別，《般若經》說，當知即是修所斷第一能取分別也。

『P9』復次，善現！諸菩薩摩訶薩應以如是諸法法性而為定量，行深般若波羅蜜多，方便善巧入諸法法性已，而於諸法不壞法性，謂不分別此是般若波羅蜜多乃至布施波羅蜜多，此是般若波羅蜜多乃至布施波羅蜜多法性；此是內空乃至無性自性空，此是內空乃至無性自性空法性；此是真如乃至不思議界，此是真如乃至不思議界法性；此是苦集滅道聖諦，此是苦集滅道聖諦法性；此是四念住乃至八聖道支，此是四念住乃至八聖道支法性；此是四靜慮、四無量、四無色定，此是四靜慮、四無量、四無色定法性；此是八解脫乃至十遍處，此是八解脫乃至十遍處法性；此是空、無相、無願解脫門，此是空、無相、無願解脫門法性；此是極喜地乃至法雲地，此是極喜地乃至法雲地法性；此是一切陀羅尼門、三摩地門，此是一切陀羅尼門、三摩地門法性；此是五眼、六神通，此是五眼、六神通法性；此是如來十力乃至十八不共法，此是如來十力乃至十八不共法法性；此是三十二大士相、八十隨好，此是三十二大士相、八十隨好法性；此是無忘失法、恆住捨性，此是無忘失法、恆住捨性法性；此是一切智、道相智、一切相智，此是一切智、道相智、一切相智法性；此是預流果乃至獨覺菩提，此是預流果乃至獨覺菩提法性；此是一切菩薩摩訶薩行，此是一切菩薩摩訶薩行法性；此是諸佛無上正等菩提，此是諸佛無上正等菩提法性；此是一切智智，此是一切智智法性。善現！諸菩薩摩訶薩行深般若波羅蜜多，不應如是分別諸法法性差別而壞法性。」

(41) 具壽善現白言：「世尊！若菩薩摩訶薩行深般若波羅蜜多，不應分別諸法法性壞法性者，云何世尊自說諸法法性差別而壞法性？謂世尊說此是色，此是受想行識，此是眼處乃至意處，此是色處乃至法處，此是眼界乃至意界，此是色界乃至法界，此是眼識界乃至意識界，此是眼觸乃至意觸，此是眼觸為緣所生諸受乃至意觸為緣所生諸受，此是地界乃至識界，此是因緣乃至增上緣，此是無明乃至老死，此是內法，此是外法，此是善法，此是非善法，此是有記法，此是無記法，此是有漏法，此是無漏法，此是世間法，此是出世間法，此是共法，此是不共

法，此是有誦法，此是無誦法，此是有為法，此是無為法。世尊！既說如是等法種種差別，將無世尊自壞法性？」

- (42) 佛言：「善現！我不自壞諸法法性，但以名相方便假說，令諸有情悟入諸法法性平等，出離生死，證得涅槃。是故，善現！一切如來應正等覺雖說諸法種種名相，而能不壞諸法實性。」
- (43) 具壽善現復白佛言：「若佛但以名相假說諸法法性，令諸有情方便悟入法性平等，出離生死，證得涅槃，云何佛於無名相法，以名相說而言不壞？」
- (44) 佛告善現：「我隨世俗，於一切法假立名相，為諸有情方便宣說而無執著，故無所壞。善現！如諸愚夫，聞說苦等，執著名相，不了假說；非諸如來及佛弟子，聞說苦等，執著名相，然如實知隨世俗說，無有真實諸法名相。善現！若諸聖者，於名著名，於相著相，彼則亦應於空著空，於無相著無相，於無願著無願，於真如著真如，於法界著法界，於實際著實際，於無為著無為。善現！是一切法，唯有假名，唯有假相，而無真實，聖者於中亦不執著，唯假名相。如是，善現！諸菩薩摩訶薩住一切法，但假名相，行深般若波羅蜜多，而於其中無所執著。」
- (45) 具壽善現復白佛言：「若一切法，但有名相，諸菩薩摩訶薩為何事故，發菩提心，受諸勤苦，行菩薩行，謂自勤苦修行布施波羅蜜多乃至般若波羅蜜多，安住內空乃至無性自性空，安住真如乃至不思議界，安住苦集滅道聖諦，修行四念住乃至八聖道支，修行四靜慮、四無量、四無色定，修行八解脫乃至十遍處，修行空、無相、無願解脫門，修行極喜地乃至法雲地，修行一切陀羅尼門、三摩地門，修行五眼、六神通，修行如來十力乃至十八不共法，修行無忘失法、恆住捨性，修行一切智、道相智、一切相智，修行一切菩薩摩訶薩行，修行諸佛無上正等菩提，修行一切智智，皆令圓滿？」
- (46) 佛告善現：「以一切法，但有名相，如是名相，唯假施設，名相性空，諸有情類顛倒執著，沈淪生死，不證涅槃，是故菩薩摩訶薩眾悲愍彼故，發菩提心，受諸勤苦，行菩薩行，漸次證得一切智智，既自證得一切智智，轉正法輪，以三乘法方便拔濟，令出生死，入無餘依般涅槃界，然諸名相無生無滅，亦無住異施設可得。」

- (47) 爾時，具壽善現白佛言：「世尊！佛說一切智智，為一切智智耶？」
- (48) 佛言：「善現！我說一切智智，為一切智智。」

[假執分別]

設有情及因，由此所摧害，故是修道繫，其餘九違品：
如自所緣性，『Q1』，『Q2』，『Q3』三智障有三，
『Q4』靜道『Q5』真如等，相應不相應。『Q6』不等及『Q7』苦等，
『Q8』諸煩惱自性，及『Q9』無二愚蒙，為最後分別。

◎於五蘊等假設有情，及於彼安立之因唯現諸法假立士夫，執彼為實能受用者之心，由此修道頂加行之所摧害。故彼與修道是能治所治相繫之違品，除前實執，此是其餘九種假執分別也。

○修道頂加行心心所轉無間道時，所應斷之有境分別心有九，謂：

如自所緣境之體性而知者即三智，此三智有三種障：

- ◎『Q1』由不了知一切相皆空，障一切相智，緣於斷此障愚蒙之假立士夫執為實受用者之俱生分別。
- ◎『Q2』由不了知一切道，障道相智，緣於斷此障愚蒙之假立夫執為實受用者。
- ◎『Q3』由不了知一切事，障一切智，緣於斷此障愚蒙之假立士夫執為實受用者。

(49) 『Q1』 - 『Q3』具壽善現復白佛言：「如來曾說一切智智，略有三種，謂一切智、道相智、一切相智，如是三智，其相云何？有何差別？」

(50) 佛告善現：「一切智者，謂共聲聞及獨覺智；道相智者，謂共菩薩摩訶薩智；一切相智者，謂諸如來應正等覺不共妙智。」

(51) 具壽善現復白佛言：「何故一切智是共聲聞及獨覺智？」

(52) 佛告善現：「一切智者，謂五蘊、十二處、十八界等差別法門，聲聞、獨覺亦能了知法門差別，而不能知一切道相及一切法、一切種相故，一切智是共聲聞及獨覺智。」

(53) 具壽善現復白佛言：「何故道相智是共菩薩摩訶薩智？」

(54) 佛告善現：「諸菩薩摩訶薩應學遍知一切道相，謂聲聞道相、獨覺道相、菩薩道相、如來道相，諸菩薩摩訶薩於此諸道，應

常修學，令速圓滿，雖令此道作所應作，而不令其證住實際故，道相智是共菩薩摩訶薩智。」

- (55) 具壽善現復白佛言：「諸菩薩摩訶薩修如來道得圓滿已，豈於實際亦不證住？」
- (56) 佛告善現：「諸菩薩摩訶薩成熟有情，嚴淨佛土及修大願，若未圓滿，猶於實際未應證住；若已圓滿，乃於實際應可證住。」
- (57) 具壽善現復問世尊：「諸菩薩摩訶薩為住於道，證住實際耶？」
佛言：「不爾。」
- (58) 善現復問：「諸菩薩摩訶薩為住非道，證住實際耶？」
佛言：「不爾。」
- (59) 善現復問：「諸菩薩摩訶薩為住道非道，證住實際耶？」
佛言：「不爾。」
- (60) 善現復問：「諸菩薩摩訶薩為住非道非非道，證住實際耶？」
佛言：「不爾。」
- (61) 具壽善現復白佛言：「世尊！若爾，諸菩薩摩訶薩為何所住，證住實際耶？」
- (62) 佛言：「善現！於意云何？汝為住道，得盡諸漏，心解脫不？」
「不也，世尊！」
- (63) 善現！汝為住非道，得盡諸漏，心解脫不？」
「不也，世尊！」
- (64) 善現！汝為住道非道，得盡諸漏，心解脫不？」
「不也，世尊！」
- (65) 善現！汝為住非道非非道，得盡諸漏，心解脫不？」
「不也，世尊！」
- (66) 佛言：「善現！汝何所住，得盡諸漏，心永解脫？」
- (67) 善現對曰：「非我有住，得盡諸漏，心永解脫，然我盡漏，心得解脫，都無所住。」
- (68) 佛告善現：「諸菩薩摩訶薩亦復如是，行深般若波羅蜜多，都無所住，證住實際。」
- (69) 具壽善現復白佛言：「何故一切相智名一切相智耶？」
- (70) 佛告善現：「知一切法，皆同一相，謂寂滅相，是故名為一切相智。
復次，善現！諸行、狀、相能表諸法，如來如實能遍覺知，由是故名一切相智。」

- (71) 具壽善現復白佛言：「若一切智、若道相智、若一切相智，如是三智，諸煩惱斷有差別不？有有餘斷、無餘斷不？」
- (72) 佛告善現：「非諸煩惱斷有差別，然諸如來一切煩惱習氣相續皆已永斷，聲聞、獨覺習氣相續猶未永斷。」
- (73) 善現復問：「諸煩惱斷，得無為不？」
佛言：「如是。」
- (74) 善現復問：「聲聞、獨覺不得無為，煩惱斷不？」
佛言：「不爾。」
- (75) 善現復問：「無為法中，有差別不？」
佛言：「不爾。」
- (76) 具壽善現復白佛言：「若無為法無差別者，佛何故說一切如來應正等覺習氣相續皆已永斷，聲聞、獨覺習氣相續猶未永斷？」
- (77) 佛言：「善現！習氣相續實非煩惱，然諸聲聞及諸獨覺煩惱已斷，猶有少分似貪瞋癡動發身語，即說此為習氣相續。此在愚夫異生相續能引無義，非在聲聞、獨覺相續能引無義，如是一切習氣相續，諸佛世尊究竟無有。」
- (78) 具壽善現白言：「世尊！道與涅槃，俱無自性，佛何故說此是預流，此是一來，此是不還，此是阿羅漢，此是獨覺，此是菩薩，此是如來？」
- (79) 佛告善現：「若預流、若一來、若不還、若阿羅漢、若獨覺、若菩薩、若如來，一切皆是無為所顯。」
- (80) 具壽善現復白佛言：「無為法中，實有預流乃至如來義差別不？」
佛言：「不爾。」
- (81) 善現復問：「若爾，何故佛說預流乃至如來，一切皆是無為所顯？」
- (82) 佛言：「善現！我依世俗言說顯示有預流等，所顯差別，不依勝義，非勝義中可有顯示。何以故？非無為中有語言道，或分別慧，若復二種，然由彼彼世俗言說諸法斷故，施設彼彼世俗言說諸法後際。」
- (83) 具壽善現復白佛言：「若一切法自相皆空，前際尚無，況有後際，云何施設有後際耶？」
- (84) 佛告善現：「如是！如是！如汝所說。諸所有法自相皆空，前際尚無，況有後際。後際實有，必無是處。然諸有情不能了達諸所有法自相皆空，為益彼故，方便假說此是前際，此是後際。」

然一切法自相空中，前際、後際俱不可得。如是，善現！諸菩薩摩訶薩達一切法自相空已，應行般若波羅蜜多。

善現當知！諸菩薩摩訶薩達一切法自相皆空，修行般若波羅蜜多，於諸法中，無所執著，謂不執著若內若外、若善若非善、若有記若無記、若世間若出世間、若有漏若無漏、若有為若無為，諸法差別，亦不執著若聲聞法、若獨覺法、若菩薩法、若如來法，唯依世俗言說假立，不依勝義。」

大般若波羅蜜多經卷第四百六十三

(85)爾時，具壽善現白佛言：「世尊！如來常說甚深般若波羅蜜多，甚深般若波羅蜜多何因緣故，名為般若波羅蜜多？」

◎『Q4』由不了知般若波羅蜜多，於寂靜一切障道愚蒙之假立士夫，緣彼執為實受用者。

(86)『Q4』佛告善現：「甚深般若波羅蜜多到一切法究竟彼岸，故名般若波羅蜜多。

復次，善現！由深般若波羅蜜多，聲聞、獨覺、菩薩、如來能到彼岸，故名般若波羅蜜多。

復次，善現！甚深般若波羅蜜多，分析諸法，過極微量，竟不見有少實可得，故名般若波羅蜜多。

復次，善現！此深般若波羅蜜多包含真如、法界、法性，廣說乃至不思議界，故名般若波羅蜜多。

◎『Q5』由不了知色等所知與真如，故於真如等與色相應為一性不相應為異性而愚蒙之假立士夫，緣彼執為實受用者。

『Q5』復次，善現！於深般若波羅蜜多無有少法若合若散、若有色若無色、若有見若無見、若有對若無對，故名般若波羅蜜多。所以者何？甚深般若波羅蜜多非合非散，無色無見無對，一相所謂無相。

復次，善現！甚深般若波羅蜜多能生一切微妙善法，能發一切智慧辯才，能引一切世出世樂，能達一切甚深法義，故名般若波羅蜜多。

◎『Q6』由不了知魔性本空，於大小乘道不等愚蒙假立士夫，緣彼執為實受用者。

『Q6』復次，善現！甚深般若波羅蜜多理趣堅實，不可動壞，若菩薩摩訶薩行深般若波羅蜜多，一切惡魔及魔眷屬、聲聞、獨覺、外道、梵志、惡友、怨讎，皆不能壞。所以者何？甚深般若波羅蜜多說一切法自相皆空，諸惡魔等，皆不可得，故名般若波羅蜜多。善現！諸菩薩摩訶薩應如實行如是般若波羅蜜多甚深義趣，謂一切法自相皆空，一切惡緣無能動壞。

◎『Q7』由於宣說無常等之經義，如言執為究竟真理，故於苦等四諦法性愚蒙假立士夫，緣彼執為實受用者。

『Q7』復次，善現！諸菩薩摩訶薩欲行般若波羅蜜多甚深義趣，應行無常義、苦義、空義、無我義、寂靜義、遠離義，應行苦集滅道慧義，應行苦集滅道智義，應行法、類、他心智義，應行世俗、勝義智義，應行盡、無生智義，應行盡所有、如所有智義。善現！諸菩薩摩訶薩為行般若波羅蜜多甚深義趣，應行般若波羅蜜多。」

(87) 具壽善現白言：「世尊！於此般若波羅蜜多深妙理中，義與非義，俱不可得，云何菩薩摩訶薩為行般若波羅蜜多甚深義趣，應行般若波羅蜜多？」

◎『Q8』由不了知貪等客性與真如性故，於煩惱性愚蒙假立士夫，緣彼執為實受用者。

(88) 『Q8』佛告善現：「諸菩薩摩訶薩為行般若波羅蜜多甚深義趣，應作是念：『我不應行貪義非義，我不應行瞋義非義，我不應行癡義非義，我不應行邪見義非義，我不應行邪定義非義，我不應行乃至一切見趣義非義。』所以者何？貪欲、瞋恚、愚癡、邪見、邪定，乃至一切見趣、真如、實際，不與諸法為義非義。復次，善現！諸菩薩摩訶薩為行般若波羅蜜多甚深義趣，應作是念：『我不應行色義非義，我不應行受想行識義非義，我不應行眼處乃至意處義非義，我不應行色處乃至法處義非義，我不應行眼界乃至眼界義非義，我不應行色界乃至法界義非義，我不應行眼識界乃至意識界義非義，我不應行眼觸乃至意觸義非義，我不應行眼觸為緣所生諸受乃至意觸為緣所生諸受義非義，我不應行地界乃至識界義非義，我不應行因緣乃至增上緣義非義，我不應行無明乃至老死義非義，我不應行布施波羅蜜

多乃至般若波羅蜜多義非義，我不應行內空乃至無性自性空義非義，我不應行真如乃至不思議界義非義，我不應行苦集滅道聖諦義非義，我不應行四念住乃至八聖道支義非義，我不應行四靜慮、四無量、四無色定義非義，我不應行八解脫乃至十遍處義非義，我不應行空、無相、無願解脫門義非義，我不應行淨觀地乃至如來地義非義，我不應行極喜地乃至法雲地義非義，我不應行一切陀羅尼門、三摩地門義非義，我不應行五眼、六神通義非義，我不應行如來十力乃至十八不共法義非義，我不應行三十二大士相、八十隨好義非義，我不應行無忘失法、恒住捨性義非義，我不應行一切智、道相智、一切相智義非義，我不應行預流果乃至獨覺菩提義非義，我不應行一切菩薩摩訶薩行義非義，我不應行諸佛無上正等菩提義非義，我不應行一切智智義非義。」何以故？善現！如來得無上正等菩提時，求一切法義與非義都不可得。

善現當知！如來出世，若不出世，諸法法性、法住、法定、法爾常住，無法於法為義非義。善現！諸菩薩摩訶薩應離一切義非義執，常行般若波羅蜜多甚深義趣。」

- (89) 具壽善現復白佛言：「何故般若波羅蜜多不與諸法為義非義？」
- (90) 佛告善現：「甚深般若波羅蜜多為欲證入無為法故，不與諸法為義非義。」
- (91) 具壽善現復白佛言：「豈不一切賢聖皆以無為為勝義耶？」
- (92) 佛告善現：「如是！如是！如汝所說。一切賢聖無不皆以無為而為勝義，然無為法不與諸法為益為損。善現！譬如虛空、真如、法界不與諸法為益為損，諸菩薩摩訶薩甚深般若波羅蜜多亦復如是，不與諸法為益為損，是故般若波羅蜜多不與諸法為義非義。」
- (93) 具壽善現復白佛言：「諸菩薩摩訶薩豈不要學無為般若波羅蜜多，乃能證得一切智智？」

◎『Q9』由不了知二取相空，於無二取愚蒙之假立士夫，緣彼執為實受用者之俱生分別。

——此九分別是修所斷最後之能取分別也。

- (94) 『Q9』佛告善現：「如是！如是！如汝所說。諸菩薩摩訶薩要學甚深無為般若波羅蜜多，方能證得一切智智，以不二法而為方便。」
- (95) 善現復問：「為以不二法得不二法耶？」
佛言：「不爾。」
- (96) 善現復問：「為以二法得不二法耶？」
佛言：「不爾。」
- (97) 善現白言：「若無二法，不以二法、不二法得，諸菩薩摩訶薩云何當得一切智智？」
- (98) 佛告善現：「二不二法，俱不可得，是故所得一切智智，不以二法、不二法得，然無所得法能得無所得。何以故？甚深般若波羅蜜多及一切智智俱不可得故。」

三、[斷除所斷之勝利]

如諸病痊愈，常時獲安隱，恆修眾生樂，一切勝功德。

任運而依附，勝果所莊嚴，上品位菩薩，如眾流歸海。

◎十地菩薩安住大乘上上品修道，由經多無數劫修修道故，能取所取四類分別所知障，猶如重病悉盡斷盡，具足順緣，永離違緣，譬如病者諸病痊愈，長得安樂。

○又一切種為大悲所轉善巧成辦眾生利樂如是一切勝妙功德，自然依附彼三乘斷智德果莊嚴之菩薩，猶如四河同歸大海也。

樹喻品第六十九

【第 48 義】：無間道頂加行 (V-7)

一、[多福喻顯]

安立三千生，聲聞麟喻德，及離生菩薩，眾善為譬喻。

輕以無量福，明佛無間道，無間三摩地，證一切相智。

◎無間頂加行，《經》中以自果多福為喻而宣說，謂若有人將三千大千世界有情，皆安立於聲聞地，獨覺地，菩薩正性離生地所獲眾多福德為喻，說無間道頂加行所親生之佛果勝出彼福，以此佛果福聚而顯此無間道頂加行，謂由親果福聚多故，表彼親因亦甚多福也。

○最後心無間道之三摩地，亦名無間三摩地，以得一切相智為自性之佛果，更無餘道間隔，此即是究竟之親因故。

(01) 爾時，具壽善現白佛言：「世尊！如是般若波羅蜜多最為甚深，諸菩薩摩訶薩能為難事，謂不得諸有情，亦不得彼施設，而為有情速求證得一切智智。世尊！譬如有人，欲於無色、無見、無對、無所依止空中種樹，彼甚為難，諸菩薩摩訶薩亦復如是，不得有情及彼施設，而為有情速求證得一切智智，極為難事。」

(02) 佛言：「善現！如是！如是！如汝所說。如是般若波羅蜜多最為甚深，諸菩薩摩訶薩能為難事，不得有情及彼施設，而為有情速求證得一切智智。

善現當知！諸菩薩摩訶薩雖不見實有情，亦不見彼施設，而諸有情愚癡顛倒，執為實有，沈溺生死，受苦無窮，為拔彼故，速求證得一切智智，以巧方便而救度之。譬如有人，良田種樹，是人雖復不識此樹根莖、枝葉、花果受者，而種樹已，隨時溉灌，勤加守護，此樹後時漸得生長，根莖、枝葉、花果茂盛，眾人受用，愈疾獲安。諸菩薩摩訶薩亦復如是，雖不見有果報有情，而為有情速求證得一切智智，漸次修行布施、淨戒、安忍、精進、靜慮、般若波羅蜜多及餘無量菩提分法，既圓滿已，便能證得一切智智，令諸有情受用果報枝葉花果，各得饒益。善現當知！枝葉饒益，謂諸有情依此菩薩解脫惡趣。其花饒益，謂諸有情依此菩薩或生刹帝利大族，或生婆羅門大族，或生長者大族，或生居士大族，或生四大王眾天乃至或生非想非非想處天。其果饒益，謂此菩薩自證無上正等菩提，令諸有情或住預流果，或住一來果，或住不還果，或住阿羅漢果，或住獨覺菩提，或住無上正等菩提，是諸有情勤修善法，依三乘道漸次證得三乘涅槃，如是名為果報饒益。善現！諸菩薩摩訶薩雖作如是大饒益事，而竟不見有實有情得涅槃者，但見妄想眾苦寂滅。如是，善現！諸菩薩摩訶薩行深般若波羅蜜多，不得有情及彼施設，為除滅彼我執顛倒，速求證得一切智智，由是因緣，極為難事。」

(03) 具壽善現白言：「世尊！諸菩薩摩訶薩當知如佛。所以者何？依諸菩薩摩訶薩故，便能永斷一切地獄、傍生、鬼界，亦能永斷一切無暇、貧窮、下賤、三界眾苦。」

(04) 佛言善現：「如是！如是！如汝所說，諸菩薩摩訶薩應知如佛。世間若無諸菩薩眾，便無三世一切如來，亦無獨覺及聲聞眾，亦無永斷一切地獄、傍生、鬼界及餘無暇、貧窮、下賤、三界

苦時。是故，善現！汝言菩薩摩訶薩眾猶如佛者，實如所說。復次，善現當知！菩薩摩訶薩眾即是如來。所以者何？善現！若由此真如施設如來，即由此真如施設獨覺，亦由此真如施設聲聞，亦由此真如施設一切賢聖，亦由此真如施設色受想行識，亦由此真如施設眼處乃至意處，亦由此真如施設色處乃至法處，亦由此真如施設眼界乃至意界，亦由此真如施設色界乃至法界，亦由此真如施設眼識界乃至意識界，亦由此真如施設眼觸乃至意觸，亦由此真如施設眼觸為緣所生諸受乃至意觸為緣所生諸受，亦由此真如施設地界乃至識界，亦由此真如施設因緣乃至增上緣，亦由此真如施設無明乃至老死，亦由此真如施設布施波羅蜜多乃至般若波羅蜜多，亦由此真如施設內空乃至無性自性空，亦由此真如施設苦集滅道聖諦，亦由此真如施設四念住乃至八聖道支，亦由此真如施設四靜慮、四無量、四無色定，亦由此真如施設八解脫乃至十遍處，亦由此真如施設空、無相、無願解脫門，亦由此真如施設淨觀地乃至如來地，亦由此真如施設極喜地乃至法雲地，亦由此真如施設一切陀羅尼門、三摩地門，亦由此真如施設五眼、六神通，亦由此真如施設如來十力乃至十八不共法，亦由此真如施設三十二大士相、八十隨好，亦由此真如施設無忘失法、恆住捨性，亦由此真如施設一切智、道相智、一切相智，亦由此真如施設一切菩薩摩訶薩行，亦由此真如施設諸佛無上正等菩提，亦由此真如施設一切智智，亦由此真如施設有為界，亦由此真如施設無為界，亦由此真如施設一切法，亦由此真如施設一切有情，亦由此真如施設一切菩薩摩訶薩。

如是，善現！若如來真如、若獨覺真如、若聲聞真如、若一切賢聖真如、若色等一切法真如、若一切有情真如、若一切菩薩摩訶薩真如，如是真如，實皆無異，由無異故，說名真如。諸菩薩摩訶薩於此真如修學圓滿，便能證得一切智智，既已證得一切智智，故名如來。以是因緣，當知菩薩摩訶薩眾即是如來，以一切法、一切有情皆以真如為定量故。

如是，善現！諸菩薩摩訶薩應學甚深般若波羅蜜多，若學甚深般若波羅蜜多，則能學一切法真如；若學一切法真如，則於一切法真如得自在；若於一切法真如得自在，則得一切有情根勝劣智；若得一切有情根勝劣智，則能具知一切有情勝解差別；

若能具知一切有情勝解差別，則知一切有情自業受果；若知一切有情自業受果，則願智圓滿；若願智圓滿，則能淨修三世妙智；若能淨修三世妙智，則能圓滿一切智智；若能圓滿一切智智，則能無倒行菩薩行；若能無倒行菩薩行，則能常以財施、法施饒益有情；若能常以財施、法施饒益有情，則能如實成熟有情；若能如實成熟有情，則能如實嚴淨佛土；若能如實嚴淨佛土，則能證得一切智智；若能證得一切智智，則能如實轉妙法輪；若能如實轉妙法輪，則能安立有情於三乘道；若能安立有情於三乘道，則能令有情入無餘依般涅槃界。如是，善現！諸菩薩摩訶薩見如是等自利利他無量功德，欲令所發大菩提心堅固不退，應勤精進修行般若波羅蜜多方便善巧。」

- (05) 時具壽善現白佛言：「世尊！若菩薩摩訶薩能發無上正等覺心，如說修行甚深般若波羅蜜多，世間天人、阿素洛等，皆應敬禮。」
- (06) 佛言善現：「如是！如是！如汝所說。若菩薩摩訶薩能發無上正等覺心，如說修行甚深般若波羅蜜多，世間天人、阿素洛等，皆應敬禮。」
- (07) 具壽善現復白佛言：「若菩薩摩訶薩普為饒益一切有情，初發無上正等覺心，得幾所福？」
- (08) 佛告善現：「假使充滿小千世界一切有情皆趣聲聞或獨覺地，於意云何？是諸有情其福多不？」
- (09) 善現對曰：「甚多，世尊！彼所獲福，無量無邊。」
- (10) 佛告善現：「彼諸有情所獲福聚，於汝所問普為饒益一切有情初發無上正等覺心一菩薩摩訶薩所獲福聚，百分不及一，千分不及一，如是乃至百千俱胝那庾多分亦不及一。所以者何？聲聞、獨覺皆依菩薩摩訶薩有，非菩薩摩訶薩依諸聲聞、獨覺故有。
- 復次，善現！置滿小千世界、若中千世界一切有情皆趣聲聞或獨覺地所獲福聚。假使充滿三千大千世界一切有情皆趣聲聞或獨覺地，於意云何？是諸有情其福多不？」
- (11) 善現對曰：「甚多，世尊！彼所獲福，無量無邊。」
- (12) 佛告善現：「彼諸有情所獲福聚，於汝所問普為饒益一切有情初發無上正等覺心一菩薩摩訶薩所獲福聚，百分不及一，千分不及一，如是乃至百千俱胝那庾多分亦不及一。所以者何？聲

聞、獨覺皆依菩薩摩訶薩有，非菩薩摩訶薩依諸聲聞、獨覺故有。

復次，善現！置滿三千大千世界一切有情皆趣聲聞或獨覺地所獲福聚。假使充滿三千大千世界一切有情皆住淨觀地，於意云何？是諸有情其福多不？」

(13) 善現對曰：「甚多，世尊！彼所獲福，無量無邊。」

(14) 佛告善現：「彼諸有情所獲福聚，於汝所問普為饒益一切有情初發無上正等覺心一菩薩摩訶薩所獲福聚，百分不及一，千分不及一，如是乃至百千俱胝那庾多分亦不及一。所以者何？聲聞、獨覺皆依菩薩摩訶薩有，非菩薩摩訶薩依諸聲聞、獨覺故有。

復次，善現！置滿三千大千世界一切有情皆住淨觀地所獲福聚。假使充滿三千大千世界一切有情皆住種姓地、若第八地、若具見地、若薄地、若離欲地、若已辦地，所獲福聚，假使充滿三千大千世界一切有情皆住獨覺地，於意云何？是諸有情其福多不？」

(15) 善現對曰：「甚多，世尊！彼所獲福，無量無邊。」

(16) 佛告善現：「彼諸有情所獲福聚，於汝所問普為饒益一切有情初發無上正等覺心一菩薩摩訶薩所獲福聚，百分不及一，千分不及一，如是乃至百千俱胝那庾多分亦不及一。所以者何？聲聞、獨覺皆依菩薩摩訶薩有，非菩薩摩訶薩依諸聲聞、獨覺故有。

復次，善現！假使充滿三千大千世界一切有情皆普為饒益一切有情，初發無上正等覺心，是諸菩薩摩訶薩眾所獲福聚，於入菩薩正性離生一菩薩摩訶薩所獲福聚，百分不及一，千分不及一，如是乃至百千俱胝那庾多分亦不及一。

復次，善現！假使充滿三千大千世界一切有情皆入菩薩正性離生，是諸菩薩摩訶薩眾所獲福聚，於行菩提向一菩薩摩訶薩所獲福聚，百分不及一，千分不及一，如是乃至百千俱胝那庾多分亦不及一。

復次，善現！假使充滿三千大千世界一切有情皆行菩提向，是諸菩薩摩訶薩眾所獲福聚，於一如來應正等覺所成福聚，百分不及一，千分不及一，如是乃至百千俱胝那庾多分亦不及一。」

二、[釋所緣行相]

無性為所緣，正念為增上，寂靜為行相，愛說者常難。

◎無間道頂加行之所緣緣，謂無實性一切如幻諸法，以此是斷除一切增益之處故。

○此之增上緣，謂最後心加行道所攝之正念，即大乘發心，以此於生彼道為自在之緣故。

○此無間道頂加行之行相，謂寂靜一切戲論之智，以此寂靜即彼狀貌故。

○頗有不善巧方便愛說二諦相違者，對此無間道頂加行之所緣行相常發攻難，以此所緣行相甚深難測故。

(17) 時具壽善現白佛言：「世尊！初發無上正等覺心諸菩薩摩訶薩何所思惟？」

(18) 佛言：「善現！是菩薩摩訶薩恒正思惟一切智智。」

(19) 具壽善現復白佛言：「一切智智以何為性？何所緣？何增上？何行相？何為相？」

(20) 佛告善現：「一切智智無性為性，無相無因，無所警覺，無生現故。又汝所問『一切智智何所緣？何增上？何行相？何為相』者，善現！一切智智無性為所緣，正念為增上，寂靜為行相，以法界為相。」

【第 49 義】：所除邪執 (V-8)

『R1』於所緣證成，及『R2』明所緣性，『R3』一切相智智，『R4』勝義世俗諦。『R5』加行與『R6』、『R7』、『R8』三寶，『R9』巧便『R10』佛現觀，『R11』顛倒及『R12』道性，『R13』、『R14』能治、所治品。『R15』性相並『R16』修習，說者邪分別，依一切相智，說為十六種。

○此邪執就所緣分十六種，謂：

◎『R1』由有為、無為界皆離實體故，無間道頂加行及一切相智之所緣不應道理，此於所緣證成起邪分別。

(21) 『R1』具壽善現復白佛言：「為但一切智智無性為性？為色受想行識亦無性為性？為眼處乃至意處亦無性為性？為色處乃至法處亦無性為性？為眼界乃至眼界亦無性為性？為色界乃至法界亦無性為性？為眼識界乃至意識界亦無性為性？為眼

觸乃至意觸亦無性為性？為眼觸為緣所生諸受乃至意觸為緣所生諸受亦無性為性？為地界乃至識界亦無性為性？為因緣乃至增上緣亦無性為性？為無明乃至老死亦無性為性？為布施波羅蜜多乃至般若波羅蜜多亦無性為性？為內空乃至無性自性空亦無性為性？為真如乃至不思議界亦無性為性？為苦集滅道聖諦亦無性為性？為四念住乃至八聖道支亦無性為性？為四靜慮、四無量、四無色定亦無性為性？為八解脫乃至十遍處亦無性為性？為空、無相、無願解脫門亦無性為性？為淨觀地乃至如來地亦無性為性？為極喜地乃至法雲地亦無性為性？為一切陀羅尼門、三摩地門亦無性為性？為五眼、六神通亦無性為性？為如來十力乃至十八不共法亦無性為性？為三十二大士相、八十隨好亦無性為性？為無忘失法、恆住捨性亦無性為性？為一切智、道相智、一切相智亦無性為性？為預流果乃至獨覺菩提亦無性為性？為一切菩薩摩訶薩行亦無性為性？為諸佛無上正等菩提亦無性為性？為有為界亦無性為性？為無為界亦無性為性？」

- (22) 佛告善現：「非但一切智智無性為性，色受想行識亦無性為性，如是乃至有為界、無為界亦無性為性。」
- (23) 具壽善現復白佛言：「何緣一切智智無性為性？色受想行識亦無性為性？如是乃至有為界、無為界亦無性為性？」
- (24) 佛告善現：「一切智智自性無故，若法自性無，此法無性為性。色受想行識亦自性無故，若法自性無，此法無性為性。如是乃至有為界、無為界亦自性無故，若法自性無，此法無性為性。」
- (25) 具壽善現復白佛言：「何緣一切智智自性無？色受想行識亦自性無？如是乃至有為界、無為界亦自性無？」
- (26) 佛告善現：「一切智智無和合自性故，若法無和合自性，此法則以無性為性。色受想行識亦無和合自性故，若法無和合自性，此法則以無性為性。如是乃至有為界、無為界亦無和合自性故，若法無和合自性，此法則以無性為性。善現！由是因緣，諸菩薩摩訶薩應知一切法皆無性為性。」

◎ 『R2』由一切法畢竟無自性故，所明離戲論之所緣自性不應道理，此於行相起邪分別。

『R2』復次，善現！一切法皆以空為自性，無相為自性，無願為自性。善現！由是因緣，諸菩薩摩訶薩應知一切法皆無性為性。

復次，善現！一切法皆以真如為自性，實際為自性，法界為自性。善現！由是因緣，諸菩薩摩訶薩應知一切法皆無性為性。」

(27) 具壽善現復白佛言：「若一切法皆無性者，初發無上正等覺心諸菩薩摩訶薩成就何等方便善巧，能行布施波羅蜜多乃至般若波羅蜜多，成熟有情，嚴淨佛土？成就何等方便善巧，能住內空乃至無性自性空，成熟有情，嚴淨佛土？成就何等方便善巧，能住真如乃至不思議界，成熟有情，嚴淨佛土？成就何等方便善巧，能住苦集滅道聖諦，成熟有情，嚴淨佛土？成就何等方便善巧，能行四念住乃至八聖道支，成熟有情，嚴淨佛土？成就何等方便善巧，能行四靜慮、四無量、四無色定，成熟有情，嚴淨佛土？成就何等方便善巧，能行八解脫乃至十遍處，成熟有情，嚴淨佛土？成就何等方便善巧，能行空、無相、無願解脫門，成熟有情，嚴淨佛土？成就何等方便善巧，能行菩薩摩訶薩地，成熟有情，嚴淨佛土？成就何等方便善巧，能行一切陀羅尼門、三摩地門，成熟有情，嚴淨佛土？成就何等方便善巧，能行五眼、六神通，成熟有情，嚴淨佛土？成就何等方便善巧，能行如來十力乃至十八不共法，成熟有情，嚴淨佛土？成就何等方便善巧，能行無忘失法、恒住捨性，成熟有情，嚴淨佛土？成就何等方便善巧，能行一切智、道相智、一切相智，成熟有情，嚴淨佛土？成就何等方便善巧，能行一切菩薩摩訶薩行，成熟有情，嚴淨佛土？成就何等方便善巧，能行諸佛無上正等菩提，成熟有情，嚴淨佛土？成就何等方便善巧，能行一切智智，成熟有情，嚴淨佛土？」

(28) 佛告善現：「是菩薩摩訶薩成就最勝方便善巧，雖知一切法皆無性為性，而常精勤成熟有情，嚴淨佛土，雖常精勤成熟有情，嚴淨佛土，而恒通達一切有情及諸佛土無不皆以無性為性。善現！是菩薩摩訶薩雖行布施波羅蜜多乃至般若波羅蜜多，學菩提道，而知布施波羅蜜多乃至般若波羅蜜多及菩提道無不皆以無性為性；如是乃至雖行一切智智，學菩提道，而知一切智智及菩提道無不皆以無性為性。善現！是菩薩摩訶薩如是修行布施波羅蜜多乃至般若波羅蜜多，學菩提道，廣說乃至如是修行

一切智智，學菩提道，若未成就如來十力、四無所畏、四無礙解、大慈大悲大喜大捨、十八不共法、無忘失法、恆住捨性、一切智、道相智、一切相智及餘無量無邊佛法皆名學菩提道未得圓滿。

◎『R3』由有性無性皆於勝義無所得故，一切相智之智不應道理，此於果上起邪分別。

『R3』若學此道已得圓滿，由一剎那相應般若，便能證得一切智智。爾時，一切微細煩惱習氣相續皆永不生，名無餘斷，得名為佛，復以無障清淨佛眼遍觀十方三世等法尚不得無，況當得有。如是，善現！諸菩薩摩訶薩應行般若波羅蜜多，信解一切法皆無性為性。善現！是名菩薩摩訶薩成就最勝方便善巧，謂行般若波羅蜜多，觀一切法尚不得無，況當得有。

善現！是菩薩摩訶薩修行布施波羅蜜多時，於此布施，施者、受者、施物、施果及菩提心尚不見無，況當見有。如是乃至證得一切智智時，於一切智智，若能證者、若所證得、若由此證得、若證得時處尚不見無，況當見有。所以者何？善現！是菩薩摩訶薩常作是念：『諸法皆以無性為性，如是無性，非佛所作，非菩薩作，非獨覺作，非聲聞作，亦非餘作，以一切法皆無作者，作者離故。』」

(29) 具壽善現復白佛言：「豈不諸法諸法性離？」

佛告善現：「實爾，諸法諸法性離。」

(30) 善現復問：「若一切法離法性者，云何離法能知離法若有若無？世尊！有法不應能知無法，無法不應能知有法，有法不應能知有法，無法不應能知無法。世尊！如是一切法皆無知為性，云何菩薩摩訶薩行深般若波羅蜜多，於諸法中種種顯示，謂色受想行識若有若無，眼處乃至意處若有若無，色處乃至法處若有若無，眼界乃至眼界若有若無，色界乃至法界若有若無，眼識界乃至意識界若有若無，眼觸乃至意觸若有若無，眼觸為緣所生諸受乃至意觸為緣所生諸受若有若無，地界乃至識界若有若無，因緣乃至增上緣若有若無，無明乃至老死若有若無，布施波羅蜜多乃至般若波羅蜜多若有若無，內空乃至無性自性空若有若無，真如乃至不思議界若有若無，苦集滅道聖諦若有若無，四念住乃至八聖道支若有若無，四靜慮、四無量、四無色

定若有若無，八解脫乃至十遍處若有若無，空、無相、無願解脫門若有若無，淨觀地乃至如來地若有若無，極喜地乃至法雲地若有若無，一切陀羅尼門、三摩地門若有若無，五眼、六神通若有若無，如來十力乃至十八不共法若有若無，三十二大士相、八十隨好若有若無，無忘失法、恆住捨性若有若無，一切智、道相智、一切相智若有若無，預流果乃至獨覺菩提若有若無，一切菩薩摩訶薩行若有若無，諸佛無上正等菩提若有若無，一切智智若有若無，有為界、無為界若有若無？」

- (31) 佛告善現：「諸菩薩摩訶薩行深般若波羅蜜多，隨世俗故，顯示諸法若有若無，不隨勝義。」
善現復問：「世俗、勝義為有異不？」

◎『R4』實空為真如性故，勝義世俗二諦不應道理，此於二諦起邪分別。

- (32) 『R4』佛告善現：「非異世俗別有勝義。所以者何？世俗真如即是勝義，諸有情類顛倒妄執，於此真如不知不見，諸菩薩摩訶薩為益彼故，隨世俗相，顯示諸法若有若無，非隨勝義。復次，善現！無量有情於蘊等法起實有想，或實無想，不達諸法非有非無，諸菩薩摩訶薩為益彼故，顯示蘊等若有若無，令諸有情因斯了達蘊等諸法，非有非無，非欲令執實有無相。如是，善現！諸菩薩摩訶薩應勤精進，離有無執，行深般若波羅蜜多。」

大般若波羅蜜多經卷第四百六十四

菩薩行品第七十

◎『R5』布施等波羅蜜多勝義無所得故，止觀雙運加行不應道理，此於加行自性起邪分別。

- (33) 『R5』爾時，具壽善現白佛言：「世尊所說菩薩行菩薩行者，何法名為菩薩行耶？」
(34) 佛告善現：「菩薩行菩薩行者，謂為無上正等菩提行生死故，名菩薩行。」
(35) 具壽善現白佛言：「世尊！諸菩薩摩訶薩當於何處行菩薩行？」
(36) 佛言：「善現！諸菩薩摩訶薩當於色受想行識空行菩薩行，當於眼處乃至意處空行菩薩行，當於色處乃至法處空行菩薩行，當於眼界乃至意界空行菩薩行，當於色界乃至法界空行菩薩

行，當於眼識界乃至意識界空行菩薩行，當於眼觸乃至意觸空行菩薩行，當於眼觸為緣所生諸受乃至意觸為緣所生諸受空行菩薩行，當於地界乃至識界空行菩薩行，當於因緣乃至增上緣空行菩薩行，當於無明乃至老死空行菩薩行，當依布施波羅蜜多乃至般若波羅蜜多行菩薩行，當依內空乃至無性自性空行菩薩行，當依真如乃至不思議界行菩薩行，當依苦集滅道聖諦行菩薩行，當依四念住乃至八聖道支行菩薩行，當依四靜慮行菩薩行，當依四無量行菩薩行，當依四無色定行菩薩行，當依八解脫行菩薩行，當依八勝處行菩薩行，當依九次第定行菩薩行，當依十遍處行菩薩行，當依三解脫門行菩薩行，當依十地行菩薩行，當依一切陀羅尼門行菩薩行，當依一切三摩地門行菩薩行，當依五眼行菩薩行，當依六神通行菩薩行，當依如來十力行菩薩行，當依四無所畏行菩薩行，當依大慈大悲大喜大捨行菩薩行，當依十八佛不共法行菩薩行，當依無忘失法、恒住捨性行菩薩行，當依一切智、道相智、一切相智行菩薩行，當依嚴淨佛土行菩薩行，當依成熟有情行菩薩行，當依引發文字陀羅尼行菩薩行，當依悟入文字陀羅尼行菩薩行，當依悟入無文字陀羅尼行菩薩行，當依引發無礙辯才行菩薩行，當依有為界行菩薩行，當依無為界行菩薩行。善現！諸菩薩摩訶薩如是修行菩薩行時，如佛無上正等菩提，於諸法中不作二相。善現！若菩薩摩訶薩如是行般若波羅蜜多時，名為無上正等菩提修菩薩行。善現！諸菩薩摩訶薩若能如是修菩薩行，疾證無上正等菩提。」

◎『R6』圓滿慧所證一切所知皆於勝義無所得故，佛寶不應道理；

(37)『R6』爾時，具壽善現白佛言：「世尊所說佛陀，佛陀者，依何義故，名為佛陀？」

(38)佛告善現：「覺義、實義、薄伽梵義，故名佛陀。

復次，善現！於諸實法現等正覺，故名佛陀。

復次，善現！通達實法，故名佛陀。

復次，善現！於一切法如所有性、盡所有性無顛倒覺，故名佛陀。

復次，善現！遍於三世及無為法無障智轉，故名佛陀。

復次，善現！如實開覺一切有情，令離顛倒，故名佛陀。」

◎『R7』一切諸法唯假名故，法寶不應道理；

- (39) 『R7』爾時，具壽善現白佛言：「世尊所說菩提，菩提者，依何義故，名為菩提？」
- (40) 佛告善現：「菩提者，是空義，是真如義，是實際義，是法性義，是法界義。
- 復次，善現！假立名相，施設言說，能真實覺，最上勝妙，故名菩提。
- 復次，善現！不可壞義是菩提義，無分別義是菩提義。
- 復次，善現！是真是實，非虛妄，非變異，故名菩提。
- 復次，善現！唯假名相，無實可得，故名菩提。
- 復次，善現！諸佛所有真淨遍覺，故名菩提。
- 復次，善現！諸佛由此，於一切法、一切種相現等正覺，故名菩提。」

◎『R8』所依色等皆於勝義無所得故，僧寶不應道理；

此於正行所依之歸依及歸境三寶起邪分別。

- (41) 『R8』爾時，具壽善現白佛言：「世尊！諸菩薩摩訶薩為菩提故，修行六波羅蜜多乃至一切智智時，於何等法為益為損，為增為減，為生為滅，為染為淨？」
- (42) 佛告善現：「諸菩薩摩訶薩為菩提故，修行六波羅蜜多乃至一切智智時，於一切法無益無損，無增無減，無生無滅，無染無淨。何以故？是菩薩摩訶薩為菩提故，行深般若波羅蜜多，於一切法都無所緣而為方便，不為益損，不為增減，不為生滅，不為染淨，現在前故。」
- (43) 具壽善現白言：「世尊！若菩薩摩訶薩為菩提故，修行六波羅蜜多乃至一切智智時，於一切法都無所緣而為方便，不為益損，不為增減，不為生滅，不為染淨，現在前者，是菩薩摩訶薩行深般若波羅蜜多，云何攝受布施波羅蜜多乃至般若波羅蜜多？云何攝受內空乃至無性自性空？云何攝受真如乃至不思議界？云何攝受苦集滅道聖諦？云何攝受四念住乃至八聖道支？云何攝受四靜慮、四無量、四無色定？云何攝受八解脫乃至十遍處？云何攝受空、無相、無願解脫門？云何攝受諸菩薩地？云何攝受陀羅尼門、三摩地門？云何攝受五眼、六神通？」

云何攝受如來十力乃至十八不共法？云何攝受無忘失法、恒住捨性？云何攝受一切智、道相智、一切相智？云何超諸聲聞、獨覺等地，趣入菩薩正性離生，漸次證得一切智智？」

- (44) 佛言：「善現！諸菩薩摩訶薩行深般若波羅蜜多時，不以二故攝受修行六波羅蜜多，乃至不以二故漸次證得一切智智。」
- (45) 具壽善現復白佛言：「若菩薩摩訶薩行深般若波羅蜜多時，不以二故攝受修行六波羅蜜多，乃至不以二故漸次證得一切智智者，云何菩薩摩訶薩從初發心乃至後心，恒時增長一切善法？」
- (46) 佛告善現：「若菩薩摩訶薩以二故行，則諸善法不得增長。何以故？愚夫異生皆依二故，所起善法不得增長。若菩薩摩訶薩不二故行，從初發心乃至後心，恒時增長一切善法。是故，善現！諸菩薩摩訶薩善根堅固，世間天人、阿素洛等，不能毀壞，令墮聲聞、獨覺等地，世間種種惡不善法不能制伏令於行六波羅蜜多乃至一切智智時所有善法不得增長。如是，善現！諸菩薩摩訶薩應行無二甚深般若波羅蜜多。」
- (47) 具壽善現白言：「世尊！諸菩薩摩訶薩為善根故，行深般若波羅蜜多耶？」
- (48) 佛言：「不爾。諸菩薩摩訶薩不為善根故，行深般若波羅蜜多，亦不為不善根故，行深般若波羅蜜多。何以故？諸菩薩摩訶薩法應如是，若未親近諸佛世尊，若諸善根未極圓滿，若真善友未多攝受，終不能得一切智智。」
- (49) 具壽善現復白佛言：「云何菩薩摩訶薩親近諸佛，圓滿善根，得真善友多所攝受，速能證得一切智智？」
- (50) 佛言：「善現！諸菩薩摩訶薩從初發心親近如來應正等覺，聞說正法，所謂契經乃至論議；聞已受持，數數溫習，令善通利；既善通利，思惟觀察；既觀察已，深見意趣；見意趣已，復善通達；既善通達，得陀羅尼，起無礙辯乃至證得一切智智，隨所生處，於所聞持正法教義常不忘失，於諸佛所，廣種善根，由善根力所攝受故，不墮惡趣無暇中生。復由善根所攝受故，意樂清淨，淨意樂力所攝持故，常能無倒成熟有情，嚴淨佛土。復由善根所攝受故，常不遠離真淨善友，謂諸如來應正等覺及諸菩薩摩訶薩眾、獨覺、聲聞，并餘能讚佛法僧者。如是，善現！諸菩薩摩訶薩親近諸佛，圓滿善根，得真善友多所攝受，速能證得一切智智。是故，善現！諸菩薩摩訶薩行深般若波羅

蜜多，欲疾證得一切智智，當勤精進親近諸佛，攝受圓滿所種善根，承事善友，勿生厭倦。」

親近品第七十一

- (51) 爾時，具壽善現白佛言：「世尊！若菩薩摩訶薩不親近諸佛，不圓滿善根，不承事善友，是菩薩摩訶薩豈不能得一切智智？」
- (52) 佛告善現：「若不能親近諸佛，圓滿善根，承事善友，尚不名菩薩摩訶薩，豈能證得一切智智。所以者何？或有菩薩摩訶薩親近諸佛，種諸善根，承事善友，猶不能得一切智智，況不能親近諸佛，圓滿善根，承事善友，而能證得一切智智。彼若能得一切智智，無有是處。是故，善現！若菩薩摩訶薩欲稱菩薩摩訶薩名，欲疾證得一切智智，常應親近諸佛世尊，圓滿善根，承事善友，勿生厭倦。」
- (53) 具壽善現復白佛言：「以何因緣，有菩薩摩訶薩雖親近諸佛，種諸善根，承事善友，而不能得一切智智？」
- (54) 佛告善現：「彼菩薩摩訶薩遠離方便善巧力故，雖親近諸佛，種諸善根，承事善友，而不能得一切智智，謂彼菩薩摩訶薩不從諸佛及諸善友聞說殊勝方便善巧，雖親近諸佛，種諸善根，承事善友，而不能得一切智智。」

◎『R9』布施等勝義無所得故，善巧方便不應道理，此於差別行起邪分別。

- (55) 『R9』具壽善現復白佛言：「何等名為方便善巧，諸菩薩摩訶薩成就如是方便善巧，諸有所為，定能證得一切智智？」
- (56) 佛告善現：「若菩薩摩訶薩從初發心修行布施波羅蜜多時，以一切智智相應作意，或施諸佛，或施菩薩，或施獨覺，或施聲聞，或施諸餘沙門梵志，或施外道修梵行者，或施貧窮涉路苦行及來乞者，或施一切人非人等，是菩薩摩訶薩成就如是一切智智相應作意，雖行布施，而無施想，無受者想，亦無一切我我所想。所以者何？是菩薩摩訶薩觀一切法自相皆空，無實無成，無轉無滅，入諸法相，知一切法無作無能，入諸行相。是菩薩摩訶薩成就如是方便善巧，恒時增長覺分善根，由此善根常增長故，能行布施波羅蜜多，成熟有情，嚴淨佛土。雖行布施，而不希求施所得果，謂不迴向可愛境界及勝生處，唯為救護無救護者，及欲解脫未解脫者，修行布施波羅蜜多。」

復次，善現！若菩薩摩訶薩從初發心修行淨戒波羅蜜多時，以一切智智相應作意受持淨戒，心常不起貪瞋癡等隨眠、纏、縛，亦復不起能障菩提餘不善法，所謂慳吝、惡戒、忿恚、懈怠、劣心、亂心、惡慧、諸慢、過慢、慢過慢、我慢、增上慢、卑慢、邪慢、聲聞、獨覺相應作意。所以者何？是菩薩摩訶薩觀一切法自相皆空，無實無成，無轉無滅，入諸法相，知一切法無作無能，入諸行相。是菩薩摩訶薩成就如是方便善巧，恒時增長覺分善根，由此善根常增長故，能行淨戒波羅蜜多，成熟有情，嚴淨佛土。雖行淨戒，而不希求戒所得果，謂不迴向可愛境界及勝生處，唯為救護無救護者，及欲解脫未解脫者，修行淨戒波羅蜜多。

復次，善現！若菩薩摩訶薩從初發心修行安忍波羅蜜多時，以一切智智相應作意，修學安忍，是菩薩摩訶薩乃至為護自命因緣，亦常不起一念忿恚惡言加報怨恨之心。假使有來欲害其命，劫奪財寶，侵凌妻室，誣曷罵辱，阻隔輕調，或打或刺，或割或截，及加種種不饒益事，於彼有情竟無忿恨，唯求作彼利益安樂。所以者何？是菩薩摩訶薩觀一切法自相皆空，無實無成，無轉無滅，入諸法相，知一切法無作無能，入諸行相。是菩薩摩訶薩成就如是方便善巧，恒時增長覺分善根，由此善根常增長故，能行安忍波羅蜜多，成熟有情，嚴淨佛土。雖行安忍，而不希求忍所得果，謂不迴向可愛境界及勝生處，唯為救護無救護者，及欲解脫未解脫者，修行安忍波羅蜜多。

復次，善現！若菩薩摩訶薩從初發心修行精進波羅蜜多時，以一切智智相應作意，發起正勤，勇猛無怯，遠離懈怠下劣之心，為求菩提，不憚眾苦，修諸善法，常無懈廢。所以者何？是菩薩摩訶薩觀一切法自相皆空，無實無成，無轉無滅，入諸法相，知一切法無作無能，入諸行相。是菩薩摩訶薩成就如是方便善巧，恒時增長覺分善根，由此善根常增長故，能行精進波羅蜜多，成熟有情，嚴淨佛土。雖行精進，而不希求勤所得果，謂不迴向可愛境界及勝生處，唯為救護無救護者，及欲解脫未解脫者，修行精進波羅蜜多。

復次，善現！若菩薩摩訶薩從初發心修行靜慮波羅蜜多時，以一切智智相應作意，修學諸定。是菩薩摩訶薩眼見諸色，耳聞諸聲，鼻嗅諸香，舌嘗諸味，身覺諸觸，意了諸法，已不取諸

相，不取隨好，即於是處防護諸根，不放逸住，勿令發起世間貪憂、惡不善法、諸煩惱漏，專修念定，守護諸根。是菩薩摩訶薩若行若住，若坐若臥，若語若默，常不遠離勝奢摩他，遠離種種雜穢諸法，身心寂靜，無異威儀，軌則所行，無不調善，心常安定，無所分別。所以者何？是菩薩摩訶薩觀一切法自相皆空，無實無成，無轉無滅，入諸法相，知一切法無作無能，入諸行相。是菩薩摩訶薩成就如是方便善巧，恒時增長覺分善根，由此善根常增長故，能行靜慮波羅蜜多，成熟有情，嚴淨佛土。雖行靜慮，而不希求定所得果，謂不迴向可愛境界及勝生處，唯為救護無救護者，及欲解脫未解脫者，修行靜慮波羅蜜多。

復次，善現！若菩薩摩訶薩從初發心修行般若波羅蜜多時，以一切智智相應作意，修學妙慧。是菩薩摩訶薩離諸惡慧，他不能引，心不發起我我所執，遠離一切我見、有情見乃至知者見、見者見、有無有見、諸惡見趣，遠離憍慢，無所分別，引發種種殊勝善根。所以者何？是菩薩摩訶薩觀一切法自相皆空，無實無成，無轉無滅，入諸法相，知一切法無作無能，入諸行相。是菩薩摩訶薩成就如是方便善巧，恒時增長覺分善根，由此善根常增長故，能行般若波羅蜜多，成熟有情，嚴淨佛土。雖行般若，而不希求慧所得果，謂不迴向可愛境界及勝生處，唯為救護無救護者，及欲解脫未解脫者，修行般若波羅蜜多。

復次，善現！若菩薩摩訶薩從初發心修行般若波羅蜜多時，以一切智智相應作意，入四靜慮、四無量、四無色定。是菩薩摩訶薩雖於靜慮、無量、無色入出自在，而不攝受彼果異熟。所以者何？是菩薩摩訶薩成就最勝方便善巧，觀諸靜慮、無量、無色自相皆空，無實無成，無轉無滅，入諸法相，知一切法無作無能，入諸行相。是菩薩摩訶薩成就如是方便善巧，恒時增長覺分善根，由此善根常增長故，能行靜慮、無量、無色，由行靜慮、無量、無色，便能自在成熟有情，嚴淨佛土。

復次，善現！若菩薩摩訶薩從初發心修行般若波羅蜜多時，以一切智智相應作意，修學一切菩提分法，成就如是方便善巧，雖行見修所斷法道，而不取預流、一來、不還、阿羅漢果、獨覺菩提。所以者何？是菩薩摩訶薩觀一切法自相皆空，無實無成，無轉無滅，入諸法相，知一切法無作無能，入諸行相。是

菩薩摩訶薩成就最勝方便善巧，恒時增長覺分善根，由此善根常增長故，能行一切菩提分法，超諸聲聞、獨覺等地，趣入菩薩正性離生，是名菩薩無生法忍。由此忍故，常能自在成熟有情，嚴淨佛土。

復次，善現！若菩薩摩訶薩修行般若波羅蜜多時，以一切智智相應作意，雖得自在順逆入出八解脫、八勝處、九次第定、十遍處等，而能成就方便善巧，不取預流、一來、不還、阿羅漢果、獨覺菩提。所以者何？是菩薩摩訶薩觀一切法自相皆空，無實無成，無轉無滅，入諸法相，知一切法無作無能，入諸行相。是菩薩摩訶薩成就最勝方便善巧，恒時增長覺分善根，由此善根常增長故，便能自在成熟有情，嚴淨佛土，證入菩薩不退轉地，得受記忍。

復次，善現！若菩薩摩訶薩修行般若波羅蜜多時，以一切智智相應作意，精進修行如來十力、四無所畏、四無礙解、大慈大悲大喜大捨及十八不共法等無量無邊諸佛功德，乃至未具成熟有情，嚴淨佛土，猶未證得一切智智。所以者何？是菩薩摩訶薩觀一切法自相皆空，無實無成，無轉無滅，入諸法相，知一切法無作無能，入諸行相。是菩薩摩訶薩成就最勝方便善巧，恒時增長覺分善根，由此善根常增長故，便能圓滿成熟有情，嚴淨佛土，漸次證得一切智智。善現！如是名為方便善巧，若菩薩摩訶薩成就如是方便善巧，諸有所為定能證得一切智智。如是最勝方便善巧，皆由般若波羅蜜多而得成就。是故，善現！諸菩薩摩訶薩應勤修學甚深般若波羅蜜多，諸有所為，勿希果報。若能如是精勤修學甚深般若波羅蜜多，速能證得一切智智。」

遍學品第七十二

- (57) 爾時，具壽善現白佛言：「世尊！諸菩薩摩訶薩成就如是最勝覺慧，雖能受行清淨深法，而不攝受殊勝果報。」
- (58) 佛告善現：「如是！如是！如汝所說，諸菩薩摩訶薩成就如是最勝覺慧，雖能受行清淨深法，而不攝受殊勝果報。何以故？是菩薩摩訶薩於法自性能不動故。」
- (59) 具壽善現白言：「世尊！是菩薩摩訶薩能於何法自性無動？」
- (60) 佛告善現：「是菩薩摩訶薩能於無性自性無動。」

- (61) 具壽善現復白佛言：「是菩薩摩訶薩於何無性自性無動？」
- (62) 佛告善現：「是菩薩摩訶薩能於色自性無動，能於受想行識自性無動，能於眼處乃至意處自性無動，能於色處乃至法處自性無動，能於眼界乃至意界自性無動，能於色界乃至法界自性無動，能於眼識界乃至意識界自性無動，能於眼觸乃至意觸自性無動，能於眼觸為緣所生諸受乃至意觸為緣所生諸受自性無動，能於布施波羅蜜多乃至般若波羅蜜多自性無動，能於四靜慮、四無量、四無色定自性無動，能於四念住乃至八聖道支自性無動，能於三解脫門自性無動，能於八解脫、九次第定自性無動，能於如來十力乃至十八不共法自性無動，如是乃至能於一切智智自性無動，能於一切有為界、無為界自性無動。所以者何？如是諸法即是無性，諸菩薩摩訶薩於此無性自性無動，無性不能現證無性。」

◎ 『R10』所證有性及無性之自性，皆於勝義無可證故，如來現觀不應道理，此於佛現觀起邪分別。

- (63) 『R10』具壽善現白言：「世尊！有性法為能現證有性不？」
佛言：「不爾。」
- (64) 「世尊！無性法為能現證有性不？」
佛言：「不爾。」
- (65) 「世尊！有性法為能現證無性不？」
佛言：「不爾。」
- (66) 「世尊！無性法為能現證無性不？」
佛言：「不爾。」
- (67) 「世尊！若爾，亦應有性不能現觀有性，無性不能現觀有性，有性不能現觀無性，無性不能現觀無性，將非世尊無得無現觀耶？」
- (68) 佛言：「善現！雖有得有現觀，然離四句。」
- (69) 「世尊！云何離四句而有得有現觀？」
- (70) 「善現！若得若現觀，非有非無，絕諸戲論，是故我說有得有現觀，然離四句。」

◎ 『R11』無常、不淨等戲論建立，皆於勝義無所得故，緣蘊常等四倒不應道理，此於所治顛倒起邪分別。

- (71) 『R11』具壽善現復白佛言：「諸菩薩摩訶薩以何為戲論？」
- (72) 佛告善現：「諸菩薩摩訶薩觀色乃至識若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀眼處乃至意處若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀色處乃至法處若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀眼界乃至眼界若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀色界乃至法界若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀眼識界乃至意識界若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀眼觸乃至意觸若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀眼觸為緣所生諸受乃至意觸為緣所生諸受若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀地界乃至識界若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀因緣乃至增上緣若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀無明乃至老死若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀布施波羅蜜多乃至般若波羅蜜多若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀內空乃至無性自性空若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀真如乃至不思議界若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀苦集滅道聖諦若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀四念住乃至八聖道支若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。」

觀四靜慮、四無量、四無色定若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀八解脫乃至十遍處若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。

觀空、無相、無願解脫門若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀淨觀地乃至如來地若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀極喜地乃至法雲地若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。

觀一切陀羅尼門、三摩地門若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀五眼、六神通若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀如來十力乃至十八不共法若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。

觀三十二大士相、八十隨好若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀無忘失法、恆住捨性若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀一切智、道相智、一切相智若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。

觀預流果乃至獨覺菩提若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀一切菩薩摩訶薩行若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀諸佛無上正等菩提若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。觀一切智智若常若無常、若樂若苦、若我若無我、若淨若不淨、若寂靜若不寂靜、若遠離若不遠離，是為戲論。

復次，善現！諸菩薩摩訶薩若作是念：『苦聖諦應遍知，集聖諦應永斷，滅聖諦應作證，道聖諦應修習』，是為戲論。若作是念：『應修四靜慮、四無量、四無色定』，是為戲論。若作是念：『應修四念住乃至八聖道支』，是為戲論。若作是念：『應修空、無相、無願解脫門』，是為戲論。若作是念：『應修八解脫、八勝處、九次第定、十遍處』，是為戲論。若作是念：『應超預流果乃至獨覺菩提』，是為戲論。若作是念：『應行布施波羅蜜多乃至般若波羅蜜多』，是為戲論。若作是念：『應住內空乃至無性自性空』，是為戲論。若作是念：『應住真如乃至不思議界』，是為戲論。若作是念：『應入菩薩正性離生』，是為戲論。若作是念：『應圓滿菩薩十地』，是為戲論。若作是念：『應起一切陀羅尼門、三摩地門』，是為戲論。若作是念：『應引五眼、六神通』，是為戲論。若作是念：『應引如來十力乃至十八不共法』，是為戲論。若作是念：『應圓滿三十二大士相、八十隨好』，是為戲論。若作是念：『應引無忘失法、恒住捨性』，是為戲論。若作是念：『應引一切智、道相智、一切相智』，是為戲論。若作是念：『應行一切菩薩摩訶薩行』，是為戲論。若作是念：『應證諸佛無上正等菩提』，是為戲論。若作是念：『我當嚴淨佛土，成熟有情』，是為戲論。若作是念：『我當證得一切智智』，是為戲論。若作是念：『我當永斷一切煩惱習氣相續』，是為戲論。善現！諸菩薩摩訶薩以如是等種種分別而為戲論。

復次，善現！諸菩薩摩訶薩行深般若波羅蜜多時，應觀色乃至識若常若無常、若樂若苦、若我若無我、若淨若不淨、若寂靜若不寂靜、若遠離若不遠離，皆不可戲論故，不應戲論；如是乃至應觀一切智智若應證得若不應證得，俱不可戲論故，不應戲論；應觀一切煩惱習氣相續若應永斷若不應永斷，俱不可戲論故，不應戲論。善現！諸菩薩摩訶薩行深般若波羅蜜多時，應觀如是等諸法及有情皆不可戲論故，不應戲論。所以者何？以一切法及諸有情有性不能戲論有性，有性不能戲論無性，無性不能戲論無性，無性不能戲論有性，離有無性，若能戲論、若所戲論、若戲論處、若戲論時，皆不可得。是故，善現！色無戲論，受想行識亦無戲論，如是乃至一切智智無戲論，永斷

煩惱習氣相續亦無戲論。如是，善現！諸菩薩摩訶薩應行無戲論甚深般若波羅蜜多。」

- (73) 具壽善現白言：「世尊！諸菩薩摩訶薩行深般若波羅蜜多時，云何觀色受想行識乃至一切智智、永斷煩惱習氣相續，皆不可戲論故，不應戲論？」
- (74) 佛告善現：「諸菩薩摩訶薩行深般若波羅蜜多時，應觀色無自性，受想行識亦無自性，如是乃至應觀一切智智無自性，永斷煩惱習氣相續亦無自性。若法無自性，則不可戲論。是故，善現！色受想行識不可戲論故，諸菩薩摩訶薩不應戲論，如是乃至一切智智、永斷煩惱習氣相續不可戲論故，諸菩薩摩訶薩不應戲論。善現！諸菩薩摩訶薩若能如是於一切法離諸戲論，行深般若波羅蜜多方便善巧，便入菩薩正性離生，若已得入，速能證得一切智智。」

大般若波羅蜜多經卷第四百六十五

- (01) 爾時，具壽善現白佛言：「世尊！若一切法皆無自性，離諸戲論，不可得者，諸菩薩摩訶薩由何等道，得入菩薩正性離生？為聲聞道？為獨覺道？為如來道？」
- (02) 佛告善現：「諸菩薩摩訶薩不由聲聞道，不由獨覺道，不由如來道得入菩薩正性離生，然於諸道遍學滿已，由菩薩道得入菩薩正性離生。譬如第八，先學諸道，後由自道得入自乘正性離生，乃至未起圓滿果道，未能證得自乘極果。諸菩薩摩訶薩亦復如是，先於諸道遍學滿已，後由自道得入菩薩正性離生，乃至未起金剛喻定，猶未能得一切智智。若起此定，以一剎那相應般若，乃能證得一切智智。」

◎『R12』修道之果於勝義中無菩提可證故，其道自性不應道理，此於道自性起邪分別。

- (03) 『R12』具壽善現復白佛言：「若菩薩摩訶薩先於諸道遍學滿已，後由自道得入菩薩正性離生，世尊！豈不第八、預流、一來、不還、阿羅漢、獨覺、如來向果其道各異？世尊！如是諸道設各異者，云何菩薩摩訶薩先於諸道遍學滿已，後由自道得入菩薩正性離生？謂諸菩薩摩訶薩若起第八道，應成第八；若起具見道，應成預流；若起進修道，應成一來、不還；若起無學道，應成阿羅漢；若起獨覺道，應成獨覺。世尊！若菩薩摩

訶薩成第八已，能入菩薩正性離生，必無是處，不入菩薩正性離生而能證得一切智智，亦無是處。世尊！若菩薩摩訶薩成預流、一來、不還、阿羅漢、獨覺已，能入菩薩正性離生，必無是處，不入菩薩正性離生而能證得一切智智，亦無是處。世尊！云何令我如實了知諸菩薩摩訶薩要於諸道遍學滿已，乃入菩薩正性離生而不違理？」

- (04) 佛告善現：「如是！如是！如汝所說。若菩薩摩訶薩成第八已，廣說乃至成獨覺已，能入菩薩正性離生，必無是處，不入菩薩正性離生而能證得一切智智，亦無是處。」
- (05) 具壽善現白言：「世尊！若爾，云何諸菩薩摩訶薩先於諸道遍學滿已，後由自道得入菩薩正性離生；已入菩薩正性離生，漸次證得一切智智，永斷一切習氣相續？」
- (06) 佛告善現：「諸菩薩摩訶薩從初發心，勇猛精進，修行六種波羅蜜多，以勝智見超過八地，謂淨觀地乃至獨覺地。雖於如是所說八地皆遍修學，而能以勝智見超過，由道相智得入菩薩正性離生。已入菩薩正性離生，漸次復由一切相智證得圓滿一切智智，永斷一切習氣相續。善現當知！第八者智即是菩薩摩訶薩忍，預流、一來、不還、阿羅漢、獨覺若智若斷，亦是菩薩摩訶薩忍。如是，善現！諸菩薩摩訶薩先於諸道遍學滿已，後由自道得入菩薩正性離生；已入菩薩正性離生，漸次證得一切智智；既已證得一切智智，以果饒益一切有情。」
- (07) 爾時，具壽善現白佛言：「世尊！如說菩薩摩訶薩眾應學遍知一切道相，若聲聞道、若獨覺道、若菩薩道、若如來道，知此等道一切種相，名道相智，諸菩薩摩訶薩云何當起此道相智？」
- (08) 佛告善現：「諸行、狀、相能正顯發道相智者，諸菩薩摩訶薩遍於如是諸行、狀、相皆現等覺；現等覺已，如實為他宣說、開示、施設、建立，令諸有情得無倒解，隨應趣向所求利樂。是菩薩摩訶薩應於一切音聲語言皆得善巧陀羅尼門，由此善巧陀羅尼門發起種種音聲語言，遍為三千大千世界諸有情類宣說正法，令知所聞，皆如谷響，雖有領解，而無執著。善現！諸菩薩摩訶薩由此因緣，應學圓滿諸道相智；既學圓滿道相智已，應如實知一切有情意樂、隨眠種種差別，如應為作利益安樂，謂如實知地獄有情意樂、隨眠及彼因果，知已，方便遮障彼道；亦如實知傍生有情意樂、隨眠及彼因果，知已，

方便遮障彼道；亦如實知鬼界有情意樂、隨眠及彼因果，知己，方便遮障彼道；亦如實知諸龍、藥叉、阿素洛等意樂、隨眠及彼因果，知己，方便遮障彼道；亦如實知人及欲天意樂、隨眠及彼因果，知己，方便遮障彼道；亦如實知梵眾天乃至色究竟天意樂、隨眠及彼因果，知己，方便遮障彼道；亦如實知空無邊處天乃至非想非非想處天意樂、隨眠及彼因果，知己，方便遮障彼道；亦如實知四念住乃至八聖道支及彼因果，亦如實知三解脫門及彼因果，亦如實知四靜慮、四無量、四無色定及彼因果，亦如實知八解脫、八勝處、九次第定、十遍處及彼因果，亦如實知苦集滅道聖諦及彼因果，亦如實知布施波羅蜜多乃至般若波羅蜜多及彼因果，亦如實知內空乃至無性自性空及彼因果，亦如實知真如乃至不思議界及彼因果，亦如實知淨觀地乃至如來地及彼因果，亦如實知極喜地乃至法雲地及彼因果，亦如實知一切陀羅尼門、一切三摩地門及彼因果，亦如實知五眼、六神通及彼因果，亦如實知如來十力乃至十八不共法及彼因果，亦如實知無忘失法、恒住捨性及彼因果，亦如實知一切智、道相智、一切相智及彼因果。

善現！諸菩薩摩訶薩既如實知聲聞等道及因果已，隨其所應，安立有情於三乘道，令勤修學，各得究竟。

善現！諸菩薩摩訶薩應起如是諸道相智，若菩薩摩訶薩能學如是諸道相智，於諸有情種種界性、意樂、隨眠，皆能悟入；既悟入已，隨其所宜，為說正法，皆令獲得所求勝果，終不唐捐。所以者何？是菩薩摩訶薩善達有情諸根勝劣，如實解了一切有情往來死生心所差別，故所說法，終不唐捐。

善現！諸菩薩摩訶薩應行如是諸道般若波羅蜜多。所以者何？一切聲聞、獨覺、菩薩所應學道菩提分法，無不攝在甚深般若波羅蜜多，一切聲聞、獨覺、菩薩於此中學，皆得究竟。」

◎『R13』、『R14』勝義中無所捨、所取故，所治品與能治品之差別不應道理，此於能治、所治之差別起邪分別。

(09)『R13』，『R14』爾時，具壽善現白佛言：「世尊！若一切種菩提分法乃至菩提，如是一切，非合非散，無色無見無對，一相所謂無相，云何如是菩提分法能取菩提？世尊！一切非合非散，無色無見無對，一相所謂無相法，非於餘法有取有捨。譬

如虛空，於一切法無取無捨，自性空故。諸法亦爾，自性皆空，非於餘法有取有捨，如何可言四念住等菩提分法能取菩提？」

- (10) 佛告善現：「如是！如是！如汝所說。以一切法自性皆空，無取無捨，然諸有情於一切法自性空義不能解了，為益彼故，方便宣說菩提分法能取菩提。」

復次，善現！若所有色受想行識，若眼處乃至意處，若色處乃至法處，若眼界乃至眼界，若色界乃至法界，若眼識界乃至意識界，若眼觸乃至意觸，若眼觸為緣所生諸受乃至意觸為緣所生諸受，若地界乃至識界，若因緣乃至增上緣，若無明乃至老死，若布施波羅蜜多乃至般若波羅蜜多，若內空乃至無性自性空，若真如乃至不思議界，若苦集滅道聖諦，若四念住乃至八聖道支，若四靜慮、四無量、四無色定，若三解脫門，若八解脫乃至十遍處，若淨觀地乃至如來地，若極喜地乃至法雲地，若一切陀羅尼門、三摩地門，若五眼、六神通，若如來十力乃至十八不共法，若三十二大士相、八十隨好，若無忘失法、恒住捨性，若一切智、道相智、一切相智，若預流果乃至獨覺菩提，若一切菩薩摩訶薩行，若諸佛無上正等菩提，若斷煩惱習氣相續，若一切智智，如是等一切法，皆於聖法毗柰耶中，非合非散，無色無見無對，一相所謂無相，如來為益諸有情類，令生正解，入法實相，依世俗說，不依勝義。善現當知！諸菩薩摩訶薩於如是一切法應學智見，學智見已，如實通達如是諸法應可受用，如是諸法不應受用。」

- (11) 具壽善現即白佛言：「諸菩薩摩訶薩於何等法學智見已，如實通達不應受用？於何等法學智見已，如實通達應可受用？」

- (12) 佛告善現：「諸菩薩摩訶薩於諸聲聞、獨覺地法，學智見已，如實通達不應受用；於一切智智相應諸法，學智見已，如實通達一切種相應可受用。善現！諸菩薩摩訶薩於此聖法毗柰耶中，應如是學甚深般若波羅蜜多。」

- (13) 具壽善現復白佛言：「世尊所說聖法毗柰耶、聖法毗柰耶者，何謂聖法毗柰耶？」

- (14) 佛告善現：「若諸聲聞、若諸獨覺、若諸菩薩、若諸如來，與貪瞋癡非合非散，與五順下分結非合非散，與五順上分結非合非散，與四靜慮、四無量、四無色定非合非散，與四念住乃至八聖道支非合非散，與苦集滅道聖諦非合非散，與三解脫門非

合非散，與八解脫乃至十遍處非合非散，與淨觀地乃至如來地非合非散，與五眼、六神通非合非散，與布施波羅蜜多乃至般若波羅蜜多非合非散，與內空乃至無性自性空非合非散，與真如乃至不思議界非合非散，與極喜地乃至法雲地非合非散，與一切陀羅尼門、三摩地門非合非散，與如來十力乃至十八不共法非合非散，與三十二大士相、八十隨好非合非散，與無忘失法、恆住捨性非合非散，與一切智、道相智、一切相智非合非散，與預流果乃至獨覺菩提非合非散，與一切菩薩摩訶薩行非合非散，與諸佛無上正等菩提非合非散，與永斷一切煩惱習氣相續非合非散，與一切智智非合非散，與有為界非合非散，與無為界非合非散。

善現！彼名為聖者，此是彼聖法毗柰耶，是故名聖法毗柰耶。所以者何？此一切法無色無見無對，一相所謂無相，彼諸聖者，如實現見。善現當知！無色法與無色法非合非散，無見法與無見法非合非散，無對法與無對法非合非散，一相法與一相法非合非散，無相法與無相法非合非散。善現！諸菩薩摩訶薩於此無色、無見、無對、一相、無相甚深般若波羅蜜多，常應修學，學已，不取一切法相。」

◎『R15』所相諸法勝義無故，諸法之相不應道理，此於性相起邪分別。

(15) 『R15』爾時，具壽善現白佛言：「世尊！諸菩薩摩訶薩豈不應於色相乃至識相學？豈不應於眼處相乃至意處相學？豈不應於色處相乃至法處相學？豈不應於眼界相乃至意界相學？豈不應於色界相乃至法界相學？豈不應於眼識界相乃至意識界相學？豈不應於眼觸相乃至意觸相學？豈不應於眼觸為緣所生諸受相乃至意觸為緣所生諸受相學？豈不應於地界相乃至識界相學？豈不應於因緣相乃至增上緣相學？豈不應於無明相乃至老死相學？豈不應於布施波羅蜜多相乃至般若波羅蜜多相學？豈不應於內空相乃至無性自性空相學？豈不應於真如相乃至不思議界相學？豈不應於苦集滅道聖諦相學？豈不應於四靜慮、四無量、四無色定相學？豈不應於四念住相乃至八聖道支相學？豈不應於八解脫相乃至十遍處相學？豈不應於空、無相、無願解脫門相學？豈不應於淨觀地相乃至如來

地相學？豈不應於極喜地相乃至法雲地相學？豈不應於一切陀羅尼門、三摩地門相學？豈不應於五眼、六神通相學？豈不應於如來十力相乃至十八不共法相學？豈不應於三十二大士相、八十隨好相學？豈不應於無忘失法、恆住捨性相學？豈不應於一切智、道相智、一切相智相學？豈不應於預流果相乃至獨覺菩提相學？豈不應於一切菩薩摩訶薩行、諸佛無上正等菩提相學？豈不應於永斷煩惱習氣相續、一切智智相學？豈不應於知苦、斷集、證滅、修道相學？豈不應於順逆緣起觀相學？豈不應於一切聖者、聖法相學？豈不應於有為界、無為界相學？

世尊！若菩薩摩訶薩不於如是諸法相學，亦應不於諸行相學。世尊！若菩薩摩訶薩於諸法相及諸行相既不能學，云何能超一切聲聞及獨覺地？若不能超一切聲聞及獨覺地，云何能入菩薩正性離生？若不能入菩薩正性離生，云何能得一切智智？若不能得一切智智，云何能轉妙法輪？若不能轉妙法輪，云何能以三乘法安立有情，令出無邊生死苦海？」

◎『R16』所修自共相皆於勝義無所得故，修自共相不應道理，此於修習起邪分別。

(16) 『R16』佛告善現：「若一切法有實相者，諸菩薩摩訶薩應於中學。以一切法非有實相，是故菩薩摩訶薩眾不於相學，亦復不於無相法學。所以者何？若佛出世，若不出世，法界常住，諸法一相，所謂無相，如是無相，既非有相，亦非無相，故不可學。」

(17) 爾時，具壽善現白佛言：「世尊！若一切法皆非有相，亦非無相，云何菩薩摩訶薩能修般若波羅蜜多？世尊！若菩薩摩訶薩不能修般若波羅蜜多，應不能超諸聲聞地及獨覺地；若不能超諸聲聞地及獨覺地，應不能入菩薩正性離生；若不能入菩薩正性離生，應不能起菩薩無生法忍；若不能起菩薩無生法忍，應不能發菩薩勝妙神通；若不能發菩薩勝妙神通，應不能嚴淨佛土，成熟有情；若不能嚴淨佛土，成熟有情，應不能證得一切智智；若不能證得一切智智，應不能轉妙法輪；若不能轉妙法輪，則應不能安立有情，令住預流果、或一來果、或不還果、或阿羅漢果、或獨覺菩提、或復無上正等菩提，亦應不能安立

有情，令住施性福業事，或戒性福業事，或修性福業事，當獲人天富樂自在。」

- (18) 佛告善現：「如是！如是！如汝所說。一切法非有相，非無相，若菩薩摩訶薩知一切法若有相、若無相，咸同一相，所謂無相，修此無相是修般若波羅蜜多。」
- (19) 具壽善現復白佛言：「云何菩薩摩訶薩修此無相是修般若波羅蜜多？」
- (20) 佛告善現：「若菩薩摩訶薩修除遣一切法，是修般若波羅蜜多。」
- (21) 具壽善現復白佛言：「云何菩薩摩訶薩修除遣一切法，是修般若波羅蜜多？」
- (22) 佛告善現：「若菩薩摩訶薩修除遣色受想行識，是修般若波羅蜜多；修除遣眼處乃至意處，是修般若波羅蜜多；修除遣色處乃至法處，是修般若波羅蜜多；修除遣眼界乃至眼界，是修般若波羅蜜多；修除遣色界乃至法界，是修般若波羅蜜多；修除遣眼識界乃至意識界，是修般若波羅蜜多；修除遣眼觸乃至意觸，是修般若波羅蜜多；修除遣眼觸為緣所生諸受乃至意觸為緣所生諸受，是修般若波羅蜜多；修除遣地界乃至識界，是修般若波羅蜜多；修除遣因緣乃至增上緣，是修般若波羅蜜多；修除遣無明乃至老死，是修般若波羅蜜多；修除遣不淨觀，是修般若波羅蜜多；修除遣四靜慮、四無量、四無色定，是修般若波羅蜜多；修除遣佛隨念、法隨念、僧隨念、戒隨念、捨隨念、天隨念、寂靜隨念、持入出息隨念，是修般若波羅蜜多；修除遣無常想、苦想、無我想、空想、集想、因想、生想、緣想、滅想、靜想、妙想、離想、道想、如想、行想、出想，是修般若波羅蜜多；修除遣我想、有情想乃至知者想、見者想，是修般若波羅蜜多；修除遣常想、樂想、我想、淨想，是修般若波羅蜜多；修除遣緣起想，是修般若波羅蜜多；修除遣聖諦想，是修般若波羅蜜多；修除遣四念住乃至八聖道支，是修般若波羅蜜多；修除遣三解脫門，是修般若波羅蜜多；修除遣八解脫乃至十遍處，是修般若波羅蜜多；修除遣有尋有伺三摩地、無尋唯伺三摩地、無尋無伺三摩地，是修般若波羅蜜多；修除遣苦集滅道聖諦，是修般若波羅蜜多；修除遣苦智、集智、滅智、道智、法智、類智、世俗智、他心智、盡智、無生智、如說智，是修般若波羅蜜多；修除遣布施波羅蜜多乃至般若波

羅蜜多，是修般若波羅蜜多；修除遣內空乃至無性自性空，是修般若波羅蜜多；修除遣真如乃至不思議界，是修般若波羅蜜多；修除遣淨觀地乃至如來地，是修般若波羅蜜多；修除遣極喜地乃至法雲地，是修般若波羅蜜多；修除遣一切陀羅尼門、三摩地門，是修般若波羅蜜多；修除遣五眼、六神通，是修般若波羅蜜多；修除遣如來十力乃至十八不共法，是修般若波羅蜜多；修除遣三十二大士相、八十隨好，是修般若波羅蜜多；修除遣無忘失法、恆住捨性，是修般若波羅蜜多；修除遣一切智、道相智、一切相智，是修般若波羅蜜多；修除遣預流果乃至獨覺菩提，是修般若波羅蜜多；修除遣一切菩薩摩訶薩行，是修般若波羅蜜多；修除遣諸佛無上正等菩提，是修般若波羅蜜多；修除遣一切智智，是修般若波羅蜜多；修除遣永斷一切煩惱習氣相續，是修般若波羅蜜多。」

(23) 具壽善現復白佛言：「云何菩薩摩訶薩修除遣色受想行識，是修般若波羅蜜多；如是乃至修除遣永斷一切煩惱習氣相續，是修般若波羅蜜多？」

(24) 佛告善現：「諸菩薩摩訶薩行深般若波羅蜜多時，若念有色受想行識，非除遣色受想行識，非修般若波羅蜜多；如是乃至若念有永斷一切煩惱習氣相續，非除遣永斷一切煩惱習氣相續，非修般若波羅蜜多。然諸菩薩摩訶薩行深般若波羅蜜多時，不念有色受想行識，是除遣色受想行識，是修般若波羅蜜多；如是乃至不念有永斷一切煩惱習氣相續，是除遣永斷一切煩惱習氣相續，是修般若波羅蜜多。所以者何？非有想者，能修般若波羅蜜多。是故，善現！若菩薩摩訶薩修除遣色受想行識，是修般若波羅蜜多；如是乃至修除遣永斷一切煩惱習氣相續，是修般若波羅蜜多。」

復次，善現！住有想者，不能修布施波羅蜜多乃至般若波羅蜜多，亦不能修四念住乃至八聖道支，亦不能住內空乃至無性自性空，亦不能住真如乃至不思議界，亦不能住苦集滅道聖諦，亦不能修空、無相、無願解脫門，亦不能修殊勝四靜慮、四無量、四無色定，亦不能修八解脫乃至十遍處，亦不能修極喜地乃至法雲地，亦不能修一切陀羅尼門、三摩地門，亦不能修五眼、六神通，亦不能修如來十力乃至十八不共法，亦不能修無忘失法、恆住捨性，亦不能修一切智、道相智、一切相智，

亦不能修一切菩薩摩訶薩行，亦不能修諸佛無上正等菩提，亦不能修一切智智，亦不能修永斷一切煩惱習氣相續。所以者何？住有想者，必當執有我及我所，由此執故，便著二邊；著二邊故，決定不能解脫生死，無道無涅槃，云何能如實修六波羅蜜多，乃至永斷一切煩惱習氣相續？」

(25) 具壽善現復白佛言：「何等是有？何等是非有？」

(26) 佛告善現：「二是有，不二是非有。」

(27) 善現復問：「云何為二？云何為不二？」

(28) 世尊告曰：「色想乃至識想為二，色想空乃至識想空為不二。眼處想乃至意處想為二，眼處想空乃至意處想空為不二。色處想乃至法處想為二，色處想空乃至法處想空為不二。眼界想乃至眼界想為二，眼界想空乃至眼界想空為不二。色界想乃至法界想為二，色界想空乃至法界想空為不二。眼識界想乃至意識界想為二，眼識界想空乃至意識界想空為不二。眼觸想乃至意觸想為二，眼觸想空乃至意觸想空為不二。眼觸為緣所生諸受想乃至意觸為緣所生諸受想為二，眼觸為緣所生諸受想空乃至意觸為緣所生諸受想空為不二。地界想乃至識界想為二，地界想空乃至識界想空為不二。因緣想乃至增上緣想為二，因緣想空乃至增上緣想空為不二。無明想乃至老死想為二，無明想空乃至老死想空為不二。布施波羅蜜多想乃至般若波羅蜜多想為二，布施波羅蜜多想空乃至般若波羅蜜多想空為不二。內空想乃至無性自性空想為二，內空想空乃至無性自性空想空為不二。真如想乃至不思議界想為二，真如想空乃至不思議界想空為不二。苦集滅道聖諦想為二，苦集滅道聖諦想空為不二。四念住想乃至八聖道支想為二，四念住想空乃至八聖道支想空為不二。四靜慮、四無量、四無色定想為二，四靜慮、四無量、四無色定想空為不二。八解脫想乃至十遍處想為二，八解脫想空乃至十遍處想空為不二。空、無相、無願解脫門想為二，空、無相、無願解脫門想空為不二。淨觀地想乃至如來地想為二，淨觀地想空乃至如來地想空為不二。極喜地想乃至法雲地想為二，極喜地想空乃至法雲地想空為不二。陀羅尼門、三摩地門想為二，陀羅尼門、三摩地門想空為不二。五眼、六神通想為二，五眼、六神通想空為不二。如來十力想乃至十八不共法想為二，如來十力想空乃至十八不共法想空為不二。三十二

大士相、八十隨好想為二，三十二大士相、八十隨好想空為不二。無忘失法、恒住捨性想為二，無忘失法、恒住捨性想空為不二。一切智、道相智、一切相智想為二，一切智、道相智、一切相智想空為不二。預流果想乃至獨覺菩提想為二，預流果想空乃至獨覺菩提想空為不二。一切菩薩摩訶薩行、諸佛無上正等菩提想為二，一切菩薩摩訶薩行、諸佛無上正等菩提想空為不二。有為界、無為界想為二，有為界、無為界想空為不二。善現！乃至一切想皆為二，乃至一切二皆是有，乃至一切有皆有生死，有生死者，不能解脫生老病死愁歎苦憂惱。善現！諸想空者，皆為不二；諸不二者，皆是非有；諸非有者，皆無生死；無生死者，便能解脫生老病死愁歎苦憂惱。善現！由是因緣，當知一切有二想者，定無布施、淨戒、安忍、精進、靜慮、般若波羅蜜多，無得無現觀。下至順忍，彼尚非有，況能遍知色受想行識，如是乃至況能遍知一切智智，彼尚不能修四念住乃至八聖道支，況能得預流果乃至獨覺菩提，況復能得一切智智，及能永斷一切煩惱習氣相續。」

【第六事】漸次加行

『S1』 - 『S6』 布施至般若，『S7』 - 『S12』 隨念於佛等，『S13』 法無性自性，許為漸次行。

- ◎ 『S1』 - 『S6』 從布施乃至般若者，謂布施等六度之六漸次加行。
- ◎ 『S7』 - 『S12』 隨念佛等者，謂六念之六種漸次加行。
- ◎ 『S13』 通達一切法於勝義中為無性自性之漸次加行。
- 許此十三種為漸次加行，以是布施等十三法所攝持之三智一切行相，次第決定而修之菩薩瑜伽故。
- 此十三法通彼諸位及三智行相之加行，以無性自性為所緣相，六念為意樂圓滿，六度為加行圓滿故。無性與六度通一切位易了。
- 六念者，在加行道時名念住等，在見道位名菩提分，在修道位名正道支。
- 由此十三法攝持漸修三智一百七十三種行相，即漸次加行之義。

漸次品第七十三

(29) 爾時，具壽善現白佛言：「世尊！住有想者，若無順忍，亦無修道、得果、現觀，住無想者，豈有順忍？若淨觀地如是乃至

若如來地，若修聖道，因修聖道，斷諸煩惱，由此煩惱所覆障故，尚不能證聲聞、獨覺相應之地，況入菩薩正性離生。若不能入菩薩正性離生，豈能證得一切智智？若不能證得一切智智，何能永斷一切煩惱習氣相續？世尊！若一切法都無所有，無生無滅，無染無淨，如是諸法既都不生，豈能證得一切智智？」

- (30) 佛告善現：「如是！如是！如汝所說。住無想者，亦無順忍，乃至亦無永斷煩惱習氣相續。若一切法都無所有，無生無滅，無染無淨，如是諸法既都不生，豈能證得一切智智？」
- (31) 具壽善現復白佛言：「諸菩薩摩訶薩行深般若波羅蜜多時，為有有想，有無想不？為有色想，受想行識想不？如是乃至為有一切智智想不？為有永斷一切煩惱習氣相續想不？為有色想，有色斷想不？為有受想行識想，有受想行識斷想不？為有眼處乃至意處想，有眼處乃至意處斷想不？為有色處乃至法處想，有色處乃至法處斷想不？為有眼界乃至境界想，有眼界乃至境界斷想不？為有色界乃至法界想，有色界乃至法界斷想不？為有眼識界乃至意識界想，有眼識界乃至意識界斷想不？為有眼觸乃至意觸想，有眼觸乃至意觸斷想不？為有眼觸為緣所生諸受乃至意觸為緣所生諸受想，有眼觸為緣所生諸受乃至意觸為緣所生諸受斷想不？為有地界乃至識界想，有地界乃至識界斷想不？為有因緣乃至增上緣想，有因緣乃至增上緣斷想不？為有貪瞋癡想，有貪瞋癡斷想不？為有無明乃至老死愁歎苦憂惱想，有無明乃至老死愁歎苦憂惱斷想不？為有苦聖諦想，有苦聖諦斷想不？為有苦集聖諦想，有苦集聖諦斷想不？為有苦滅聖諦想，有苦滅聖諦斷想不？為有證苦滅道聖諦想，有證苦滅道聖諦斷想不？如是乃至為有一切智智想，有證一切智智想不？為有所斷一切煩惱習氣相續想，有永斷一切煩惱習氣相續想不？」
- (32) 佛告善現：「諸菩薩摩訶薩行深般若波羅蜜多時，於一切法皆無有想，亦無無想。若無有想，亦無無想，當知即是菩薩順忍，亦是修道，亦是得果，亦是現觀。
復次，善現！諸菩薩摩訶薩以無性為聖道，以無性為現觀，達一切法皆以無性而為自性。由是因緣，當知一切法皆以無性為其自性。」

- (33) 具壽善現即白佛言：「若一切法皆以無性為自性者，云何如來應正等覺於一切法無性為性，現等覺已，說名為佛，於一切法及諸境界得自在轉？」
- (34) 佛告善現：「如是！如是！一切法皆以無性為自性。我本修學菩薩道時，無倒修行布施、淨戒、安忍、精進、靜慮、般若波羅蜜多，由此離欲惡不善法，有尋有伺，離生喜樂，入初靜慮具足住，如是乃至斷樂斷苦，先喜憂沒，不苦不樂，捨念清淨，入第四靜慮具足住。我於爾時，於諸靜慮及靜慮支雖善取相，而無所執，於諸靜慮及靜慮支不生味著，於諸靜慮及靜慮支都無所得。我於爾時，於四靜慮行相清淨無所分別。我於爾時，於諸靜慮及靜慮支雖善純熟，而不受彼所得果報，但依靜慮，令心引發神境、天耳、他心、宿住、天眼智通，於此五通雖善取相，而無所執，亦不愛味，於諸通境都無所得，亦不分別，如空而住。我於爾時，觀一切法平等平等，無性為性，以一剎那相應般若，證得無上正等菩提，謂如實知是苦聖諦，是集聖諦，是滅聖諦，是道聖諦，皆同一相，所謂無相，如是無相，亦無所有。由此成就如來十力、四無所畏、四無礙解、大慈大悲大喜大捨并十八佛不共法等無量無數不可思議微妙功德，以佛妙智安立有情三聚差別，謂正性定聚、邪性定聚及不定聚，安立如是三聚別已，隨其所應，方便化導，令獲殊勝利益安樂。」
- (35) 具壽善現復白佛言：「云何如來應正等覺於一切法無性性中，起四靜慮，發五神通，證大菩提，具諸功德，安立利樂三聚有情？」
- (36) 佛告善現：「若諸欲惡不善法等，有少自性，或復他性為自性者，我本修行菩薩道時，不應通達一切欲惡不善法等，皆以無性為自性已，離欲惡等，入初靜慮乃至能入第四靜慮，具足安住，以諸欲惡不善法等，都無自性，亦無他性，但以無性為自性故。我本修行菩薩道時，通達欲惡不善法等，皆以無性為自性已，離欲惡等，入初靜慮乃至能入第四靜慮。
- 復次，善現！若五神通有少自性，或復他性為自性者，我本修行菩薩道時，不應通達一切神通皆以無性為自性已，發起種種自在神通，於諸境界，妙用無礙，以諸神通都無自性，亦無他性，但以無性為自性故。我本修行菩薩道時，通達神通皆以無性為自性已，發起種種自在神通，於諸境界，妙用無礙。

復次，善現！若佛無上正等菩提有少自性，或復他性為自性者，我本修行菩薩道時，不應通達諸佛無上正等菩提及諸功德皆以無性為自性已，證得無上正等菩提，具諸功德，以佛無上正等菩提及諸功德都無自性，亦無他性，但以無性為自性故。我本修行菩薩道時，通達無上正等菩提皆以無性為自性已，證得無上正等菩提，具諸功德。

復次，善現！若諸有情有少自性，或復他性為自性者，我成佛已，不應通達一切有情皆以無性為自性已，安立有情三聚差別，隨其所應，方便化導，令獲殊勝利益安樂，以諸有情都無自性，亦無他性，但以無性為自性故。我成佛已，通達有情皆以無性為自性已，安立有情三聚差別，隨其所應，方便化導，令獲殊勝利益安樂。」

大般若波羅蜜多經卷第四百六十六

(01) 爾時，具壽善現白佛言：「世尊！若菩薩摩訶薩於一切法無性性中，起四靜慮，發五神通，證得無上正等菩提，具諸功德，安立有情三聚差別，令其獲得利樂事者，云何初發心菩薩摩訶薩於一切法無性性中，作漸次業，修漸次學，行漸次行，證得無上正等菩提，作諸有情勝利樂事？」

(02) 佛告善現：「諸菩薩摩訶薩初發心位，或從佛聞，或復從於多供養佛、菩薩、獨覺及阿羅漢、不還、一來、預流果等賢聖所聞，謂證諸法無性為性究竟圓滿，方名為佛，漸證諸法無性為性，名為菩薩，乃至預流深信諸法無性為性，名賢善士，故一切法及諸有情無不皆以無性為性，法及有情乃至無有如毛端量自性可得。是菩薩摩訶薩聞此事已，作是念言：『若一切法及諸有情皆以無性而為自性，證得此故，說名為佛，乃至預流深信此故，名賢善士。我於無上正等菩提，若當證得，若不證得，諸法有情常以無性而為自性故，我定應發趣無上正等菩提，得菩提已，若諸有情行有想者，方便安立，令住無想。』

是菩薩摩訶薩作此念已，求趣無上正等菩提，普為有情得涅槃故，作漸次業，修漸次學，行漸次行。如過去世諸菩薩摩訶薩求趣無上正等菩提，先學漸次業、學、行故，證得無上正等菩提，是菩薩摩訶薩亦復如是，先應修學布施波羅蜜多，次應修

學淨戒波羅蜜多，次應修學安忍波羅蜜多，次應修學精進波羅蜜多，次應修學靜慮波羅蜜多，後應修學般若波羅蜜多。

【第 50 義】：布施漸次加行 (VI-1)

『S1』善現當知！是菩薩摩訶薩從初發心修學布施波羅蜜多時，應自行布施，亦勸他行布施，無倒稱揚布施功德，歡喜讚歎行布施者。由此因緣，得大財位，常行布施，離慳吝心，隨諸有情所須飲食、衣服、臥具、瓔珞、香花、財寶、燈明、車乘、舍宅及餘資具，悉皆施與。是菩薩摩訶薩由布施故，受持戒蘊，生天人中，得大尊貴；由施、戒故，復得定蘊；由施、戒、定故，復得慧蘊；由施、戒、定、慧故，復得解脫蘊；由施、戒、定、慧、解脫故，復得解脫智見蘊；由施乃至解脫智見蘊圓滿故，超諸聲聞及獨覺地，證入菩薩正性離生；既入菩薩正性離生，成熟有情，嚴淨佛土；作此事已，證得無上正等菩提，轉妙法輪，以三乘法安立度脫諸有情類，令出生死，證得涅槃。善現！是菩薩摩訶薩由布施故，雖能如是作漸次業，修漸次學，行漸次行，而於一切都無所得。所以者何？以一切法無自性故。

【第 51 義】：淨戒漸次加行 (VI-2)

『S2』復次，善現！是菩薩摩訶薩從初發心修學淨戒波羅蜜多時，應自行淨戒，亦勸他行淨戒，無倒稱揚淨戒功德，歡喜讚歎行淨戒者。由此因緣，戒蘊清淨，生天人中，得大尊貴，施貧窮者所須財物；既行施已，安住戒蘊、定蘊、慧蘊、解脫蘊、解脫智見蘊；由戒、定、慧、解脫、解脫智見蘊清淨故，超諸聲聞及獨覺地，證入菩薩正性離生；既入菩薩正性離生，成熟有情，嚴淨佛土；作此事已，證得無上正等菩提，轉妙法輪，以三乘法安立度脫諸有情類，令出生死，證得涅槃。善現！是菩薩摩訶薩由淨戒故，雖能如是作漸次業，修漸次學，行漸次行，而於一切都無所得。所以者何？以一切法無自性故。

【第 52 義】：安忍漸次加行 (VI-3)

『S3』復次，善現！是菩薩摩訶薩從初發心修學安忍波羅蜜多時，應自行安忍，亦勸他行安忍，無倒稱揚安忍功德，歡喜讚

歎行安忍者。是菩薩摩訶薩行安忍時，能以資具施諸有情，皆令充足；既行施已，安住戒蘊、定蘊、慧蘊、解脫蘊、解脫智見蘊；由戒、定、慧、解脫、解脫智見蘊清淨故，超諸聲聞及獨覺地，證入菩薩正性離生；既入菩薩正性離生，成熟有情，嚴淨佛土；作此事已，證得無上正等菩提，轉妙法輪，以三乘法安立度脫諸有情類，令出生死，證得涅槃。善現！是菩薩摩訶薩由安忍故，雖能如是作漸次業，修漸次學，行漸次行，而於一切都無所得。所以者何？以一切法無自性故。

【第 53 義】：精進漸次加行 (VI-4)

『S4』復次，善現！是菩薩摩訶薩從初發心修學精進波羅蜜多時，應自於諸善法發勤精進，亦勸他於諸善法發勤精進，無倒稱揚精進功德，歡喜讚歎行精進者。是菩薩摩訶薩行精進時，能以資具施諸有情，皆令充足；既行施已，安住戒蘊、定蘊、慧蘊、解脫蘊、解脫智見蘊；由戒、定、慧、解脫、解脫智見蘊清淨故，超諸聲聞及獨覺地，證入菩薩正性離生；既入菩薩正性離生，成熟有情，嚴淨佛土；作此事已，證得無上正等菩提，轉妙法輪，以三乘法安立度脫諸有情類，令出生死，證得涅槃。善現！是菩薩摩訶薩由精進故，雖能如是作漸次業，修漸次學，行漸次行，而於一切都無所得。所以者何？以一切法無自性故。

【第 54 義】：靜慮漸次加行 (VI-5)

『S5』復次，善現！是菩薩摩訶薩從初發心修學靜慮波羅蜜多時，應自入四靜慮、四無量、四無色定，亦勸他入四靜慮、四無量、四無色定，無倒稱揚四靜慮、四無量、四無色定功德，歡喜讚歎入四靜慮、四無量、四無色定者。是菩薩摩訶薩行靜慮時，能以資具施諸有情，皆令充足；既行施已，安住戒蘊、定蘊、慧蘊、解脫蘊、解脫智見蘊；由戒、定、慧、解脫、解脫智見蘊清淨故，超諸聲聞及獨覺地，證入菩薩正性離生；既入菩薩正性離生，成熟有情，嚴淨佛土；作此事已，證得無上正等菩提，轉妙法輪，以三乘法安立度脫諸有情類，令出生死，證得涅槃。善現！是菩薩摩訶薩由靜慮故，雖能如是作漸次

業，修漸次學，行漸次行，而於一切都無所得。所以者何？以一切法無自性故。

【第 55 義】：般若漸次加行 (VI-6)

『S6』復次，善現！是菩薩摩訶薩從初發心修學般若波羅蜜多時，以無所得而為方便，應自行六波羅蜜多，亦勸他行六波羅蜜多，無倒稱揚六波羅蜜多功德，歡喜讚歎行六波羅蜜多者。是菩薩摩訶薩由於六波羅蜜多方便善巧，超諸聲聞及獨覺地，證入菩薩正性離生；既入菩薩正性離生，成熟有情，嚴淨佛土；作此事已，證得無上正等菩提，轉妙法輪，以三乘法安立度脫諸有情類，令出生死，證得涅槃。善現！是菩薩摩訶薩由般若故，雖能如是作漸次業，修漸次學，行漸次行，而於一切都無所得。所以者何？以一切法無自性故。善現！是為初發心菩薩摩訶薩依學六種波羅蜜多作漸次業，修漸次學，行漸次行，與諸有情作利樂事。

復次，善現！諸菩薩摩訶薩作漸次業，修漸次學，行漸次行時，從初發心以一切智智相應作意，信解一切法皆以無性而為自性，先應修學佛隨念，次應修學法隨念，次應修學僧隨念，次應修學戒隨念，次應修學捨隨念，後應修學天隨念。

【第 56 義】：念佛漸次加行 (VI-7)

『S7』善現！云何菩薩摩訶薩修學佛隨念？謂菩薩摩訶薩修學佛隨念時，不應以色思惟如來應正等覺，不應以受想行識思惟如來應正等覺。何以故？色乃至識皆無自性。若法無自性，則不可念，不可思惟。所以者何？若無念無思惟，是為佛隨念。復次，善現！諸菩薩摩訶薩修學佛隨念時，不應以三十二大士相思惟如來應正等覺，不應以真金色身、常光一尋、八十隨好思惟如來應正等覺。何以故？如是相好、金光色身都無自性。若法無自性，則不可念，不可思惟。所以者何？若無念無思惟，是為佛隨念。

復次，善現！諸菩薩摩訶薩修學佛隨念時，不應以戒蘊思惟如來應正等覺，不應以定蘊、慧蘊、解脫蘊、解脫智見蘊思惟如來應正等覺。何以故？如是諸蘊，皆無自性。若法無自性，則不可念，不可思惟。所以者何？若無念無思惟，是為佛隨念。

復次，善現！諸菩薩摩訶薩修學佛隨念時，不應以五眼、六神通思惟如來應正等覺，不應以佛十力乃至十八不共法思惟如來應正等覺。何以故？如是諸法，皆無自性。若法無自性，則不可念，不可思惟。所以者何？若無念無思惟，是為佛隨念。復次，善現！諸菩薩摩訶薩修學佛隨念時，不應以無忘失法、恒住捨性思惟如來應正等覺，不應以一切智、道相智、一切相智及餘無量無邊佛法思惟如來應正等覺。何以故？如是諸法，皆無自性。若法無自性，則不可念，不可思惟。所以者何？若無念無思惟，是為佛隨念。

復次，善現！諸菩薩摩訶薩修學佛隨念時，不應以緣性法思惟如來應正等覺，不應以緣起法思惟如來應正等覺。何以故？緣性緣起，俱無自性。若法無自性，則不可念，不可思惟。所以者何？若無念無思惟，是為佛隨念。善現！諸菩薩摩訶薩行深般若波羅蜜多時，應如是修學佛隨念；若如是修學佛隨念，是為作漸次業，修漸次學，行漸次行。若菩薩摩訶薩能如是作漸次業，修漸次學，行漸次行時，則能圓滿四念住乃至八聖道支，亦能圓滿四靜慮、四無量、四無色定，亦能圓滿八解脫乃至十遍處，亦能圓滿布施波羅蜜多乃至般若波羅蜜多，亦能圓滿內空乃至無性自性空，亦能圓滿真如乃至不思議界，亦能圓滿苦集滅道聖諦，亦能圓滿空、無相、無願解脫門，亦能圓滿諸菩薩地，亦能圓滿一切陀羅尼門、三摩地門，亦能圓滿五眼、六神通，亦能圓滿如來十力乃至十八不共法，亦能圓滿無忘失法、恒住捨性，亦能圓滿一切智、道相智、一切相智，由此證得一切智智。善現！是菩薩摩訶薩以一切法無性為性方便力故，覺一切法皆無自性，其中無有想，亦復無無想。善現！諸菩薩摩訶薩應如是修學佛隨念，謂一切法無性性中，佛尚不可得，況有佛隨念。

【第 57 義】：念法漸次加行 (VI-8)

『S8』善現！云何菩薩摩訶薩修學法隨念？謂菩薩摩訶薩修學法隨念時，不應思惟善法非善法，不應思惟有記法無記法，不應思惟世間法出世間法，不應思惟有愛味法無愛味法，不應思惟有諍法無諍法，不應思惟聖法非聖法，不應思惟有漏法無漏法，不應思惟墮三界法不墮三界法，不應思惟有為界法無為界

法。何以故？如是諸法，皆無自性。若法無自性，則不可念，不可思惟。所以者何？若無念無思惟，是為法隨念。善現！諸菩薩摩訶薩行深般若波羅蜜多時，應如是修學法隨念；若如是修學法隨念，是為作漸次業，修漸次學，行漸次行。若菩薩摩訶薩能如是作漸次業，修漸次學，行漸次行時，則能圓滿四念住，廣說乃至一切相智，由此證得一切智智。善現！是菩薩摩訶薩以一切法無性為性方便力故，覺一切法皆無自性，其中無有想，亦復無無想。善現！諸菩薩摩訶薩應如是修學法隨念，謂一切法無性性中，法尚不可得，況有法隨念。

【第 58 義】：念僧漸次加行 (VI-9)

『S9』善現！云何菩薩摩訶薩修學僧隨念？謂菩薩摩訶薩修學僧隨念時，應作是念：『佛弟子眾，具淨戒蘊、定蘊、慧蘊、解脫蘊、解脫智見蘊，四雙八隻補特伽羅，一切皆是無為所顯，皆以無性而為自性，由此因緣，不應思惟。』何以故？如是善士，皆無自性。若法無自性，則不可念，不可思惟。所以者何？若無念無思惟，是為僧隨念。善現！諸菩薩摩訶薩行深般若波羅蜜多時，應如是修學僧隨念；若如是修學僧隨念，是為作漸次業，修漸次學，行漸次行。若菩薩摩訶薩能如是作漸次業，修漸次學，行漸次行時，則能圓滿四念住，廣說乃至一切相智，由此證得一切智智。善現！是菩薩摩訶薩以一切法無性為性方便力故，覺一切法皆無自性，其中無有想，亦復無無想。善現！諸菩薩摩訶薩應如是修學僧隨念，謂一切法無性性中，僧尚不可得，況有僧隨念。

【第 59 義】：念戒漸次加行 (VI-10)

『S10』善現！云何菩薩摩訶薩修學戒隨念？謂菩薩摩訶薩修學戒隨念時，從初發心應念聖戒無缺無隙，無瑕無穢，無所取著，應受供養，智者所讚，妙善受持，妙善究竟，隨順勝定，思惟此戒無性為性，由是因緣，不應思惟。何以故？如是聖戒，都無自性。若法無自性，則不可念，不可思惟。所以者何？若無念無思惟，是為戒隨念。善現！諸菩薩摩訶薩行深般若波羅蜜多時，應如是修學戒隨念；若如是修學戒隨念，是為作漸次業，修漸次學，行漸次行。若菩薩摩訶薩能如是作漸次業，修

漸次學，行漸次行時，則能圓滿四念住，廣說乃至一切相智，由此證得一切智智。善現！是菩薩摩訶薩以一切法無性為性方便力故，覺一切法皆無自性，其中無有想，亦復無無想。善現！諸菩薩摩訶薩應如是修學戒隨念，謂一切法無性性中，戒尚不可得，況有戒隨念。

【第 60 義】：念捨漸次加行 (VI-11)

『S11』善現！云何菩薩摩訶薩修學捨隨念？謂菩薩摩訶薩修學捨隨念時，從初發心常應念捨，若念自捨，若念他捨，若念捨財，若念捨法，於捨施位，終不起心：『我能捨施，或不捨施。』若捨所有身分肢節，亦不起心：『我能捨施，或不捨施。』亦不思惟所捨、所與施福、施果。何以故？如是諸法，皆無自性。若法無自性，則不可念，不可思惟。所以者何？若無念無思惟，是為捨隨念。善現！諸菩薩摩訶薩行深般若波羅蜜多時，應如是修學捨隨念；若如是修學捨隨念，是為作漸次業，修漸次學，行漸次行。若菩薩摩訶薩能如是作漸次業，修漸次學，行漸次行時，則能圓滿四念住，廣說乃至一切相智，由此能證一切智智。善現！是菩薩摩訶薩以一切法無性為性方便力故，覺一切法皆無自性，其中無有想，亦復無無想。善現！諸菩薩摩訶薩應如是修學捨隨念，謂一切法無性性中，捨尚不可得，況有捨隨念。

【第 61 義】：念天漸次加行 (VI-12)

『S12』善現！云何菩薩摩訶薩修學天隨念？謂菩薩摩訶薩修學天隨念時，從初發心應作是念：『四大王眾天乃至他化自在天，由有淨信、戒、聞、捨、慧，從此命終，生彼天處。我今亦有如是淨信、戒、聞、捨、慧，與彼諸天功德相似。』又作是念：『諸預流等，生六欲天，諸不還等，生上二界。』如是一切，皆不可得，不應思惟。何以故？如是諸天，皆無自性。若法無自性，則不可念，不可思惟。所以者何？若無念無思惟，是為天隨念。善現！諸菩薩摩訶薩行深般若波羅蜜多時，應如是修學天隨念；若如是修學天隨念，是為作漸次業，修漸次學，行漸次行。若菩薩摩訶薩能如是作漸次業，修漸次學，行漸次行時，則能圓滿四念住，廣說乃至一切相智，由此證得一切智

智。善現！是菩薩摩訶薩以一切法無性為性方便力故，覺一切法皆無自性，其中無有想，亦復無無想。善現！諸菩薩摩訶薩應如是修學天隨念，謂一切法無性性中，天尚不可得，況有天隨念。

復次，善現！諸菩薩摩訶薩行深般若波羅蜜多時，若欲圓滿作漸次業，修漸次學，行漸次行，以一切法無性為性方便力故，應學內空乃至無性自性空，應學真如乃至不思議界，應學苦集滅道聖諦，應學四念住乃至八聖道支，應學四靜慮、四無量、四無色定，應學八解脫乃至十遍處，應學空、無相、無願解脫門，應學布施波羅蜜多乃至般若波羅蜜多，應學菩薩摩訶薩地，應學一切陀羅尼門、三摩地門，應學五眼、六神通，應學如來十力乃至十八不共法，應學無忘失法、恆住捨性，應學一切智、道相智、一切相智。

【第 62 義】：無性自性漸次加行 (VI-13)

『S13』善現！是菩薩摩訶薩如是修學菩提道時，覺一切法皆以無性而為自性，於中尚無少念可得，況有念色受想行識，況有念眼處乃至意處，況有念色處乃至法處，況有念眼界乃至意識界，況有念色界乃至法界，況有念眼識界乃至意識界，況有念眼觸乃至意觸，況有念眼觸為緣所生諸受乃至意觸為緣所生諸受，況有念地界乃至識界，況有念因緣乃至增上緣，況有念無明乃至老死，況有念布施波羅蜜多乃至般若波羅蜜多，況有念內空乃至無性自性空，況有念真如乃至不思議界，況有念苦集滅道聖諦，況有念四念住乃至八聖道支，況有念四靜慮、四無量、四無色定，況有念八解脫乃至十遍處，況有念空、無相、無願解脫門，況有念淨觀地乃至如來地，況有念極喜地乃至法雲地，況有念一切陀羅尼門、三摩地門，況有念五眼、六神通，況有念如來十力乃至十八不共法，況有念三十二大士相、八十隨好，況有念無忘失法、恆住捨性，況有念一切智、道相智、一切相智，況有念預流果乃至獨覺菩提，況有念一切菩薩摩訶薩行，況有念諸佛無上正等菩提，況有念一切智智。善現！如是諸念及所念法，若少實有，無有是處。如是，善現！諸菩薩摩訶薩行深般若波羅蜜多時，雖作漸次業，修漸次學，行漸次行，而於其中，心皆不轉，以一切法無自性故。」

- (03) 具壽善現白言：「世尊！若一切法皆無自性，則應無色受想行識，乃至應無一切智智，是則應無佛法僧寶、道果染淨，亦無得無現觀，則一切法皆應是無。」
- (04) 佛告善現：「於意云何？於一切法無性性中，有性無性為可得不？」
- (05) 善現對曰：「不也，世尊！」
- (06) 佛告善現：「若一切法無性性中，有性無性俱不可得，汝今云何可作是說：若一切法皆無自性，則應無色受想行識，乃至應無得及現觀，則一切法皆應是無？」
- (07) 善現白言：「我於是義，自無疑惑，但為未來有苾芻等，或求聲聞，或求獨覺，或求佛果，彼作是念：『若一切法皆無自性，誰染誰淨？誰縛誰解？』彼於染淨縛解義中不了知故，毀戒、毀見、毀威儀、毀淨命，由此當墮三惡趣中，受諸劇苦，難得解脫。我觀未來當有如是可怖畏事，故作是說，然我於此，實無疑惑。」
- (08) 佛告善現：「善哉！善哉！汝今乃能為未來世諸苾芻等作如是問，然一切法無性性中，若有若無，俱不可得。」

無相品第七十四

- (09) 爾時，具壽善現白佛言：「世尊！若一切法皆以無性而為自性，諸菩薩摩訶薩見何等義，為欲利益安樂有情，求趣無上正等菩提？」
- (10) 佛告善現：「以一切法皆以無性而為自性，諸菩薩摩訶薩為欲利益安樂有情。所以者何？諸有情類具斷常見，住有所得，難可調伏，愚癡顛倒，難可解脫。善現當知！住有所得者，由有所得想，無得無現觀，亦無無上正等菩提。」
- (11) 具壽善現復白佛言：「若有所得者，無得無現觀，亦無無上正等菩提；無所得者，為有得有現觀，有無上正等菩提不？」
- (12) 佛告善現：「若無所得即是得，即是現觀，即是無上正等菩提。所以者何？以彼不壞法界相故。善現當知！若有於此無所得中，欲有所得，欲得現觀，欲得無上正等菩提，當知彼為欲壞法界。」
- (13) 具壽善現復白佛言：「若有所得者，無得無現觀，亦無無上正等菩提；若無所得即是得，即是現觀，即是無上正等菩提。無所得中，無得無現觀，亦無無上正等菩提，諸菩薩摩訶薩云何

得有初地乃至十地？云何得有無生法忍？云何得有異熟神通？云何得有異熟布施波羅蜜多乃至般若波羅蜜多？云何得有安住如是異熟生法，成熟有情，嚴淨佛土，於諸佛所恭敬供養上妙供具所獲善根，乃至無上正等菩提與果無盡，展轉乃至般涅槃後，自設利羅及諸弟子猶得種種恭敬供養，善根勢力爾乃窮盡？」

- (14) 佛告善現：「以一切法無所得故，諸菩薩摩訶薩得有初地乃至十地。即由此故，得有無生法忍；即由此故，得有異熟神通；即由此故，得有異熟布施波羅蜜多乃至般若波羅蜜多；即由此故，得有安住異熟生法，成熟有情，嚴淨佛土，於諸佛所恭敬供養上妙供具所獲善根，乃至無上正等菩提與果無盡，展轉乃至般涅槃後，自設利羅及諸弟子猶得種種恭敬供養，善根勢力爾乃窮盡。」
- (15) 具壽善現復白佛言：「若一切法皆無所得，布施、淨戒、安忍、精進、靜慮、般若波羅蜜多及諸神通有何差別？」
- (16) 佛告善現：「無所得者，布施等六波羅蜜多及諸神通皆無差別。為欲令彼有所得者離諸染著，方便宣說布施等六波羅蜜多及諸神通有差別相。」
- (17) 具壽善現復白佛言：「以何因緣，無所得者，布施等六波羅蜜多及諸神通說無差別？」
- (18) 佛告善現：「諸菩薩摩訶薩行深般若波羅蜜多時，不得布施，不得施者，不得受者，不得所施，不得施果而行布施，不得淨戒而護淨戒，不得安忍而修安忍，不得精進而勤精進，不得靜慮而入靜慮，不得般若而起般若，不得神通而發神通，不得四念住乃至八聖道支而修四念住乃至八聖道支，不得三解脫門而修三解脫門，不得四靜慮、四無量、四無色定而修四靜慮、四無量、四無色定，不得八解脫乃至十遍處而修八解脫乃至十遍處，不得菩薩地而修菩薩地，不得陀羅尼門、三摩地門而修陀羅尼門、三摩地門，不得五眼、六神通而修五眼、六神通，不得如來十力乃至十八不共法而修如來十力乃至十八不共法，不得無忘失法、恒住捨性而修無忘失法、恒住捨性，不得一切智、道相智、一切相智而修一切智、道相智、一切相智，不得有情而成熟有情，不得佛土而嚴淨佛土，不得一切佛法而證無上正等菩提。如是，善現！諸菩薩摩訶薩應行無所得甚深

般若波羅蜜多。若菩薩摩訶薩能行無所得甚深般若波羅蜜多，一切惡魔及魔眷屬皆不能壞。」

【第七事】剎那加行

【第 63 義】：非異熟剎那加行（VII-1）

『T1』施等一一中，攝諸無漏法，當知即能仁，一剎那智德。
猶如諸士夫，動一處水輪，一切頓轉動，剎那智亦爾。

- ◎『T1』最後無間道菩薩能仁身中之一剎那智，當知即是非異熟剎那加行，以是現證一非異熟無漏法時，即能現證一切無漏法有學位之究竟智故。如是現證一無漏智，亦能現證餘智，以布施等一一法皆攝一切無漏道法故。譬如士夫搖水車輪，但動一處餘一切處皆頓動故。
- (01) 『T1』爾時，具壽善現白佛言：「世尊！云何菩薩摩訶薩行深般若波羅蜜多時，一心現起則能攝受六波羅蜜多，亦能攝受四靜慮、四無量、四無色定，亦能攝受三十七菩提分法，亦能攝受三解脫門，亦能攝受八解脫乃至十遍處，亦能攝受一切陀羅尼門、三摩地門，亦能攝受五眼、六神通，亦能攝受如來十力乃至十八不共法，亦能攝受無忘失法、恒住捨性，亦能攝受一切智、道相智、一切相智，亦能攝受三十二大士相、八十隨好？」
- (02) 佛告善現：「若菩薩摩訶薩行深般若波羅蜜多時，所修布施乃至般若波羅蜜多，皆為般若波羅蜜多之所攝受，方得圓滿。如是乃至所引三十二大士相、八十隨好，皆為般若波羅蜜多之所攝受，方得圓滿。如是，善現！諸菩薩摩訶薩行深般若波羅蜜多時，一心現起則能攝受六波羅蜜多，如是乃至亦能攝受三十二大士相、八十隨好。」
- (03) 具壽善現白言：「世尊！云何菩薩摩訶薩行深般若波羅蜜多時，諸有所作，皆為般若波羅蜜多之所攝受故，一心起則能攝受六波羅蜜多，乃至三十二大士相、八十隨好？」
- (04) 佛告善現：「諸菩薩摩訶薩行深般若波羅蜜多時，所修布施乃至般若波羅蜜多，皆為般若波羅蜜多所攝受故，遠離二想；如

是乃至所引三十二大士相、八十隨好，亦為般若波羅蜜多所攝受故，遠離二想。」

(05) 具壽善現復白佛言：「云何菩薩摩訶薩行深般若波羅蜜多時，雖行布施乃至般若波羅蜜多而無二想，如是乃至雖引三十二大士相、八十隨好而無二想？」

(06) 佛告善現：「諸菩薩摩訶薩行深般若波羅蜜多時，為欲圓滿布施波羅蜜多故，即於布施波羅蜜多中，攝受一切波羅蜜多乃至三十二大士相、八十隨好而行布施，由此因緣，而無二想。如是乃至為欲圓滿八十隨好故，即於八十隨好中，攝受一切波羅蜜多乃至三十二大士相、八十隨好而引八十隨好，由此因緣，而無二想。」

復次，善現！諸菩薩摩訶薩行深般若波羅蜜多故，若行布施波羅蜜多時，住無漏心而行布施波羅蜜多；若行淨戒乃至般若波羅蜜多時，住無漏心而行淨戒乃至般若波羅蜜多。是故雖行布施乃至般若波羅蜜多而無二想。如是乃至若引三十二大士相時，住無漏心而引三十二大士相；若引八十隨好時，住無漏心而引八十隨好。是故雖引三十二大士相、八十隨好而無二想。」

(07) 具壽善現復白佛言：「云何菩薩摩訶薩行深般若波羅蜜多故，若行布施波羅蜜多時，住無漏心而行布施波羅蜜多；如是乃至若引八十隨好時，住無漏心而引八十隨好？」

(08) 佛告善現：「若菩薩摩訶薩行深般若波羅蜜多時，以離相心不見諸相而行布施波羅蜜多，所謂不見誰能行施、所施何物、誰受此施、云何行施。住是離相無漏心中，離愛離慳而行布施波羅蜜多，爾時不見所行布施，亦復不見此無漏心，乃至不見一切佛法，如是菩薩摩訶薩住無漏心而行布施波羅蜜多。如是乃至若菩薩摩訶薩行深般若波羅蜜多時，以離相心不見諸相而引八十隨好，所謂不見誰是能引八十隨好，於誰而引八十隨好，為何而引八十隨好，云何而引八十隨好。住是離相無漏心中，無染無著而引八十隨好，爾時不見所引八十隨好，亦復不見此無漏心，乃至不見一切佛法，如是菩薩摩訶薩住無漏心而引八十隨好。」

(09) 具壽善現復白佛言：「若菩薩摩訶薩行深般若波羅蜜多時，於一切法無相無作，云何能圓滿布施波羅蜜多乃至般若波羅蜜多？如是乃至云何能圓滿三十二大士相、八十隨好？」

(10) 佛告善現：「諸菩薩摩訶薩行深般若波羅蜜多時，能以離相無漏之心而行布施，隨諸有情所須資具，悉皆施與。若有須內頭目、髓腦、皮肉、肢節、筋骨、身命，亦皆施與；若有須外國城、妻子、所愛親屬、種種嚴具，亦皆施與。如是施時，設有人來現前呵毀：『咄哉大士！何用行此無益施為？如是施者，今世後世多諸苦惱。』是菩薩摩訶薩行深般若波羅蜜多故，雖聞其言，而不退屈，但作是念：『彼人雖來呵毀於我，而我不應心生憂悔，我當勇猛施諸有情所須之物，身心無倦。』是菩薩摩訶薩持此布施，與諸有情平等共有，迴向無上正等菩提。如是布施及迴向時，不見其相，所謂不見誰能布施、所施何物、誰受此施、云何行施，亦復不見誰能迴向、何所迴向、云何迴向、何處迴向，於如是等一切事物，悉皆不見。所以者何？如是諸法，無不皆由內空故空，如是乃至由自相空故空。是菩薩摩訶薩觀一切法無不空已，復作是念：『誰能迴向？何所迴向？云何迴向？何處迴向？如是等法，皆不可得。』是菩薩摩訶薩由如是觀及如是念所作迴向，名善迴向。由此復能成熟有情，嚴淨佛土，亦能圓滿布施波羅蜜多乃至般若波羅蜜多，如是乃至亦能圓滿三十二大士相、八十隨好。是菩薩摩訶薩雖能如是圓滿布施波羅蜜多，而不攝受施異熟果，雖不攝受施異熟果，而由布施波羅蜜多善清淨故，隨意能辦一切資具。譬如他化自在諸天，一切所須，隨意皆現，此菩薩摩訶薩亦復如是，諸有所須，隨意能辦，能以種種上妙供具供養恭敬，尊重讚歎諸佛世尊，亦能充足世間天人、阿素洛等所須資具。由此布施波羅蜜多攝諸有情，方便善巧以三乘法而安立之，令隨所宜，各得利樂。如是，善現！諸菩薩摩訶薩行深般若波羅蜜多時，由離諸相無漏心力，能於無相、無作法中，圓滿布施波羅蜜多，亦能圓滿諸餘功德。

大般若波羅蜜多經卷第四百六十七

復次，善現！諸菩薩摩訶薩行深般若波羅蜜多時，能以離相無漏之心受持淨戒，謂聖無漏道支所攝，法爾所得善清淨戒。如是淨戒無缺無隙，無瑕無穢，無所取著，應受供養，智者所讚。由此淨戒，於一切法無所取著，謂不取著色受想行識，不取著眼處乃至意處，不取著色處乃至法處，不取著眼界乃至意界，不取著色界乃至法界，不取著眼識界乃至意識界，不取著三十

二大士相、八十隨好，不取著刹帝利大族、婆羅門大族、長者大族、居士大族，不取著四大王眾天乃至他化自在天，不取著梵眾天乃至色究竟天，不取著空無邊處天乃至非想非非想處天，不取著預流果乃至獨覺菩提，不取著轉輪王位及餘小王宰官等位。但以如是所受持戒，與諸有情平等共有，迴向無上正等菩提，於迴向時，以無相、無所得、無二為方便，非有相、有所得、有二為方便，但由世俗，不由勝義。由此因緣，一切佛法無不圓滿。

是菩薩摩訶薩由此淨戒波羅蜜多方便善巧，起四靜慮勝進分，無染著為方便故，引諸神通。是菩薩摩訶薩用異熟生清淨天眼，恒見十方無邊世界現在諸佛安隱住持，為諸有情宣說正法，乃至證得一切智智，於所見事，能不忘失。是菩薩摩訶薩用超過人清淨天耳，恒聞十方無邊世界諸佛說法，乃至證得一切智智，於所聞事，能不忘失，隨所聞法，能作自他諸利樂事，無空過者。是菩薩摩訶薩用他心智能知十方佛及有情心、心所法，知已，能起一切有情諸利樂事。是菩薩摩訶薩用宿住智知諸有情先所造業，由所造業不失壞故，生彼彼處，受諸苦樂，知已，為說本業因緣，令其憶知，作饒益事。是菩薩摩訶薩用漏盡智安立有情，或令住預流果，或令住一來果，或令住不還果，或令住阿羅漢果，或令住獨覺菩提，或令住菩薩勝位，或令住一切智智。以要言之，是菩薩摩訶薩在所生處，隨諸有情，堪能差別，方便令住勝善品中。

如是，善現！諸菩薩摩訶薩行深般若波羅蜜多時，由離諸相無漏心力，能於無相、無作法中，圓滿淨戒波羅蜜多，亦能圓滿諸餘功德。

復次，善現！諸菩薩摩訶薩行深般若波羅蜜多時，能以離相無漏之心而修安忍。是菩薩摩訶薩從初發心，乃至安坐妙菩提座，其中假使一切有情各持種種刀杖瓦石競來加害，是菩薩摩訶薩不起一念忿恨之心。爾時，菩薩應修二忍。云何為二？一者、應受一切有情罵辱加害，不生忿恨，伏瞋恚忍；二者、應起無生法忍。是菩薩摩訶薩若遭種種惡言罵辱，或遭種種刀杖加害，應審思察：『誰能罵辱？誰能加害？誰受罵辱？誰受加害？誰起忿恨？誰應忍受？』復應審查一切法性皆畢竟空，法尚不可得，況當有法性；尚無法性，況有有情。如是觀時，若

能罵辱、若所罵辱、若能加害、若所加害，皆無所有，乃至分分割截身肢，其心安忍，都無異念，於諸法性如實觀察，復能證得無生法忍。云何名為無生法忍？謂令一切煩惱不生，微妙智慧常無間斷，及觀諸法畢竟不生，是故名為無生法忍。

是菩薩摩訶薩安住如是二種忍中，速能修滿布施波羅蜜多乃至般若波羅蜜多，速能修滿四念住乃至八聖道支，速能修滿四靜慮、四無量、四無色定，速能修滿八解脫乃至十遍處，速能修滿空、無相、無願解脫門，速能修滿諸菩薩地，速能修滿一切陀羅尼門、三摩地門，速能修滿五眼、六神通，速能修滿如來十力乃至十八不共法，速能修滿無忘失法、恆住捨性，速能修滿一切智、道相智、一切相智，速能修滿三十二大士相、八十隨好。

是菩薩摩訶薩安住如是諸佛法已，於聖無漏、出世、不共一切聲聞獨覺神通，皆得圓滿。安住如是勝神通已，以淨天眼恆見十方無邊世界現在諸佛安隱住持，為諸有情宣說正法，乃至證得一切智智，起佛隨念，常無間斷；以淨天耳恆聞十方諸佛說法，聞已受持，常不忘失，為諸有情如實宣說；以他心智能正測量諸佛世尊心、心所法，亦能正知菩薩、獨覺及諸聲聞心、心所法，亦能正知餘有情類心、心所法，隨其所應，為說正法，令生勝解；以宿住智知諸有情宿種善根種種差別，知己，方便示現、勸導、讚勵、慶喜，令獲殊勝利益安樂；以漏盡智隨其所應，安立有情於三乘法，令得解脫生老病死。是菩薩摩訶薩行深般若波羅蜜多，成就殊勝方便善巧，嚴淨佛土，成熟有情，速能具足一切相智，證得無上正等菩提，轉妙法輪，度有情眾。如是，善現！諸菩薩摩訶薩行深般若波羅蜜多時，由離諸相無漏心力，能於無相、無作法中，圓滿安忍波羅蜜多，亦能圓滿諸餘功德。

復次，善現！諸菩薩摩訶薩行深般若波羅蜜多時，能以離相無漏之心而修精進。是菩薩摩訶薩成就勇猛身心精進，由此能入初靜慮具足住，乃至能入第四靜慮具足住，依四靜慮起無量種神通變現，乃至以手摩捫日月，自在迴轉，不以為難。成就勇猛身精進故，以神通力，經須臾頃，能至十方殑伽沙等諸佛世界，復以種種飲食、衣服、臥具、醫藥及餘資具恭敬供養，尊重讚歎現說正法諸佛世尊，由此善根，果報無盡，乃至證得一

切智智。由此善根，增上勢力，得成佛已，復為無量世間天人、阿素洛等，以無量種飲食、衣服、臥具、醫藥及餘資具恭敬供養，尊重讚歎。由此善根，增上勢力，般涅槃後，自設利羅及諸弟子猶為無量世間天人、阿素洛等恭敬供養，尊重讚歎。是菩薩摩訶薩復以神力，能至十方殑伽沙等諸佛世界，於諸佛所聽聞正法，聞已受持，乃至無上正等菩提，終不忘失。是菩薩摩訶薩復以神力，能至十方殑伽沙等諸佛世界，成熟有情，嚴淨佛土，精勤修學一切智智，得圓滿已，證得無上正等菩提，轉妙法輪，度有情眾。如是，善現！諸菩薩摩訶薩行深般若波羅蜜多，成就勇猛身精進故，能令精進波羅蜜多疾得圓滿。復次，善現！諸菩薩摩訶薩行深般若波羅蜜多，成就勇猛心精進故，速能圓滿諸聖無漏道及道支所攝精進波羅蜜多，由此能令一切不善身語意業無容得起。

是菩薩摩訶薩於諸法中終不取著若常若無常、若樂若苦、若我若無我、若淨若不淨、若寂靜若不寂靜、若遠離若不遠離、若有為界若無為界、若欲界若色界若無色界、若有漏界若無漏界，若四靜慮、四無量、四無色定，若四念住、四正斷、四神足、五根、五力、七等覺支、八聖道支，若空、無相、無願解脫門，若布施波羅蜜多乃至般若波羅蜜多，若內空乃至無性自性空，若真如乃至不思議界，若苦集滅道聖諦，若八解脫、八勝處、九次第定、十遍處，若淨觀地乃至如來地，若極喜地乃至法雲地，若一切陀羅尼門、一切三摩地門，若五眼、六神通，若如來十力乃至十八不共法，若三十二大士相、八十隨好，若無忘失法、恒住捨性，若一切智、道相智、一切相智，若無常、苦、空、無我，若預流果、一來果、不還果、阿羅漢果、獨覺菩提，若一切菩薩摩訶薩行、諸佛無上正等菩提。

是菩薩摩訶薩亦不取著是預流、是一來、是不還、是阿羅漢、是獨覺、是菩薩、是如來，亦不取著如有情下法所顯、如有情中法所顯、如有情上法所顯、如有情上分所顯、如有情下分所顯、如有情聲聞乘所顯、如有情獨覺乘所顯、如有情無上乘所顯，是菩薩摩訶薩於如是等法及有情皆不取著。所以者何？所取著法及諸有情皆無自性可取著故。

是菩薩摩訶薩成就勇猛心精進故，雖恒造作一切有情諸利樂事，而於有情都無所得；雖常圓滿所修精進波羅蜜多，而於精

進波羅蜜多都無所得；雖常圓滿一切佛法，而於佛法都無所得；雖常嚴淨一切佛土，而於佛土都無所得。是菩薩摩訶薩成就如是身心精進，雖能遠離一切惡法，亦能攝受一切善法而無取著。無取著故，從一佛國至一佛國，從一世界至一世界，為欲饒益諸有情故，所欲示現諸神通事，皆能自在示現無礙。謂或示現雨眾妙花，散眾名香，作眾伎樂，現雲雷音振動大地。或復示現眾妙七寶莊嚴世界，身放光明，照諸盲冥，身出妙香，令臭穢者，皆得香潔。或復示現設大祠祀，於中不惱諸有情類，因斯化導無量有情，令人正道，離斷生命乃至邪見。或以布施乃至般若攝諸有情，為欲饒益諸有情故，或捨財寶，或捨妻子，或捨王位，或捨肢節，或捨身命，隨諸有情，應以如是如是方便而得饒益，即以如是如是方便而饒益之。如是，善現！諸菩薩摩訶薩行深般若波羅蜜多時，由離諸相無漏心力，能於無相、無作法中，圓滿精進波羅蜜多，亦能圓滿諸餘功德。

復次，善現！諸菩薩摩訶薩行深般若波羅蜜多時，能以離相無漏之心而修靜慮。是菩薩摩訶薩除諸佛定，於諸餘定皆能圓滿，是菩薩摩訶薩離欲惡不善法，有尋有伺，離生喜樂，入初靜慮具足而住，如是乃至斷樂斷苦，先喜憂沒，不苦不樂，捨念清淨，入第四靜慮具足而住。是菩薩摩訶薩以慈俱心普緣一方，乃至十方一切世間具足而住，如是乃至以捨俱心普緣一方，乃至十方一切世間具足而住。

是菩薩摩訶薩超諸色想，滅有對想，不思惟種種想，入無邊空，空無邊處具足而住，如是乃至超一切種無所有處，入非想非非想處具足而住。是菩薩摩訶薩安住靜慮波羅蜜多，於八解脫、八勝處、九次第定、十遍處，能順逆入具足而住。是菩薩摩訶薩能於空、無相、無願解脫門具足而住，能於無間三摩地、如電三摩地、聖正三摩地、金剛喻三摩地具足而住。

是菩薩摩訶薩安住靜慮波羅蜜多，修三十七菩提分法及道相智，皆令圓滿。用道相智攝受一切三摩地已，漸次修超淨觀地乃至獨覺地，證入菩薩正性離生，既入菩薩正性離生，修諸地行，圓滿佛地。是菩薩摩訶薩雖於諸地漸次修超，而於中間不取果證，乃至未得一切智智。

是菩薩摩訶薩安住靜慮波羅蜜多，從一佛國趣一佛國，恭敬供養，尊重讚歎諸佛世尊，於諸佛所，植眾善本，成熟有情，嚴

淨佛土。從一世界趣一世界，饒益有情，身心無倦，或以布施，或以淨戒，或以安忍，或以精進，或以靜慮，或以般若波羅蜜多攝諸有情，或以戒蘊，或以定蘊，或以慧蘊，或以解脫蘊，或以解脫智見蘊攝諸有情，或教有情住預流果，或住一來果，或住不還果，或住阿羅漢果，或住獨覺菩提，或住菩薩摩訶薩位，或住無上正等菩提，隨諸有情善根勢力，善法增長，種種方便，令其安住。

是菩薩摩訶薩安住靜慮波羅蜜多，能引一切陀羅尼門、三摩地門，能得殊勝四無礙解、異熟神通。是菩薩摩訶薩成就殊勝異熟神通，決定不復入於母胎，受諸欲樂，攝受生乘，生過所染。所以者何？是菩薩摩訶薩善見善知一切法性皆如幻化；雖知諸行皆如幻化，而乘悲願饒益有情；雖乘悲願饒益有情，而達有情及彼施設皆不可得；雖達有情及彼施設皆不可得，而能安立一切有情，令其安住不可得法，此依世俗，不依勝義。

是菩薩摩訶薩安住靜慮波羅蜜多，修行一切靜慮、解脫、等持、等至，乃至圓滿所求無上正等菩提，常不捨離所修靜慮波羅蜜多。是菩薩摩訶薩行道相智，方便引發一切相智，安住其中，永斷一切習氣相續，能正自利，亦正利他，能與一切世間天人、阿素洛等，作淨福田，堪受世間供養恭敬。如是，善現！諸菩薩摩訶薩行深般若波羅蜜多時，由離諸相無漏心力，能於無相、無作法中，圓滿靜慮波羅蜜多，亦能圓滿諸餘功德。

【第 64 義】：異熟剎那加行（VII-2）

『T2』若時起異熟，一切白法性，般若波羅蜜，即一剎那智。

◎『T2』第二異熟剎那加行者，謂若時生起猶如離障白淨月光一切白法之自性般若波羅蜜多無漏異熟法，最後心菩薩之智時，此最後無間道於一剎那能證菩提，以是菩薩有學道究竟智故。

『T2』復次，善現！諸菩薩摩訶薩行深般若波羅蜜多時，能以離相無漏之心而修般若。是菩薩摩訶薩不見少法實有成就，謂不見色實有成就，不見受想行識實有成就；不見色生，不見受想行識生；不見色滅，不見受想行識滅；不見色是增益門，不見受想行識是增益門；不見色是損減門，不見受想行識是損減門；不見色有積集，不見受想行識有積集；不見

色有離散，不見受想行識有離散。如是乃至不見一切有漏法實有成就，不見一切無漏法實有成就；不見一切有漏法生，不見一切無漏法生；不見一切有漏法滅，不見一切無漏法滅；不見一切有漏法是增益門，不見一切無漏法是增益門；不見一切有漏法是損減門，不見一切無漏法是損減門；不見一切有漏法有積集，不見一切無漏法有積集；不見一切有漏法有離散，不見一切無漏法有離散。如實觀色是虛妄，不堅實，無自在；如實觀受想行識是虛妄，不堅實，無自在。如是乃至如實觀一切有漏法是虛妄，不堅實，無自在；如實觀一切無漏法是虛妄，不堅實，無自在。是菩薩摩訶薩如是觀時，不得色自性，不得受想行識自性；如是乃至不得一切有漏法自性，不得一切無漏法自性。

是菩薩摩訶薩行深般若波羅蜜多如是觀時，於一切法深生信解，皆以無性而為自性；於如是事生信解已，能行內空，乃至能行無性自性空。如是行時，於一切法無所執著，謂不執著色，不執著受想行識，不執著眼處乃至意處，不執著色處乃至法處，不執著眼界乃至意界，不執著色界乃至法界，不執著眼識界乃至意識界，不執著眼觸乃至意觸，不執著眼觸為緣所生諸受乃至意觸為緣所生諸受，不執著地界乃至識界，不執著因緣乃至增上緣，不執著無明乃至老死，不執著布施波羅蜜多乃至般若波羅蜜多，不執著內空乃至無性自性空，不執著真如乃至不思議界，不執著苦集滅道聖諦，不執著四念住乃至八聖道支，不執著四靜慮、四無量、四無色定，不執著八解脫乃至十遍處，不執著空、無相、無願解脫門，不執著淨觀地乃至如來地，不執著極喜地乃至法雲地，不執著一切陀羅尼門、三摩地門，不執著五眼、六神通，不執著如來十力乃至十八不共法，不執著三十二大士相、八十隨好，不執著無忘失法、恆住捨性，不執著一切智、道相智、一切相智，不執著預流果乃至獨覺菩提，不執著一切菩薩摩訶薩行，不執著諸佛無上正等菩提。是菩薩摩訶薩行無所有甚深般若波羅蜜多時，能圓滿菩薩道，謂能圓滿六波羅蜜多，亦能圓滿內空乃至無性自性空，亦能圓滿真如乃至不思議界，亦能圓滿苦集滅道聖諦，亦能圓滿四念住乃至八聖道支，亦能圓滿四靜慮、四無量、四無色定，亦能圓滿八解脫乃至十遍處，亦能圓滿空、無相、無願解脫門，亦

能圓滿諸菩薩地，亦能圓滿一切陀羅尼門、三摩地門，亦能圓滿五眼、六神通，亦能圓滿如來十力乃至十八不共法，亦能圓滿無忘失法、恒住捨性，亦能圓滿一切智、道相智、一切相智，亦能圓滿三十二大士相、八十隨好。

是菩薩摩訶薩圓滿如是菩薩道已，復能圓滿離闇佛道，謂能圓滿六波羅蜜多及餘無量無邊佛法。是菩薩摩訶薩安住如是離闇佛道，引發殊勝異熟神通，隨諸有情應以布施乃至般若而攝受者，即以布施乃至般若而攝受之；應以戒蘊、定蘊、慧蘊、解脫蘊、解脫智見蘊而攝受者，即以戒蘊乃至解脫智見蘊而攝受之；應令安住預流果、或一來果、或不還果、或阿羅漢果、或獨覺菩提、或復無上正等菩提者，即方便令安住預流果乃至無上正等菩提。

是菩薩摩訶薩能作種種神通變現，欲往殑伽沙等世界，隨意能往；欲現所往諸世界中種種珍寶，隨意能現；欲令所往諸世界中有情受用種種珍寶，隨其所樂，皆令充足。是菩薩摩訶薩從一世界往一世界，利益安樂無量有情，見諸世界種種妙好莊嚴之相，能自攝受隨意所樂莊嚴佛土。譬如他化自在諸天諸有所須，眾妙樂具，隨心而現，如是菩薩隨意攝受種種莊嚴無量佛土，此所攝受諸佛土中，微妙清淨，離雜染法，隨意所欲，悉皆能現。

是菩薩摩訶薩由異熟生布施波羅蜜多乃至般若波羅蜜多，由異熟生諸妙神通，由異熟生菩薩道故，行道相智。由道相智得成熟故，復能證得一切相智，由得此智，於一切法無所攝受，謂不攝受色，亦不攝受受想行識，如是乃至亦不攝受若善法若非善法、若有記法若無記法、若世間法若出世間法、若有漏法若無漏法、若有為法若無為法，亦不攝受所證無上正等菩提，亦不攝受一切佛土所受用物，其中有情於一切法亦無攝受。所以者何？是菩薩摩訶薩先不攝受一切法故，於一切法無所得故，為諸有情無倒宣說一切法性無攝受故。如是，善現！諸菩薩摩訶薩行深般若波羅蜜多時，由離諸相無漏心力，能於無相、無作法中，圓滿般若波羅蜜多，亦能圓滿諸餘功德。」

無雜品第七十五

【第 65 義】：無相剎那加行 (VII-3)

『T3』由布施等行，諸法如夢住，一剎那能證，諸法無相性。

◎『T3』第三無相剎那加行者，謂最後心智，即一剎那證菩提之無相剎那加行，以是善修布施等六度行，知一切法猶如夢事，增上力故，一剎那頃能知染淨一切諸法皆勝義無相之有學究竟瑜伽故。

(11) 『T3』爾時，具壽善現白佛言：「世尊！云何於一切無雜無相自相空法中，能圓滿六波羅蜜多？云何於一切無差別法中而施設差別？云何了知如是諸法差別之相？云何於般若波羅蜜多中，能攝受一切六波羅蜜多，如是乃至攝受一切世出世法？云何於一切異相法中施設一相，所謂無相，及於一相、無相法中施設一切差別法相？」

(12) 佛告善現：「諸菩薩摩訶薩行深般若波羅蜜多時，安住如夢、如響、如像、如光影、如陽焰、如幻、如化五取蘊中，為諸有情布施、持戒、安忍、精進、修定、學慧，如實了知如夢乃至如化五蘊，皆同一相，所謂無相。所以者何？夢乃至化，皆無自性。若法無自性，是法則無相；若法無相，是法一相，所謂無相。由此因緣，當知一切施者、受者、施物、施性、施果、施緣，皆同無相。」

若如是知而行布施，則能圓滿所行布施波羅蜜多；若能圓滿所行布施波羅蜜多，則不遠離淨戒、安忍、精進、靜慮、般若波羅蜜多。安住此六波羅蜜多，則能圓滿四靜慮、四無量、四無色定，亦能圓滿四念住乃至八聖道支，亦能圓滿三解脫門，亦能圓滿內空乃至無性自性空，亦能圓滿真如乃至不思議界，亦能圓滿苦集滅道聖諦，亦能圓滿八解脫乃至十遍處，亦能圓滿諸菩薩地，亦能圓滿五百陀羅尼門、五百三摩地門，亦能圓滿五眼、六神通，亦能圓滿如來十力乃至十八不共法，亦能圓滿無忘失法、恒住捨性，亦能圓滿一切智、道相智、一切相智。是菩薩摩訶薩安住如是諸異熟聖無漏法中，能往十方殑伽沙等諸佛世界，以無量種上妙供具恭敬供養，尊重讚歎諸佛世尊，作諸有情利益安樂，應以布施乃至般若波羅蜜多而攝受者，即以布施乃至般若波羅蜜多而攝受之；應以諸餘種種善法而攝受者，即以諸餘種種善法而攝受之。是菩薩摩訶薩成就一切殊勝善根，於一切法皆得自在，雖受生死，不為生死過失所染。為

欲利樂諸有情故，攝受人天富貴自在，由此富貴自在威力，能作有情諸饒益事，以四攝事而攝受之。

是菩薩摩訶薩知一切法皆無相故，雖知預流果而不住預流果，乃至雖知獨覺菩提而不住獨覺菩提。所以者何？是菩薩摩訶薩如實了知一切法已，為欲證得一切智智，不共一切聲聞、獨覺。如是，善現！諸菩薩摩訶薩知一切法皆無相故，如實了知布施等六波羅蜜多及餘無量無邊佛法皆同無相，由此因緣，普能圓滿一切佛法，便能證得一切智智。

復次，善現！諸菩薩摩訶薩行深般若波羅蜜多時，安住如夢、如響、如像、如光影、如陽焰、如幻、如化五取蘊中，圓滿淨戒波羅蜜多。是菩薩摩訶薩如實了知如夢乃至如化五蘊，便能圓滿無相淨戒波羅蜜多。如是淨戒，無缺無隙，無瑕無穢，無所取著，應受供養，智者所讚，妙善受持，妙善究竟，是聖無漏，是出世間道支所攝。安住此戒，能善受持受施設戒、法爾得戒、律儀戒、有表戒、無表戒、現行戒、不現行戒、威儀戒、非威儀戒。

是菩薩摩訶薩雖具成就如是諸戒，而於諸法無所取著，不作是念：『我由此戒，當生刹帝利大族、或婆羅門大族、或長者大族、或居士大族，富貴自在。』不作是念：『我由此戒，當為小王，或為大王，或為輪王，或為輔佐，富貴自在。』不作是念：『我由此戒，當生四大王眾天乃至他化自在天，富貴自在。』不作是念：『我由此戒，當得預流果、或一來果、或不還果、或阿羅漢果、或獨覺菩提，或入菩薩正性離生，或得菩薩無生法忍，或得無上正等菩提。』所以者何？如是諸法，皆同一相，所謂無相、無住、無得。無相之法不得無相，有相之法不得有相，無相之法不得有相，有相之法不得無相，由是因緣，都無所得。

如是，善現！諸菩薩摩訶薩行深般若波羅蜜多時，速能圓滿無相淨戒波羅蜜多；既能圓滿無相淨戒波羅蜜多，速入菩薩正性離生；既入菩薩正性離生，復得菩薩無生法忍；既得菩薩無生法忍，修行道相智，趣一切相智，得異熟五神通，復得五百陀羅尼門，亦得五百三摩地門，安住此中，復能證得四無礙解，從一佛國至一佛國，親近供養諸佛世尊，成熟有情，嚴淨佛土。

是菩薩摩訶薩為化有情，雖現流轉諸趣生死，而不為彼過失所染。如幻化人，雖現行住坐臥等事，而無真實往來等業，雖現種種饒益有情，而於有情及彼施設都無所得。如有如來應正等覺，名善寂靜，證得無上正等菩提，轉妙法輪，度無量眾，令出生死，證得涅槃，而無有情堪受決得無上正等菩提記者。時彼如來化作化佛，令久住世，自捨壽行，入無餘依般涅槃界，彼佛化身住一劫已，授一菩薩無上正等菩提記已，方入涅槃。彼佛化身雖作種種饒益有情事而無所得，謂不得色受想行識，乃至不得一切有漏無漏等法及諸有情。是菩薩摩訶薩亦復如是，雖有所作，而無所得。如是，善現！諸菩薩摩訶薩行深般若波羅蜜多時，圓滿淨戒波羅蜜多，由此淨戒波羅蜜多得圓滿故，便能攝受一切佛法，因斯證得一切智智。

復次，善現！諸菩薩摩訶薩行深般若波羅蜜多時，安住如夢、如響、如像、如光影、如陽焰、如幻、如化五取蘊中，圓滿安忍波羅蜜多。是菩薩摩訶薩如實了知如夢乃至如化五蘊，便能圓滿無相安忍波羅蜜多。

善現！云何菩薩摩訶薩行深般若波羅蜜多時，如實了知如夢乃至如化五蘊，便能圓滿無相安忍波羅蜜多？

善現！是菩薩摩訶薩如實了知是五取蘊無實相故，修二種忍，便能圓滿無相安忍波羅蜜多。云何為二？謂安受忍及觀察忍。安受忍者，謂諸菩薩從初發心乃至安坐妙菩提座，於其中間，假使一切有情之類競來訶毀，以麤惡言罵詈凌辱，復以瓦石刀杖加害，是時菩薩為滿安忍波羅蜜多，乃至不生一念忿恨，亦復不起加報之心，但作是念：『彼諸有情，深可哀愍，增上煩惱擾動其心，不得自在，於我發起如是惡業，我今不應瞋恨於彼。』

復作是念：『由我攝受怨家諸蘊，令彼有情於我發起如是惡業，但應自責，不應瞋彼。』菩薩如是審觀察時，於彼有情深生慈愍，如是等類，名安受忍。

觀察忍者，謂諸菩薩作是思惟：『諸行如幻，虛妄不實，不得自在，亦如虛空，無我，有情、命者、生者、養者、士夫、補特伽羅、意生、儒童、作者、受者、知者、見者皆不可得，唯是虛妄分別所起，一切皆是自心所變。誰訶毀我？誰罵詈我？誰凌辱我？誰以種種瓦石刀杖加害於我？誰復受彼凌辱加

害？皆是自心虛妄分別，我今不應橫起執著，如是諸法，由自性空、勝義空故，都無所有。』菩薩如是審觀察時，如實了知諸行空寂，於一切法不生異想，如是等類，名觀察忍。是菩薩摩訶薩修習如是二種忍故，便能圓滿無相安忍波羅蜜多，由能圓滿無相安忍波羅蜜多，即便獲得無生法忍。」

- (13) 具壽善現白言：「世尊！云何名為無生法忍？此何所斷？復是何智？」
- (14) 佛告善現：「由此勢力，乃至少分惡不善法亦不得生，是故名為無生法忍。此令一切我及我所慢等煩惱畢竟不生，如實忍受諸行如夢乃至如化，此忍名智，得此智故，說名獲得無生法忍。」
- (15) 具壽善現復白佛言：「聲聞、獨覺及諸菩薩無生法忍有何差別？」
- (16) 佛告善現：「諸預流者，若智若斷，乃至獨覺，若智若斷，亦名菩薩摩訶薩忍。復有菩薩摩訶薩忍，謂忍諸法畢竟不生，是為差別。善現當知！諸菩薩摩訶薩成就如是殊勝忍故，超勝一切聲聞、獨覺。諸菩薩摩訶薩安住如是異熟忍中，行菩薩道，能圓滿道相智；成就如是道相智故，常不遠離四念住乃至八聖道支，亦不遠離三解脫門，亦不遠離異熟神通；由不遠離異熟神通，從一佛國趣一佛國，親近供養諸佛世尊，成熟有情，嚴淨佛土。作是事已，用一剎那相應般若，證得無上正等菩提。如是，善現！諸菩薩摩訶薩行深般若波羅蜜多時，疾能圓滿無相安忍波羅蜜多；由此安忍波羅蜜多得圓滿故，便能圓滿一切佛法，因斯證得一切智智。」

大般若波羅蜜多經卷第四百六十八

復次，善現！諸菩薩摩訶薩行深般若波羅蜜多時，安住如夢、如響、如像、如光影、如陽焰、如幻、如化五取蘊中，如實了知如夢乃至如化五蘊無實相已，發起勇猛身心精進。是菩薩摩訶薩發起勇猛身精進故，引發殊勝迅疾神通，能往十方殑伽沙等諸佛世界，親近如來應正等覺，以無量種上妙供具供養恭敬，尊重讚歎，於諸佛所，種諸善根，利益安樂諸有情類，亦能嚴淨種種佛土。是菩薩摩訶薩由身精進，成熟有情，隨其所宜，以三乘法方便安立，各令究竟。如是，善現！諸菩薩摩訶薩行深般若波羅蜜多，由身精進，能速圓滿無相精進波羅蜜多。

是菩薩摩訶薩發起勇猛心精進故，引發諸聖無漏道支所攝聖道，圓滿精進波羅蜜多，於中具能攝諸善法，謂四念住乃至八聖道支，若空、無相、無願解脫門，若四靜慮、四無量、四無色定，若八解脫乃至十遍處，若苦集滅道聖諦，若布施波羅蜜多乃至般若波羅蜜多，若極喜地乃至法雲地，若一切陀羅尼門、三摩地門，若內空乃至無性自性空，若真如乃至不思議界，若五眼、六神通，若如來十力乃至十八不共法，若無忘失法、恆住捨性，若一切智、道相智、一切相智。是菩薩摩訶薩由心精進，諸相隨好，皆得圓滿，放大光明，照無邊界。由心精進極圓滿故，便能永斷一切煩惱習氣相續，證得無上正等菩提，轉妙法輪，具三十二相，令三千界六種變動。其中有情，蒙光照觸，睹斯變動，聞正法音，隨其所應，於三乘道得不退轉，各得究竟。

如是，善現！諸菩薩摩訶薩行深般若波羅蜜多，圓滿精進波羅蜜多，由此精進波羅蜜多多有所作，是菩薩摩訶薩安住精進波羅蜜多，速能圓滿一切佛法，疾證無上正等菩提。

復次，善現！諸菩薩摩訶薩行深般若波羅蜜多時，安住如夢、如響、如像、如光影、如陽焰、如幻、如化五取蘊中，圓滿靜慮波羅蜜多。善現！云何菩薩摩訶薩行深般若波羅蜜多時，安住如夢乃至如化五取蘊中，圓滿靜慮波羅蜜多？謂菩薩摩訶薩行深般若波羅蜜多時，如實了知如夢乃至如化五蘊，無實相已，入初靜慮乃至第四靜慮，入慈無量乃至捨無量，入空無邊處定乃至非想非非想處定，修空、無相、無願三摩地，修如電三摩地，修金剛喻三摩地，修聖正三摩地。住金剛喻三摩地中，除如來定，於餘所有，若共二乘，若餘勝定，一切能入具足安住，然於如是靜慮、無量、無色定等，不生味著，亦不耽著彼所得果。所以者何？是菩薩摩訶薩如實了知靜慮、無量、無色定等及一切法皆同無相，無性為性，不應無相味著無相，不應無性味著無性。無味著故，終不隨順靜慮、無量、無色定等勢力而生色無色界。所以者何？是菩薩摩訶薩於一切界都無所得，於能入定及所入定、由此入定、為此入定亦無所得。是菩薩摩訶薩於一切法無所得故，速能圓滿無相靜慮波羅蜜多，由此靜慮波羅蜜多，超諸聲聞及獨覺地。」

- (17) 具壽善現白言：「世尊！是菩薩摩訶薩云何圓滿無相靜慮波羅蜜多，超諸聲聞及獨覺地？」
- (18) 佛告善現：「是菩薩摩訶薩善學內空乃至無性自性空故，便能圓滿無相靜慮波羅蜜多，超諸聲聞及獨覺地。是菩薩摩訶薩住諸空中，於一切法都無所得，不見有法離諸空者。是菩薩摩訶薩安住此中，不得預流果乃至不得獨覺菩提，亦復不得諸菩薩行及佛無上正等菩提，如是諸空亦皆空故。是菩薩摩訶薩由住此空，超諸聲聞、獨覺等地，證入菩薩正性離生。」
- (19) 具壽善現復白佛言：「諸菩薩摩訶薩以何為生？以何為離生？」
- (20) 佛告善現：「諸菩薩摩訶薩以一切有所得為生，以一切無所得為離生。」
- (21) 具壽善現白言：「世尊！諸菩薩摩訶薩以何為有所得？以何為無所得？」
- (22) 佛告善現：「諸菩薩摩訶薩以一切法為有所得，謂菩薩摩訶薩以色受想行識為有所得，以眼處乃至意處為有所得，以色處乃至法處為有所得，以眼界乃至眼界為有所得，以色界乃至法界為有所得，以眼識界乃至意識界為有所得，以眼觸乃至意觸為有所得，以眼觸為緣所生諸受乃至意觸為緣所生諸受為有所得，以地界乃至識界為有所得，以因緣乃至增上緣為有所得，以無明乃至老死為有所得，以布施波羅蜜多乃至般若波羅蜜多為有所得，以內空乃至無性自性空為有所得，以真如乃至不思議界為有所得，以苦集滅道聖諦為有所得，以四念住乃至八聖道支為有所得，以空、無相、無願解脫門為有所得，以四靜慮、四無量、四無色定為有所得，以八解脫乃至十遍處為有所得，以淨觀地乃至如來地為有所得，以極喜地乃至法雲地為有所得，以一切陀羅尼門、三摩地門為有所得，以五眼、六神通為有所得，以如來十力乃至十八不共法為有所得，以三十二大士相、八十隨好為有所得，以無忘失法、恆住捨性為有所得，以一切智、道相智、一切相智為有所得，以預流果乃至獨覺菩提為有所得，以一切菩薩摩訶薩行為有所得，以諸佛無上正等菩提為有所得，以一切智智為有所得。善現！諸菩薩摩訶薩以如是等種種法門為有所得，即有所得，說名為生。
- 復次，善現！諸菩薩摩訶薩以一切法無行、無得、無說、無示為無所得，謂諸菩薩摩訶薩以色受想行識無行、無得、無說、

無示為無所得。所以者何？色自性乃至識自性，皆不可行、得、說、示故。諸菩薩摩訶薩以眼處乃至意處無行、無得、無說、無示為無所得。所以者何？眼處自性乃至意處自性，皆不可行、得、說、示故。諸菩薩摩訶薩以色處乃至法處無行、無得、無說、無示為無所得。所以者何？色處自性乃至法處自性，皆不可行、得、說、示故。

諸菩薩摩訶薩以眼界乃至眼界無行、無得、無說、無示為無所得。所以者何？眼界自性乃至眼界自性，皆不可行、得、說、示故。諸菩薩摩訶薩以色界乃至法界無行、無得、無說、無示為無所得。所以者何？色界自性乃至法界自性，皆不可行、得、說、示故。諸菩薩摩訶薩以眼識界乃至意識界無行、無得、無說、無示為無所得。所以者何？眼識界自性乃至意識界自性，皆不可行、得、說、示故。諸菩薩摩訶薩以眼觸乃至意觸無行、無得、無說、無示為無所得。所以者何？眼觸自性乃至意觸自性，皆不可行、得、說、示故。

諸菩薩摩訶薩以眼觸為緣所生諸受乃至意觸為緣所生諸受無行、無得、無說、無示為無所得。所以者何？眼觸為緣所生諸受自性乃至意觸為緣所生諸受自性，皆不可行、得、說、示故。諸菩薩摩訶薩以地界乃至識界無行、無得、無說、無示為無所得。所以者何？地界自性乃至識界自性，皆不可行、得、說、示故。諸菩薩摩訶薩以因緣乃至增上緣無行、無得、無說、無示為無所得。所以者何？因緣自性乃至增上緣自性，皆不可行、得、說、示故。

諸菩薩摩訶薩以無明乃至老死無行、無得、無說、無示為無所得。所以者何？無明自性乃至老死自性，皆不可行、得、說、示故。諸菩薩摩訶薩以布施波羅蜜多乃至般若波羅蜜多無行、無得、無說、無示為無所得。所以者何？布施波羅蜜多自性乃至般若波羅蜜多自性，皆不可行、得、說、示故。諸菩薩摩訶薩以內空乃至無性自性空無行、無得、無說、無示為無所得。所以者何？內空自性乃至無性自性空自性，皆不可行、得、說、示故。

諸菩薩摩訶薩以真如乃至不思議界無行、無得、無說、無示為無所得。所以者何？真如自性乃至不思議界自性，皆不可行、得、說、示故。諸菩薩摩訶薩以苦集滅道聖諦無行、無得、無

說、無示為無所得。所以者何？苦集滅道聖諦自性，皆不可行、得、說、示故。諸菩薩摩訶薩以四念住乃至八聖道支無行、無得、無說、無示為無所得。所以者何？四念住自性乃至八聖道支自性，皆不可行、得、說、示故。

諸菩薩摩訶薩以空、無相、無願解脫門無行、無得、無說、無示為無所得。所以者何？空、無相、無願解脫門自性，皆不可行、得、說、示故。諸菩薩摩訶薩以四靜慮、四無量、四無色定，無行、無得、無說、無示為無所得。所以者何？四靜慮、四無量、四無色定自性，皆不可行、得、說、示故。諸菩薩摩訶薩以八解脫乃至十遍處無行、無得、無說、無示為無所得。所以者何？八解脫自性乃至十遍處自性，皆不可行、得、說、示故。

諸菩薩摩訶薩以淨觀地乃至如來地無行、無得、無說、無示為無所得。所以者何？淨觀地自性乃至如來地自性，皆不可行、得、說、示故。諸菩薩摩訶薩以極喜地乃至法雲地無行、無得、無說、無示為無所得。所以者何？極喜地自性乃至法雲地自性，皆不可行、得、說、示故。諸菩薩摩訶薩以一切陀羅尼門、三摩地門，無行、無得、無說、無示為無所得。所以者何？一切陀羅尼門、三摩地門自性，皆不可行、得、說、示故。

諸菩薩摩訶薩以五眼、六神通，無行、無得、無說、無示為無所得。所以者何？五眼、六神通自性，皆不可行、得、說、示故。諸菩薩摩訶薩以如來十力乃至十八不共法無行、無得、無說、無示為無所得。所以者何？如來十力自性乃至十八不共法自性，皆不可行、得、說、示故。諸菩薩摩訶薩以三十二大士相、八十隨好，無行、無得、無說、無示為無所得。所以者何？三十二大士相、八十隨好自性，皆不可行、得、說、示故。

諸菩薩摩訶薩以無忘失法、恆住捨性，無行、無得、無說、無示為無所得。所以者何？無忘失法、恆住捨性自性，皆不可行、得、說、示故。諸菩薩摩訶薩以一切智、道相智、一切相智，無行、無得、無說、無示為無所得。所以者何？一切智、道相智、一切相智自性，皆不可行、得、說、示故。諸菩薩摩訶薩以預流果乃至獨覺菩提無行、無得、無說、無示為無所得。所

以者何？預流果自性乃至獨覺菩提自性，皆不可行、得、說、示故。

諸菩薩摩訶薩以一切菩薩摩訶薩行無行、無得、無說、無示為無所得。所以者何？一切菩薩摩訶薩行自性，皆不可行、得、說、示故。諸菩薩摩訶薩以諸佛無上正等菩提無行、無得、無說、無示為無所得。所以者何？諸佛無上正等菩提自性，皆不可行、得、說、示故。諸菩薩摩訶薩以一切智智無行、無得、無說、無示為無所得。所以者何？一切智智自性，皆不可行、得、說、示故。善現！諸菩薩摩訶薩以如是等種種法門無行、無得、無說、無示為無所得，即無所得，說名離生。

諸菩薩摩訶薩證入正性離生位已，圓滿一切靜慮、解脫、等持、等至，尚不隨定勢力而生，況隨貪瞋癡等煩惱。若隨煩惱勢力而生，無有是處。是菩薩摩訶薩安住此中，造作諸業，由業勢力流轉諸趣，亦無是處。是菩薩摩訶薩雖住如幻諸行聚中，作諸有情如實饒益，而不得幻及諸有情。是菩薩摩訶薩於如是事無所得時，成熟有情，嚴淨佛土，常無懈廢。如是，善現！諸菩薩摩訶薩行深般若波羅蜜多時，速能圓滿無相靜慮波羅蜜多。由此靜慮波羅蜜多速圓滿故，疾證無上正等菩提，轉妙法輪，度有情眾，如是法輪，名無所得。

復次，善現！諸菩薩摩訶薩行深般若波羅蜜多時，安住如夢、如響、如像、如光影、如陽焰、如幻、如化五取蘊中，圓滿般若波羅蜜多。是菩薩摩訶薩如實了知諸法性相一切如夢乃至如化，便能圓滿無相般若波羅蜜多。」

【第 66 義】：無二剎那加行（VII-4）

『T4』如夢與能見，不見有二相，一剎那能見，諸法無二性。

◎『T4』第四無二剎那加行者，謂最後心智即無二剎那加行，以是一剎那頃能現見能取所取一切諸法無二實體之有學究竟瑜伽故。譬如夢中所見宅舍等與能見之心無二體故。

(23) 『T4』具壽善現白言：「世尊！云何菩薩摩訶薩行深般若波羅蜜多時，如實了知諸法性相一切如夢乃至如化？」

(24) 佛告善現：「諸菩薩摩訶薩行深般若波羅蜜多時，不見夢，不見見夢者；不聞響，不見聞響者；不見像，不見見像者；不見

光影，不見見光影者；不見陽焰，不見見陽焰者；不見幻，不見見幻者；不見化，不見見化者。所以者何？夢乃至化，皆是愚夫異生顛倒之所執著。諸阿羅漢、獨覺、菩薩摩訶薩眾及諸如來應正等覺，皆不見夢，不見見夢者；乃至不見化，不見見化者。所以者何？以一切法無性為性，非成非實，無相無為，非實有性，與涅槃等。若一切法無性為性，廣說乃至與涅槃等，云何菩薩摩訶薩行深般若波羅蜜多時，於一切法起有性想、成想、實想、有相、有為、有實性想？若起此想，無有是處。所以者何？若一切法有少自性、有成、有實、有相、有為、有實性可得者，則所修行甚深般若波羅蜜多應非般若波羅蜜多。如是，善現！諸菩薩摩訶薩行深般若波羅蜜多時，不著色乃至識，不著眼處乃至意處，不著色處乃至法處，不著眼界乃至意識界，不著色界乃至法界，不著眼識界乃至意識界，不著眼觸乃至意觸，不著眼觸為緣所生諸受乃至意觸為緣所生諸受，不著地界乃至識界，不著因緣乃至增上緣，不著從緣所生諸法，不著無明乃至老死，不著欲界、色界、無色界，不著一切靜慮、解脫、等持、等至，不著四念住乃至八聖道支，不著空、無相、無願解脫門，不著布施波羅蜜多乃至般若波羅蜜多，不著苦集滅道聖諦，不著內空乃至無性自性空，不著真如乃至不思議界，不著淨觀地乃至如來地，不著極喜地乃至法雲地，不著一切陀羅尼門、三摩地門，不著五眼、六神通，不著如來十力乃至十八不共法，不著三十二大士相、八十隨好，不著無忘失法、恆住捨性，不著一切智、道相智、一切相智，不著預流果乃至獨覺菩提，不著一切菩薩摩訶薩行，不著諸佛無上正等菩提，不著一切智智。

是菩薩摩訶薩行深般若波羅蜜多時，於如是等一切法門，由不著故，便能圓滿菩薩初地乃至十地，而於其中不生貪著。所以者何？是菩薩摩訶薩不得初地乃至十地能、所圓滿，云何於中而起貪著？是菩薩摩訶薩雖行深般若波羅蜜多，而不得深般若波羅蜜多，由不得深般若波羅蜜多故，亦不得一切法。是菩薩摩訶薩雖觀般若波羅蜜多攝一切法，而於諸法都無所得。所以者何？以一切法與此般若波羅蜜多皆無二無二處。何以故？一切法性不可分別，說為真如，說為法界，說為實際，諸法無雜、無差別故。」

- (25) 具壽善現白言：「世尊！若一切法，其性無雜、無差別者，云何可說是善是非善，是有記是無記，是有漏是無漏，是世間是出世間，是有為是無為，有如是等差別法門？」
- (26) 佛告善現：「於意云何？一切法實性中，有法可說是善是非善，是有記是無記，是有漏是無漏，是世間是出世間，是有為是無為，是預流果，是一來果，是不還果，是阿羅漢果，是獨覺菩提，是一切菩薩摩訶薩行，是諸佛無上正等菩提不？」
- (27) 善現對曰：「不也，世尊！」
- (28) 佛告善現：「由是因緣，當知一切法無雜、無差別、無相、無生、無滅、無礙、無說、無示。善現當知！我本修學菩薩道時，於法自性都無所得，謂不得色受想行識，不得眼處乃至意處，不得色處乃至法處，不得眼界乃至眼界，不得色界乃至法界，不得眼識界乃至意識界，不得眼觸乃至意觸，不得眼觸為緣所生諸受乃至意觸為緣所生諸受，不得地界乃至識界，不得因緣乃至增上緣，不得從緣所生諸法，不得無明乃至老死，不得欲界、色界、無色界，不得善非善，不得有記無記，不得有漏無漏，不得世間出世間，不得有為無為，不得四念住乃至八聖道支，不得四靜慮、四無量、四無色定，不得八解脫乃至十遍處，不得空、無相、無願解脫門，不得苦集滅道聖諦，不得布施波羅蜜多乃至般若波羅蜜多，不得內空乃至無性自性空，不得真如乃至不思議界，不得淨觀地乃至如來地，不得極喜地乃至法雲地，不得一切陀羅尼門、三摩地門，不得五眼、六神通，不得如來十力乃至十八不共法，不得三十二大士相、八十隨好，不得無忘失法、恆住捨性，不得一切智、道相智、一切相智，不得預流果乃至獨覺菩提，不得一切菩薩摩訶薩行，不得諸佛無上正等菩提。
- 如是，善現！諸菩薩摩訶薩行深般若波羅蜜多時，從初發心乃至安坐妙菩提座，常應善學諸法自性。若能善學諸法自性，則能善淨大菩提道，亦能圓滿諸菩薩行，成熟有情，嚴淨佛土，速證無上正等菩提，轉妙法輪，以三乘法方便調伏諸有情眾，令於三有，不復輪迴，證得涅槃究竟安樂。如是，善現！諸菩薩摩訶薩應以無相而為方便，修學般若波羅蜜多。」

眾德相品第七十六

【第八事】果法身

【第 67 義】：自性身 (VIII-1)

能仁自性身，得諸無漏法，一切種清淨，彼自性為相。

◎佛自性身具三別法：

- a 已得念住等二十一聚無漏法故具足差別。
- b 二障及習氣畢竟清淨故離繫差別。
- c 無漏智之自性以真空為相故自性差別。

——此後二差別，即 b 離垢清淨之自性身與 c 自性清淨之自性身。

- (01) 爾時，具壽善現白佛言：「世尊！若一切法無不如夢、如響、如像、如光影、如陽焰、如幻、如化，都無實事，無性為性，自相皆空，云何可立是善是非善，是有記是無記，是有漏是無漏，是世間是出世間，是有為是無為，如是乃至是預流果是能證得預流果法，是一來果是能證得一來果法，是不還果是能證得不還果法，是阿羅漢果是能證得阿羅漢果法，是獨覺菩提是能證得獨覺菩提法，是諸菩薩摩訶薩地是能證得菩薩摩訶薩地法，是諸佛無上正等菩提是能證得諸佛無上正等菩提法耶？」
- (02) 佛告善現：「世間愚夫無聞異生，於夢得夢、得見夢者，如是乃至於化得化、得見化者。如是愚夫無聞異生，得夢乃至得化等已，顛倒執著，或造不善身語意行，或復造善身語意行，或造無記身語意行，或造非福身語意行，或復造福身語意行，或造不動身語意行，由諸行故，往來生死，輪轉無窮。諸菩薩摩訶薩行深般若波羅蜜多時，以二種空觀察諸法。何謂二空？一、畢竟空；二、無際空。是菩薩摩訶薩安住如是二種空中，為諸有情宣說正法。謂作是言：『汝等應知色是空，離我我所；受想行識是空，離我我所。眼處是空，離我我所；耳鼻舌身意處是空，離我我所。色處是空，離我我所；聲香味觸法處是空，離我我所。眼界是空，離我我所；耳鼻舌身意識界是空，離我我所。色界是空，離我我所；聲香味觸法界是空，離我我所。眼識界是空，離我我所；耳鼻舌身意識界是空，離我我所。眼觸是空，離我我所；耳鼻舌身意觸是空，離我我所。眼觸為緣所生諸受是空，離我我所；耳鼻舌身意觸為緣所生諸受是空，離我我所。地界是空，離我我所；水火風空識界是空，

離我我所。因緣是空，離我我所；等無間緣是空，離我我所；所緣緣是空，離我我所；增上緣是空，離我我所。從緣所生諸法是空，離我我所。無明是空，離我我所；行、識、名色、六處、觸、受、愛、取、有、生、老死是空，離我我所。善法是空，離我我所；非善法是空，離我我所。有記法是空，離我我所；無記法是空，離我我所。有漏法是空，離我我所；無漏法是空，離我我所。世間法是空，離我我所；出世間法是空，離我我所。有為法是空，離我我所；無為法是空，離我我所。布施波羅蜜多乃至般若波羅蜜多是空，離我我所。內空乃至無性自性空是空，離我我所。真如乃至不思議界是空，離我我所。苦集滅道聖諦是空，離我我所。四念住乃至八聖道支是空，離我我所。空、無相、無願解脫門是空，離我我所。四靜慮、四無量、四無色定是空，離我我所。八解脫乃至十遍處是空，離我我所。淨觀地乃至如來地是空，離我我所。極喜地乃至法雲地是空，離我我所。一切陀羅尼門、三摩地門是空，離我我所。五眼、六神通是空，離我我所。如來十力乃至十八不共法是空，離我我所。三十二大士相、八十隨好是空，離我我所。無忘失法、恒住捨性是空，離我我所。一切智、道相智、一切相智是空，離我我所。預流果乃至獨覺菩提是空，離我我所。一切菩薩摩訶薩行是空，離我我所。諸佛無上正等菩提是空，離我我所。』

復作是言：『汝等應知！色如夢乃至如化，都無自性；受想行識如夢乃至如化，都無自性。眼處如夢乃至如化，都無自性；耳鼻舌身意處如夢乃至如化，都無自性。色處如夢乃至如化，都無自性；聲香味觸法處如夢乃至如化，都無自性。眼界如夢乃至如化，都無自性；耳鼻舌身意識界如夢乃至如化，都無自性。色界如夢乃至如化，都無自性；聲香味觸法界如夢乃至如化，都無自性。眼識界如夢乃至如化，都無自性；耳鼻舌身意識界如夢乃至如化，都無自性。眼觸如夢乃至如化，都無自性；耳鼻舌身意觸如夢乃至如化，都無自性。眼觸為緣所生諸受如夢乃至如化，都無自性；耳鼻舌身意觸為緣所生諸受如夢乃至如化，都無自性。地界如夢乃至如化，都無自性；水火風空識界如夢乃至如化，都無自性。因緣如夢乃至如化，都無自性；等無間緣、所緣緣、增上緣如夢乃至如化，都無自性。從緣所生

諸法如夢乃至如化，都無自性。無明如夢乃至如化，都無自性；行、識、名色、六處、觸、受、愛、取、有、生、老死如夢乃至如化，都無自性。善法如夢乃至如化，都無自性；非善法如夢乃至如化，都無自性。有記法如夢乃至如化，都無自性；無記法如夢乃至如化，都無自性。有漏法如夢乃至如化，都無自性；無漏法如夢乃至如化，都無自性。世間法如夢乃至如化，都無自性；出世間法如夢乃至如化，都無自性。有為法如夢乃至如化，都無自性；無為法如夢乃至如化，都無自性。布施波羅蜜多乃至般若波羅蜜多如夢乃至如化，都無自性。內空乃至無性自性空如夢乃至如化，都無自性。真如乃至不思議界如夢乃至如化，都無自性。苦集滅道聖諦如夢乃至如化，都無自性。四念住乃至八聖道支如夢乃至如化，都無自性。空、無相、無願解脫門如夢乃至如化，都無自性。四靜慮、四無量、四無色定如夢乃至如化，都無自性。八解脫、八勝處、九次第定、十遍處如夢乃至如化，都無自性。淨觀地乃至如來地如夢乃至如化，都無自性。極喜地乃至法雲地如夢乃至如化，都無自性。一切陀羅尼門、三摩地門如夢乃至如化，都無自性。五眼、六神通如夢乃至如化，都無自性。如來十力乃至十八不共法如夢乃至如化，都無自性。三十二大士相、八十隨好如夢乃至如化，都無自性。無忘失法、恆住捨性如夢乃至如化，都無自性。一切智、道相智、一切相智如夢乃至如化，都無自性。預流果乃至獨覺菩提如夢乃至如化，都無自性。一切菩薩摩訶薩行如夢乃至如化，都無自性。諸佛無上正等菩提如夢乃至如化，都無自性。』

復作是言：『汝等應知！此中無色受想行識，無眼處乃至意處，無色處乃至法處，無眼界乃至意識界，無眼識界乃至意識界，無眼觸乃至意觸，無眼觸為緣所生諸受乃至意觸為緣所生諸受，無地界乃至識界，無因緣乃至增上緣，無從緣所生諸法，無無明乃至老死，無善非善法，無有記無記法，無有漏無漏法，無世間出世間法，無有為無為法，無布施波羅蜜多乃至般若波羅蜜多，無內空乃至無性自性空，無真如乃至不思議界，無苦集滅道聖諦，無四念住乃至八聖道支，無空、無相、無願解脫門，無四靜慮、四無量、四無色定，無八解脫乃至十遍處，無淨觀地乃至如來地，無極喜地乃至法雲地，無

一切陀羅尼門、三摩地門，無五眼、六神通，無如來十力乃至十八佛不共法，無三十二大士相、八十隨好，無無忘失法、恒住捨性，無一切智、道相智、一切相智，無預流果乃至獨覺菩提，無一切菩薩摩訶薩行，無諸佛無上正等菩提，無夢、無見夢者，無響、無聞響者，無像、無見像者，無光影、無見光影者，無陽焰、無見陽焰者，無幻、無見幻者，無化、無見化者。』復作是言：『汝等應知！是一切法皆無實事，無性為性。汝等虛妄分別力故，於無蘊中起有蘊想，於無處中起有處想，於無界中起有界想，於無觸中起有觸想，於無受中起有受想。』復作是言：『汝等應知！蘊、處、界等一切法性，皆從緣生，顛倒所起諸業異熟之所攝受，汝等何因於是虛妄無實事法起實事想？』菩薩爾時方便善巧，具大神力，若諸有情有慳貪者，方便拔濟，令離慳貪，是諸有情離慳貪已，教修布施波羅蜜多，是諸有情由布施故，得大財位，富貴自在。復從是處方便拔濟，教修淨戒波羅蜜多，是諸有情由淨戒故，得生善趣，尊貴自在。復從是處方便拔濟，教修安忍波羅蜜多，是諸有情由安忍故，速能獲得無生法忍。復從是處方便拔濟，教修精進波羅蜜多，是諸有情由精進故，乃至無上正等菩提，於諸善法不復退轉。復從是處方便拔濟，教修靜慮波羅蜜多，是諸有情由靜慮故，得生梵世，於初靜慮安住自在；從初靜慮方便拔濟，復令安住第二靜慮；如是展轉，方便拔濟，乃至令住非想非非想處定。復從是處方便拔濟，隨其所宜，令住三乘，或令住四念住乃至八聖道支，或令住三解脫門，或令住八解脫乃至十遍處，或令住四聖諦，或令住六波羅蜜多，或令住內空乃至無性自性空，或令住真如乃至不思議界，或令住極喜地乃至法雲地，或令住陀羅尼門、三摩地門，或令住五眼、六神通，或令住如來十力乃至十八佛不共法，或令住無忘失法、恒住捨性，或令住一切智、道相智、一切相智。

是菩薩摩訶薩方便善巧，若諸有情耽著有為布施、淨戒、安忍、精進、靜慮、般若及餘善法所得果報，以諸方便，安慰濟拔，令住無餘般涅槃界。是菩薩摩訶薩行深般若波羅蜜多方便善巧，成就無色無見無對真無漏法，安住其中，若諸有情應得預流、一來、不還、阿羅漢果、獨覺菩提或復無上正等菩提，示現、勸導、讚勵、慶喜，方便濟拔，或令得預流果，乃至或令

證得無上正等菩提。如是，善現！諸菩薩摩訶薩行深般若波羅蜜多，觀察二空，雖知諸法無不如夢乃至如化，皆非實有，無性為性，自相皆空，而能安立善非善法，廣說乃至是能證得諸佛無上正等菩提，皆無雜亂。」

大般若波羅蜜多經卷第四百六十九

- (03) 爾時，具壽善現白佛言：「世尊！諸菩薩摩訶薩甚為希有，行深般若波羅蜜多，觀察二空，雖知諸法一切如夢、如響、如像、如光影、如陽焰、如幻、如化，皆非實有，無性為性，自相皆空，而能安立善、非善等諸法差別，皆無雜亂。」
- (04) 佛告善現：「如是！如是！如汝所說。諸菩薩摩訶薩甚為希有，行深般若波羅蜜多，觀察二空，雖知諸法皆如夢等，都非實有，無性為性，自相皆空，而能安立善非善等諸法差別，不相雜亂。汝等若知諸菩薩摩訶薩行深般若波羅蜜多時所有甚奇希有之法，聲聞、獨覺皆不成就，不能測量，汝等一切聲聞、獨覺，於諸菩薩摩訶薩辯尚不能對，況餘有情而能酬答。」
- (05) 具壽善現復白佛言：「何等名為諸菩薩摩訶薩行深般若波羅蜜多時所有甚奇希有之法，聲聞、獨覺皆不成就，不能測量？」
- (06) 佛告善現：「諦聽！諦聽！善思念之！吾當為汝分別解說諸菩薩摩訶薩行深般若波羅蜜多時所有甚奇希有之法。善現！諸菩薩摩訶薩行深般若波羅蜜多時，安住異熟布施波羅蜜多乃至般若波羅蜜多，若五神通，若三十七菩提分法，若陀羅尼，若三摩地，若空、無相、無願解脫門，若四靜慮、四無量、四無色定，若八解脫、八勝處、九次第定、十遍處，若餘無量無邊佛法，往十方界，若諸有情應以布施乃至般若而攝受者，則以布施乃至般若而攝受之；應以初靜慮乃至非想非非想處定而攝受者，則以初靜慮乃至非想非非想處定而攝受之；應以慈悲喜捨而攝受者，則以慈悲喜捨而攝受之；應以四念住乃至八聖道支而攝受者，則以四念住乃至八聖道支而攝受之；應以空、無相、無願三摩地而攝受者，則以空、無相、無願三摩地而攝受之；應以諸餘善法而攝受者，則以諸餘善法而攝受之。」
- (07) 具壽善現復白佛言：「云何菩薩摩訶薩行深般若波羅蜜多時，安住異熟波羅蜜多、五神通等無量功德，以布施等攝諸有情？」
- (8a) 佛告善現：「諸菩薩摩訶薩行深般若波羅蜜多時，施諸有情所須之物，謂須飲食施與飲食，若須衣服施與衣服，若須車乘施

與車乘，若須花香施與花香，若須臥具施與臥具，若須舍宅施與舍宅，若須燈明施與燈明，若須醫藥施與醫藥，若須諸餘種種資具，悉皆施與，令無匱乏；或施聲聞、獨覺、菩薩、諸佛世尊衣服、飲食、臥具、醫藥、房舍、資具、諸妙花香、寶幢、幡蓋、伎樂、燈明及蘇油等諸餘供具。如是施時，其心平等，無差別想而行布施，如施持戒，犯戒亦爾；如施人趣，非人亦爾；如施內道，外道亦爾；如施諸聖，異生亦爾；如施尊貴，下賤亦爾。上從諸佛，下至傍生，平等平等，無所分別，不觀施田勝劣有異。所以者何？諸菩薩摩訶薩了達一切自相皆空，空中都無上下差別故，無異想，無所分別而行布施。是菩薩摩訶薩由無異想，無所分別而行布施，當得無異無分別法，謂得圓滿一切相智及餘無量諸佛功德。

善現當知！若菩薩摩訶薩見傍生等有所求乞，便起是心：『此來乞者，若是如來應正等覺真福田故，我應施之。若非如來應正等覺，是傍生等非福田故，不應施與所須資具。』是菩薩摩訶薩起如是心，越菩薩法。所以者何？諸菩薩摩訶薩要淨自心，福田方淨，見求乞者，不應念言：『如是有情，有所求乞，我應布施；如是有情，有所求乞，我不應施。』若作是念，違本所發大菩提心，謂諸菩薩發菩提心，『我為有情，當作依怙、洲渚、舍宅、救護之處。』

見來乞者，應起是心：『今此有情，貧窮孤露，我當以施而攝受之。彼由此緣，不盜他物，少欲喜足，能轉施他，由是因緣，離斷生命，廣說乃至離雜穢語，亦能調伏貪、恚、邪見，身壞命終，乘前福業，生剎帝利大族、或婆羅門大族、或長者大族、或居士大族、或餘隨一富貴家生，豐饒財寶，修諸善業。或因布施，攝受因緣，漸依三乘而趣圓寂，謂令趣證聲聞、獨覺及無上乘般涅槃界。』

復次，善現！若菩薩摩訶薩有諸怨敵，或餘有情，來至其所，為損害故，或有匱乏，求乞身分及諸財物，是菩薩摩訶薩終不應起分別異心：『此應施與，此不應施。』但應發起平等之心，隨求身分及諸財物，悉皆施與。所以者何？是菩薩摩訶薩普為饒益諸有情故，求趣無上正等菩提，不為利樂自身命故。

若當發起分別異心：『此應施與，此不應施。』便為如來應正等覺及諸菩薩、獨覺、聲聞，世間天人、阿素洛等諸聖賢眾，

共所呵責：『誰要請汝發菩提心，誓普利樂諸有情類，無歸依者為作歸依，無舍宅者為作舍宅，無洲渚者為作洲渚，無救護者為作救護，不安樂者令其安樂，而今簡別有施、不施？』

復次，善現！若菩薩摩訶薩行深般若波羅蜜多時，有人非人來至其所，求乞種種髓腦、支節，是菩薩摩訶薩不應發起分別二心為施、不施，唯作是念：『隨彼所求，定當施與。』

所以者何？是菩薩摩訶薩常作是念：『我為利樂諸有情故，而受此身，諸有來求，定當施與，不應不施。』

故見乞者，便起是心：『吾今此身，本為他受，彼不來取，尚應自送，況來求乞，而當不與。』

作是念已，歡喜踊躍，自解支節，而授與之，復自慶言：『今獲大利，謂捨雜穢，得純淨身。』

善現！諸菩薩摩訶薩行深般若波羅蜜多，應如是學。

復次，善現！若菩薩摩訶薩見乞求者，便起是心：『今於此中，誰施？誰受？所施何物？由何而施？為何而施？云何而施？諸法自性皆不可得。所以者何？如是諸法皆畢竟空，非空法中，有與有奪，有施有受。』

善現！諸菩薩摩訶薩行深般若波羅蜜多時，應如是學。諸法皆空，所謂或由內空故空，乃至或由無性自性空故空。是菩薩摩訶薩安住此空而行布施，恒無間斷，圓滿布施波羅蜜多，由此布施波羅蜜多得圓滿故，為他割截、劫奪一切內外物時，其心都無分別瞋恨，但作是念：『有情及法，一切皆空，誰割截我？誰劫奪我？誰復受之？誰作是觀？』

〔段落（8b）移到（12f） - （12g）之間〕

【第 68 義】：智法身（VIII-2）

『U』1 順菩提分法，2 無量及 3 解脫，4 九次第等至，5 十遍處自體。6 最為殊勝處，差別有八種，7 無諍與 8 願智，9 神通 10 無礙解。11 四一切清淨，12 十自在 13 十力，14 四種無所畏，及 15 三種不護。16 並三種念住，17 無忘失法性，18 永害諸隨眠，19 大悲諸眾生。20 唯佛不共法，說有十八種，及 21 一切相智，說名為法身。

◎此智法身分二十一聚：

『U1』第一聚謂三十七菩提分法。

『U2』第二聚謂慈等四無量心。

- 『U3』 第三聚有色觀色等八解脫。
- 『U4』 第四聚謂九次第等至。此等如前已說。
- 『U5』 第五聚謂十遍處：增上緣依止靜慮，所緣緣為地水火風四大種及青黃赤白四大種所造並空識二境，令其如欲，遍一切處世間定慧相應之十種等至也。
所餘諸處不立為遍處者，以諸根不能向外展，聲處不能相續，香味二處色界無故。遍者，謂相續普遍開展義。
- 『U6』 第六聚八勝處，謂內有色想外觀色多勝處及少勝處，內無色想外觀色多勝處及少勝處。此四是形色勝處。
青勝處、黃勝處、赤勝處、白勝處，此四是顯色勝處。
由此形、顯諸勝處，發生奢摩他勝知與毗鉢舍那勝見之定慧相應也。
前四勝處從初二解脫因生，後四勝處從淨解脫因生。
- 『U7』 第七聚謂無諍，由佛無諍三摩地力，能令眾生有拔除煩惱之功能也。
- 『U8』 第八聚謂願智，乃至生死未空，隨願成辦眾生義利也。
- 『U9』 第九聚謂六神通。
- 『U10』 第十聚謂四無礙解，如前已說。
- 『U11』 第十一聚謂四一切種清淨：所依身清淨、所緣受用清淨、心三摩地清淨、智清淨，是為究竟四清淨。
- 『U12』 第十二聚謂十自在，能住壽一卻名壽自在，於無數三摩地獲得自在名心自在，已得虛空藏定名資具自在，開示一切工巧藝術等事業名事業自在，能隨願而受生名生自在，能現佛身充滿一切世界名勝解自在，成就無數調伏眾生大願名願自在，能於一時頓現無量神變調伏眾生名神通自在，獲得殊勝四無礙解名智自在，如欲能演十二分教名法自在。
- 『U13』 第十三聚謂十力。
- 『U14』 第十四聚謂四無畏，如前已說。
- 『U15』 第十五聚謂三不護，如來身、語、意行究竟清淨故，不恐他知三業邪行而護過失也。
- 『U16』 第十六聚謂三念住，佛說法時於善聽者不起貪心，於不善聽者不起瞋心，於間雜者不起二心，唯念住於捨也。
- 『U17』 第十七聚謂不忘失法，利益有情不越時也。
- 『U18』 第十八聚謂永害隨眠，永斷煩惱、所知二障之習氣種子也。

『U19』第十九聚謂大悲心，晝夜六時以饒益心恒觀一切眾生誰已成熟，誰未成熟，誰成增上生器，誰成決定勝器。

『U20』第二十聚謂佛十八不共法，如前已說。

『U21』第二十一聚，謂一切相智，「及」字亦攝究竟道相智、一切智。

——如是二十一聚無漏智，即說名智法身也。

(09) 具壽善現白言：「世尊！諸菩薩摩訶薩為亦能得一切相智？」

(10) 佛告善現：「如是！如是！諸菩薩摩訶薩亦名能得一切相智。」

(11) 具壽善現復白佛言：「若菩薩摩訶薩亦名能得一切相智，與佛世尊有何差別？」

(12a) 佛告善現：「諸菩薩摩訶薩名為隨得一切相智，諸佛世尊名為已得一切相智。所以者何？非諸菩薩與佛世尊條然有異，謂諸菩薩與佛世尊俱住諸法無差別性，於諸法相求正遍知，說名菩薩，若至究竟，名佛世尊。然佛世尊於一切法自相、共相照了無闇，清淨具足，在因位時，名為菩薩，若至果位，名佛世尊。是謂菩薩與佛世尊雖俱名得一切相智，而有差別。善現！是名菩薩摩訶薩世間法施，諸菩薩摩訶薩依因如是世間法施，復能修行出世法施，謂諸菩薩摩訶薩行深般若波羅蜜多時方便善巧，先施有情世間善法，後令厭離世間善法，安住出世無漏聖法，乃至令得一切智智。」

(12b) 善現！云何名為出世聖法，諸菩薩摩訶薩為諸有情宣說、開示、分別、顯了，說名法施？善現！一切不共異生善法，若正修學，令諸有情超出世間安隱而住，謂三十七菩提分法、三解脫門、八解脫、九次第定、四聖諦智、波羅蜜多、諸空等智、菩薩十地、五眼、六神通、如來十力、四無所畏、四無礙解、十八佛不共法、大慈大悲大喜大捨、三十二大士相、八十隨好、一切陀羅尼門、一切三摩地門，諸如是等無漏善法，一切皆名出世聖法。若菩薩摩訶薩為諸有情宣說、開示、分別、顯了如是諸法，名為菩薩出世法施。

(12c) 『U1』善現！此中云何名為三十七種菩提分法？謂四念住、四正斷、四神足、五根、五力、七等覺支、八聖道支。善現！如是名為三十七種菩提分法。

○善現！四念住者，謂菩薩摩訶薩於內身、外身、內外身住循身觀，具足正勤、正知、正念，除世貪憂，住身集觀，住身滅

觀，由彼於身住循身觀，住身集觀，住身滅觀，無所依止，於諸世間無所執受，是為第一，於受、於心、於法亦爾，是名四念住。

○善現！四正斷者，謂菩薩摩訶薩為令未生惡不善法永不生故，為令已生惡不善法永斷滅故，為令未生善法生故，為令已生善法堅住不忘，修滿倍增，廣大智作證故，生起樂欲，發勤精進，策心持心，是名四正斷。

○善現！四神足者，謂菩薩摩訶薩欲三摩地斷行成就修習神足、勤三摩地斷行成就修習神足、心三摩地斷行成就修習神足、觀三摩地斷行成就修習神足，依止厭，依止離，依止滅，迴向於捨，是名四神足。

○善現！五根者，謂菩薩摩訶薩信根、精進根、念根、定根、慧根，是名五根。

○善現！五力者，謂菩薩摩訶薩信力、精進力、念力、定力、慧力，是名五力。

○善現！七等覺支者，謂菩薩摩訶薩念等覺支、擇法等覺支、精進等覺支、喜等覺支、輕安等覺支、定等覺支、捨等覺支，是名七等覺支。

○善現！八聖道支者，謂菩薩摩訶薩正見、正思惟、正語、正業、正命、正精進、正念、正定，是名八聖道支。

◎善現！三解脫門者，謂菩薩摩訶薩空、無相、無願解脫門。云何空解脫門？謂菩薩摩訶薩以空、無我行相，攝心一趣，是名空解脫門。云何無相解脫門？謂菩薩摩訶薩以滅、寂靜行相，攝心一趣，是名無相解脫門。云何無願解脫門？謂菩薩摩訶薩以苦、無常行相，攝心一趣，是名無願解脫門。

『U3』善現！八解脫者，謂菩薩摩訶薩有色觀諸色，是第一解脫。內無色想，觀外諸色，是第二解脫。淨勝解身作證，是第三解脫。超一切色想，滅有對想，不思惟種種想，入無邊空，空無邊處定具足住，是第四解脫。超一切空無邊處，入無邊識，識無邊處定具足住，是第五解脫。超一切識無邊處，入無少所有，無所有處定具足住，是第六解脫。超一切無所有處，入非想非非想處定具足住，是第七解脫。超一切非想非非想處，入滅想受定具足住，是第八解脫。

『U4』善現！九次第定者，謂菩薩摩訶薩離欲惡不善法，有尋有伺，離生喜樂，初靜慮具足住，是第一次第定。尋伺寂靜，內等淨，心一趣性，無尋無伺，定生喜樂，第二靜慮具足住，是第二次第定。離喜住捨，正念正知，身受樂，聖說應捨，具念樂住，第三靜慮具足住，是第三次第定。斷樂斷苦，先喜憂沒，不苦不樂，捨念清淨，第四靜慮具足住，是第四次第定。超一切色想，滅有對想，不思惟種種想，入無邊空，空無邊處定具足住，是第五次第定。如是乃至超一切非想非非想處，入滅想定具足住，是第九次第定。

◎善現！四聖諦智者，謂菩薩摩訶薩苦智、集智、滅智、道智，是名四聖諦智。

◎善現！波羅蜜多者，謂菩薩摩訶薩布施、淨戒、安忍、精進、靜慮、般若、方便善巧、妙願、力、智波羅蜜多，是名波羅蜜多。

◎善現！諸空等智者，謂菩薩摩訶薩內空乃至無性自性空智，及真如乃至不思議界智，是名諸空等智。

◎善現！菩薩十地者，謂菩薩摩訶薩極喜地、離垢地、發光地、焰慧地、極難勝地、現前地、遠行地、不動地、善慧地、法雲地，是名菩薩十地。

◎善現！五眼者，謂菩薩摩訶薩所求肉眼、天眼、聖慧眼、法眼、佛眼，是名五眼。

『U7』善現！六神通者，謂菩薩摩訶薩所學神境智證通、天眼智證通、天耳智證通、他心智證通、宿住隨念智證通、漏盡智證通，是名六神通。

『U13』復次，善現！如來十力者，若諸如來應正等覺於是處如實知是處，於非處如實知非處，是第一力。若諸如來應正等覺於諸有情過去未來現在諸業及諸法受處因異熟，皆如實知，是第二力。若諸如來應正等覺於諸世間非一、種種諸界差別，皆如實知，是第三力。若諸如來應正等覺於諸世間非一、種種勝解差別，尋伺有異，皆如實知，是第四力。若諸如來應正等覺於諸有情補特伽羅諸根勝劣，皆如實知，是第五力。若諸如來應正等覺於遍趣行，皆如實知，是第六力。若諸如來應正等覺普於一切靜慮、解脫、等持、等至、雜染、清淨、安立差別，皆如實知，是第七力。若諸如來應正等覺以淨天眼超過於人，

見諸有情死時生時諸善惡事，如是有情因身、語、意三種惡行，因諸邪見，因謗賢聖，墮諸惡趣，如是有情因身、語、意三種妙行，因諸正見，因讚賢聖，生諸善趣；復以天眼清淨過人，見諸有情死時生時好色惡色，從此復生善趣惡趣，於諸有情，隨業勢力，生善惡趣，皆如實知，是第八力。若諸如來應正等覺於諸有情過去無量諸宿住事，或一生、或十生、或百生、或千生、或無量生、或一劫、或十劫、或百劫、或千劫、或無量劫，所有諸行、諸說、諸相，皆如實知，是第九力。若諸如來應正等覺於諸漏盡無漏心解脫、無漏慧解脫，皆如實知，於自漏盡真解脫法，自證通慧，具足而住，如實覺受：我生已盡，梵行已立，所作已辦，不受後有，是第十力。如是名為如來十力。

『U14』善現！四無所畏者，若諸如來應正等覺自稱我是正等覺者，設有沙門、若婆羅門、若天魔梵、若餘世間，依法立難，或令憶念：『佛於是法，非正等覺。』我於彼難，正見無因，以於彼難，正見無因，得安隱住，無怖無畏，自稱我處大仙尊位，於大眾中正師子吼，轉大梵輪，一切沙門、若婆羅門、若天魔梵、若餘世間，定無有能如法轉者，是第一無畏。若諸如來應正等覺自稱我已永盡諸漏，設有沙門、若婆羅門、若天魔梵、若餘世間，依法立難，或令憶念：『佛於是漏，猶未永盡。』我於彼難，正見無因，以於彼難，正見無因，得安隱住，無怖無畏，自稱我處大仙尊位，於大眾中正師子吼，轉大梵輪，一切沙門、若婆羅門、若天魔梵、若餘世間，定無有能如法轉者，是第二無畏。若諸如來應正等覺自稱我為諸弟子眾，說能障法，染必為障，設有沙門、若婆羅門、若天魔梵、若餘世間，依法立難，或令憶念：『有染是法，不能為障。』我於彼難，正見無因，以於彼難，正見無因，得安隱住，無怖無畏，自稱我處大仙尊位，於大眾中正師子吼，轉大梵輪，一切沙門、若婆羅門、若天魔梵、若餘世間，定無有能如法轉者，是第三無畏。若諸如來應正等覺自稱我為諸弟子眾說出離道，諸聖修習，決定出離，決定通達，正盡眾苦，作苦邊際，設有沙門、若婆羅門、若天魔梵、若餘世間，依法立難，或令憶念：『有修此道，非正出離，非正通達，非正盡苦，非作苦邊。』我於彼難，正見無因，以於彼難，正見無因，得安隱住，無怖無畏，

自稱我處大仙尊位，於大眾中正師子吼，轉大梵輪，一切沙門、若婆羅門、若天魔梵、若餘世間，定無有能如法轉者，是第四無畏。如是名為四無所畏。

『U10』善現！四無礙解者，謂義無礙解、法無礙解、詞無礙解、辯無礙解，如是名為四無礙解。善現！云何義無礙解？謂緣義無礙智。云何法無礙解？謂緣法無礙智。云何詞無礙解？謂緣詞無礙智。云何辯無礙解？謂緣辯無礙智。

『U20』善現！十八佛不共法者，謂諸如來應正等覺常無誤失，無卒暴音，無忘失念，無不定心，無種種想，無不擇捨，志欲無退，精進無退，憶念無退，般若無退，解脫無退，解脫智見無退，若智若見於過去世無著無礙，若智若見於現在世無著無礙，若智若見於未來世無著無礙，一切身業，智為前導，隨智而轉，一切語業，智為前導，隨智而轉，一切意業，智為前導，隨智而轉，是名十八佛不共法。

聲聞無諍定，離見者煩惱，佛無諍永斷，聚落等煩惱。
佛所有願智，任運無礙著，無障礙常住，普答一切問。

◎如來無諍三摩地，勝出聲聞等之無諍三摩地：

- 以聲聞之無諍三摩地，唯斷自身為眾生作生煩惱之所緣緣。
- 佛之無諍三摩地，謂入聚落等時，能盡斷除見自眾生身中之煩惱故。

◎又如來願智，勝出聲聞等之願智：

- 佛者無少功用相故任運而轉，無執著故不貪著色等，永斷二障故於一切所知智無障礙，乃至生死未空，三摩地作用安住故恒常而住，由得四無礙解故能普答一切問。
- 聲聞等之願智則不能爾。

若善因成熟，於彼彼所化，爾時能饒益，即於彼彼現。
如天雖降雨，種壞不發芽，諸佛雖出世，無根不獲善。

- 若佛現身饒益有情者，須彼有情已集善根，要由值遇善知識等宿植善根，遇佛等之因勢力成熟，於彼彼所化彼時彼處現身說法能有益，乃於彼彼所化現身說法故。

○於未集資糧之有情，則不如是現，由彼眾生業障障蔽，不具現佛之因故。

○諸佛世尊雖出世間，亦有一類眾生不獲聞法等善根，以彼等無親見佛之善根故。譬如天雖降雨，然焦爛之種不發青芽也。

如是事廣大，故說佛為遍，即此無盡故，亦可說為常。

○諸佛世尊可說為「遍」，如上所說若有眾生調伏時至，則一切時處現身說法，作廣大利他事故。

○事業相續亦可說為「常」，乃至生死未終安住利他時無盡故。

【第 69 義】：受用身 (VIII-3)

許三十二相，八十隨好性，受用大乘故，名佛受用身。

◎三十二相、八十隨好為性之能仁色身，許為圓滿受用身，圓滿受用大乘法等五種決定所別之身故。五決定者，謂：

a 處決定，唯住色究竟天宮。

b 身決定，唯是相好圓明莊嚴之身。

c 眾決定，唯聖菩薩之所圍繞。

d 法決定，唯說大乘之法。

e 時決定，乃至生死未空而住。

一、[釋相]

『V』1 手足輪相具，2 足底如龜腹，3 手足指網連，4 柔軟極細嫩。5 身七處充滿，6 手足指纖長，7 跟廣 8 身洪直，9 足膝骨不突。10 諸毛皆上靡，11 踰如髻泥耶，12 雙臂形長妙，13 陰藏密第一。14 皮金色 15 細薄，16 孔一毛右旋，17 眉間毫相嚴，18 上身如獅子。19 膊圓實 20 項豐，21 非勝現勝昧，22 身量縱橫等，譬諾瞿陀樹。23 頂肉髻圓顯，24 舌廣長 25 梵音，26 兩頰如獅王，27 齒潔白 28 平齊。29 諸齒極細密，30 數量滿四十，31 紺目 32 牛王睫，妙相三十二。

此中此相，所有能生因，由彼彼圓滿，能感此諸相。

迎送師長等，正受堅固住，習近四攝事，布施妙資財。

救放所殺生，增長受善等，是能生因相，如《經》所宣說。

- 『V1』由昔於有學道時極善迎送師長等故，感得能仁手足具足輪相。
- 『V2』由昔正受律儀堅固安住故，感得足下平整如龜腹狀。
- 『V3』由昔修習四攝事故，感得手足指間縵網相連猶如鵝王。
- 『V4』由昔布施善妙食物等故，感得手足柔軟細嫩。
- 『V5』由昔布施善妙飲物等故，感得佛身手足四背（漢文經謂掌）雙肩及頸七處充滿。
- 『V6』由昔救脫被殺被縛被打有情故，感得手足諸指纖長可愛。
- 『V7』由昔饒益他活命故，感得足跟寬廣。
- 『V8』由昔離殺生故，感得佛身洪直。
- 『V9』由昔正受布施等善法故，感得足踝膝骨皆不突現。
- 『V10』由昔自所行善轉增長他故，感得諸毛皆悉上靡。
- 『V11』由昔將醫方明工巧明等傳授他故，感得雙端漸次細圓如堅泥耶端。
- 『V12』由昔不捨諸來求財者故，感得雙臂長妙。
- 『V13』由昔安立一切有情於梵行律儀，及善防護秘密語故，感得陰相藏密最為第一。
- 『V14』由昔施他妙敷具故，感得皮如金色清淨鮮明。
- 『V15』由昔施他勝宮殿故，感得身皮細薄潤滑。
- 『V16』由昔遠離憤鬧散亂等故，感得一一毛孔唯一毛生皆向右旋。
- 『V17』由昔敬承一切眾生及師長等，亦令他敬事故，感得眉間毫相莊嚴，量如橄欖核許，形如銀管，潔白軟柔，展長三肘，縮即右旋毫端上靡。
- 『V18』由昔未曾輕毀他故，感得上身猶如獅子。
- 『V19』由昔隨順他善說故，感得臂膊圓實。
- 『V20』由昔施他醫藥等故，感得雙肩之中項部極善豐滿。
- 『V21』由昔承事眾生作看病人等故，感得於非上味中亦得上味。
- 『V22』由昔建造園林等故，感得身量與弓相等如諾瞿陀樹。
- 『V23』由昔施他寺院等故，感得頂上烏瑟尼沙高顯周圓。
- 『V24』由昔三無數卻說和愛語等故，感得舌相薄淨廣長如紅蓮色。
- 『V25』由昔一音為一切世界有情宣說正法故，感得成就五支梵音。
- 『V26』由昔遠離綺語過故，感得兩頰如獅子王。
- 『V27』由昔承事稱讚一切眾生故，感得齒潔白相。
- 『V28』由昔遠離邪命正命清淨故，感得齒平齊相。

『V29』由昔修諦實語故，感得齒細密相。

『V30』由昔遠離離間語故，感得整四十齒。

『V31』由昔視一切眾生如一子故，感得眼如紺青寶相。

『V32』由昔視一切眾生無貪瞋故，感得兩眼上下睫毛不相雜亂猶如牛王。

——此等即是三十二相。

◎能仁圓滿報身定能感得此三十二相，謂由能感此此諸相之彼彼因，皆圓滿故。迎送師長等因，隨各各相時已廣宣說。此等名為相者，由誰具足此相，即能表現彼是大丈夫故。

(12d)『V1』-『V32』復次，善現！三十二大士相者，謂如來足下，有平滿相，妙善安住，猶如奩底，地雖高下，隨足所蹈，皆悉坦然，無不等觸，是為第一。如來足下，千輻輪文，輞轂眾相，無不圓滿，是為第二。如來手足，悉皆柔軟，如睹羅綿，勝過一切，是為第三。如來手足，一一指間，猶如鴈王，咸有鞞網，金色交絡，文同綺畫，是為第四。如來手足，所有諸指，圓滿纖長，甚可愛樂，是為第五。如來足跟，廣長圓滿，與趺相稱，勝餘有情，是為第六。如來足趺，脩高充滿，柔軟妙好，與跟相稱，是為第七。如來雙踰，漸次纖圓，如豎泥耶仙鹿王踰，是為第八。如來雙臂，脩直庸圓，如象王鼻，平立摩膝，是為第九。如來陰相，勢峰藏密，其猶龍馬，亦如象王，是為第十。如來毛孔，各一毛生，柔潤紺青，右旋宛轉，是第十一。如來髮毛，端皆上靡，右旋宛轉，柔潤紺青，嚴金色身，甚可愛樂，是第十二。如來身皮，細薄潤滑，塵垢水等，皆所不住，是第十三。如來身皮，皆真金色，光潔晃曜，如妙金臺，眾寶莊嚴，眾所樂見，是第十四。如來兩足、二手掌中、頸及雙肩，七處充滿，是第十五。如來肩項，圓滿殊妙，是第十六。如來膊腋，悉皆充實，是第十七。如來容儀，洪滿端直，是第十八。如來身相，修廣端嚴，是第十九。如來體相，縱廣量等，周匝圓滿，如諾瞿陀，是第二十。如來頷臆并身上半，威容廣大，如師子王，是二十一。如來常光，面各一尋，是二十二。如來齒相，四十齊平，淨密根深，白逾珂雪，是二十三。如來四牙，鮮白鋒利，是二十四。如來常得味中上味，是二十五。如來舌相，薄淨廣長，能覆面輪，至耳髮際，是二十六。如來梵音，詞韻弘雅，隨眾多少，無不等聞，其聲洪震，猶如天鼓，發言婉約，

如頻迦音，是二十七。如來眼睫，猶若牛王，紺青齊整，不相雜亂，是二十八。如來眼睛，紺青鮮白，紅環間飾，皎潔分明，是二十九。如來面輪，其猶滿月，眉相皎淨，如天帝弓，是第三十。如來眉間，有白毫相，右旋柔軟，如睹羅綿，鮮白光淨，逾珂雪等，是三十一。如來頂上烏瑟膩沙，高顯周圓，猶如天蓋，是三十二。

是名三十二大士相。

大般若波羅蜜多經卷第四百七十

二、[釋隨好]

『W』1 佛爪赤銅色，2 潤澤 3 高 4 諸指圓 5 滿而 6 纖長，7 脈不現 8 無結。9 踝隱 10 足平隱，11 行步如獅 12 象，13 鵝 14 牛王 15 右旋，16 妙 17 直進 18 堅密。19 光潔 20 身相稱，21 潔淨 22 軟 23 清淨，24 眾相皆圓滿，25 身廣大微妙。26 步庠序 27 雙目清淨 28 身細嫩，29 身無怯 30 充實，31 其身善策勵。32 支節善開展，33 顧視淨無翳，34 身圓而 35 相稱，36 無歪 37 身平整。38 臍深 39 臍右旋，40 為眾所樂見，41 行淨 42 身無疣，43 無諸黑鬣點。44 手軟如木棉，45 手文明 46 深長，47 面門不太長，48 唇紅如頻婆。49 舌柔軟 50 微薄，51 赤紅 52 發雷音，53 語美妙 54 牙圓，55 鋒利 56 白 57 平齊，58 漸細 59 鼻高修，60 清淨最第一，61 眼廣 62 眼睫密，63 猶如蓮華葉。64 眉修長 65 細軟，66 潤澤 67 毛齊整，68 手長滿 69 耳齊，70 耳輪無過失。71 額部善分展，72 開廣 73 頂周圓，74 髮紺青如蜂，75 稠密 76 軟 77 不亂。78 不澀 79 出妙香，能奪眾生意，80 德紋相吉祥，是為佛隨好。

◎佛受用身有八十隨好：

『W1』由於一切諸行離貪愛究竟故，感得能仁爪如赤銅色，鮮紅光明。

『W2』由於一切有情增上利益意樂到究竟故，爪色潤澤。

『W3』由於上等族姓生故，爪甲高起。

『W4』由行境無罪故，諸指圓形。

『W5』由集善根究竟故，諸指豐滿。

『W6』由漸次修三種智德故，指漸細長。

『W7』由昔善護十不善業道及邪命故，筋脈不現。

- 『W8』由已解煩惱結故，筋脈無結。
- 『W9』由能了知甚深密義，踝骨不現。
- 『W10』由從生死等難可行處度諸眾生故，足無不平。
- 『W11』由善巧映覆人故，行步如獅子。
- 『W12』由善巧映覆龍故，行步如象王。
- 『W13』由善巧騰空故，行步如鵝王。
- 『W14』由善引有情至安樂處故，行步如牛王。
- 『W15』由順繞路而行故，回身右旋。
- 『W16』由行步善巧端莊故，行步善妙。
- 『W17』由心常無曲屈故，行步直進。
- 『W18』由稱讚他功德故，身盤緊密。
- 『W19』由不染著諸惡法故，其身光潔。
- 『W20』由說稱機法故，身次第相稱。
- 『W21』由行清淨故，身最潔淨。
- 『W22』由心具大悲故，身柔妙。
- 『W23』由意垢清淨故，身善清淨。
- 『W24』由法毗奈耶圓滿故，眾相圓滿。
- 『W25』為他說廣妙功德圓滿故，身廣大微妙。
- 『W26』於一切有情心平等故，行步安庠平等。
- 『W27』由說清淨法故，雙目清淨無翳。
- 『W28』由說易解法故，身極細嫩。
- 『W29』由於難行處心不退故，身容無怯弱。
- 『W30』由修善根勝出一切世間故，身最充實。
- 『W31』由盡後有故，身善策勵。
- 『W32』由善分別緣起順逆故，支節善開展。
- 『W33』由說清淨法義故，顧視清淨無翳。
- 『W34』由弟子戒圓滿故，其身圓滿。
- 『W35』由未染著生死過故，身部相稱。
- 『W36』由摧伏我慢故，身無歪倒。
- 『W37』由說無盡法故，身相平整無諸高下。
- 『W38』由通達甚深法故，臍底深妙。
- 『W39』由弟子受持順自之教授故，臍紋右旋。
- 『W40』由諸徒眾行端嚴故，威儀端莊眾所樂見。
- 『W41』由意淨故，三業行淨。

- 『W42』由於非時不說法毗奈耶故，身無疣贅及諸黥點。
- 『W43』由說身等安樂法故，雙手柔軟如睹羅棉。
- 『W44』由得光明大沙門故，手文光明。
- 『W45』由住甚深法故，手文甚深。
- 『W46』由數數說真淨法故，手文長直。
- 『W47』由為眾生宣說眾多學處故，面門不太長。
- 『W48』由通達一切世間猶如影像故，唇紅如頻婆果。
- 『W49』由柔和語調伏眾生故，舌極柔軟。
- 『W50』由說眾多功德正理故，舌極微薄。
- 『W51』由所說法毗奈耶，諸著我我所之凡夫難測度故，舌赤紅色。
- 『W52』由無一切怖畏故，語具雷聲。
- 『W53』由說和愛語故，音韻美妙。
- 『W54』防護三有結使故，四牙圓整。
- 『W55』調伏難調故，四牙鋒利。
- 『W56』降伏煩惱，法毗奈耶最潔白故，四牙潔白。
- 『W57』安住通達生死涅槃平等地故，四牙相齊。
- 『W58』漸說三乘現觀故，四牙漸細。
- 『W59』安住方便所持勝慧故，鼻相高修。
- 『W60』具足眾生信仰淨行故，鼻清淨。
- 『W61』由說廣大法故，眼目寬廣。
- 『W62』由度眾生出生死故，眼睫厚密。
- 『W63』能令眾生歡喜稱讚故，眼目青白分明圓滿，如蓮花葉。
- 『W64』由常時回顧諸有情故，雙眉修長。
- 『W65』由善巧和緩調伏非以五火炙身等故，眉毛細軟。
- 『W66』意為善故，雙眉潤澤。
- 『W67』遍見貪等過患故，眉毛齊整。
- 『W68』由遮遣有情損害故，手長圓滿。
- 『W69』由戰勝貪等故，兩耳相齊。
- 『W70』令諸有情相續不壞故，耳根不壞。
- 『W71』不由邊執見等擾動心故，額部與發際極善分展。
- 『W72』由摧壞一切邪說故，額部開展寬大。
- 『W73』由圓滿勝願故，頂圓如蓋。
- 『W74』由於色等斷除貪愛故，發紺青色如蜂。
- 『W75』遍盡見修所斷隨眠故，頭髮稠密。

『W76』由說聖教妙慧遍知故，頭髮柔軟。

『W77』由意不為貪等亂故，頭髮不亂。

『W78』常時不說粗惡語故，發不粗澀。

『W79』由於三寶前散佈妙花故，發出妙香奪眾生意。

『W80』手足拇指有德紋相猶如金剛，手足掌中有四方吉祥紋，其外無名指等有七紋右旋而善莊嚴。

——此八十種名佛隨好者，由身外現功德相表內心功德故。

(12e) 『W1』-『W80』復次，善現！八十隨好者，謂如來指爪，狹長薄潤，光潔鮮淨，如花赤銅，是為第一。如來手足，指圓纖長，映直柔軟，節骨不現，是為第二。如來手足，各等無差，於諸指間，悉皆充密，是為第三。如來手足，圓滿如意，軟淨光澤，色如蓮花，是為第四。如來筋氣，盤結堅固，深隱不現，是為第五。如來兩踝，俱隱不現，是為第六。如來行步，直進庠審，如龍象王，是為第七。如來行步，威容齊肅，如師子王，是為第八。如來行步，安平庠序，不過不減，猶如牛王，是為第九。如來行步，進止儀雅，其猶鵝王，是為第十。如來迴顧，必皆右旋，如龍象王，舉身隨轉，是第十一。如來支節，漸次映圓，妙善安布，是第十二。如來骨節，交結無隙，猶若龍盤，是第十三。如來膝輪，妙善安布，堅固圓滿，是第十四。如來隱處，其文妙好，威勢具足，圓滿清淨，是第十五。如來身支，潤滑柔軟，光悅鮮淨，塵垢不著，是第十六。如來身容，敦肅無畏，常不怯弱，是第十七。如來身支，堅固稠密，善相屬著，是第十八。如來身支，安定敦重，曾不掉動，圓滿無壞，是第十九。如來身相，猶若仙王，周匝端嚴，光淨離翳，是第二十。如來身有周匝圓光，於行等時，恒自照曜，是二十一。如來腹形，方正無欠，柔軟不現，眾相莊嚴，是二十二。如來臍深，右旋圓妙，清淨光澤，是二十三。如來臍厚，不窪不凸，周匝妙好，是二十四。如來皮膚，遠離疥癬，亦無黧點、疣贅等過，是二十五。如來手掌，充滿柔軟，足下安平，是二十六。如來手文，深長明直，潤澤不斷，是二十七。如來脣色，光潤丹暉，如頻婆果，上下相稱，是二十八。如來面門，不長不短，不大不小，如量端嚴，是二十九。如來舌相，軟薄廣長，如赤銅色，是第三十。如來發聲，威震深遠，如象王吼，明朗清徹，是三

十一。如來音韻，美妙具足，如深谷響，是三十二。如來鼻高，脩而且直，其孔不現，是三十三。如來諸齒，方整鮮白，是三十四。如來諸牙，圓白光潔，漸次鋒利，是三十五。如來眼淨，青白分明，是三十六。如來眼相脩廣，猶如青蓮花葉，甚可愛樂，是三十七。如來眼睫，上下齊整，稠密不白，是三十八。如來雙眉，長而不白，緻而細軟，是三十九。如來雙眉，綺靡順次，紺琉璃色，是第四十。如來雙眉，高顯光潤，形如初月，是四十一。如來耳厚，廣大脩長，輪埵成就，是四十二。如來兩耳，綺麗齊平，離眾過失，是四十三。如來容儀，能令見者，無損無染，皆生愛敬，是四十四。如來額廣，圓滿平正，形相殊妙，是四十五。如來身分，上下圓滿，如師子王，威嚴無對，是四十六。如來頭髮，脩長紺青，稠密不白，是四十七。如來頭髮，香潔細軟，潤澤旋轉，是四十八。如來頭髮，齊整無亂，亦不交雜，是四十九。如來頭髮，堅固不斷，永無[遞]落，是第五十。如來頭髮，光滑殊妙，塵垢不著，是五十一。如來身分，堅固充實，逾那羅延，是五十二。如來身體，長大端直，是五十三。如來諸竅，清淨圓好，是五十四。如來身支，勢力殊勝，無與等者，是五十五。如來身相，眾所樂觀，嘗無厭足，是五十六。如來面輪，脩廣得所，皎潔光淨，如秋滿月，是五十七。如來顏貌，舒泰光顯，含笑先言，唯向不背，是五十八。如來面貌，光澤熙怡，遠離頻蹙、青赤等過，是五十九。如來身支，清淨無垢，常無臭穢，是第六十。如來身所有諸毛孔中，常出如意微妙之香，是六十一。如來面門，常出最上殊勝之香，是六十二。如來頭相，周圓妙好，如末達那，亦猶天蓋，是六十三。如來身毛，紺青光淨，如孔雀項，紅暉綺飾，色類赤銅，是六十四。如來法音，隨眾大小，不增不減，應理無差，是六十五。如來頂相，無能見者，是六十六。如來手足，指約分明，莊嚴妙好，如赤銅色，是六十七。如來行時，其足去地，如四指量，而現印文，是六十八。如來自持，不待他衛，身無傾動，亦不透迤，是六十九。如來威德，遠震一切，惡心見喜，恐怖見安，是第七十。如來音聲，不高不下，隨眾生意，和悅與言，是七十一。如來能隨諸有情類言音意樂而為說法，是七十二。如來一音演說正法，隨有情類，各令得解，是七十三。如來說法，咸依次第，必有因緣，言無不善，是七十四。如來等觀諸

有情類，讚善毀惡而無愛憎，是七十五。如來所為，先觀後作，軌範具足，令識善淨，是七十六。如來相好，一切有情無能觀盡，是七十七。如來頂骨，堅實圓滿，是七十八。如來顏容，常少不老，好巡舊處，是七十九。如來手足及胸臆前，俱有吉祥喜旋德相，文同綺畫，色類朱丹，是第八十。如是名為八十隨好。

【第 70 義】：化身 (VIII-4)

若乃至三有，於眾生平等，作種種利益，佛化身無斷。

◎此分生化身、巧化身、勝應身之三。

○例如釋迦世尊，初如為天子時，次如現乾闥婆王時，三如釋迦能仁也。

○又生化身亦現為禽獸、河橋、樹木等。

◎若有乃至三有未空，於淨不淨眾生，同時而作增上生決定勝等種種利益之身，即能仁佛世尊之化身，以是不具五種決定所顯之究竟色身故。

◎佛作事業亦常無間斷，乃至生死未空於一切世界事業相續無斷故。

(12f) 善現！如來應正等覺成就如是諸相好故，身光任運，能照三千大千世界，無不遍滿，若作意時，即能普照無量無邊無數世界，然為憐愍諸有情故，攝光常照，面各一尋，若縱身光，即日月等所有光明，皆悉不現，諸有情類便不能知晝夜、半月、月時、歲數，所作事業，有不得成。

佛聲任運，能遍三千大千世界，若作意時，即能遍滿無量無邊無數世界，然為利樂諸有情故，聲隨眾量，不減不增。

○善現！如是功德勝利，我先菩薩位修行般若波羅蜜多時，已能成辦，故今相好圓滿莊嚴，一切有情見者歡喜，皆獲殊勝利益安樂。

法身事業 (VIII-4')

如是盡生死，此事業無斷，『X1』諸趣寂滅業，『X2』安立四攝事。『X3』令知諸雜染，及知諸清淨，『X4』有情如證義，『X5』六波羅蜜多。『X6』佛道『X7』自性空，『X8』盡滅二戲論，

『X9』假名『X10』無所得，『X11』成熟諸有情。
『X12』及立菩薩道，『X13』遣除諸執著，『X14』得菩提，
『X15』嚴淨佛土及『X16』決定。『X17』無量有情利，
『X18』親近佛等德，『X19』菩提分『X20』諸業不失壞『X21』見諦。
『X22』遠離諸顛倒，『X23』無彼根本理，『X24』清淨，
『X25』及資糧，『X26』有為與無為，悉不知有異，
『X27』安立大涅槃，許法身事業，有二十七種。

◎如前所說智法身不間斷故，由是乃至盡其生死，此法身事業亦不間斷，以如是不間斷之資糧因已達究竟故。有二十七種法身事業謂：

◎『X1』安立眾生於意樂圓滿，以令發求諸趣安樂及解脫寂靜之意樂故。

(8b) 『X1』(a) 復次，善現！我以佛眼遍觀十方殑伽沙等諸世界中，有菩薩摩訶薩為欲利樂諸有情類，以故思願入大地獄，見諸有情受諸劇苦，見已，發起三種示導。云何為三？一者、神變示導；二者、記說示導；三者、教誡示導。是菩薩摩訶薩以神變示導滅除地獄湯、火、刀等種種苦具，以記說示導記彼有情心之所念而為說法，以教誡示導於彼發起慈悲喜捨而為說法，令彼地獄諸有情類於菩薩所生淨信心，由此因緣，從地獄出，得生天上，或生人中，漸依三乘，盡苦邊際，證涅槃界，究竟安樂。

◎復次，善現！我以佛眼遍觀十方殑伽沙等諸世界中，有菩薩摩訶薩承事供養諸佛世尊。是菩薩摩訶薩承事供養佛世尊時，深心歡喜，愛樂恭敬，非不歡喜，愛樂恭敬。於諸如來應正等覺所說正法，恭敬聽聞，受持讀誦，乃至無上正等菩提，終不忘失，隨所聞法，能為有情無倒宣說，令獲殊勝利益安樂。

◎『X1』(b) 復次，善現！我以佛眼遍觀十方殑伽沙等諸世界中，有菩薩摩訶薩為欲饒益傍生趣中諸有情故，自捨身命。是菩薩摩訶薩見諸傍生飢火所逼，欲相殘害，起慈愍心，自割身分，斷諸支節，散擲十方，恣令食噉。諸傍生類得此菩薩身肉食者，皆於菩薩深起愛敬慚愧之心，由是因緣，脫傍生趣，得生天上，或生人中，值遇如來應正等覺，聞說正法，如實修行，漸依三乘，而趣圓寂，謂隨證入無上大乘、獨覺、聲聞般涅槃界。如是，善現！諸菩薩摩訶薩能為世間作難作事，多所饒益，

謂為利樂諸有情故，自發無上正等覺心，亦令他發，自行種種如實正行，亦令他行。

- ◎『X1』(c) 復次，善現！我以佛眼遍觀十方殑伽沙等諸世界中，有菩薩摩訶薩為欲饒益餓鬼趣中諸有情類，以故思願往彼界中，方便息除飢渴等苦。令諸餓鬼眾苦既息，於此菩薩深起愛敬慚愧之心，復為宣說離慳法要，令彼聞已，起惠施心，乘此善根，脫餓鬼趣，得生天上，或生人中，值遇如來應正等覺，供養恭敬，聞正法音，漸次修行三乘正行，乃至證入無上大乘、獨覺、聲聞般涅槃界。如是，善現！諸菩薩摩訶薩於有情類安住大悲，發起無邊方便善巧，令隨證入三乘涅槃。
- ◎『X1』(d) 復次，善現！我以佛眼遍觀十方殑伽沙等諸世界中，有菩薩摩訶薩方便善巧，或為四大王眾天宣說正法，乃至或為他化自在天宣說正法。是諸天眾於菩薩所聞正法已，漸依三乘，勤修正行，隨應證入般涅槃界。善現當知！彼天眾中有諸天子，耽著天上五妙欲樂及所居止眾寶宮殿，是菩薩摩訶薩示現火起，燒其宮殿，令生厭怖，因為說法，作是言：『諸天子！應審觀察諸行無常、苦、空、非我，不可保信，誰有智者，於斯樂著？』時諸天子聞此法音，於五妙欲深生厭怖，自觀身命，虛偽無常，譬如芭蕉、電光、陽焰，觀諸宮殿，猶如牢獄，作是觀已，漸依三乘，勤修正行而趣圓寂，謂漸證入三乘涅槃。
- ◎『X1』(e) 復次，善現！我以佛眼遍觀十方殑伽沙等諸世界中，有菩薩摩訶薩見諸梵天著諸見趣，方便化導，令其厭捨，告言：『天仙！汝等何故於空、無相、虛妄、不實諸行聚中，發起如是諸惡見趣？當速捨之，信受正法，令汝長夜利益安樂。』如是，善現！諸菩薩摩訶薩安住大悲，為諸有情宣說法要。善現！是為菩薩摩訶薩所有甚奇希有之法。
- ◎復次，善現！我以無障清淨佛眼遍觀十方殑伽沙等諸世界中，有菩薩摩訶薩以四攝事攝諸有情。云何為四？一者、布施；二者、愛語；三者、利行；四者、同事。

◎『X2』又安立他於成熟加行，以令了知布施、愛語、利行、同事四攝事故。

◎『X2』(a)善現！云何菩薩摩訶薩以布施事攝諸有情？善現！諸菩薩摩訶薩以二種施攝諸有情。云何為二？一者、財施；二者、法施。

○善現！云何菩薩摩訶薩能以財施攝諸有情？善現！諸菩薩摩訶薩行深般若波羅蜜多時，能以種種飲食、衣服、房舍、臥具、車乘、燈明、伎樂、香花、寶幢、幡蓋及瓔珞等施諸有情，或以金銀、吠琉璃寶、頗胝迦寶、珂貝、璧玉、帝青、大青、末尼、真珠、石藏、杵藏、紅蓮等寶施諸有情，或以妻妾、男女、大小僮僕、侍衛、象馬、牛羊及醫藥等施諸有情，或以種種財寶、庫藏、城邑、聚落及王位等施諸有情，或以身分、手足、支節、頭目、髓腦施諸有情。是菩薩摩訶薩以種種物置四衢道，昇高臺上，唱如是言：『一切有情有所須者，恣意來取，勿生疑難，如取己物，莫作他想，乃至我身手足、支節、頭目、髓腦隨意取之，我於汝等，無所吝惜。』

是菩薩摩訶薩施諸有情所須物已，復勸歸依佛法僧寶，或勸受持五近事戒，或勸受持八近住戒，或勸受持十善業道，或勸修學初靜慮乃至第四靜慮，或勸修學慈無量乃至捨無量，或勸修學空無邊處定乃至非想非非想處定，或勸修學佛隨念乃至天隨念，或勸修學不淨觀、持息念，或勸修學無常想乃至滅想，或勸修學四念住乃至八聖道支，或勸修學空、無相、無願解脫門，或勸修學八解脫乃至十遍處，或勸修學布施波羅蜜多乃至般若波羅蜜多，或勸安住內空乃至無性自性空，或勸安住真如乃至不思議界，或勸安住苦集滅道聖諦，或勸修學一切陀羅尼門、三摩地門，或勸修學淨觀地乃至如來地，或勸修學極喜地乃至法雲地，或勸修學五眼、六神通，或勸修學如來十力乃至十八不共法，或勸修學三十二大士相、八十隨好，或勸修學無忘失法、恒住捨性，或勸修學一切智、道相智、一切相智，或勸修學預流果乃至獨覺菩提，或勸修學一切菩薩摩訶薩行，或勸修學諸佛無上正等菩提。

如是，善現！諸菩薩摩訶薩行深般若波羅蜜多方便善巧，於諸有情行財施已，復善安立諸有情類，令住無上安隱法中，乃至令得一切智智。善現！是為菩薩摩訶薩行深般若波羅蜜多時所有甚奇希有之法。

○善現！云何菩薩摩訶薩行深般若波羅蜜多時，能以法施攝諸有情？善現！法施有二種。云何為二？一者、世間法施；二者、出世法施。云何名為世間法施？謂諸菩薩摩訶薩行深般若波羅蜜多時，為諸有情宣說、開示、分別、顯了世間妙法，謂不淨觀、若持息念、若四靜慮、若四無量、若四無色定、若五神通，若餘世間共異生法，如是名為世間法施。善現！何故此法名為世間？謂學此法，未能畢竟離世間故，名為世間。善現！是菩薩摩訶薩行此世間妙法施已，種種方便化導有情，令其遠離世間諸法，種種方便化導有情，令住聖法及聖法果。

○善現！云何聖法及聖法果？善現！言聖法者，謂三十七菩提分法及三解脫門等；聖法果者，謂預流果乃至獨覺菩提等。善現！何故此法名為出世？謂學此法，能令畢竟出離世間，故名出世。復次，善現！諸菩薩摩訶薩聖法者，謂六波羅蜜多、八解脫、八勝處、九次第定、十遍處、陀羅尼門、三摩地門、諸菩薩地、五眼、六神通、如來十力、四無所畏、四無礙解、大慈大悲大喜大捨、十八佛不共法、無忘失法、恒住捨性、一切智、道相智、一切相智等諸無漏法。聖法果者，謂佛無上正等菩提大涅槃界。

復次，善現！諸菩薩摩訶薩聖法者，謂預流果智、一來果智、不還果智、阿羅漢果智、獨覺菩提智、諸佛無上正等菩提智，四念住乃至八聖道支智，空、無相、無願解脫門智，四靜慮、四無量、四無色定智，八解脫、八勝處、九次第定、十遍處智，布施波羅蜜多乃至般若波羅蜜多智，一切陀羅尼門、三摩地門智，苦集滅道聖諦智，內空乃至無性自性空智，真如乃至不思議界智，極喜地乃至法雲地智，五眼、六神通智，淨觀地乃至如來地智，如來十力乃至十八佛不共法智，三十二大士相、八十隨好智，無忘失法、恒住捨性智，一切智、道相智、一切相智，善法、非善法智，有記法、無記法智，有漏法、無漏法智，世間法、出世間法智，有為法、無為法智，是名聖法。聖法果者，謂永斷一切煩惱習氣相續，是名聖法果。

(12g) 如是，善現！諸菩薩摩訶薩行深般若波羅蜜多時，能以財法二種布施攝諸有情，是為甚奇希有之法。

◎『X2』(b) 善現！云何菩薩摩訶薩以愛語事攝諸有情？善現！諸菩薩摩訶薩行深般若波羅蜜多時，以柔軟音為有情類先說布

施波羅蜜多，次說淨戒波羅蜜多，次說安忍波羅蜜多，次說精進波羅蜜多，次說靜慮波羅蜜多，後說般若波羅蜜多方便攝受。善現！諸菩薩摩訶薩行深般若波羅蜜多時，以柔軟音多說此六波羅蜜多攝有情類。所以者何？由此六種波羅蜜多普能攝受諸善法故。

◎『X2』(c) 善現！云何菩薩摩訶薩以利行事攝諸有情？善現！諸菩薩摩訶薩行深般若波羅蜜多時，於長夜中，種種方便，勸諸有情精勤修學布施、淨戒、安忍、精進、靜慮、般若波羅蜜多及餘種種殊勝善法，常無懈廢。

◎『X2』(d) 善現！云何菩薩摩訶薩以同事攝諸有情？善現！諸菩薩摩訶薩行深般若波羅蜜多時，以勝神通及大願力，現處地獄、傍生、鬼界、人、天等中，同彼事業，方便攝受，令獲殊勝利益安樂。

◎善現！諸菩薩摩訶薩能以如是布施、愛語、利行、同事攝諸有情，是為甚奇希有之法。

◎『X3』又安立他令知四諦之正見，以令他了知雜染因果之苦集二諦為所捨，清淨因果滅道二諦為所取故。

——上三是安立於資糧道。

『X3』復次，善現！我以佛眼遍觀十方殑伽沙等諸世界中，希有菩薩摩訶薩行深般若波羅蜜多時，教誡教授諸餘菩薩摩訶薩言：『來，善男子！汝應善學引發諸字陀羅尼門，謂應善學一字、二字乃至十字，如是乃至二十、三十，乃至若百、若千、若萬，乃至無數，引發自在。又應善學一切語言皆入一字，或入二字乃至十字，如是乃至或入二十、或入三十，乃至若百、若千、若萬，乃至無數，引發自在。又應善學於一字中攝一切字，一切字中攝於一字，引發自在。又應善學一字能攝四十二本母字，四十二本母字能攝一字。』…（中略：大般若波羅蜜多經卷第四百七十一）

大般若波羅蜜多經卷第四百七十二

(01) 爾時，具壽善現白佛言：「世尊！若菩薩摩訶薩行深般若波羅蜜多時，如實了知色等諸法各各差別，不相雜亂，將無以色乃至以識壞法界耶？將無以眼處乃至以意處壞法界耶？將無

以色處乃至以法處壞法界耶？將無以眼界乃至以意界壞法界耶？將無以色界乃至以法界壞法界耶？將無以眼識界乃至以意識界壞法界耶？將無以眼觸乃至以意觸壞法界耶？將無以眼觸為緣所生諸受乃至以意觸為緣所生諸受壞法界耶？將無以地界乃至以識界壞法界耶？將無以因緣乃至以增上緣壞法界耶？將無以從緣所生諸法壞法界耶？將無以無明乃至以老死壞法界耶？將無以內空乃至以無性自性空壞法界耶？將無以真如乃至以不思議界壞法界耶？將無以苦集滅道聖諦壞法界耶？將無以布施波羅蜜多乃至以般若波羅蜜多壞法界耶？將無以四靜慮、四無量、四無色定壞法界耶？將無以四念住乃至以八聖道支壞法界耶？將無以空、無相、無願解脫門壞法界耶？將無以八解脫、八勝處、九次第定、十遍處壞法界耶？將無以淨觀地乃至以如來地壞法界耶？將無以極喜地乃至以法雲地壞法界耶？將無以一切陀羅尼門、三摩地門壞法界耶？將無以五眼、六神通壞法界耶？將無以如來十力乃至以十八不共法壞法界耶？將無以三十二大士相、八十隨好壞法界耶？將無以無忘失法、恒住捨性壞法界耶？將無以一切智、道相智、一切相智壞法界耶？將無以預流果乃至以獨覺菩提壞法界耶？將無以一切菩薩摩訶薩行壞法界耶？將無以諸佛無上正等菩提壞法界耶？將無以一切智智壞法界耶？何以故？世尊！法界無二無差別故。」

- (02) 佛告善現：「若離法界，餘法可得，可言彼法能壞法界；然離法界，無法可得，故無餘法能壞法界。所以者何？諸佛、菩薩、獨覺、聲聞，知離法界無法可得，既知無法離於法界，亦不為他施設宣說，是故法界無能壞者。如是，善現！諸菩薩摩訶薩行深般若波羅蜜多時，應學法界無二無別，不可壞相。」
- (03) 具壽善現復白佛言：「若菩薩摩訶薩欲學法界，當於何學？」
- (04) 佛告善現：「若菩薩摩訶薩欲學法界，當於一切法學。所以者何？善現！以一切法皆入法界故。」
- (05) 具壽善現復白佛言：「何因緣故，說一切法皆入法界？」
- (06) 佛告善現：「若佛出世，若不出世，諸法法眾，皆入法界，無差別相，不由佛說。所以者何？善現！若善法非善法、若有記法無記法、若有漏法無漏法、若世間法出世間法、若有為

法無為法，如是等一切法，無不皆入無相、無為、性空法界。是故，善現！諸菩薩摩訶薩行深般若波羅蜜多時，欲學法界，當學一切法，若學一切法，即是學法界。」

- (07) 具壽善現復白佛言：「若一切法皆入法界，無二無別，諸菩薩摩訶薩云何當學般若波羅蜜多乃至布施波羅蜜多？云何當學初靜慮乃至第四靜慮？云何當學慈無量乃至捨無量？云何當學空無邊處定乃至非想非非想處定？云何當學四念住乃至八聖道支？云何當學空、無相、無願解脫門？云何當學八解脫乃至十遍處？云何當學極喜地乃至法雲地？云何當學一切陀羅尼門、三摩地門？云何當學內空乃至無性自性空？云何當學真如乃至不思議界？云何當學苦集滅道聖諦？云何當學五眼、六神通？云何當學如來十力乃至十八不共法？云何當學無忘失法、恒住捨性？云何當學一切智、道相智、一切相智？云何當學成滿三十二大士相、八十隨好？云何當學成滿剎帝利大族、婆羅門大族、長者大族、居士大族？云何當學成滿四大王眾天乃至他化自在天？云何當學成滿梵眾天乃至廣果天？云何當學成滿無想有情天法而不樂生彼？云何當學成滿淨居天法而不樂生彼？云何當學空無邊處天法乃至非想非非想處天法而不樂生彼？云何當學初發菩提心乃至第十發菩提心？云何當學趣證菩薩正性離生？云何當學一切聲聞及獨覺地而不作證？云何當學成熟有情、嚴淨佛土？云何當學諸陀羅尼及無礙辯？云何當學一切菩薩摩訶薩道及佛無上正等菩提，如是學已，知一切法一切種相，便能證得一切智智？
- 世尊！非法界中有如是等種種分別，將無菩薩摩訶薩眾由此分別，行於顛倒，無戲論中起諸戲論？何以故？真法界中都無分別、戲論事故。…
 - 世尊！法界非有記無記法，亦不離有記無記法；有記無記法即是法界，法界即是有記無記法。世尊！法界非有漏無漏法，亦不離有漏無漏法；有漏無漏法即是法界，法界即是有漏無漏法。
 - 世尊！法界非世間出世間法，亦不離世間出世間法；世間出世間法即是法界，法界即是世間出世間法。世尊！法界非有為無為法，亦不離有為無為法；有為無為法即是法界，法界即是有為無為法。」

- (08) 佛告善現：「如是！如是！如汝所說。真法界中，無一切種分別戲論。法界非色受想行識，亦不離色受想行識；法界即色受想行識，色受想行識即法界。如是乃至法界非有為無為法，亦不離有為無為法；法界即有為無為法，有為無為法即法界。
- 復次，善現！諸菩薩摩訶薩行深般若波羅蜜多時，若見有法離法界者，便非正趣所求無上正等菩提。是故，善現！諸菩薩摩訶薩行深般若波羅蜜多時，不見有法離真法界。
- 善現當知！諸菩薩摩訶薩行深般若波羅蜜多時，知一切法即真法界，方便善巧無名相法，為諸有情寄名相說，謂此是色受想行識，此是眼處乃至意處，此是色處乃至法處，此是眼界乃至意界，此是色界乃至法界，此是眼識界乃至意識界，此是眼觸乃至意觸，此是眼觸為緣所生諸受乃至意觸為緣所生諸受，此是地界乃至識界，此是因緣乃至增上緣，此是從緣所生諸法，此是無明乃至老死，此是善法、非善法，此是有記法、無記法，此是有漏法、無漏法，此是世間法、出世間法，此是有為法、無為法，此是布施波羅蜜多乃至般若波羅蜜多，此是四靜慮、四無量、四無色定，此是四念住乃至八聖道支，此是空、無相、無願解脫門，此是內空乃至無性自性空，此是真如乃至不思議界，此是苦集滅道聖諦，此是八解脫乃至十遍處，此是淨觀地乃至如來地，此是極喜地乃至法雲地，此是一切陀羅尼門、三摩地門，此是五眼、六神通，此是如來十力乃至十八不共法，此是無忘失法、恆住捨性，此是一切智、道相智、一切相智，此是三十二大士相、八十隨好，此是預流果乃至獨覺菩提，此是一切菩薩摩訶薩行，此是諸佛無上正等菩提。

◎『X4』安立他自利意樂圓滿，以令有情了知，如自所證之真實義故。

『X4』如工幻師或彼弟子，執持少物於眾人前，幻作種種異類色相，謂或幻作男女、大小；或復幻作象、馬、牛、羊、駝、驢、雞等種種禽獸；或復幻作城邑、聚落、園林、池沼，種種莊嚴，甚可愛樂；或復幻作衣服、飲食、房舍、臥具、花、香、瓔珞，種種珍寶、財穀、庫藏；或復幻作無量種類伎樂俳優，令無量人歡娛受樂；或復幻作種種形相，令行布施，或令持戒，或令安忍，或令精進，或令習定，或令修慧；或

復現生剎帝利大族乃至居士大族；或復幻作諸山、大海、妙高山王、輪圍山等；或復現生四大王眾天乃至他化自在天；或復現生梵眾天乃至色究竟天；或復現生空無邊處天乃至非想非非想處天；或復現作預流、一來、不還、阿羅漢、獨覺；或復現作菩薩摩訶薩，從初發心修行布施波羅蜜多乃至般若波羅蜜多，修行四靜慮、四無量、四無色定，修行四念住乃至八聖道支，修行空、無相、無願解脫門，學住內空乃至無性自性空，學住真如乃至不思議界，學住苦集滅道聖諦，趣入菩薩正性離生，修行極喜地乃至法雲地，引發種種殊勝神通，放大光明，照諸世界，成熟有情，嚴淨佛土，遊戲一切靜慮、解脫、等持、等至、諸陀羅尼及三摩地，修行種種諸佛功德；或復幻作如來形像，具三十二大丈夫相，八十隨好圓滿莊嚴，成就十力、四無所畏、四無礙解、大慈大悲大喜大捨、十八不共法、無忘失法、恆住捨性、一切智、道相智、一切相智等無量無邊不可思議殊勝功德。

○善現！如是幻師或彼弟子為惑他故，在眾人前幻作此等諸幻化事，其中無智男女大小見是事已，咸驚歎言：『奇哉！此人妙解眾伎，能作種種甚希有事，乃至能作如來之身，相好莊嚴，具諸功德，令眾歡樂，自顯伎能。』

其中有智見此事已，作是思惟：『甚為神異！如何此人能現是事，其中雖無實事可得，而令愚人迷謬歡悅，於無實物起實物想？』唯有智者了達皆空，雖有見聞，而無執著。

大般若波羅蜜多經卷第四百七十三

善達品第七十七

◎『X5』又安立他於自成熟加行，以令圓滿六度行故。

『X5』如是，善現！諸菩薩摩訶薩行深般若波羅蜜多時，雖不見法界離諸法有，不見諸法離法界有，不見有情及彼施設實事可得，而能發生方便善巧。

自修行六波羅蜜多，亦勸他修行六波羅蜜多，無倒稱揚修行六波羅蜜多法，歡喜讚歎修行六波羅蜜多者。

◎『X6』又立他於俱利行，以令往趣佛地十善道故。

『X6』自受持十善業道，亦勸他受持十善業道，無倒稱揚受持十善業道法，歡喜讚歎受持十善業道者。

自受持五戒，亦勸他受持五戒，無倒稱揚受持五戒法，歡喜讚歎受持五戒者。

自受持八戒，亦勸他受持八戒，無倒稱揚受持八戒法，歡喜讚歎受持八戒者。

自受持出家戒，亦勸他受持出家戒，無倒稱揚受持出家戒法，歡喜讚歎受持出家戒者。

自修行四靜慮，亦勸他修行四靜慮，無倒稱揚修行四靜慮法，歡喜讚歎修行四靜慮者。

自修行四無量，亦勸他修行四無量，無倒稱揚修行四無量法，歡喜讚歎修行四無量者。

自修行四無色定，亦勸他修行四無色定，無倒稱揚修行四無色定法，歡喜讚歎修行四無色定者。

自修行四念住乃至八聖道支，亦勸他修行四念住乃至八聖道支，無倒稱揚修行四念住乃至八聖道支法，歡喜讚歎修行四念住乃至八聖道支者。

自修行空、無相、無願解脫門，亦勸他修行空、無相、無願解脫門，無倒稱揚修行空、無相、無願解脫門法，歡喜讚歎修行空、無相、無願解脫門者。

自安住內空乃至無性自性空，亦勸他安住內空乃至無性自性空，無倒稱揚安住內空乃至無性自性空法，歡喜讚歎安住內空乃至無性自性空者。

自安住真如乃至不思議界，亦勸他安住真如乃至不思議界，無倒稱揚安住真如乃至不思議界法，歡喜讚歎安住真如乃至不思議界者。

自安住苦集滅道聖諦，亦勸他安住苦集滅道聖諦，無倒稱揚安住苦集滅道聖諦法，歡喜讚歎安住苦集滅道聖諦者。

自修行八解脫，亦勸他修行八解脫，無倒稱揚修行八解脫法，歡喜讚歎修行八解脫者。自修行八勝處，亦勸他修行八勝處，無倒稱揚修行八勝處法，歡喜讚歎修行八勝處者。

自修行九次第定，亦勸他修行九次第定，無倒稱揚修行九次第定法，歡喜讚歎修行九次第定者。

自修行十遍處，亦勸他修行十遍處，無倒稱揚修行十遍處法，歡喜讚歎修行十遍處者。

自修行菩薩十地，亦勸他修行菩薩十地，無倒稱揚修行菩薩十地法，歡喜讚歎修行菩薩十地者。

自修行一切陀羅尼門，亦勸他修行一切陀羅尼門，無倒稱揚修行一切陀羅尼門法，歡喜讚歎修行一切陀羅尼門者。

自修行一切三摩地門，亦勸他修行一切三摩地門，無倒稱揚修行一切三摩地門法，歡喜讚歎修行一切三摩地門者。

自圓滿五眼，亦勸他圓滿五眼，無倒稱揚圓滿五眼法，歡喜讚歎圓滿五眼者。

自圓滿六神通，亦勸他圓滿六神通，無倒稱揚圓滿六神通法，歡喜讚歎圓滿六神通者。

自圓滿如來十力，亦勸他圓滿如來十力，無倒稱揚圓滿如來十力法，歡喜讚歎圓滿如來十力者。

自圓滿四無所畏，亦勸他圓滿四無所畏，無倒稱揚圓滿四無所畏法，歡喜讚歎圓滿四無所畏者。

自圓滿四無礙解，亦勸他圓滿四無礙解，無倒稱揚圓滿四無礙解法，歡喜讚歎圓滿四無礙解者。

自圓滿大慈大悲大喜大捨，亦勸他圓滿大慈大悲大喜大捨，無倒稱揚圓滿大慈大悲大喜大捨法，歡喜讚歎圓滿大慈大悲大喜大捨者。

自圓滿十八不共法，亦勸他圓滿十八不共法，無倒稱揚圓滿十八不共法法，歡喜讚歎圓滿十八不共法者。

自圓滿無忘失法，亦勸他圓滿無忘失法，無倒稱揚圓滿無忘失法法，歡喜讚歎圓滿無忘失法者。

自圓滿恒住捨性，亦勸他圓滿恒住捨性，無倒稱揚圓滿恒住捨性法，歡喜讚歎圓滿恒住捨性者。

自圓滿一切智，亦勸他圓滿一切智，無倒稱揚圓滿一切智法，歡喜讚歎圓滿一切智者。

自圓滿道相智，亦勸他圓滿道相智，無倒稱揚圓滿道相智法，歡喜讚歎圓滿道相智者。

自圓滿一切相智，亦勸他圓滿一切相智，無倒稱揚圓滿一切相智法，歡喜讚歎圓滿一切相智者。

自圓滿三十二大士相、八十隨好，亦勸他圓滿三十二大士相、八十隨好，無倒稱揚圓滿三十二大士相、八十隨好法，歡喜讚歎圓滿三十二大士相、八十隨好者。

◎『X7』又安立他於清淨見，令以世間修所成慧，通達勝義自性空故。
——上四安立於加行道。

『X7』善現！若真法界，初、中、後際有差別者，則諸菩薩摩訶薩行深般若波羅蜜多時，不能施設方便善巧，為諸有情說真法界，嚴淨佛土，成熟有情，修諸菩薩摩訶薩行，證得無上正等菩提，能盡未來利樂一切。以真法界初、中、後際常無差別，是故菩薩摩訶薩行深般若波羅蜜多時，能善施設方便善巧，為諸有情說真法界，嚴淨佛土，成熟有情，修諸菩薩摩訶薩行，證得無上正等菩提，能盡未來利樂一切。」

實際品第七十八

- (09) 爾時，具壽善現白佛言：「世尊！若諸有情、有情施設，俱畢竟不可得，諸菩薩摩訶薩為誰故，行甚深般若波羅蜜多？」
- (10) 佛告善現：「諸菩薩摩訶薩但以實際為量故，行甚深般若波羅蜜多。善現當知！若有情際異實際者，諸菩薩摩訶薩則不應行甚深般若波羅蜜多，以有情際不異實際，是故菩薩摩訶薩眾為諸有情行深般若波羅蜜多。復次，善現！諸菩薩摩訶薩行深般若波羅蜜多時，以不壞實際法，安立有情，令住實際。」
- (11) 具壽善現復白佛言：「若有情際即是實際，云何菩薩摩訶薩行深般若波羅蜜多時，以不壞實際法安立有情，令住實際？世

尊！若菩薩摩訶薩行深般若波羅蜜多時，安立有情，令住實際，則為安立實際，令住實際。世尊！若菩薩摩訶薩行深般若波羅蜜多時，安立實際，令住實際，則為安立自性，令住自性；然理不應安立自性，令住自性，云何可說諸菩薩摩訶薩行深般若波羅蜜多時，以不壞實際法安立有情，令住實際？」

- (12) 佛告善現：「不可安立實際，令住實際，亦不可安立自性，令住自性，然諸菩薩摩訶薩行深般若波羅蜜多時，有方便善巧故，能安立有情，令住實際，而有情際不異實際，有情際與實際無二無二處。」…
- (13) 爾時，具壽善現白佛言：「世尊！若一切法皆本性空，本性空中，有情及法俱不可得，由此於中，亦無非法，云何菩薩摩訶薩為有情類求證無上正等菩提，欲盡未來常作饒益？」
- (14) 佛告善現：「如是！如是！如汝所說。諸所有法皆本性空，本性空中，有情及法俱不可得，由此於中，亦無非法。
- 善現當知！若一切法非本性空，諸菩薩摩訶薩行深般若波羅蜜多時，不應安住本性空理，求證無上正等菩提，為饒益有情，說本性空法。以一切法皆本性空，是故菩薩摩訶薩行深般若波羅蜜多時，住一切法本性空理，求證無上正等菩提，為饒益有情，說本性空法。善現！何等諸法，本性皆空，而諸菩薩摩訶薩行深般若波羅蜜多時，如實了知本性空已，住本性空，為他說法？
 - 善現！色乃至識本性皆空，眼處乃至意處本性皆空，色處乃至法處本性皆空，眼界乃至意識界本性皆空，色界乃至法界本性皆空，眼識界乃至意識界本性皆空，眼觸乃至意觸本性皆空，眼觸為緣所生諸受乃至意觸為緣所生諸受本性皆空，地界乃至識界本性皆空，因緣乃至增上緣本性皆空，從緣所生諸法本性皆空，無明乃至老死本性皆空，布施波羅蜜多乃至般若波羅蜜多本性皆空，四靜慮、四無量、四無色定本性皆空，四念住乃至八聖道支本性皆空，空、無相、無願解脫門本性皆空，內空乃至無性自性空本性皆空，真如乃至不思議界本性皆空，苦集滅道聖諦本性皆空，八解脫乃至十遍處本性皆空，淨觀地乃至如來地本性皆空，極喜地乃至法雲地本性皆空，一切陀羅尼門、三摩地門本性皆空，五眼、六神通本性皆空，如來十力乃至十八不共法本性皆空，三十二大士相、八十隨好本性皆空，無

忘失法、恒住捨性本性皆空，一切智、道相智、一切相智本性皆空，預流果乃至獨覺菩提本性皆空，一切菩薩摩訶薩行本性皆空，諸佛無上正等菩提本性皆空，永斷一切煩惱習氣相續本性皆空。諸菩薩摩訶薩行深般若波羅蜜多時，如實了知色等諸蘊乃至永斷一切煩惱習氣相續本性空已，住本性空，為諸有情宣說如是本性空法。

○復次，善現！若內空性本性不空，若外空、內外空、空空、大空、勝義空、有為空、無為空、畢竟空、無際空、散無散空、本性空、自共相空、一切法空、不可得空、無性空、自性空、無性自性空性亦本性不空者，則諸菩薩摩訶薩行深般若波羅蜜多時，不應為諸有情說一切法皆本性空，若作是說，壞本性空。然本性空理不可壞，非常非斷。所以者何？本性空理無方無處，無所從來，亦無所去。如是空理，亦名法住，此中無法，無聚無散，無減無增，無生無滅，無淨無不淨，是一切法本所住性，諸菩薩摩訶薩安住其中，求趣無上正等菩提，不見有法有所求趣，不見有法無所求趣，以一切法都無所住，故名法住。諸菩薩摩訶薩安住此中行深般若波羅蜜多，見一切法本性空已，定於無上正等菩提得不退轉。所以者何？是菩薩摩訶薩不見有法能為障礙，見一切法無障礙故，便於無上正等菩提不生疑惑，故不退轉。

○復次，善現！諸菩薩摩訶薩住一切法本性空中，觀本性空都無所得，謂我、有情、命者、生者、養者、士夫、補特伽羅、意生、孺童、作者、受者、知者、見者皆不可得，色乃至識亦不可得，眼處乃至意處亦不可得，色處乃至法處亦不可得，眼界乃至眼界亦不可得，色界乃至法界亦不可得，眼識界乃至意識界亦不可得，眼觸乃至意觸亦不可得，眼觸為緣所生諸受乃至意觸為緣所生諸受亦不可得，地界乃至識界亦不可得，因緣乃至增上緣亦不可得，從緣所生諸法亦不可得，無明乃至老死亦不可得，布施波羅蜜多乃至般若波羅蜜多亦不可得，內空乃至無性自性空亦不可得，真如乃至不思議界亦不可得，苦集滅道聖諦亦不可得，四念住乃至八聖道支亦不可得，四靜慮、四無量、四無色定亦不可得，八解脫乃至十遍處亦不可得，空、無相、無願解脫門亦不可得，淨觀地乃至如來地亦不可得，極喜地乃至法雲地亦不可得，一切陀羅尼門、三摩地門亦不可得，

五眼、六神通亦不可得，如來十力乃至十八不共法亦不可得，無忘失法、恆住捨性亦不可得，一切智、道相智、一切相智亦不可得，預流果乃至獨覺菩提亦不可得，一切菩薩摩訶薩行亦不可得，諸佛無上正等菩提亦不可得，善法、非善法亦不可得，有記法、無記法亦不可得，有漏法、無漏法亦不可得，世間法、出世間法亦不可得，有為法、無為法亦不可得，三十二大士相、八十隨好亦不可得。

大般若波羅蜜多經卷第四百七十四

◎『X8』又安立他於見道，令諸眾生親證盡滅二取戲論之空性故。

『X8』善現當知！如有如來應正等覺化作四眾，所謂苾芻、苾芻尼、鄔波索迦、鄔波斯迦，假使化佛或經一劫，或一劫餘，為彼四眾宣說正法，於意云何？如是化眾頗有能得或預流果、或一來果、或不還果、或阿羅漢果、或獨覺菩提，或得無上正等菩提記不？」

(15) 善現對曰：「不也，世尊！何以故？是諸化眾都無實事，非無實法可有得果，可得受記。」…

(16) 爾時，具壽善現白佛言：「世尊！若一切法皆本性空，都無差別，諸菩薩摩訶薩為住何處發趣無上正等菩提？諸佛無上正等菩提無二行相，非二行相能證無上正等菩提，唯願世尊哀愍為說！」

(17) 佛告善現：「如是！如是！如汝所說。諸佛無上正等菩提無二行相，非二行相能證無上正等菩提。所以者何？菩提無二亦無分別，若於菩提行於二相，有分別者，必不能證所求無上正等菩提。

○善現當知！諸菩薩摩訶薩不於菩提行於二相，亦不分別，都無所住，發趣無上正等菩提。諸菩薩摩訶薩於一切法不行二相，亦不分別，都無所行，則能證得所求無上正等菩提。

○善現當知！諸菩薩摩訶薩所求無上正等菩提，非行二相而能證得。諸菩薩摩訶薩所有菩提都無所行，謂不於色行，亦不於受想行識行；如是乃至不於一切菩薩摩訶薩行行，亦不於諸佛無上正等菩提行。所以者何？諸菩薩摩訶薩所有菩提，不緣名聲執我我所，謂不作是念：『我行於色，我行於受想行識。』如

是乃至不作是念：『我行於一切菩薩摩訶薩行，我行於諸佛無上正等菩提。』

○復次，善現！諸菩薩摩訶薩所有菩提，非取故行，非捨故行。」

- (18) 具壽善現白言：「世尊！若菩薩摩訶薩所有菩提，非取故行，非捨故行，諸菩薩摩訶薩所有菩提當何處行？」
- (19) 佛告善現：「於意云何？如來化身所有菩提當何處行？為取故行？為捨故行？」
- (20) 善現對曰：「不也，世尊！如來化身實無所有，如何可說所有菩提有所行處，若取若捨？」
- (21) 佛告善現：「於意云何？諸阿羅漢夢中菩提當何處行？為取故行？為捨故行？」
- (22) 善現對曰：「不也，世尊！諸阿羅漢諸漏永盡，昏沈睡眠蓋纏俱滅，畢竟無夢，云何當有夢中菩提有所行處，若取若捨？」
- (23) 佛告善現：「如是！如是！如汝所說。諸阿羅漢畢竟無夢，昏沈睡眠分別盡故，諸菩薩摩訶薩行深般若波羅蜜多，所有菩提亦復如是，非取故行，非捨故行，都無行處，達一切法本性空故。」
- (24) 具壽善現復白佛言：「若菩薩摩訶薩行深般若波羅蜜多，所有菩提，非取故行，非捨故行，都無行處，謂不行於色，亦不行於受想行識；如是乃至不行於一切菩薩摩訶薩行，亦不行於諸佛無上正等菩提者，豈不菩薩摩訶薩為欲饒益諸有情故，不行布施波羅蜜多乃至般若波羅蜜多，不行內空乃至無性自性空，不行真如乃至不思議界，不行苦集滅道聖諦，不行四念住乃至八聖道支，不行四靜慮、四無量、四無色定，不行八解脫乃至十遍處，不行空、無相、無願解脫門，不行極喜地乃至法雲地，不行一切陀羅尼門、三摩地門，不行五眼、六神通，不行如來十力乃至十八不共法，不行三十二大士相、八十隨好，不行無忘失法、恆住捨性，不行一切智、道相智、一切相智，不住菩薩殊勝神通成熟有情，嚴淨佛土，而得無上正等菩提？」
- (25) 佛告善現：「諸菩薩摩訶薩所有菩提雖無行處，而諸菩薩摩訶薩為欲饒益諸有情故，要行布施波羅蜜多乃至般若波羅蜜多，如是乃至要行一切智、道相智、一切相智，要住菩薩殊勝神通成熟有情，嚴淨佛土，乃得無上正等菩提。」

- (26) 具壽善現復白佛言：「諸菩薩摩訶薩所有菩提若無行處，將無菩薩摩訶薩為欲饒益諸有情故，不住布施波羅蜜多乃至般若波羅蜜多，久修令滿；如是乃至不住一切智、道相智、一切相智，久修令滿；不住菩薩殊勝神通成熟有情，嚴淨佛土，久修令滿，而得無上正等菩提？」
- (27) 佛告善現：「諸菩薩摩訶薩所有菩提雖無行處，而諸菩薩摩訶薩為欲饒益諸有情故，要住布施波羅蜜多乃至般若波羅蜜多，久修令滿；如是乃至要住一切智、道相智、一切相智，久修令滿；要住菩薩殊勝神通成熟有情，嚴淨佛土，久修令滿，乃得無上正等菩提。
- 善現當知！若菩薩摩訶薩修諸善根未總圓滿，終不能得所求無上正等菩提。
 - 善現當知！若菩薩摩訶薩欲得無上正等菩提，應住色本性空，應住受想行識本性空；如是乃至應住一切菩薩摩訶薩行本性空，應住諸佛無上正等菩提本性空；應住一切法本性空，應住一切有情本性空，修行布施波羅蜜多乃至般若波羅蜜多，令得圓滿，如是乃至修行一切智、道相智、一切相智，令得圓滿，修行菩薩殊勝神通成熟有情，嚴淨佛土，令圓滿已，便得無上正等菩提。
 - 善現當知！是一切法本性空理及諸有情本性空理，最極寂靜，無有少法能增能減，能生能滅，能斷能常，能染能淨，能得果能現觀。

◎『X9』又安立他於修道中第二地、第三地者，由令了知彼二地所攝諸法，皆唯假名安立於尸羅、安忍故。

『X9』善現當知！諸菩薩摩訶薩依世俗故，說修般若波羅蜜多，如實了知本性空已，證得無上正等菩提，不依勝義。所以者何？真勝義中無色可得，亦無受想行識可得；如是乃至無一切菩薩摩訶薩行可得，亦無諸佛無上正等菩提可得；無行一切菩薩摩訶薩行者可得，亦無行諸佛無上正等菩提者可得。善現！如是諸法皆依世俗言說施設，不依勝義。善現！諸菩薩摩訶薩行深般若波羅蜜多，從初發心，雖極猛利為諸有情行菩提行，而於此心都無所得，於諸有情亦無所得，於大菩提亦無所得，於佛、菩薩亦無所得，以一切法、一切有情不可得故。」

- (28) 爾時，具壽善現白佛言：「世尊！若一切法都無所有，皆不可得，云何菩薩摩訶薩行菩提行？云何能得所求無上正等菩提？誰行菩提行？誰復能證得？」
- (29) 佛告善現：「於意云何？汝於先時依止斷界，斷諸煩惱，得無漏根，住無間定，得預流果，次一來果，次不還果，後阿羅漢果，汝於彼時頗見有情若心、若道、若諸道果，有可得不？」
- (30) 善現對曰：「不也，世尊！」
- (31) 佛告善現：「若汝彼時依止斷界，斷諸煩惱，得無漏根，於有情心、道及道果，都無所得，云何言得阿羅漢果？」
- (32) 善現對曰：「依世俗說，不依勝義。」
- (33) 佛告善現：「如是！如是！如汝所說。諸菩薩摩訶薩亦復如是，依世俗說行菩提道及得無上正等菩提，不依勝義。
- 善現當知！依世俗故，假說有色受想行識；如是乃至依世俗故，假說有一切菩薩摩訶薩行、諸佛無上正等菩提；依世俗故，假說有情、菩薩、諸佛，不依勝義。
 - 善現當知！諸菩薩摩訶薩不見有法能於無上正等菩提有增有減，有益有損，以一切法本性空故。
 - 善現當知！諸菩薩摩訶薩於一切法觀本性空尚不可得，況初發心而有可得。最初發心尚不可得，況修布施波羅蜜多乃至般若波羅蜜多而有可得，況住內空乃至無性自性空而有可得，況住真如乃至不思議界而有可得，況住苦集滅道聖諦而有可得，況修四念住乃至八聖道支而有可得，況修四靜慮、四無量、四無色定而有可得，況修八解脫乃至十遍處而有可得，況修空、無相、無願解脫門而有可得，況修極喜地乃至法雲地而有可得，況修一切陀羅尼門、三摩地門而有可得，況修五眼、六神通而有可得，況修如來十力乃至十八不共法而有可得，況修三十二大士相、八十隨好而有可得，況修無忘失法、恆住捨性而有可得，況修一切智、道相智、一切相智而有可得，況修一切菩薩摩訶薩行而有可得，況修諸佛無上正等菩提而有可得。善現！諸菩薩摩訶薩於所修住一切佛法若有所得，無有是處。
 - 如是，善現！諸菩薩摩訶薩行深般若波羅蜜多，方便修行大菩提行，證得無上正等菩提，利樂有情，常無間斷。」

無闕品第七十九

◎『X10』安立於第四地、第五地、第六地者，由令第四地了知菩提分慧；第五地了知四聖諦慧；第六地了知緣起慧中，皆知一切諸法勝義無所得故。

- (34) 『X10』爾時，具壽善現白佛言：「世尊！若菩薩摩訶薩雖勤精進修行布施波羅蜜多乃至般若波羅蜜多，安住內空乃至無性自性空，安住真如乃至不思議界，安住苦集滅道聖諦，修行四念住乃至八聖道支，修行四靜慮、四無量、四無色定，修行八解脫乃至十遍處，修行空、無相、無願解脫門，修行極喜地乃至法雲地，修行一切陀羅尼門、三摩地門，修行五眼、六神通，修行如來十力乃至十八不共法，修行三十二大士相、八十隨好，修行無忘失法、恒住捨性，修行一切智、道相智、一切相智，修行一切菩薩摩訶薩行，修行諸佛無上正等菩提；若菩提道修未圓滿，不能證得所求無上正等菩提。世尊！云何菩薩摩訶薩修菩提道令得圓滿，能證無上正等菩提？」
- (35) 佛告善現：「若菩薩摩訶薩行深般若波羅蜜多時，具足殊勝方便善巧，由此方便善巧力故，修行布施波羅蜜多時，不得布施，不得施者，不得受者，亦不遠離如是諸法而行布施波羅蜜多，是菩薩摩訶薩如是施時，能具照明三菩提道，修菩提道速能成就。如是，善現！諸菩薩摩訶薩行深般若波羅蜜多，方便善巧修菩提道，令得圓滿，能證無上正等菩提。如是，善現！若菩薩摩訶薩行深般若波羅蜜多時，具足殊勝方便善巧，由此方便善巧力故，修行淨戒、安忍、精進、靜慮、般若波羅蜜多，廣說乃至修行一切菩薩摩訶薩行、諸佛無上正等菩提，隨其所應，皆當廣說。」
- (36) 爾時，具壽舍利子白佛言：「世尊！云何菩薩摩訶薩行深般若波羅蜜多時，勇猛正勤修菩提道？」
- (37) 佛告舍利子：「若菩薩摩訶薩行深般若波羅蜜多時，方便善巧，不和合色受想行識，不離散色受想行識；不和合眼處乃至意處，不離散眼處乃至意處；不和合色處乃至法處，不離散色處乃至法處；不和合眼界乃至眼界，不離散眼界乃至眼界；不和合色界乃至法界，不離散色界乃至法界；不和合眼識界乃至意識界，不離散眼識界乃至意識界；不和合眼觸乃至意觸，不離散眼觸乃至意觸；不和合眼觸為緣所生諸受乃至意觸為緣所生諸受，不離散眼觸為緣所生諸受乃至意觸為緣所生諸受；不和

合地界乃至識界，不離散地界乃至識界；不和合因緣乃至增上緣，不離散因緣乃至增上緣；不和合從緣所生諸法，不離散從緣所生諸法；不和合無明乃至老死，不離散無明乃至老死。所以者何？如是諸法，皆無自性，可合離故。

○舍利子！若菩薩摩訶薩行深般若波羅蜜多時，方便善巧，不和合布施波羅蜜多乃至般若波羅蜜多，不離散布施波羅蜜多乃至般若波羅蜜多；不和合內空乃至無性自性空，不離散內空乃至無性自性空；不和合真如乃至不思議界，不離散真如乃至不思議界；不和合苦集滅道聖諦，不離散苦集滅道聖諦；不和合四念住乃至八聖道支，不離散四念住乃至八聖道支；不和合四靜慮、四無量、四無色定，不離散四靜慮、四無量、四無色定；不和合八解脫乃至十遍處，不離散八解脫乃至十遍處；不和合空、無相、無願解脫門，不離散空、無相、無願解脫門；不和合淨觀地乃至如來地，不離散淨觀地乃至如來地；不和合極喜地乃至法雲地，不離散極喜地乃至法雲地；不和合一切陀羅尼門、三摩地門，不離散一切陀羅尼門、三摩地門；不和合五眼、六神通，不離散五眼、六神通；不和合如來十力乃至十八佛不共法，不離散如來十力乃至十八佛不共法；不和合三十二大士相、八十隨好，不離散三十二大士相、八十隨好；不和合無忘失法、恒住捨性，不離散無忘失法、恒住捨性；不和合一切智、道相智、一切相智，不離散一切智、道相智、一切相智；不和合預流果乃至獨覺菩提，不離散預流果乃至獨覺菩提；不和合一切菩薩摩訶薩行，不離散一切菩薩摩訶薩行；不和合諸佛無上正等菩提，不離散諸佛無上正等菩提。所以者何？如是諸法，皆無自性，可合離故。如是，舍利子！諸菩薩摩訶薩行深般若波羅蜜多時，勇猛正勤修菩提道。」

(38) 時舍利子復白佛言：「若一切法都無自性，可合離者，云何菩薩摩訶薩引發般若波羅蜜多於中修學？世尊！若菩薩摩訶薩不學般若波羅蜜多，終不能得所求無上正等菩提。」

(39) 佛告舍利子：「如是！如是！如汝所說。若菩薩摩訶薩不學般若波羅蜜多，終不能得所求無上正等菩提。舍利子！諸菩薩摩訶薩要學般若波羅蜜多，乃能證得所求無上正等菩提。舍利子！諸菩薩摩訶薩所求無上正等菩提，要有方便善巧，乃能證得，非無方便善巧而能證得。」

○舍利子！諸菩薩摩訶薩行深般若波羅蜜多時，若見有法自性可得，則應可取；不見有法自性可得，當何所取？所謂不取此是般若波羅蜜多乃至布施波羅蜜多，此是色乃至識，此是眼處乃至意處，此是色處乃至法處，此是眼界乃至眼界，此是色界乃至法界，此是眼識界乃至意識界，此是眼觸乃至意觸，此是眼觸為緣所生諸受乃至意觸為緣所生諸受，此是地界乃至識界，此是因緣乃至增上緣，此是從緣所生諸法，此是無明乃至老死，此是內空乃至無性自性空，此是真如乃至不思議界，此是苦集滅道聖諦，此是四念住乃至八聖道支，此是四靜慮、四無量、四無色定，此是八解脫乃至十遍處，此是空、無相、無願解脫門，此是淨觀地乃至如來地，此是極喜地乃至法雲地，此是一切陀羅尼門、三摩地門，此是五眼、六神通，此是如來十力乃至十八不共法，此是三十二大士相、八十隨好，此是無忘失法、恒住捨性，此是一切智、道相智、一切相智，此是預流果乃至獨覺菩提，此是一切菩薩摩訶薩行，此是諸佛無上正等菩提，此是異生，此是聲聞，此是獨覺，此是菩薩，此是如來。

大般若波羅蜜多經卷第四百七十五

○舍利子！諸菩薩摩訶薩行深般若波羅蜜多，如實了知一切法性皆不可取，所謂般若波羅蜜多乃至布施波羅蜜多皆不可取，色乃至識亦不可取，眼處乃至意處亦不可取，色處乃至法處亦不可取，眼界乃至眼界亦不可取，色界乃至法界亦不可取，眼識界乃至意識界亦不可取，眼觸乃至意觸亦不可取，眼觸為緣所生諸受乃至意觸為緣所生諸受亦不可取，地界乃至識界亦不可取，因緣乃至增上緣亦不可取，從緣所生諸法亦不可取，無明乃至老死亦不可取，內空乃至無性自性空亦不可取，真如乃至不思議界亦不可取，苦集滅道聖諦亦不可取，四念住乃至八聖道支亦不可取，四靜慮、四無量、四無色定亦不可取，八解脫乃至十遍處亦不可取，空、無相、無願解脫門亦不可取，淨觀地乃至如來地亦不可取，極喜地乃至法雲地亦不可取，一切陀羅尼門、三摩地門亦不可取，五眼、六神通亦不可取，如來十力乃至十八不共法亦不可取，三十二大士相、八十隨好亦不可取，無忘失法、恒住捨性亦不可取，一切智、道相智、一切相智亦不可取，預流果乃至獨覺菩提亦不可取，一切菩薩摩訶

薩行亦不可取，諸佛無上正等菩提亦不可取，一切異生、聲聞、獨覺、菩薩、如來亦不可取。

- 舍利子！諸菩薩摩訶薩行深般若波羅蜜多，如實了知一切法性不可取故，於一切法得無障礙。
 - 舍利子！此不可取波羅蜜多即是無障波羅蜜多，如是無障波羅蜜多即是般若波羅蜜多，諸菩薩摩訶薩應於中學。
 - 舍利子！若菩薩摩訶薩能於中學，於一切法都無所得，尚不得學，況得無上正等菩提，況得般若波羅蜜多，況得異生、聲聞、獨覺、菩薩、佛法。何以故？
 - 舍利子！無有少法實有自性，於無自性一切法中，何等是異生法？何等是預流法？何等是一來法？何等是不還法？何等是阿羅漢法？何等是獨覺法？何等是菩薩法？何等是如來法？
 - 舍利子！如是諸法既不可得，依何等法可施設有補特伽羅？補特伽羅既不可得，云何可說此是異生，此是預流，此是一來，此是不還，此是阿羅漢，此是獨覺，此是菩薩，此是如來？」
- (40) 時舍利子白言：「世尊！若一切法都無自性，皆非實有，依何等事而可了知此是異生，此是異生法；廣說乃至此是如來，此是如來法？」
- (41) 佛告舍利子：「於汝意云何？為實有色，或曾或當如諸愚夫異生執不？為實有受想行識，或曾或當如諸愚夫異生執不？如是乃至為實有一切菩薩摩訶薩行，或曾或當如諸愚夫異生執不？為實有諸佛無上正等菩提，或曾或當如諸愚夫異生執不？為實有異生、預流、一來、不還、阿羅漢、獨覺、菩薩、如來，或曾或當如諸愚夫異生執不？」
- (42) 舍利子言：「不也，世尊！但由顛倒，愚夫異生有如是執。」
- (43) 佛告舍利子：「諸菩薩摩訶薩行深般若波羅蜜多方便善巧，雖觀諸法都無自性，皆非實有，而依世俗求趣無上正等菩提，為諸有情方便宣說，令得正解，離諸顛倒。」

◎『X11』安立於第七地者，令以彼地所攝方便善巧波羅蜜多成熟諸有情故。

- (44) 『X11』時舍利子復白佛言：「云何菩薩摩訶薩行深般若波羅蜜多時，方便善巧，雖觀諸法都無自性，皆非實有，而依世俗

求趣無上正等菩提，為諸有情方便宣說，令得正解，離諸顛倒？」

(45) 佛告舍利子：「諸菩薩摩訶薩行深般若波羅蜜多時，成就如是方便善巧，謂都不見有少實法可於中住；由於中住，而有罣礙；由罣礙故，而有退沒；由退沒故，心便劣弱；心劣弱故，便生懈怠。

○舍利子！以一切法都無實事，離我我所，皆以無性而為自性，本性空寂，自相空寂，唯有一切愚夫異生迷謬顛倒，執著色蘊乃至識蘊，執著眼處乃至意處，執著色處乃至法處，執著眼界乃至意界，執著色界乃至法界，執著眼識界乃至意識界，執著眼觸乃至意觸，執著眼觸為緣所生諸受乃至意觸為緣所生諸受，執著地界乃至識界，執著因緣乃至增上緣，執著從緣所生諸法，執著無明乃至老死，執著布施波羅蜜多乃至般若波羅蜜多，執著內空乃至無性自性空，執著真如乃至不思議界，執著苦集滅道聖諦，執著四念住乃至八聖道支，執著四靜慮、四無量、四無色定，執著八解脫乃至十遍處，執著空、無相、無願解脫門，執著淨觀地乃至如來地，執著極喜地乃至法雲地，執著一切陀羅尼門、三摩地門，執著五眼、六神通，執著如來十力乃至十八不共法，執著三十二大士相、八十隨好，執著無忘失法、恒住捨性，執著一切智、道相智、一切相智，執著預流果乃至獨覺菩提，執著一切菩薩摩訶薩行，執著諸佛無上正等菩提，執著異生、預流、一來、不還、阿羅漢、獨覺、菩薩、如來。由是因緣，諸菩薩摩訶薩觀一切法都無實事，離我我所，皆以無性而為自性，本性空寂、自相空寂，行深般若波羅蜜多，自立如幻師，為有情說法，諸慳貪者，為說布施；諸破戒者，為說淨戒；諸忿恚者，為說安忍；諸懈怠者，為說精進；諸散亂者，為說靜慮；諸愚癡者，為說般若。是菩薩摩訶薩安立有情，令住布施乃至般若波羅蜜多已，復為宣說能出生死殊勝聖法，令諸有情依之修學，或得預流果，或得一來果，或得不還果，或得阿羅漢果，或得獨覺菩提，或入菩薩正性離生，或住菩薩摩訶薩地，或證無上正等菩提。」

(46) 時舍利子復白佛言：「諸菩薩摩訶薩行深般若波羅蜜多時，云何不名有所得者？謂諸有情實無所有，而令安住布施波羅蜜多

乃至般若波羅蜜多，復為宣說能出生死殊勝聖法，或令得預流果，乃至或令證得無上正等菩提。」

(47) 佛告舍利子：「諸菩薩摩訶薩行深般若波羅蜜多時，於諸有情非有所得。何以故？

○舍利子！是菩薩摩訶薩行深般若波羅蜜多時，不見有情少實可得，唯有世俗假說有情。

○舍利子！是菩薩摩訶薩行深般若波羅蜜多時，安住二諦為諸有情宣說正法。何謂二諦？一、世俗諦；二、勝義諦。

○舍利子！雖二諦中有情施設俱不可得，而諸菩薩摩訶薩行深般若波羅蜜多時，方便善巧，為諸有情宣說正法，令諸有情聞正法已，於現法中尚不得我，何況當得所求果證及能得者。

○如是，舍利子！諸菩薩摩訶薩行深般若波羅蜜多時，方便善巧，雖為有情宣說正法，令修正行，得所證果，而心於彼都無所得，達一切法不可得故。」

(48) 爾時，具壽舍利子白佛言：「世尊！此諸菩薩摩訶薩雖於諸法不得一性，不得異性，不得摠性，不得別性，而被如是大功德鎧。由被如是大功德鎧，不現欲界，不現色界，不現無色界，不現有為界，不現無為界。雖化有情令出三界，而於有情都無所得，亦復不得有情施設；有情施設不可得故，無縛無脫；無縛脫故，無染無淨；無染淨故，諸趣差別不可了知；諸趣差別不可了知故，無業無煩惱；無業煩惱故，亦無異熟果；既無異熟果，如何得有我及有情流轉諸趣，現三界等種種差別？」

(49) 佛告舍利子：「如是！如是！如汝所說。舍利子！若諸有情先有後無，菩薩、諸佛應有過失；若諸趣生死先有後無，則菩薩、諸佛亦有過失。先無後有，理亦不然。是故，舍利子！若佛出世，若不出世，法相常住，真如、法界、不虛妄性，終無改轉，以一切法法性、法界、法住、法定、真如、實際、不虛妄性、不變異性猶如虛空，此中尚無我等可得，況有色等諸法可得。既無色等諸法可得，云何當有諸趣生死？諸趣生死既不可得，云何當有成熟有情，令其解脫？唯依世俗，假說為有。

○舍利子！諸菩薩摩訶薩從過去佛聞一切法自性皆空，但諸有情顛倒執著，聞已，如實繫念思惟，為脫有情顛倒執著，求趣無上正等菩提，於求趣時，不作是念：『我於此法已得當得，令彼有情已度當度，所執著處，生死眾苦。』

○舍利子！是菩薩摩訶薩為脫有情顛倒執著，被功德鎧，大誓莊嚴，勇猛正勤，無所顧戀，不退無上正等菩提，常於菩提不起猶豫，謂：『我當證、不當證耶？』但正念言：『我定當證所求無上正等菩提，作諸有情真實饒益，謂令解脫迷謬顛倒，諸趣往來，受生死苦。』

○舍利子！諸菩薩摩訶薩雖脫有情迷謬顛倒，諸趣生死，而無所得，但依世俗，說有是事。

○舍利子！如工幻師或彼弟子，依帝網術，化作無量百千俱胝諸有情類，復化種種上妙飲食，施化有情，皆令飽滿，作是事已，歡喜唱言：『我已獲得廣大福聚。』於意云何？是工幻師或彼弟子，實令有情得飽滿不？」

(50) 舍利子言：「不也，世尊！」

(51) 佛告舍利子：「諸菩薩摩訶薩亦復如是，從初發心，為欲饒益諸有情故，修行布施波羅蜜多乃至般若波羅蜜多，安住內空乃至無性自性空，安住真如乃至不思議界，安住苦集滅道聖諦，修行四念住乃至八聖道支，修行四靜慮、四無量、四無色定，修行八解脫乃至十遍處，修行空、無相、無願解脫門，修行極喜地乃至法雲地，修行一切陀羅尼門、三摩地門，修行五眼、六神通，修行如來十力乃至十八不共法，修行三十二大士相、八十隨好，修行無忘失法、恆住捨性，修行一切智、道相智、一切相智，圓滿菩薩大菩提道，成熟有情，嚴淨佛土。

○舍利子！諸菩薩摩訶薩雖作是事，而於有情及一切法都無所得，不作是念：『我以此法調伏如是諸有情類，令其遠離顛倒執著，不復輪迴諸趣生死。』」

◎『X12』安立於八地中，初安立於了知三道之道相智者，安立於彼地所攝菩薩道表示之三道道相智故。

(52) 『X12』爾時，具壽善現白佛言：「世尊！何謂菩薩大菩提道，諸菩薩摩訶薩修行此道，方便善巧成熟有情，嚴淨佛土，疾證無上正等菩提？」

(53) 佛告善現：「諸菩薩摩訶薩從初發心所行布施波羅蜜多乃至般若波羅蜜多，所行內空乃至無性自性空，所行真如乃至不思議界，所行苦集滅道聖諦，所行四念住乃至八聖道支，所行四靜慮、四無量、四無色定，所行八解脫乃至十遍處，所行空、無

相、無願解脫門，所行極喜地乃至法雲地，所行一切陀羅尼門、三摩地門，所行五眼、六神通，所行如來十力乃至十八不共法，所行無忘失法、恒住捨性，所行一切智、道相智、一切相智及餘無量無邊佛法，皆是菩薩大菩提道。諸菩薩摩訶薩修行此道，方便善巧成熟有情，嚴淨佛土，疾證無上正等菩提，而無有情、佛土等想。」

- (54) 具壽善現復白佛言：「云何菩薩摩訶薩修行布施波羅蜜多時，方便善巧成熟有情？」
- (55) 佛告善現：「有菩薩摩訶薩修行布施波羅蜜多時，方便善巧，自行布施亦勸他行布施，慇懃教誡教授彼言：『諸善男子！勿著布施，若著布施，當更受身；若更受身，由斯展轉，當受無量猛利大苦。諸善男子！勝義諦中都無布施，亦無施者、受者、施物及諸施果，如是諸法皆本性空，本性空中無法可取，諸法空性亦不可取。』
- 如是，善現！諸菩薩摩訶薩修行布施波羅蜜多，雖於有情自行於施亦勸他施，而於布施、施者、受者、施物、施果皆無所得，如是布施波羅蜜多名無所得波羅蜜多。
 - 善現！是菩薩摩訶薩於此諸法無所得時，方便善巧能化有情，住預流果、或一來果、或不還果、或阿羅漢果、或獨覺菩提，或趣無上正等菩提。
 - 如是，善現！諸菩薩摩訶薩修行布施波羅蜜多時，成熟有情，令獲勝利。
 - 善現！是菩薩摩訶薩自行布施，亦勸他行布施，無倒稱揚行布施法，歡喜讚歎行布施者。
 - 善現！是菩薩摩訶薩如是施已，或生刹帝利大族，或生婆羅門大族，或生長者大族，或生居士大族，豐饒財寶，或作小王，於小國土富貴自在，或作大王，於大國土富貴自在，或作輪王，於四洲界富貴自在。是菩薩摩訶薩生如是等諸尊貴處，以四攝事攝諸有情，先教有情安住布施，由施因緣，其心調善，漸次令住戒、忍、精進、靜慮、般若，復令安住四靜慮、四無量、四無色定，復令安住四念住乃至八聖道支，復令安住空、無相、無願解脫門。是菩薩摩訶薩令諸有情住如是等諸善法已，或令趣入正性離生，得預流果乃至令得阿羅漢果；或令趣入正性離生，漸次證得獨覺菩提；或令趣入正性離生，漸次修學諸菩薩

地，速趣無上正等菩提。復告彼言：『諸善男子！當發大願，速趣無上正等菩提，作諸有情饒益勝事。諸有情類虛妄分別，所執諸法都無自性，但由顛倒，妄執為有，是故汝等常當精勤，自除顛倒，亦勸他斷，自脫生死，亦令他脫，自獲大利，亦令他得。』

- 善現！諸菩薩摩訶薩常應如是修行布施波羅蜜多，由此布施波羅蜜多，從初發心乃至究竟，不墮惡趣貧賤邊鄙，為欲饒益諸有情故，多生人趣，作轉輪王，富貴自在，多所饒益。所以者何？隨業威勢，獲如是果。謂彼菩薩作輪王時，見乞者來，便作是念：『我為何事，流轉生死，作轉輪王，豈我不為饒益有情，住生死中，受斯勝果，不為餘事？』作是念已，告乞者言：『隨汝所須，皆當施與，汝取物時，如取己物，勿作他想。所以者何？我為汝等得饒益故，而受此身，積聚財物，故此財物是汝等有，隨汝自取，若自受用，若轉施他，莫有疑難。』是菩薩摩訶薩如是憐愍諸有情時，無緣大悲疾得圓滿。由此大悲疾圓滿故，雖恒饒益無量有情，而於有情都無所得，亦復不得所獲勝果，能如實知『但由世俗言說，施設饒益種種諸有情事』，又如實知『所施設事，皆如谷響，雖現似有，而無真實』，由此於法都無所取。
- 善現！諸菩薩摩訶薩常應如是修行布施波羅蜜多，謂於有情都無所顧，乃至能施自身骨肉，況不能捨諸外資具。謂諸資具攝受有情，令速解脫生老病死。」……

大般若波羅蜜多經卷第四百七十六

道土品第八十

- (56) 爾時，具壽善現作是念言：「何謂菩薩摩訶薩道，諸菩薩摩訶薩安住此道，能被種種勝功德鎧，如實饒益一切有情？」
- (57) 世尊知彼心之所念，便告之言：「善現當知！布施波羅蜜多乃至般若波羅蜜多是諸菩薩摩訶薩道，四念住乃至八聖道支是諸菩薩摩訶薩道，內空乃至無性自性空是諸菩薩摩訶薩道，真如乃至不思議界是諸菩薩摩訶薩道，苦集滅道聖諦是諸菩薩摩訶薩道，四靜慮、四無量、四無色定是諸菩薩摩訶薩道，八解脫乃至十遍處是諸菩薩摩訶薩道，空、無相、無願解脫門是諸菩薩摩訶薩道，極喜地乃至法雲地是諸菩薩摩訶薩道，一切陀羅

尼門、三摩地門是諸菩薩摩訶薩道，五眼、六神通是諸菩薩摩訶薩道，如來十力乃至十八不共法是諸菩薩摩訶薩道，無忘失法、恒住捨性是諸菩薩摩訶薩道，一切智、道相智、一切相智是諸菩薩摩訶薩道，諸餘無量無邊佛法是諸菩薩摩訶薩道。

○復次，善現！摠一切法皆是菩薩摩訶薩道。善現！於汝意云何？頗有法諸菩薩摩訶薩所不應學？諸菩薩摩訶薩不學此法，能得無上正等菩提不？」

(58) 善現對曰：「不也，世尊！」

(59) 佛告善現：「如是！如是！定無有法諸菩薩摩訶薩所不應學，諸菩薩摩訶薩不學此法，必不能得所求無上正等菩提。所以者何？若菩薩摩訶薩不學一切法，定不能得一切智智。」

(60) 具壽善現復白佛言：「若一切法皆自性空，云何菩薩摩訶薩於何處學？若有所學，將無世尊於無戲論而作戲論，謂有諸法是此是彼，由是為是；此是世間，此是出世；此是有漏，此是無漏；此是有為，此是無為；此是異生法，此是預流法，此是一來法，此是不還法，此是阿羅漢法，此是獨覺法，此是菩薩法，此是如來法？」

(61) 佛告善現：「如是！如是！如汝所說。諸所有法皆自性空。若一切法非自性空，則應菩薩摩訶薩不證無上正等菩提。以一切法皆自性空，是故菩薩摩訶薩能證無上正等菩提。」

○善現！如汝所言『若一切法皆自性空，云何菩薩摩訶薩於何處學？若有所學，將無世尊於無戲論而作戲論，謂有諸法是此是彼，由是為是；廣說乃至是如來法』者，善現！若諸有情知一切法皆自性空，則諸菩薩摩訶薩不應學一切法，證得一切智智，為諸有情建立宣說。以諸有情不知諸法皆自性空故，諸菩薩摩訶薩定應學一切法，證得一切智智，為諸有情建立宣說。

◎ 『X13』 第二安立於實執寂靜者，安立於遣除現行實執故；

『X13』 善現當知！諸菩薩摩訶薩於菩薩道初修學時，應審觀察：『諸法自性都不可得，唯有執著和合所作，我當審察諸法自性皆畢竟空，不應於中有所執著，謂不應執著色受想行識，不應執著眼處乃至意處，不應執著色處乃至法處，不應執著眼界乃至眼界，不應執著色界乃至法界，不應執著眼識界乃至意識界，不應執著眼觸乃至意觸，不應執著眼觸為緣所生諸受乃

至意觸為緣所生諸受，不應執著地界乃至識界，不應執著因緣乃至增上緣，不應執著從緣所生諸法，不應執著無明乃至老死，不應執著布施波羅蜜多乃至般若波羅蜜多，不應執著內空乃至無性自性空，不應執著真如乃至不思議界，不應執著苦集滅道聖諦，不應執著四念住乃至八聖道支，不應執著四靜慮、四無量、四無色定，不應執著八解脫乃至十遍處，不應執著空、無相、無願解脫門，不應執著淨觀地乃至如來地，不應執著極喜地乃至法雲地，不應執著一切陀羅尼門、三摩地門，不應執著五眼、六神通，不應執著如來十力乃至十八不共法，不應執著三十二大士相、八十隨好，不應執著無忘失法、恒住捨性，不應執著一切智、道相智、一切相智，不應執著預流果乃至獨覺菩提，不應執著一切菩薩摩訶薩行，不應執著諸佛無上正等菩提。所以者何？以一切法皆自性空，空性不應執著空性，空中空性尚不可得，況有空性能執著空。』

- 善現！諸菩薩摩訶薩如是觀察一切法時，於諸法性雖無執著，而於諸法學無厭倦。是菩薩摩訶薩住此學中，觀諸有情心行差別，調審觀察是諸有情心行何處；既觀察已，如實了知彼心但行虛妄所執。爾時，菩薩便作是念：『彼心既行虛妄所執，我今解脫必不為難。』

是菩薩摩訶薩作是念已，安住般若波羅蜜多，方便善巧教誡教授諸有情言：『汝等今者，皆應遠離虛妄所執，趣入正法，修諸善行。』

復作是言：『汝等今者，應行布施，當得資具無所乏少，然勿恃此而生憍逸。所以者何？此中都無堅實事故。汝等今者，應行淨戒、安忍、精進、靜慮、般若，當得種種功德具足，然勿恃此而生憍逸。所以者何？此中都無堅實事故。汝等今者，應行內空乃至無性自性空，應行真如乃至不思議界，應行苦集滅道聖諦，應行四念住乃至八聖道支，應行四靜慮、四無量、四無色定，應行八解脫乃至十遍處，應行空、無相、無願解脫門，應行淨觀地乃至如來地，應行極喜地乃至法雲地，應行一切陀羅尼門、三摩地門，應行五眼、六神通，應行如來十力乃至十八不共法，應行無忘失法、恒住捨性，應行一切智、道相智、一切相智，應行預流果乃至獨覺菩提，應行一切菩薩摩訶薩

行，應行諸佛無上正等菩提，應行諸餘無量佛法，然勿恃此而生僥逸。所以者何？此中都無堅實事故。』

- 善現！是菩薩摩訶薩安住般若波羅蜜多，方便善巧教誡教授諸有情時，行菩薩道無所執著。所以者何？一切法性不應執著，若能執著、若所執著、執時、執處皆無自性，以一切法自性空故。
- 如是，善現！諸菩薩摩訶薩如是修行菩薩道時，於一切法都無所住，以無所住而為方便，雖行布施波羅蜜多乃至般若波羅蜜多，而於其中都無所住；雖行內空乃至無性自性空，而於其中都無所住；雖行真如乃至不思議界，而於其中都無所住；雖行苦集滅道聖諦，而於其中都無所住；雖行四念住乃至八聖道支，而於其中都無所住；雖行四靜慮、四無量、四無色定，而於其中都無所住；雖行八解脫乃至十遍處，而於其中都無所住；雖行空、無相、無願解脫門，而於其中都無所住；雖行淨觀地乃至如來地，而於其中都無所住；雖行極喜地乃至法雲地，而於其中都無所住；雖行一切陀羅尼門、三摩地門，而於其中都無所住；雖行五眼、六神通，而於其中都無所住；雖行如來十力乃至十八不共法，而於其中都無所住；雖行無忘失法、恆住捨性，而於其中都無所住；雖行一切智、道相智、一切相智，而於其中都無所住；雖行預流果乃至獨覺菩提，而於其中都無所住；雖行一切菩薩摩訶薩行，而於其中都無所住；雖行諸佛無上正等菩提，而於其中都無所住；雖行諸餘無量佛法，而於其中都無所住。所以者何？如是自性、行者、行相一切皆空故，於其中都無所住。
- 善現當知！諸菩薩摩訶薩雖能得預流果乃至獨覺菩提，而於其中不欲證住。所以者何？有二緣故。何等為二？一者、彼果都無自性，能住、所住俱不可得；二者、於彼不生喜足，是故於中不欲證住。調諸菩薩常作是念：『我定應得預流果乃至獨覺菩提，不應不得，然於其中不應證住。所以者何？我從初發無上正等菩提心來，於一切時，更無餘想，唯求無上正等菩提。然我定當證得無上正等菩提，豈於中間應住餘果？』
- 善現！是菩薩摩訶薩從初發心乃至趣入菩薩所得正性離生，曾無異想，但求無上正等菩提。善現！是菩薩摩訶薩從得初地，展轉乃至得第十地，曾無異想，但求無上正等菩提。善現！是

菩薩摩訶薩專求無上正等菩提，於一切時，心無散亂，諸有發起身語意業，無不皆與菩提心俱。善現！是菩薩摩訶薩住菩提心，起菩提道，不為餘事擾亂其心。」

- (62) 具壽善現白言：「世尊！若一切法畢竟不生，云何菩薩摩訶薩起菩提道？」
- (63) 佛告善現：「如是！如是！如汝所說『一切法皆不生，此復云何諸無所作，無所趣』者，知一切法皆不生故。」
- (64) 具壽善現復白佛言：「豈不諸佛若出世間，不出世間，諸法法界法眾常住？」
- (65) 佛告善現：「如是！如是！然諸有情不能解了諸法法界法眾常住，流轉生死，受諸苦惱。諸菩薩摩訶薩為饒益彼，起菩提道，由菩提道，令諸有情畢竟解脫生死眾苦，證得常樂清涼涅槃。」

◎『X14』第三安立於假名佛寶者，安立令得名佛寶之菩提故。

- (66) 『X14』具壽善現復白佛言：「諸菩薩摩訶薩為用生道得菩提耶？」
- 佛言：「不也。」
- (67) 「世尊！為用不生道得菩提耶？」
- 佛言：「不也。」
- (68) 「世尊！為用生、不生道得菩提耶？」
- 佛言：「不也。」
- (69) 「世尊！為用非生、非不生道得菩提耶？」
- 佛言：「不也。」
- (70) 具壽善現復白佛言：「若眾，菩提由何而得？」
- (71) 佛告善現：「菩提不由道、非道得。所以者何？菩提即道，道即菩提，是故不由道、非道得。」
- (72) 具壽善現復白佛言：「若菩提即是道，道即是菩提者，豈不菩薩摩訶薩已得菩提道，應已得菩提？若眾，如來應正等覺何緣復為諸菩薩說如來十力、四無所畏、四無礙解、大慈大悲大喜大捨、十八不共法、三十二相、八十隨好及餘無量無邊佛法，令其修證？」
- (73) 佛告善現：「於意云何？汝豈謂佛得菩提耶？」
- (74) 善現對曰：「不也，世尊！所以者何？佛即是菩提，菩提即是佛，故不應謂佛得菩提。」

(75) 佛告善現：「如是！如是！然汝所問『豈不菩薩摩訶薩已得菩提道，應已得菩提』者，善現！諸菩薩摩訶薩修菩提道未得圓滿，云何可說已得菩提？善現當知！諸菩薩摩訶薩若已圓滿布施波羅蜜多乃至般若波羅蜜多，若已圓滿內空乃至無性自性空，若已圓滿真如乃至不思議界，若已圓滿苦集滅道聖諦，若已圓滿四念住乃至八聖道支，若已圓滿四靜慮、四無量、四無色定，若已圓滿八解脫乃至十遍處，若已圓滿空、無相、無願解脫門，若已圓滿極喜地乃至法雲地，若已圓滿一切陀羅尼門、三摩地門，若已圓滿五眼、六神通，若已圓滿如來十力乃至十八不共法，若已圓滿三十二大士相、八十隨好，若已圓滿無忘失法、恒住捨性，若已圓滿一切智、道相智、一切相智，若已圓滿諸餘無量無邊佛法，從此無間以一剎那金剛喻定相應妙慧，永斷一切二障羸重習氣相續，證得無上正等菩提，乃名如來應正等覺，於一切法得大自在，盡未來際饒益有情。」

◎『X15』第四安立嚴淨佛土加行者，安立於嚴淨佛土故。

(76) 『X15』爾時，具壽善現白佛言：「世尊！云何菩薩摩訶薩嚴淨佛土？」

(77) 佛告善現：「諸菩薩摩訶薩從初發心乃至後有，常自清淨身語意三羸重，亦清淨他三種羸重故，能嚴淨所居佛土。」

(78) 具壽善現復白佛言：「何謂菩薩摩訶薩身語意三羸重？」

(79) 佛告善現：「若害生命、若不與取、若欲邪行，是身羸重；若虛誑語、若離間語、若羸惡語、若雜穢語，是語羸重；若貪欲、若瞋恚、若邪見，是意羸重。」

○復次，善現！若菩薩摩訶薩戒蘊、定蘊、慧蘊、解脫蘊、解脫智見蘊皆不清淨，亦名羸重。復次，善現！若菩薩摩訶薩慳貪心、犯戒心、忿恚心、懈怠心、散亂心、惡慧心，亦名羸重。復次，善現！若菩薩摩訶薩遠離四念住乃至八聖道支心，亦名羸重。…

○復次，善現！諸菩薩摩訶薩行深般若波羅蜜多，勇猛正勤，發弘誓願，自修一切智、道相智、一切相智，亦教他修一切智、道相智、一切相智。作此事已，復發願言：『當得無上正等覺時，令我土中諸有情類不離一切智、道相智、一切相智。』

- 復次，善現！諸菩薩摩訶薩行深般若波羅蜜多，勇猛正勤，發弘誓願，自修一切菩薩摩訶薩行，亦教他修一切菩薩摩訶薩行。作此事已，復發願言：『當得無上正等覺時，令我土中諸有情類不離一切菩薩摩訶薩行。』
- 復次，善現！諸菩薩摩訶薩行深般若波羅蜜多，勇猛正勤，發弘誓願，自修諸佛無上正等菩提，亦教他修諸佛無上正等菩提。作此事已，復發願言：『當得無上正等覺時，令我土中諸有情類不離諸佛無上正等菩提。』
- 如是，善現！諸菩薩摩訶薩行深般若波羅蜜多，由斯願行，便能嚴淨所居佛土。
- 善現當知！是諸菩薩摩訶薩眾隨眾所時行菩提道，應得圓滿所起願行，即眾所時精勤修學。由此因緣，自能成就一切善法，亦能令他漸次成就一切善法，自能修得殊勝相好所莊嚴身，亦能令他漸次修得殊勝相好所莊嚴身，由廣大福所攝受故。
- 善現當知！是諸菩薩摩訶薩眾所修願行得圓滿已，各於所居嚴淨佛土證得無上正等覺時，所化有情亦生彼土，共受淨土大乘法樂。
- 善現當知！是諸菩薩摩訶薩眾應修如是嚴淨佛土，謂彼土中常不聞有三種惡趣，亦不聞有諸惡見趣，亦不聞有貪瞋癡毒，亦不聞有男女形相，亦不聞有聲聞、獨覺，亦不聞有苦、無常等不可意事，亦不聞有攝受資具，亦不聞有我我所執、隨眠、纏、結、顛倒執著，亦不聞有安立有情果位差別，但聞說空、無相、無願、無生、無滅、無性等聲，謂隨有情所樂差別，於樹林等內外物中，常有微風互相衝擊，發起種種微妙音聲，彼音聲中說：『一切法皆無自性，無性故空，空故無相，無相故無願，無願故無生，無生故無滅，是故諸法本來寂靜，自性涅槃，如來出世，若不出世，諸法法界法眾常住，謂一切法無性、空等。』彼佛土中諸有情類，若晝若夜，若行若立，若坐若臥，常聞如是妙法音聲。
- 善現當知！是諸菩薩摩訶薩眾各住所居嚴淨佛土證得無上正等覺時，十方如來應正等覺皆共稱讚彼佛名，若諸有情得聞如是諸佛名者，定於無上正等菩提得不退轉。
- 善現當知！是諸菩薩摩訶薩眾各住所居嚴淨佛土證得無上正等覺時，為諸有情宣說正法，有情聞已，定不生疑，謂為是法，

為是非法。所以者何？彼諸有情達一切法皆即真如、法界、法性，一切是法，無非法者。

- 如是，善現！是諸菩薩摩訶薩眾皆能嚴淨如是佛土。
- 復次，善現！是諸菩薩摩訶薩眾有所化生，具不善根，未於諸佛、菩薩、獨覺及聲聞等種諸善根，為諸惡友所攝受故，離善友故，不聞正法，常為種種我、有情見及諸見趣之所執藏，墮在斷常二邊偏執。是諸有情自起邪執，亦常教他令起邪執，於非三寶起三寶想，於三寶中謂非三寶，毀謗正法，稱讚邪法，由是因緣，身壞命終，墮諸惡趣，受諸劇苦。是諸菩薩摩訶薩眾各住自土證得無上正等覺已，見彼有情沈輪生死，受無量苦，以神通力，方便教化，令捨惡見，住正見中，從惡趣出，生於人趣。生人趣已，復以種種神通，方便教化，令住正定聚中，由斯畢竟不墮惡趣。復令勤修殊勝願行，命終得生嚴淨佛土，受用淨土大乘法樂。
- 如是，善現！是諸菩薩摩訶薩眾皆能如是嚴淨佛土。由所居土極清淨故，生彼有情，於一切法不起疑惑，謂此是世間法，此是出世間法；此是有漏法，此是無漏法；此是有為法，此是無為法。諸如是等疑惑分別畢竟不生，由此因緣，彼有情類定得無上正等菩提。
- 善現！是為菩薩摩訶薩嚴淨佛土功德之相。」

大般若波羅蜜多經卷第四百七十七

正定品第八十一

◎『X16』安立於九地中，初安立於自定成佛者，安立決定成佛，不墮小乘故。

- (01) 『X16』爾時，具壽善現白佛言：「世尊！是諸菩薩摩訶薩為住正性定聚，為住不定聚耶？」
- (02) 佛告善現：「是諸菩薩摩訶薩皆住正性定聚，非不定聚。」
- (03) 具壽善現復白佛言：「是諸菩薩摩訶薩為任何等正性定聚？聲聞乘耶？獨覺乘耶？菩薩乘耶？」
- (04) 佛告善現：「是諸菩薩摩訶薩皆住菩薩正性定聚，非住二乘正性定聚。」
- (05) 具壽善現復白佛言：「是諸菩薩摩訶薩為何時住正性定聚？初發心耶？不退位耶？最後有耶？」

- (06) 佛告善現：「是諸菩薩摩訶薩若初發心、若不退位、若最後有，皆住菩薩正性定聚。」
- (07) 具壽善現復白佛言：「住正性定聚菩薩摩訶薩墮惡趣不？」
- (08) 佛告善現：「住正性定聚菩薩摩訶薩，決定不墮諸惡趣中。」
復告善現：「於意云何？第八、預流、一來、不還、阿羅漢、獨覺墮惡趣不？」
- (09) 善現對曰：「不也，世尊！」
- (10) 佛告善現：「諸菩薩摩訶薩亦復如是，從初發心修行布施波羅蜜多乃至般若波羅蜜多及餘無量無邊佛法，斷諸惡法，由此因緣，墮諸惡趣，無有是處，生長壽夭，亦無是處，謂於彼處諸勝善法不得現行。是菩薩摩訶薩若生邊鄙，或生達絮、蔑戾車中，無有是處，謂於彼處不能修行殊勝善法，多起惡見，不信因果，常樂習行諸穢惡業，不聞佛名、法名、僧名，亦無四眾，謂苾芻、苾芻尼、鄔波索迦、鄔波斯迦。是菩薩摩訶薩生邪見家，無有是處，謂生彼家，執著種種諸惡見趣，撥無妙行、惡行及果，不修諸善，樂作諸惡，故諸菩薩不生彼家。復次，善現！諸菩薩摩訶薩初發無上正等覺心，以勝意樂受行十種不善業道，無有是處。」
- (11) 具壽善現復白佛言：「若菩薩摩訶薩從初發心成就如是功德善根，不生惡處，何故如來每為眾說自本生事多百千種，於中亦有生諸惡處，眾時善根為何所在？」
- (12) 佛告善現：「諸菩薩摩訶薩不由穢業受惡趣身，但為饒益諸有情類，由故思願而受彼身，是故不應引彼為難。」
復告善現：「於意云何？有諸獨覺或阿羅漢，方便善巧如諸菩薩，成就殊勝方便善巧，受白象等傍生之身，見怨賊來，欲為損害，便起無上安忍慈悲，欲令彼人得利樂故，自捨身命，不害彼不？」
- (13) 善現對曰：「諸獨覺等，無如是事。」
- (14) 佛告善現：「由此因緣，當知菩薩為欲饒益諸有情故，為大慈悲速圓滿故，雖現受種種傍生之身，而不為傍生過失所染。」
- (15) 具壽善現復白佛言：「諸菩薩摩訶薩住何善根，為欲饒益諸有情故，受傍生身？」
- (16) 佛告善現：「諸菩薩摩訶薩有何善根不應圓滿？然諸菩薩摩訶薩眾為求無上正等菩提，一切善根皆應圓滿，謂諸菩薩從初發

心乃至安坐妙菩提座，無有善根不應圓滿。要具圓滿一切善法，方得無上正等菩提，若一善法未能圓滿，而得無上正等菩提，無有是處。是故菩薩從初發心乃至安坐妙菩提座，於其中間，常學圓滿一切善法，學已，當得一切相智，永斷一切習氣相續，乃能證得一切智智。」

- (17) 具壽善現復白佛言：「云何菩薩摩訶薩成就白法及真聖智而生惡趣，受傍生身？」
- (18) 佛告善現：「於意云何？如來成就一切白法、真聖智不？」
- (19) 善現對曰：「如來成就一切白法及真聖智。」
- (20) 佛告善現：「於意云何？如來化作傍生趣身，饒益有情，作佛事不？」
- (21) 善現對曰：「如來化作傍生趣身，饒益有情，作諸佛事。」
- (22) 佛告善現：「於意云何？如來化作傍生身時，是實傍生受彼苦不？」
- (23) 善現對曰：「如來化作傍生身時，非實傍生，不受彼苦。」
- (24) 佛告善現：「諸菩薩摩訶薩亦復如是，雖成白法及真聖智，而為成熟諸有情故，方便善巧受傍生身，如應成熟諸有情類。復次，善現！於意云何？有阿羅漢諸漏永盡，能化作身，起諸事業，由彼事業能發生他歡喜心不？」
- (25) 善現對曰：「有阿羅漢諸漏永盡，能化作身，起諸事業，由彼事業，能令他人人生大歡喜。」
- (26) 佛告善現：「諸菩薩摩訶薩亦復如是，雖成白法及真聖智，而為饒益諸有情故，方便善巧受惡趣身，如應成熟諸有情類，雖受彼身，而不同彼受諸苦惱，亦復不為彼趣過失之所雜染。復次，善現！於意云何？有工幻師或彼弟子，幻作種種象馬等事，令眾人見，歡喜踊躍，於彼有實象馬等不？」
- (27) 善現對曰：「於彼無實象馬等事。」
- (28) 佛告善現：「諸菩薩摩訶薩亦復如是，雖成白法及真聖智，而為饒益諸有情故，現受種種傍生等身，雖受彼身，而實非彼，亦不為彼過失所汙。」
- (29) 具壽善現復白佛言：「諸菩薩摩訶薩如是廣大方便善巧，雖成就白法及真聖智，而為有情故，受種種身，隨其所應，現作饒益。」

◎『X17』第二安立令成熟他者，安立令作地上所攝無量有情義利故。

『X17』世尊！諸菩薩摩訶薩住何等法，能作如是方便善巧，雖受諸趣種種身形，而不為彼過失所汙？」

(30) 佛告善現：「諸菩薩摩訶薩住深般若波羅蜜多，能作如是方便善巧，由斯方便善巧力故，雖往十方殑伽沙等諸佛世界現種種身，利益安樂彼有情類，而於其中不起染著。所以者何？是菩薩摩訶薩於一切法都無所得，謂都不得能染、所染及染因緣。所以者何？以一切法自性空故。」

○善現當知！空不能染著空，空亦不能染著餘法，亦無餘法能染著空。所以者何？空中空性尚不可得，況有餘法而可得者。如是名為不可得空，諸菩薩摩訶薩安住此中，能證無上正等菩提，為諸有情常作饒益。」

(31) 具壽善現復白佛言：「諸菩薩摩訶薩為但安住甚深般若波羅蜜多，能作如是方便善巧，為亦安住諸餘法耶？」

(32) 佛告善現：「豈有餘法非深般若波羅蜜多之所攝受，而汝今者，生如是疑？」

(33) 具壽善現復白佛言：「甚深般若波羅蜜多既自性空，云何可說甚深般若波羅蜜多攝一切法？非於空中可說有法攝與不攝。」

(34) 佛告善現：「豈不諸法諸法性空？」

(35) 善現對曰：「如是！如是！」

(36) 佛告善現：「若一切法一切性空，豈不空中攝一切法？」

(37) 善現對曰：「如是！如是！」

(38) 佛告善現：「由此因緣，甚深般若波羅蜜多攝一切法，當知菩薩住深般若波羅蜜多，能作如是方便善巧。」

◎『X18』安立第十地中，初安立親近善知識者，安立令修彼地所攝親近無數諸佛為善知識等功德故。

(39) 『X18』爾時，具壽善現白佛言：「世尊！云何菩薩摩訶薩行深般若波羅蜜多時，安住諸法自性空中，引發神通波羅蜜多，安住神通波羅蜜多，能往十方殑伽沙等諸佛世界，供養恭敬諸佛世尊，於諸佛所，聽受正法，種殖無量殊勝善根？」

(40) 佛告善現：「諸菩薩摩訶薩行深般若波羅蜜多時，遍觀十方殑伽沙等諸佛世界及諸佛眾并所說法自性皆空，唯有世俗假說名字說為世界、佛眾及法，如是世俗假說名字亦自性空。」

- 善現當知！若十方界及諸佛眾并所說法假說名字自性不空，則所說空應成一分，以所說空非成一分故，一切法自性皆空，其理周圓，無二無別。諸菩薩摩訶薩行深般若波羅蜜多時，由遍觀空方便善巧，引發神通波羅蜜多，安住神通波羅蜜多，便能引發天眼、天耳、神境、他心、宿住隨念及知漏盡微妙通慧。
- 善現當知！諸菩薩摩訶薩非離神通波羅蜜多，有能自在成熟有情，嚴淨佛土，證得無上正等菩提。是故神通波羅蜜多是菩提道，諸菩薩摩訶薩皆依此道求趣無上正等菩提，於求趣時，能自圓滿一切善法，亦能教他修諸善法，雖作是事，而於善法都無執著。所以者何？是菩薩摩訶薩知諸善法皆自性空，非自性空有所執著，若有執著，則有愛味，由無執著，亦無愛味，自性空中無愛味故，能味、所味及味因緣於空法中不可得故。
- 善現當知！諸菩薩摩訶薩行深般若波羅蜜多時，安住神通波羅蜜多，引發天眼，清淨過人，用此天眼觀一切法自性皆空。見一切法自性空故，不依法相造作諸業，雖為有情說如是法，而亦不得諸有情相及彼施設。是菩薩摩訶薩以無所得而為方便，引發菩薩殊勝神通，用此神通，作所應作一切事業。
- 是菩薩摩訶薩以極清淨過人天眼，遍觀十方殑伽沙等諸佛世界，見已，引發神境智通，往彼饒益諸有情類，或以布施波羅蜜多乃至般若波羅蜜多而作饒益，或以四念住乃至八聖道支而作饒益，或以四靜慮、四無量、四無色定而作饒益，或以八解脫乃至十遍處而作饒益，或以空、無相、無願解脫門而作饒益，或以諸餘殊勝善法而作饒益，或以聲聞、獨覺、菩薩及諸佛法而作饒益。
- 是菩薩摩訶薩於十方界，若見有情多慳貪者，深生憐愍，說如是法：『汝等有情當行布施，諸慳貪者，受貧窮苦，由貧窮故，無有威德，不能自益，況能益他。是故汝等當勤行施，既自安樂，亦安樂他，勿以貧窮，更相食噉，俱不解脫諸惡趣苦。』
- 若見有情毀犯淨戒，深生憐愍，說如是法：『汝等有情當持淨戒，諸破戒者，受惡趣苦，破戒之人，無有威德，不能自益，況能益他。破戒因緣，墮三惡趣，受苦異熟，楚毒難忍，不能自救，況能救他。是故汝等當持淨戒，不應容納破戒之心經刹那頃，況經多時。勿自縱心，後生憂悔。』

- 若見有情更相忿恚，展轉結恨，互相損惱，深生憐愍，說如是法：『汝等有情當修安忍，勿相瞋忿，結恨相害，諸忿恨心，不順善法，增長惡法，招現衰損。汝等由此忿恨心故，身壞命終，當墮惡趣，受諸極苦，難有出期，是故汝等不應容納忿恨之心經剎那頃，何況令其長時相續。汝等今者，展轉相緣，應起慈心，作饒益事。』
- 若見有情懶惰懈怠，深生憐愍，說如是法：『汝等有情當勤精進，勿於善法懶惰懈怠，諸懈怠者，於諸善法及諸勝事皆不能成。汝等由斯墮諸惡趣，受無量苦，是故汝等不應容納懈怠之心經剎那頃，何況令其長時相續。』
- 若見有情失念散亂，心不寂靜，深生憐愍，說如是法：『汝等有情當修靜慮，勿生失念散亂之心，如是之心，不順善法，增長惡法，招現衰損。汝等由此身壞命終，墮諸惡趣，受無量苦，是故汝等不應容納失念散亂相應之心經剎那頃，何況令其長時相續。』
- 若見有情愚癡惡慧，深生憐愍，說如是法：『汝等有情當修勝慧，勿起惡慧，起惡慧者，於諸善趣尚不能往，況得解脫。汝等由此惡慧因緣，墮諸惡趣，受無量苦，是故汝等不應容納愚癡惡慧相應之心經剎那頃，何況令其長時相續。』
- 若見有情多貪欲者，深生憐愍，方便令其修不淨觀；若見有情多瞋恚者，深生憐愍，方便令其修慈悲觀；若見有情多愚癡者，深生憐愍，方便令其修緣起觀；若見有情多憍慢者，深生憐愍，方便令其修界分別觀；若見有情多尋伺者，深生憐愍，方便令其修持息念；若見有情失正道者，深生憐愍，方便教導令人正道，謂聲聞道、或獨覺道、或如來道，方便為彼說如是法：『汝等所執，皆自性空，非空法中可有所執，以無所執為空相故。』
- 如是，善現！諸菩薩摩訶薩行深般若波羅蜜多時，要住神通波羅蜜多，方能自在宣說正法，利益安樂諸有情類。
- 善現當知！若菩薩摩訶薩遠離神通波羅蜜多，不能自在宣說正法，與諸有情作饒益事。
- 善現當知！如鳥無翅，不能自在飛翔虛空，遠有所至，諸菩薩摩訶薩亦復如是，若無神通波羅蜜多，不能自在宣說正法，與諸有情作饒益事。

- 是故，善現！諸菩薩摩訶薩行深般若波羅蜜多時，應引發神通波羅蜜多，若引發神通波羅蜜多，即能自在宣說正法，隨意利樂諸有情類。
- 善現當知！諸菩薩摩訶薩以極清淨過人天眼，遍觀十方殑伽沙等諸佛世界，及觀生彼諸有情類，見已，引發神境智通，經須臾間，往到彼界，以他心智如實了知彼諸有情心、心所法，隨其所應，為說法要，謂說布施波羅蜜多乃至般若波羅蜜多，或說四念住乃至八聖道支，或說四靜慮、四無量、四無色定，或說八解脫乃至十遍處，或說空、無相、無願解脫門，或說一切陀羅尼門、三摩地門，或說內空乃至無性自性空，或說真如乃至不思議界，或說苦集滅道聖諦，或說因緣乃至增上緣，或說從緣所生諸法，或說無明乃至老死，或說種種蘊、處、界門，或說聲聞道，或說獨覺道，或說菩薩道，或說菩提，或說涅槃，令彼有情聞是法已，皆獲殊勝利益安樂。
- 是菩薩摩訶薩以極清淨過人天耳，能聞一切人非人聲。由此天耳，遍聞十方殑伽沙等諸佛世界一切如來應正等覺所說正法，聞已受持，思惟義趣，隨所聞法，能為有情如實宣說，或說布施波羅蜜多乃至般若波羅蜜多，廣說乃至或說菩提，或說涅槃，令彼有情聞是法已，皆獲殊勝利益安樂。
- 是菩薩摩訶薩以極清淨他心智通，如實了知諸有情類心、心所法，隨其所應，為說法要，謂說布施波羅蜜多乃至般若波羅蜜多，廣說乃至或說菩提，或說涅槃，令彼有情聞是法已，皆獲殊勝利益安樂。
- 是菩薩摩訶薩以淨宿住隨念智通，能憶自他諸本生事。由此宿住隨念智通，如實念知過去諸佛及弟子眾名等差別，若諸有情樂聞過去諸宿住事而得益者，便為宣說諸宿住事，因斯方便為說正法，謂說布施波羅蜜多乃至般若波羅蜜多，廣說乃至或說菩提，或說涅槃，令彼有情聞是法已，皆獲殊勝利益安樂。
- 是菩薩摩訶薩以極迅速神境智通，往到十方殑伽沙等諸佛世界，親近供養諸佛世尊，於諸佛所，種諸善根，還來本土，為有情說諸佛土事，因斯方便，為說正法，謂說布施波羅蜜多乃至般若波羅蜜多，廣說乃至或說菩提，或說涅槃，令諸有情聞是法已，皆獲殊勝利益安樂。

- 是菩薩摩訶薩以隨所得漏盡智通，如實了知諸有情類漏盡未盡，亦如實知漏盡方便，為未盡者宣說法要，謂說布施波羅蜜多乃至般若波羅蜜多，廣說乃至或說菩提，或說涅槃，令諸有情聞是法已，皆獲殊勝利益安樂。
- 如是，善現！諸菩薩摩訶薩行深般若波羅蜜多時，應引發神通波羅蜜多。是菩薩摩訶薩修習神通波羅蜜多得圓滿故，隨意所樂，受種種身，不為苦樂過失所染，如佛化身，雖能施作種種事業，而不為彼苦樂過失之所雜染。
- 如是，善現！諸菩薩摩訶薩行深般若波羅蜜多時，應遊戲神通波羅蜜多，若遊戲神通波羅蜜多，則能成熟有情，嚴淨佛土，疾證無上正等菩提。
- 善現當知！若菩薩摩訶薩不成熟有情，嚴淨佛土，終不能得所求無上正等菩提。所以者何？諸菩薩摩訶薩若未圓滿菩提資糧，必不能證所求無上正等菩提。」

◎『X19』第二安立智德增長中，安立令得菩提分者，安立令圓滿菩提分善故。

- (41) 『X19』具壽善現白言：「世尊！何等名為諸菩薩摩訶薩菩提資糧，諸菩薩摩訶薩圓滿如是菩提資糧，方能證得所求無上正等菩提？」
- (42) 佛告善現：「一切善法皆是菩薩菩提資糧。」
- (43) 具壽善現復白佛言：「何等名為一切善法？」
- (44) 佛告善現：「諸菩薩摩訶薩從初發心，修行布施波羅蜜多乃至般若波羅蜜多，於中都無分別執著，謂作是念：『此是布施乃至般若，由此、為此而修布施乃至般若。』是三分別執著都無，知一切法自性空故。由此所修布施等六波羅蜜多，能自饒益，亦能饒益一切有情，令出生死，證涅槃故，說為善法，亦名菩薩菩提資糧，亦名菩薩摩訶薩道。過去未來現在菩薩摩訶薩眾行此道故，已得當得今得無上正等菩提，亦令有情已、當、今度生死大海，得涅槃樂。
- 復次，善現！諸菩薩摩訶薩從初發心，修行四念住乃至八聖道支，安住內空乃至無性自性空，安住真如乃至不思議界，安住苦集滅道聖諦，修行四靜慮、四無量、四無色定，修行八解脫

乃至十遍處，修行空、無相、無願解脫門，修行菩薩摩訶薩地，修行一切陀羅尼門、三摩地門，修行如來十力乃至十八不共法，修行無忘失法、恒住捨性，修行一切智、道相智、一切相智，於中都無分別執著，謂作是念：『此是四念住乃至一切相智，由此、為此而修四念住乃至一切相智。』

是三分別執著都無，知一切法自性空故。

由此所修四念住乃至一切相智，能自饒益，亦能饒益一切有情，令出生死，得涅槃故，說為善法，亦名菩薩菩提資糧，亦名菩薩摩訶薩道。過去未來現在菩薩摩訶薩眾行此道故，已得當得今得無上正等菩提，亦令有情已、當、今度生死大海，得涅槃樂。

- 善現當知！復有無量諸菩薩眾所修功德皆名善法，亦名菩薩菩提資糧，亦名菩薩摩訶薩道。諸菩薩摩訶薩要修如是諸勝善法令極圓滿，方能證得一切智智，要已證得一切智智，乃能無倒轉正法輪，令諸有情究竟安樂。」

佛法品第八十二

◎『X20』安立業不失壞者，安立令知諸業無失壞不欺誑故。

- (01) 『X20』爾時，具壽善現白佛言：「世尊！若此諸善法是菩薩法者，復有何等是佛法耶？」
- (02) 佛告善現：「即菩薩法亦是佛法，謂諸菩薩於一切法覺一切相，由此當得一切相智，永斷一切習氣相續，若諸如來應正等覺於一切法以一剎那相應妙慧現等覺已，證得無上正等菩提。善現！是名菩薩與佛二法差別，如二聖者，雖俱是聖，而有行向、住果差別，所成就法，非無有異。
- 如是，善現！若無間道中行於一切法，未離闇障，未到彼岸，未得自在，未得果時，名為菩薩；若解脫道中行於一切法，已離闇障，已到彼岸，已得自在，已得果時，乃名為佛。是為菩薩與佛有異，由位有異，法非無別，而不可說法性有異。」
- (03) 具壽善現復白佛言：「若一切法自相皆空，自相空中如何得有種種差別，謂此是地獄，此是傍生，此是鬼界，此是人，此是天，此是種性地，此是第八地，此是預流，此是一來，此是不還，此是阿羅漢，此是獨覺，此是菩薩，此是如來？世尊！如

是所說補特伽羅既不可得，彼所造業亦不可得；如所造業既不可得，彼異熟果亦不可得。」

(04) 佛告善現：「如是！如是！如汝所說。一切法自相空，自相空中補特伽羅既無所有，業果異熟亦無所有，無所有中無差別相。然諸有情於一切法自相空理不如實知，造作諸業，或善或惡。由於善業造作增長，生人天中；由於惡業造作增長，墮三惡趣；於善業中，由於定業造作增長，生於色界或無色界。由此因緣，諸菩薩摩訶薩修行布施波羅蜜多乃至般若波羅蜜多，安住內空乃至無性自性空，安住真如乃至不思議界，安住苦集滅道聖諦，修行四念住乃至八聖道支，修行四靜慮、四無量、四無色定，修行八解脫乃至十遍處，修行空、無相、無願解脫門，修行極喜地乃至法雲地，修行一切陀羅尼門、三摩地門，修行五眼、六神通，修行如來十力乃至十八不共法，修行無忘失法、恒住捨性，修行一切智、道相智、一切相智。」

○善現！諸菩薩摩訶薩於如是等菩提分法，無間無缺，修令圓滿；既圓滿已，便能引發近助菩提金剛喻定，證得無上正等菩提，與諸有情作大饒益，常無失壞；無失壞故，令諸有情解脫生死諸苦惱事。」

(05) 具壽善現復白佛言：「佛得無上正等覺已，為得諸趣生死法不？」

(06) 佛言：「不也。」

(07) 具壽善現復白佛言：「佛得無上正等覺已，為得黑業、白業、黑白業、非黑白業不？」

(08) 佛言：「不也。」

(09) 具壽善現復白佛言：「若佛不得諸趣生死及業差別，如何施設此是地獄，此是傍生，此是鬼界，此是人，此是天，此是種性地，此是第八地，此是預流，此是一來，此是不還，此是阿羅漢，此是獨覺，此是菩薩，此是如來？」

(10) 佛告善現：「諸有情類自知諸法自相空不？」

(11) 善現對曰：「不也，世尊！」

(12) 佛告善現：「若諸有情自知諸法自相空者，諸菩薩摩訶薩便於無上正等菩提不應求證，方便善巧拔諸有情惡趣生死。以諸有情不知諸法自相空故，流轉諸趣，受無量苦，是故菩薩從諸佛所聞一切法自相空已，為欲饒益諸有情故，求證無上正等菩提，方便善巧拔諸有情惡趣生死。」

○善現當知！諸菩薩摩訶薩常作是念：『非一切法實有自相，如諸愚夫異生所執，然彼分別顛倒力故，非實有中起實有想，謂無我中起於我想，無有情中起有情想，廣說乃至無見者中起見者想，於無色中起於色想，無受想行識中起受想行識想，乃至一切有為法中虛妄分別顛倒力故，非實謂實，非有執有，由斯造作身語意業，不能解脫惡趣生死，我當拔濟，令得解脫。』是菩薩摩訶薩作此念已，行深般若波羅蜜多，以諸善法攝在其中，無倒修行諸菩薩行，漸次圓滿菩提資糧；菩提資糧得圓滿已，證得無上正等菩提。

◎『X21』安立令知四諦者，令現見四諦故。

◎『X21』得菩提已，為諸有情宣說、開示、分別、建立四聖諦義，謂此是苦聖諦，此是苦集聖諦，此是苦滅聖諦，此是趣苦滅道聖諦。復以一切菩提分法，依通達智攝在如是四聖諦中，復依一切菩提分法，以微妙智施設建立佛法僧寶。由此三寶出現世間，諸有情類解脫生死，若諸有情不能歸信佛法僧寶，造作諸業，輪迴諸趣，受苦無窮，故應歸依佛法僧寶。」

(13) 具壽善現復白佛言：「為由苦集滅道聖諦，諸有情類得般涅槃？為由苦集滅道聖智，諸有情類得般涅槃？」

(14) 佛告善現：「非由苦集滅道聖諦，諸有情類得般涅槃；非由苦集滅道聖智，諸有情類得般涅槃。

善現！我說四聖諦平等性即是涅槃，如是涅槃不由苦集滅道諦得，不由苦集滅道智得，但由般若波羅蜜多證平等性，名得涅槃。」

(15) 具壽善現復白佛言：「何等名為苦集滅道平等性耶？」

(16) 佛告善現：「若於是處，無苦集滅道諦，無苦集滅道智，名四聖諦平等之性，此平等性即四聖諦。所有真如、法界、法性、不虛妄性、不變異性、平等性、離生性、法定、法住、實際、虛空界、不思議界，若佛出世，若不出世，性相常住，無失壞，無變易，如是名為苦集滅道平等之性。諸菩薩摩訶薩行深般若波羅蜜多時，為欲隨覺此四聖諦平等性故，行深般若波羅蜜多，若能隨覺此四聖諦平等性時，名真隨覺一切聖諦，疾證無上正等菩提。」

- (17) 具壽善現復白佛言：「云何菩薩摩訶薩行深般若波羅蜜多時，為欲隨覺此四聖諦平等性故，行深般若波羅蜜多；若能隨覺此四聖諦平等性時，名真隨覺一切聖諦，不墮聲聞、獨覺等地，趣入菩薩正性離生？」
- (18) 佛告善現：「諸菩薩摩訶薩行深般若波羅蜜多時，無有少法不如實見，於一切法如實見時，於一切法都無所得；於一切法無所得時，則如實見一切法空，謂如實見四諦所攝及所不攝諸法皆空。如是見時，能入菩薩正性離生；由能入菩薩正性離生故，便住菩薩種性地中；既住菩薩種性地中，則能決定不從頂墮；若從頂墮，應墮聲聞或獨覺地。是菩薩摩訶薩安住菩薩種性地中，起四靜慮及四無量、四無色定。是菩薩摩訶薩安住如是奢摩他地，便能決擇一切法性及隨覺悟四聖諦理。爾時，菩薩雖遍知苦，而能不起緣執苦心；雖永斷集，而能不起緣執集心；雖能證滅，而能不起緣執滅心；雖能修道，而能不起緣執道心，但起隨順趣向臨入無上正等菩提之心，如實觀察諸法實相。」
- (19) 具壽善現復白佛言：「是菩薩摩訶薩云何觀察諸法實相？」
- (20) 佛告善現：「是菩薩摩訶薩觀一切法無不皆空，是為觀察諸法實相。」
- (21) 具壽善現復白佛言：「是菩薩摩訶薩云何觀察諸法皆空？」
- (22) 佛告善現：「是菩薩摩訶薩於一切法如實觀察皆自相空，如是觀察，諸法皆空。是菩薩摩訶薩以如是相毗鉢舍那，如實觀見諸法皆空，都不見有諸法自性可住彼性，證得無上正等菩提。所以者何？諸佛無上正等菩提及一切法，皆以無性而為自性，所謂色乃至識皆以無性而為自性，眼處乃至意處亦以無性而為自性，色處乃至法處亦以無性而為自性，眼界乃至眼界亦以無性而為自性，色界乃至法界亦以無性而為自性，眼識界乃至意識界亦以無性而為自性，眼觸乃至意觸亦以無性而為自性，眼觸為緣所生諸受乃至意觸為緣所生諸受亦以無性而為自性，地界乃至識界亦以無性而為自性，因緣乃至增上緣亦以無性而為自性，從緣所生諸法亦以無性而為自性，無明乃至老死亦以無性而為自性，布施波羅蜜多乃至般若波羅蜜多亦以無性而為自性，內空乃至無性自性空亦以無性而為自性，真如乃至不思議界亦以無性而為自性，苦集滅道聖諦亦以無性而為自性，四念住乃至八聖道支亦以無性而為自性，四靜慮、四無量、四無色

定亦以無性而為自性，八解脫乃至十遍處亦以無性而為自性，空、無相、無願解脫門亦以無性而為自性，淨觀地乃至如來地亦以無性而為自性，極喜地乃至法雲地亦以無性而為自性，一切陀羅尼門、三摩地門亦以無性而為自性，五眼、六神通亦以無性而為自性，如來十力乃至十八不共法亦以無性而為自性，三十二大士相、八十隨好亦以無性而為自性，無忘失法、恆住捨性亦以無性而為自性，一切智、道相智、一切相智亦以無性而為自性，預流果乃至獨覺菩提亦以無性而為自性，一切菩薩摩訶薩行亦以無性而為自性，諸佛無上正等菩提亦以無性而為自性。如是無性，非諸佛作，非獨覺作，非菩薩作，非聲聞作，亦非住果、行向者作，但為有情於一切法不知不見如實皆空故。諸菩薩摩訶薩眾行深般若波羅蜜多方便善巧，如自所覺，為諸有情如實宣說，令離執著，解脫一切生老病死，得般涅槃，究竟安樂。」

大般若波羅蜜多經卷第四百七十八

無事品第八十三

◎『X22』安立令遠離顛倒者，令永遠離常樂我淨等四顛倒故。

(01) 『X22』爾時，具壽善現白佛言：「世尊！若一切法皆以無性而為自性，如是無性，非諸佛作，非獨覺作，非菩薩作，非聲聞作，亦非住果、行向者作，云何施設諸法有異，謂此是地獄，此是傍生，此是鬼界，此是人，此是四大王眾天乃至他化自在天，此是梵眾天乃至色究竟天，此是空無邊處天乃至非想非非想處天，此是預流，此是一來，此是不還，此是阿羅漢，此是獨覺，此是菩薩，此是如來；由此業故，施設地獄；由此業故，施設傍生；由此業故，施設鬼界；由此業故，施設於人；由此業故，施設四大王眾天乃至他化自在天；由此業故，施設梵眾天乃至色究竟天；由此業故，施設空無邊處天乃至非想非非想處天；由此法故，施設預流、一來、不還；由此法故，施設阿羅漢；由此法故，施設獨覺；由此法故，施設菩薩；由此法故，施設如來？」

○世尊！無性之法，定無作用，云何可言由如是業生於地獄，由如是業生於傍生，由如是業生於鬼界，由如是業生於人中，由如是業生四大王眾天乃至他化自在天，由如是業生梵眾天乃至

色究竟天，由如是業生空無邊處天乃至非想非非想處天，由如是法得預流果，由如是法得一來果，由如是法得不還果，由如是法得阿羅漢果，由如是法得獨覺菩提，由如是法入菩薩位，行菩薩道，由如是法得一切相智，名佛世尊，令諸有情解脫生死？」

- (02) 佛告善現：「如是！如是！如汝所說。無性法中不可施設諸法有異，無業無果，亦無作用。但諸愚夫不了聖法毗奈耶故，不如實知諸法皆以無性為性，愚癡顛倒，發起種種身語意業，隨業差別，受種種身。依如是身品類差別，施設地獄、傍生、鬼界、若人、若天乃至非想非非想處。為欲濟拔如是愚夫愚癡顛倒，受生死苦，施設聖法及毗奈耶分位差別，依此分位，施設預流乃至獨覺、菩薩、如來。然一切法皆以無性而為自性，無性法中實無異法，無業無果，亦無作用，無性之法常無性故。
- 復次，善現！如汝所說『無性之法，定無作用，云何可言由如是法得預流果，廣說乃至由如是法得一切智，名佛世尊，令諸有情脫生死』者，於意云何？諸所修道是無性不？諸預流果、一來、不還、阿羅漢果、獨覺菩提及菩薩道、一切相智是無性不？」
- (03) 善現對曰：「如是！如是！諸所修道，廣說乃至一切相智，皆是無性。」
- (04) 佛告善現：「於意云何？無性法為能得無性法不？」
- (05) 善現對曰：「不也，世尊！」
- (06) 佛告善現：「無性及道，是一切法皆非相應非不相應，無色無見無對，一相所謂無相。愚夫異生愚癡顛倒，於無相法起有法想，執著五蘊，於無常中起於常想，於諸苦中起於樂想，於無我中起於我想，於不淨中起於淨想，於無性法執著有性。由此菩薩摩訶薩眾行深般若波羅蜜多方便善巧，濟拔如是諸有情類，令離顛倒虛妄分別，方便安置無相法中，令勤修學，解脫生死，證得畢竟常樂涅槃。」

◎『X23』安立令知無彼所依之根本者，安立於無實執生諸顛倒之根本故。

- (07) 『X23』具壽善現復白佛言：「愚夫異生所執著事頗有真實而非虛妄，彼執著已，造作諸業，由是因緣，沈淪諸趣，不能解脫生死苦不？」
- (08) 佛告善現：「愚夫異生所執著事乃至無有如細毛端可說真實而非虛妄，彼執著已，造作諸業，由是因緣，沈淪諸趣，不能解脫生死眾苦，唯有虛妄顛倒執著。吾今為汝廣說譬喻，重顯斯義，令其易了，諸有智者，由諸譬喻，於所說義能生正解。善現！於意云何？夢中見人受五欲樂，夢中頗有少分實事可令彼人受欲樂不？」
- (09) 善現對曰：「夢所見人尚非實有，況有實事可令彼人受五欲樂。」
- (10) 佛告善現：「於意云何？頗有諸法若善若非善、若有記若無記、若有漏若無漏、若世間若出世間、若有為若無為，非如夢中所見事不？」
- (11) 善現對曰：「定無有法若善若非善、若有記若無記、若有漏若無漏、若世間若出世間、若有為若無為，非如夢中所見事者。」
- (12) 佛告善現：「於意云何？夢中頗有真實諸趣於中往來生死事不？」
- (13) 善現對曰：「不也，世尊！」
- (14) 佛告善現：「於意云何？夢中頗有真實修道，依彼修道，有離雜染，得清淨不？」
- (15) 善現對曰：「不也，世尊！所以者何？夢所見法，都無實事，非能施設，非所施設，修道尚無，況依修道，有離雜染及得清淨。」
- (16) 佛告善現：「於意云何？明鏡等中所現眾像，為有實事可依造業，由所造業，或墮地獄，或墮傍生，或墮鬼界，或生人中，或生天上受苦樂不？」
- (17) 善現對曰：「明鏡等中所現眾像，都無實事，但誑愚童，如何可依造作諸業，由所造業，或墮惡趣，或生人天，受諸苦樂？」
- (18) 佛告善現：「於意云何？眾像頗有真實修道，依彼修道，有離雜染，得清淨不？」
- (19) 善現對曰：「明鏡等像，都無實事，非能施設，非所施設，修道尚無，況依修道，有離雜染及得清淨。」

- (20) 佛告善現：「於意云何？山谷等中所發諸響，為有實事可依造業，由所造業，或墮地獄，或墮傍生，或墮鬼界，或生人中，或生天上受苦樂不？」
- (21) 善現對曰：「山谷等中所發諸響，都無實事，但誑愚童，如何可依造作諸業，由所造業，或墮惡趣，或生人天，受諸苦樂？」
- (22) 佛告善現：「於意云何？諸響頗有真實修道，依彼修道，有離雜染，得清淨不？」
- (23) 善現對曰：「不也，世尊！所以者何？山谷等響，都無實事，非能施設，非所施設，修道尚無，況依修道，有離雜染及得清淨。」
- (24) 佛告善現：「於意云何？諸陽焰中，現似水等，為有實事可依造業，由所造業，或墮地獄，或墮傍生，或墮鬼界，或生人中，或生天上受苦樂不？」
- (25) 善現對曰：「諸陽焰中所現水等，都無實事，但誑愚童，如何可依造作諸業，由所造業，或墮惡趣，或生人天，受諸苦樂？」
- (26) 佛告善現：「於意云何？諸陽焰中水等，頗有真實修道，依彼修道，有離雜染，得清淨不？」
- (27) 善現對曰：「不也，世尊！所以者何？陽焰水等，都無實事，非能施設，非所施設，修道尚無，況依修道，有離雜染及得清淨。」
- (28) 佛告善現：「於意云何？諸光影中所現色相，為有實事可依造業，由所造業，或墮地獄，或墮傍生，或墮鬼界，或生人中，或生天上受苦樂不？」
- (29) 善現對曰：「諸光影中所現色相，都無實事，但誑愚童，如何可依造作諸業，由所造業，或墮惡趣，或生人天，受諸苦樂？」
- (30) 佛告善現：「於意云何？諸光影中色相頗有真實修道，依彼修道，有離雜染，得清淨不？」
- (31) 善現對曰：「不也，世尊！所以者何？光影色相都無實事，非能施設，非所施設，修道尚無，況依修道，有離雜染及得清淨。」
- (32) 佛告善現：「於意云何？幻師幻作象、馬、車、步四種勇軍，或復幻作牛、羊、男、女及餘種種甚希有事，此幻象等為有實事可依造業，由所造業，或墮地獄，或墮傍生，或墮鬼界，或生人中，或生天上受苦樂不？」

- (33) 善現對曰：「幻象、馬等，都無實事，但誑愚童，如何可依造作諸業，由所造業，或墮惡趣，或生人天受諸苦樂？」
- (34) 佛告善現：「於意云何？幻事頗有真實修道，依彼修道，有離雜染，得清淨不？」
- (35) 善現對曰：「不也，世尊！所以者何？幻象、馬等，都無實事，非能施設，非所施設，修道尚無，況依修道，有離雜染及得清淨。」
- (36) 佛告善現：「於意云何？能變化者所化作身，此所化身，為有實事可依造業，由所造業，或墮地獄，或墮傍生，或墮鬼界，或生人中，或生天上受苦樂不？」
- (37) 善現對曰：「諸變化身，都無實事，如何可依造作諸業，由所造業，或墮惡趣，或生人天，受諸苦樂？」
- (38) 佛告善現：「於意云何？化身頗有真實修道，依彼修道，有離雜染，得清淨不？」
- (39) 善現對曰：「不也，世尊！所以者何？諸變化身，都無實事，非能施設，非所施設，修道尚無，況依修道，有離雜染及得清淨。」
- (40) 佛告善現：「於意云何？尋香城中所現物類，為有實事可依造業，由所造業，或墮地獄，或墮傍生，或墮鬼界，或生人中，或生天上受苦樂不？」
- (41) 善現對曰：「尋香城中所現物類，都無實事，如何可依造作諸業，由所造業，或墮惡趣，或生人天，受諸苦樂？」
- (42) 佛告善現：「於意云何？尋香城中物類頗有真實修道，依彼修道，有離雜染，得清淨不？」
- (43) 善現對曰：「不也，世尊！所以者何？尋香城中所現物類，都無實事，非能施設，非所施設，修道尚無，況依修道，有離雜染及得清淨。」
- (44) 佛告善現：「於意云何？此中頗有實雜染者、清淨者不？」
- (45) 善現對曰：「此中都無實雜染者及清淨者。」
- (46) 佛告善現：「如雜染者及清淨者實無所有，由此因緣，雜染清淨亦非實有。所以者何？住我我所諸有情類，虛妄分別，謂有雜染及清淨者，由此因緣，謂有雜染及有清淨，非見實者，謂有雜染及清淨者；如實見者，知無雜染及清淨者，如是亦無雜染清淨實事可得，以一切法畢竟空故。」

實說品第八十四

◎『X24』安立圓滿清淨者，安立圓滿證得平等性之清淨故。

(01) 『X24』爾時，具壽善現白佛言：「世尊！諸見實者既無雜染及無清淨，不見實者亦無雜染及無清淨。所以者何？以一切法無所有故。

○世尊！諸實說者既無雜染及無清淨，不實說者亦無雜染及無清淨。所以者何？以一切法無自性故。

○世尊！無自性法既無雜染及無清淨，有自性法亦無雜染及無清淨，諸有自性、無自性法亦無雜染及無清淨。所以者何？以一切法皆用無性為自性故。

○世尊！若見實者及實說者無染無淨，不見實者、不實說者亦無染淨，云何世尊有時說有清淨法耶？」

(02) 佛告善現：「我說一切法平等性為清淨法。」

(03) 具壽善現復白佛言：「何謂一切法平等性？」

(04) 佛告善現：「諸法真如、法界、法性、不虛妄性、不變異性、平等性、離生性、法定、法住、實際、虛空界、不思議界，若佛出世，若不出世，性相常住，是名一切法平等性，此平等性名清淨法。此依世俗說為清淨，不依勝義。所以者何？勝義諦中既無分別，亦無戲論，一切名字言語道斷。」

◎『X25』安立資糧圓滿者，令圓滿無上菩提之二資糧故。

(05) 『X25』具壽善現復白佛言：「若一切法如夢、像、響、焰、影、幻、化及尋香城，雖現似有，而無實事，諸菩薩摩訶薩云何依此非實有法，發趣無上正等覺心，作是誓言：我當圓滿布施波羅蜜多乃至般若波羅蜜多，我當圓滿殊勝神通波羅蜜多，我當圓滿方便善巧、妙願、力、智波羅蜜多，我當圓滿四靜慮、四無量、四無色定，我當圓滿四念住乃至八聖道支，我當圓滿空、無相、無願解脫門，我當圓滿八解脫乃至十遍處，我當圓滿內空乃至無性自性空，我當圓滿真如乃至不思議界，我當圓滿苦集滅道聖諦，我當圓滿極喜地乃至法雲地，我當圓滿一切陀羅尼門、三摩地門，我當圓滿五眼、六神通，我當圓滿如來十力乃至十八不共法，我當圓滿無忘失法、恒住捨性，我當圓滿一切智、道相智、一切相智，我當圓滿三十二大士相、八

十隨好，我當發起無量光明，普照十方無邊世界，我當發起一妙音聲，遍滿十方無邊世界，隨諸有情心、心所法勝解差別，為說種種微妙法門，令獲利樂？」

(06) 佛告善現：「於意云何？汝所說法豈不一切如夢、像、響、焰、影、幻、化、尋香城耶？」

(07) 善現對曰：「如是！如是！世尊！若一切法如夢乃至如尋香城，皆無實事，云何菩薩摩訶薩行深般若波羅蜜多時，發大誓言：我當圓滿一切功德，利益安樂無量有情？」

○世尊！非夢所見，廣說乃至尋香城中所現物類，能行布施波羅蜜多乃至般若波羅蜜多，況能圓滿。餘一切法亦應如是，俱非實故。

○世尊！非夢所見，廣說乃至尋香城中所現物類，乃至能行三十二大士相、八十隨好，況能圓滿。餘一切法亦應如是，俱非實故。

○世尊！非夢所見，廣說乃至尋香城中所現物類，能成一切所願事業。餘一切法亦應如是，俱非實故。」

(08) 佛告善現：「如是！如是！如汝所說。非實有法尚不能行布施波羅蜜多乃至般若波羅蜜多，況能圓滿。如是乃至非實有法尚不能行三十二大士相、八十隨好，況能圓滿。非實有法不能成辦所願事業，非實有法不能證得所求無上正等菩提。

○復次，善現！布施、淨戒、安忍、精進、靜慮、般若波羅蜜多及餘無量無邊善法非實有故，不能證得所求無上正等菩提。善現當知！如是諸法，一切皆是思惟造作，諸有思惟所造作法，皆不能得一切智智。

○復次，善現！如是諸法，於菩提道雖能引發，而於其果無資助用，由此諸法無生無起，無實相故。諸菩薩摩訶薩行深般若波羅蜜多時，從初發心雖起種種身語意善，謂若修行布施、淨戒、安忍、精進、靜慮、般若波羅蜜多，如是乃至若修行一切智、道相智、一切相智，而知一切如夢、像、響、焰、影、幻、化及尋香城，皆非實有。

○復次，善現！如是諸法，雖非實有，若不圓滿，決定不能成熟有情，嚴淨佛土，證得無上正等菩提，謂菩薩摩訶薩若不圓滿布施、淨戒、安忍、精進、靜慮、般若波羅蜜多，乃至一切智、

道相智、一切相智，決定不能成熟有情，嚴淨佛土，證得無上正等菩提。

○復次，善現！是諸菩薩摩訶薩行深般若波羅蜜多時，隨所修住一切善法，皆如實知如夢乃至如尋香城，謂若修行布施、淨戒、安忍、精進、靜慮、般若波羅蜜多，能如實知如夢乃至如尋香城；如是乃至若修行一切智、道相智、一切相智，能如實知如夢乃至如尋香城；若成熟有情，嚴淨佛土，求趣無上正等菩提，能如實知如夢乃至如尋香城，亦如實知諸有情類心行差別如夢乃至如尋香城。

○復次，善現！是諸菩薩摩訶薩行深般若波羅蜜多時，於一切法不取為有，不取為無，若由如是取故，證得一切智智，亦知彼法如夢乃至如尋香城，不取為有，不取為無。所以者何？布施、淨戒、安忍、精進、靜慮、般若波羅蜜多乃至一切智、道相智、一切相智皆不可取故，善非善法亦不可取故，有記無記法亦不可取故，有漏無漏法亦不可取故，世間出世間法亦不可取故，有為無為法亦不可取故。是菩薩摩訶薩知一切法不可取已，求趣無上正等菩提。所以者何？以一切法皆不可取，都無實事，如夢乃至如尋香城。不可取法不能證得不可取法，然諸有情於如是法不知不見，是菩薩摩訶薩為饒益彼諸有情故，求趣無上正等菩提。

○復次，善現！是菩薩摩訶薩從初發心，為欲利樂諸有情故，修行布施波羅蜜多乃至般若波羅蜜多，不為己身，非為餘事；為欲利樂諸有情故，求趣無上正等菩提，不為己身，非為餘事。

○復次，善現！是菩薩摩訶薩行深般若波羅蜜多時，見諸愚夫於非我中而住我想，於非有情住有情想，如是乃至於非知者住知者想，於非見者住見者想。是菩薩摩訶薩見是事已，深生憐愍，方便教化，令離顛倒妄想執著，安置無相甘露界中，住是界中，不復現起我想乃至知、見者想，是時，一切掉動、散亂、戲論、分別不復現行，心多安住寂靜淡泊無戲論界。

○善現！是菩薩摩訶薩由此方便，行深般若波羅蜜多，自於諸法無所執著，亦能教他於一切法無所執著，此依世俗，不依勝義，以勝義中無所執著，自他差別不可得故。」

(09) 爾時，具壽善現白佛言：「世尊！佛得無上正等覺時，所證佛法，為依世俗，說名為得，為依勝義，說名得耶？」

- (10) 佛告善現：「佛得無上正等覺時所證佛法，依世俗故，說名為得，不依勝義。若依勝義，能得、所得俱不可得。所以者何？若謂此人得如是法，便有所得；有所得者，便執有二；執有二者，不能得果，亦無現觀。」
- (11) 具壽善現復白佛言：「若執有二，不能得果，亦無現觀；執無二者，為能得果，有現觀耶？」
- (12) 佛告善現：「執有二者，不能得果，亦無現觀；執無二者，亦復如是。有所執故，如執有二。若不執二，不執不二，則名得果，亦名現觀。所以者何？若執由此，便能得果，亦有現觀，及執由彼，不能得果，亦無現觀，俱是戲論。非一切法平等性中有諸戲論，若離戲論，乃可名為法平等性。」
- (13) 具壽善現復白佛言：「若一切法皆以無性而為自性，此中何謂法平等性？」
- (14) 佛告善現：「若於是處都無有性，亦無無性，亦不可說為平等性，如是乃名法平等性。善現當知！法平等性，既不可說，亦不可知，除平等性，無法可得，離一切法，無平等性。善現當知！法平等性，異生、聖者俱不能行，非彼境故。」
- (15) 具壽善現復白佛言：「法平等性豈亦非佛所行境耶？」
- (16) 佛告善現：「法平等性，一切聖者皆不能行，亦不能證，謂諸預流、若諸一來、若諸不還、若阿羅漢、若諸獨覺、若諸菩薩、若諸如來，皆不能以法平等性為所行境，此中一切戲論分別皆不行故。」
- (17) 具壽善現復白佛言：「佛於諸法皆得自在，如何可言法平等性亦非諸佛所行境耶？」
- (18) 佛告善現：「佛於諸法雖得自在，若平等性與佛有別，可言是佛所行境界，然平等性與佛無別，如何可說佛行彼境？善現當知！若諸異生法平等性，若諸預流、一來、不還、阿羅漢、獨覺、菩薩、如來法平等性，如是一切法平等性，皆同一相，所謂無相，是一平等，無二無別，故不可說此是異生法平等性，廣說乃至此是如來法平等性。於此一法平等性中，諸平等性既不可得，於中異生及預流等差別之相亦不可得。」
- (19) 具壽善現復白佛言：「若一切法平等性中，諸差別相皆不可得，則諸異生及預流等法及有情應無差別。」

- (20) 佛告善現：「如是！如是！如汝所說。於一切法平等性中，若諸異生、若諸聖者，乃至如來法及有情皆無差別。」
- (21) 具壽善現復白佛言：「若一切法平等性中，異生、聖者法及有情皆無差別，云何三寶出現世間，所謂佛寶、法寶、僧寶？」
- (22) 佛告善現：「於意云何？佛法僧寶法平等性各各別耶？」
- (23) 善現對曰：「如我解佛所說義者，佛法僧寶法平等性皆無差別。所以者何？佛法僧寶法平等性，如是一切皆非相應非不相應，無色無見無對，一相所謂無相。然佛世尊於無相法方便善巧，建立種種法及有情名相差別，所謂此是異生及法，乃至此是如來及法。」
- (24) 佛告善現：「如是！如是！如汝所說。諸佛於法方便善巧，能於無相建立種種法及有情名相差別。復次，善現！於意云何？若諸如來應正等覺不證無上正等菩提，設證無上正等菩提，不為有情建立諸法名相差別，諸有情類為能自知此是地獄，此是傍生，此是鬼界，此是人，此是天，謂四大王眾天乃至非想非非想處天，此是色乃至識，此是眼處乃至意處，此是色處乃至法處，此是眼界乃至意識界，此是色界乃至法界，此是眼識界乃至意識界，此是眼觸乃至意觸，此是眼觸為緣所生諸受乃至意觸為緣所生諸受，此是地界乃至識界，此是因緣乃至增上緣，此是從緣所生諸法，此是無明乃至老死，此是善非善法，此是有記無記法，此是有漏無漏法，此是世間出世間法，此是有為無為法，此是布施波羅蜜多乃至般若波羅蜜多，此是四念住乃至八聖道支，此是內空乃至無性自性空，此是真如乃至不思議界，此是苦集滅道聖諦，此是四靜慮、四無量、四無色定，此是空、無相、無願解脫門，此是八解脫乃至十遍處，此是淨觀地乃至如來地，此是極喜地乃至法雲地，此是一切陀羅尼門、三摩地門，此是五眼、六神通，此是如來十力乃至十八不共法，此是三十二大士相、八十隨好，此是無忘失法、恆住捨性，此是一切智、道相智、一切相智，此是一切相妙願智，此是一切智智，此是三寶，此是三乘，諸有情類於如是等差別名相能自知不？」
- (25) 善現對曰：「不也，世尊！若佛不為有情建立諸如是等差別名相，諸有情類不能自知諸如是等差別名相。」

- (26) 佛告善現：「是故如來於無相法方便善巧，雖為有情建立種種差別名相，而於諸法平等性中能無所動；雖於有情作大恩德，而於其中能不取相。」
- (27) 爾時，具壽善現白佛言：「世尊！為如如來於一切法平等性中都無所動，如是一切異生、預流、一來、不還及阿羅漢、獨覺、菩薩，亦於諸法平等性中無所動不？」
- (28) 佛告善現：「如是！如是！以一切法及諸有情皆不出過平等性故。如平等性，當知真如，廣說乃至不思議界亦復如是，諸法異生及諸聖者於真如等無差別故。」
- (29) 具壽善現復白佛言：「若諸異生及諸聖者并一切法平等之性無差別者，今一切法及諸有情相各異故，性亦應異，是則法性亦應各異，謂色乃至識相各異故，性亦應異；眼處乃至意處相各異故，性亦應異；色處乃至法處相各異故，性亦應異；眼界乃至意識界相各異故，性亦應異；色界乃至法界相各異故，性亦應異；眼識界乃至意識界相各異故，性亦應異；眼觸乃至意觸相各異故，性亦應異；眼觸為緣所生諸受乃至意觸為緣所生諸受相各異故，性亦應異；地界乃至識界相各異故，性亦應異；因緣乃至增上緣相各異故，性亦應異；從緣所生諸法相各異故，性亦應異；無明乃至老死相各異故，性亦應異；貪瞋癡相各異故，性亦應異；異生見趣相各異故，性亦應異；四靜慮、四無量、四無色定相各異故，性亦應異；四念住乃至八聖道支相各異故，性亦應異；空、無相、無願解脫門相各異故，性亦應異；內空乃至無性自性空相各異故，性亦應異；真如乃至不思議界相各異故，性亦應異；苦集滅道聖諦相各異故，性亦應異；布施波羅蜜多乃至般若波羅蜜多相各異故，性亦應異；八解脫乃至十遍處相各異故，性亦應異；淨觀地乃至如來地相各異故，性亦應異；極喜地乃至法雲地相各異故，性亦應異；一切陀羅尼門、三摩地門相各異故，性亦應異；五眼、六神通相各異故，性亦應異；如來十力乃至十八不共法相各異故，性亦應異；三十二大士相、八十隨好相各異故，性亦應異；無忘失法、恆住捨性相各異故，性亦應異；一切智、道相智、一切相智相各異故，性亦應異；愚夫異生乃至如來相各異故，性亦應異；善非善法相各異故，性亦應異；有記無記法相各異故，性亦應異；

有漏無漏法相各異故，性亦應異；世間出世間法相各異故，性亦應異；有為無為法相各異故，性亦應異。

○世尊！如是法等，相若各異，是則法性亦應各異，云何於諸異相法等，可得安立法性一相？云何菩薩摩訶薩行深般若波羅蜜多時，不分別法及諸有情有種種性？

若菩薩摩訶薩不分別法及諸有情有種種性，則應不能行深般若波羅蜜多；若不能行甚深般若波羅蜜多，則應不能從一菩薩地至一菩薩地；若定不能從一菩薩地至一菩薩地，則應不能趣入菩薩正性離生；若定不能趣入菩薩正性離生，則應不能超諸聲聞及獨覺地；若定不能超諸聲聞及獨覺地，則應不能圓滿神通波羅蜜多；若定不能圓滿神通波羅蜜多，則應不能於諸神通遊戲自在；若定不能於諸神通遊戲自在，則應不能圓滿布施波羅蜜多乃至般若波羅蜜多；若定不能圓滿布施波羅蜜多乃至般若波羅蜜多，則應不能從一佛國趣一佛國，親近供養諸佛世尊；若定不能從一佛國趣一佛國親近供養諸佛世尊，則應不能於諸佛所種諸善根；若定不能於諸佛所種諸善根，則應不能嚴淨佛土，成熟有情；若定不能嚴淨佛土，成熟有情，則應不能證得無上正等菩提，轉正法輪，度有情眾，令其永離惡趣生死。」

(30) 佛告善現：「如汝所言『若諸異生及諸聖者并一切法平等之性無差別者，今一切法及諸有情相各異故，性亦應異，是則法性亦應各異，云何於諸異相法等，可得安立法性一相？云何菩薩摩訶薩行深般若波羅蜜多時，不分別法及諸有情有種種性乃至廣說』，善現！於意云何？諸色法性是空性不？諸受想行識法性是空性不？如是乃至一切有為無為法性是空性不？」

(31) 善現對曰：「如是！如是！一切法性皆是空性。」

(32) 佛告善現：「於意云何？於空性中，法等異相為可得不可得？謂色異相，廣說乃至一切有為無為異相為可得不可得？」

(33) 善現對曰：「不也，世尊！於空性中，一切異相皆不可得。」

(34) 佛告善現：「由此當知，法平等性非即一切愚夫異生，非離一切愚夫異生；如是乃至非即如來應正等覺，非離如來應正等覺。法平等性非即色，非離色；非即受想行識，非離受想行識。如是乃至非即有為及無為法，非離有為及無為法。」

◎『X26』安立令知生死涅槃平等者，令現知生死有為與涅槃無為，於勝義中全無異故。

(35)『X26』具壽善現復白佛言：「法平等性為是有為？為是無為？」

(36)佛告善現：「法平等性非是有為，非是無為，然離有為法，無為法不可得，離無為法，有為法亦不可得。

○善現當知！若有為界、若無為界，如是二界，非合非散，無色無見無對，一相所謂無相，一切如來應正等覺依世俗說，不依勝義。所以者何？非勝義中，身行、語行、意行可得；非離身行、語行、意行，勝義可得。

○善現當知！即有為法及無為法平等法性說名勝義，非離一切有為無為別有勝義。

是故菩薩摩訶薩行深般若波羅蜜多時，不動勝義而行菩薩摩訶薩行，成熟有情，嚴淨佛土，證得無上正等菩提，轉妙法輪，度有情眾，令其永離生老病死，證得究竟常樂涅槃。」

空性品第八十五

(37)爾時，具壽善現白佛言：「世尊！若諸法等平等之性皆本性空，此本性空於一切法非能所作，云何菩薩摩訶薩行深般若波羅蜜多時，不動勝義以四攝事饒益有情？」

(38)佛告善現：「如是！如是！一切法等平等之性皆本性空，此本性空於一切法非能所作，然諸菩薩能為有情以布施等作饒益事。若諸有情自知諸法皆本性空，則諸如來及諸菩薩不現神通，作希有事，謂於諸法本性空中雖無所動，而令有情遠離種種妄想顛倒，謂令有情遠離我想、有情想乃至知者、見者想，亦令遠離色乃至識想，眼處乃至意處想，色處乃至法處想，眼界乃至眼界想，色界乃至法界想，眼識界乃至意識界想，地界乃至識界想，無明乃至老死想，亦令遠離有為界想，住無為界，解脫一切生老病死。無為界者，即諸法空，依世俗說，名無為界。」

◎『X27』又安立於道果者，安立於究竟所得無住大涅槃故。

(39)『X27』具壽善現復白佛言：「由何空故，說諸法空？」

(40)佛告善現：「由想空故，說諸法空。復次，善現！於意云何？若變化身復作化事，此有實事而不空耶？」

- (41) 善現對曰：「諸所變化都無實事，一切皆空。」
- (42) 佛告善現：「變化與空，如是二法，非合非散，此二俱以空空故空，不應分別是空是化。所以者何？非空性中有空、有化二事可得，以一切法畢竟空故。復次，善現！無色非化，無受想行識非化，諸是化者，無不皆空，餘法有情應知亦眾。」
- (43) 具壽善現復白佛言：「蘊、界、處等世間諸法及諸有情可皆是化，四念住等出世間法及諸有情豈亦是化？」
- (44) 佛告善現：「一切世間出世法等無非是化，然於其中，有聲聞化，有獨覺化，有菩薩化，有如來化，有煩惱化，有諸業化，由此因緣，我說一切皆如變化，等無差別。」
- (45) 具壽善現復白佛言：「一切斷果，所謂預流、一來、不還、阿羅漢果、獨覺、如來，永斷煩惱習氣相續，豈亦是化？」
- (46) 佛告善現：「如是諸法，若與生滅二相合者，亦皆是化。」
- (47) 具壽善現復白佛言：「何法非化？」
- (48) 佛告善現：「若法不與生滅相合，是法非化。」
- (49) 具壽善現復白佛言：「何法不與生滅相合？」
- (50) 佛告善現：「不虛誑法即是涅槃，此法不與生滅相合，是故非化。」
- (51) 具壽善現復白佛言：「如世尊說平等法性一切皆空，無能動者，無二可得，無有少法非自性空，如何涅槃可說非化？」
- (52) 佛告善現：「如是！如是！如汝所說。無有少法非自性空，此自性空非聲聞作，非獨覺作，非菩薩作，非如來作，亦非餘作，有佛無佛，其性常空，此即涅槃，是故我說涅槃非化，非實有法名為涅槃，可說無生、無滅、非化。復次，善現！我為新學諸菩薩說涅槃非化，非別實有不空涅槃，是故不應執此為難。」
- (53) 爾時，善現便白佛言：「云何方便教誡教授新學菩薩，令知諸法自性常空？」
- (54) 佛告善現：「豈一切法先有後無而不常空？然一切法先既非有，後亦非無，自性常空，不應驚怖，應作如是方便善巧教誡教授新學菩薩，令知諸法自性常空。」
- (55) 時薄伽梵說是經已，無量菩薩摩訶薩眾，慈氏菩薩而為上首，具壽善現及舍利子、大採菽氏、大迦葉波、阿難陀等諸大聲聞，及諸天、龍、阿素洛等一切大眾，聞佛所說，皆大歡喜，信受奉行。

